







Emniyet

Polis ve Jandarma
Tatimnamesi

54

امنیت عمومیہ مدیریت علیہ سندن بالجملہ پولیس
مرکز لرینہ اجرا بیوریان تعمیم در .

قوانین اداره یه وعدلیه ایله پولیس و وظائف و معاملاتنه
تعلق ایدن معلومات سائرہ یی جامع اولہ رق مقدا تحریری
موقع مسابقہ یه وضع اولنان اثرک مسابقہ تحریر یه سنہ اشتراک
ایدنلر طرفندن تودیع اولنان مسودات تشکل ایدن ہیئت
میزہ جہ مکملیت مطلوبہ یی حائز کورلماش اولدینی جهتله اثر
مذکورک مقصدہ موافق بر طرز مکملده یکیدن تألیف
ایتدیرلمسنک بر مدت دها تأخر ایتسی لازم کلدیکندن و محلی
پولیس لرینک معلومات اولیه اکتسابنه مدار اولق اوزره
بعض طرفلردن بویله بر کتابک وجودینه سرعتله لزوم کوستر-
لمکده اولدیغندن مباحوث غنه تألیف متصور وجوده کلنجه یه
قدر داخل مسابقه اولیان در سعات پولیس مکتبی مدیری
احمد بک طرفندن تحریر و طبع ایدیلان پولیسلره رهبر نام
کتاب ایله مکافات موعوده یی قزانہ میان محررلردن ادیب
و عثمان عفان و [توفیق طارق] افندیلرک طبع و نشر ایده-
جکلری سالف الذکر مسودات هر حالده مفید و مطالعه یه
شایان اولدیغنه مبنی شمذیلک کتب مذکورہ نک تدارک و مطا-
لعه سی ده فائده دن خالی قالیه جغنگ پولیس مأموریننه تفهیمی
توصیه اولنور .

امنیت عمومیہ مدیری

غالب

۱ تموز ۳۲۶

امنیت عمومیہ مدیری غالب بك افندی
حضرتلری طرفندن اعطا بیورلشدرد:

ضابطه عثمانیه نك ترقیات عصریه ایله متناسب معلومات
قانونیه واجتماعیه ایله پرورشیا ب فیض اوله رق احتیاجات
انضباطیه مملکتی بحق تقدیر ایتسی مقصدیله تألیفی موقع مسابقه
وضع اولنسی اوزرینه آقسرائ پولیس مرکز مأموری توفیق
طارق افندی طرفندن تحریر اولنان اشبو اثر هیئت ممیزه جه
بالتدقیق ذوات سائره طرفندن کوندریلن دیگر اثرلرده اولدینی
کبی بونده ده ویریلن پروغرامه نظراً محتاج تصحیح و اکمال
بعض نقصانلر کورلمسندن طولایی مکافات موعوده بی قزانه -
مامش ایسه ده وظائف انضباطیه ایله مکلف بالجمله مأمورینک
توسیع معلومات ایتلمرینه خادم بر رهبر مفید اوله جق قیمتی
حائزدر. بناءً علیه مأمورین انضباطیه نك بوندن مستفید و محرر
مومی الیهک ده اعلیٰ موفقیاته دسترس اوله جغنی مأمول ایلرم.

امنیت عمومیہ مدیری

۱۲ تموز ۳۲۶

غالب


ضابطہ مَحَلِّاتِ قَانُونِیَّہ

پولیس و ژاندارمه مأمورلرینہ عائد وظائف عدلیہ و سائر
معلومات قانونیہ بی واوراق تحقیقہ نمونہ لریخی حاویدر

محرری :

آقسرائ پولیس مرکزی مأموری

توفیق طارق



ناشری :

اقبال کتبخانہ سی صاحبی

مسبین

استانبول

شمس مطبعہ سی — باب عالی قارشوسندہ نومرو ۷۲

۱۳۲۶

برنجی کتاب

قسم قانونی

مندرجات :

برنجی باب — مقدمہ علم حقوق

قوانین و نظامات و عرف و عاداتك تعریفی . حکومت .
حاکمیت ملیہ . حق رأی و انتخاب . قانون اساسینك تعریف
و تفصیلاتی قوای مؤسسہ و قانون اساسی ایلہ تأمین اولنان حقوق .
قوہ عدلیہ نك صورت تطبیق و اجراسیلہ محاکمك درجات و وظائفی .

ایکنجی باب — اصول محاکمات جزائیہ

اصول محاکمہ دائر بر فکر ابتدائی . حقوق عمومیہ
و شخصیه دعوالرینك تعریفات و تقسیاتی . بودعوالرك کینملر
طرفندن نہ کبی شرائط دائرہ سنده اقامہ ایدیله بیله جکی . بو
دعوالرك نہ صورتله وجود بولدینی . بودعوالر حقندہ مرور
زمان مدتلرینك تعریفات . متن قانونك ضابطہ یه تعلق ایدن
اقسامنك مادہ بمادہ مثاللر ایلہ ایضاحی .

اوچنجی باب — قانون جزا

بر فکر قانونی حاصل ایدہ جك صورتده نظریاتدن معلومات
جمملہ . جرمك صورت تشکلی . مجرمك اوصافی . جرمك

تقسیماتی و بوقسیماتہ نظراً تعریف و درجاتی . وقوعہ کلن بر
فعلک جرم تشکیل ایدوب ایتیمہ جکنک مثاللر ایله ایضاحی .

دردنجی باب — حقوق اداره

حقوق اساسیہ حقندہ معلومات . تشکیلات اداره . اداره
مرکزیہ . اداره ولایات ضابطہ بحئی . حقوق دولدن سفرا
وقونسلسلر . خارج از مملکت بحئی . قره صولری . اجنبی
سفائن حریہ و تجاریہ سی درونندہ ایقاع ایدیلن جرائم .
اجنبی سفائن حریہ و تجاریہ سی مرتباتنک قرہدہ ایقاع ایلدکری
افعال جرمیہ . ممالک عثمانیہ دہ متوطن اجانبک نائل اولدقلى
امتیازات و مساعدات . اجنبیلرک یکدیگری علیہندہ ایقاع ایلدکری
جرائم دہ پولیسک وظیفہ سی اجنبیلرک تبعہ عثمانیہ دن بریلہ مشترکاً
ایقاع ایلدکری جرائم دہ پولیسہ تعلق ایدن وظائف ایله مثاللری .

بشنجی باب — تطبیقات و کتابت

شکایتنامہ لر . اخبار نامہ لر . ضبط ورقہ لری . راپورلر .
تحقیقات ابتدائیہ . بوکبی اوراقک تنظیم و ترتیبی حقندہ قواعد
اساسیہ و بوکادائر عملی مثاللر . تعبیرات و اصطلاحات قانونیہ نک
لغتجہ سی . مداوات ابتدائیہ .

برنجی باب — مقدمه علم حقوق

علم حقوق : حق اولان شیء حق اولمایان شیلردن یعنی طوغری یی، اکریدن وایی یی قنادن تفریق ایدن آیران قاعده لری ییلدیرن علمدر . الحاصل : حقوق ؛ خیری ، شری ییلدیرن برقدرد .

جناب حقك انسانلره احسان ایتدیكى عقل و وجدان ایله انسانلر ای یی و کوتوی بر بردن آیررلر . ایشه بو حق اولانی حق اولمایاندن و حقی یی حقسزدن تفریق یعنی آیرد ایتمکی ییلدیرن قاعده لره ده « علم حقوق » دینور علم حقوق ، ای و طوغری اولان شیلرک یا پله سنی امر ایدر . فنا واکری اولان شیلرک ده یا پله ماسنی امر ایلر یعنی یا پله سنی نهی و منع ایدر . علم حقوقك یا پله سنی امر ایتدیكى شیلره « حق » نهی و منع ایلدیكى یعنی یا پله ماسنی امر ایتدیكى شیلره ده « وظیفه » دینور . مثلاً : جناب حق انسانلری یشامق ایچون یاراتمشدر . علم حقوقده انسانلرک یشامسنی امر ایدر . بناءً علیه یشامق انسانك « حقیدر » . علم حقوق انسانلرک کرک کندیسنی و کرک بر برلرینی اولدیرمسنی نهی و منع ایدر . بناءً علیه بر انسانك کندیسنی و یاخود بشقه سنی اولدیرماسنی « وظیفه » سیدر . الحاصل علم حقوقه ، هر حق مقابلنده

بروظیفه و هر وظیفه به مقابل برحق وارد. مثلاً مأمور اولان
برذات وظیفه سنی یا پارسه برحق قازانیر ، اوده معاش در .
معاش آلمق ، وظیفه سنی بحق یاپان مأمورک حق در . علم
حقوقک تعریفده ، ای بی فسادن آیران قاعده لری بیلدیرن
برعلمدر دیمشدک . یوقاعده لر ایکی نوعدر . بریسی « قواعد
طبیعیه » درکه بو قواعد ، انسانلرک خلقتلرنده ، طبیعتلرنده ،
فطرتلرنده یعنی بالذات نفسلرنده موجود اولان وعقللری ایرن
برطاقم قاعده لردر . مثلاً : برانسان ، اسیر ایتمه نک دوکمه نک ،
اولدیرمه نک ، چالمه نک ، فنا اولدیغنی بالنفس یعنی کندی کندیسنه
آکلار . بریرده اوقومغه بشقه سنک سویله مسنه حاجت یوقدر .
چونکه : برانسان کندیسنک اسیر ایدلمسنی ، دوکولدیکنی ،
اولدیرلدیکنی ، مالنک چالندیغنی بالطبع ایسته مز . ایکنجی نوعی
« قواعد موضوعه » درکه اساساً قواعد طبیعیه دن النان قاعده لری
ماده ماده ، بند بند ، قانون ونظام شکلنده کتاب حاله قونه رق
ضبط ووضع اولنان قاعده لردر . چونکه هرکسک عقلی وطبیعی
بر اولمادیغندن قواعد طبیعیه نک جمله سنده بتون افراد انسانک
برفکرده برحکمده اتحاد ایتملری برلشمه لری قابل اوله مدیغندن
بالجمله قواعد طبیعیه بی طویلایه رق کتاب وقانون شکلنده
واجراسی یعنی یاپلمسی ویاخودیپلماسی مجبوری برحاله بولندیرمغه
لزوم کورلمشدر . قانون اساسی ، جزا قانونی مجله ، پولیس

نظامنامه سی و سائرہ کی . ایستہ شو تفصیلاتہ کورہ علم حقوق
« حقوق طبیعیہ و موضوعہ » دن مرکب بر علمدر .

علم حقوق ، موضوعی اعتباریلہ ایکی بیوک قسمہ آریلورہ .
برسی « حقوق عمومیه » دیکری « حقوق خصوصیه » در .
حقوق عمومیه باشلیجہ ایکی قسمدر . بو قسملرده بشقہ بشقہ
قسملرہ آریلور .

حقوق عمومیه نك برنجی قسمی ، « حقوق عمومیه داخلیه »
درکہ حقوق اساسیه ، حقوق ادارهٔ ملکیہ ، حقوق جزائیہ ،
قسملرینہ تقسیم اولنور .

حقوق اساسیه ، حکومتك صورت تأسسنی وشكل
ادارہ سنی ، وحکومتك افراد اہالی یعنی تبعہ سیلہ اولان حقوق
ومناسباتنی تعیین ایدن قواعدی جامعدر . « قانون اساسی » کی .
حقوق ادارهٔ ملکیہ ، افراد اہالینك منافع خصوصیه سیلہ
ہیئت دولتك منافع عمومیه سی آراسندہ کی مناسباتنی تعیین ایدن
قواعددر « ولایات قانونی ، ادارهٔ بلدیہ قانونی ، وسائر ادارہ
ومالیہ عائد قانونلر ونظامنامہ لر کی » .

حقوق جزائیہ ، جمعیت بشریہ نك انتظام واسایشی ایچون
وضع ایدیلان قواعد ونظاملرہ قارشو مخالفت ایدنلر حقندہ
اجراسی لازمکن مجازاتی وبو مجازاتك تطبیق واجراسندہ
یابلسی ایجاب ایدن معاملاتی حاوی قواعدی جامعدر . « قانون
جزا ، واصول محاکمات جزائیہ قانونلری » کی .

حقوق عمومیه نك ايكنجی قسى «حقوق عمومیه خارجیه»
در كه حقوق عمومیه دول، حقوق خصوصیه دول نامیه ايكي به
آيريلور .

حقوق عمومیه دول ، دولترك بر يرلرله اولان حقوق
ووظائفی و مناسبات سائره سنی بيلديره ن قاعده لر در .
حقوق خصوصیه دول ، ده دولترك تبعه لری آره سنده كي
حقوق و مناسباتی تعين ايدن قواعدی حاویدر .

حقوق خصوصیه ، اوچه تفسيم اولمشدر . حقوق مدنيه ،
اصول محاکمات مدنيه و یا حقوقیه ، حقوق تجارت در . حقوق
مدنيه ، افراد اهالینك بر برلرله اولان معاملات و مناسباتی
تعين ايدن قواعد در مجله احكام عدليه كي . اصول محاکمه
مدنيه و یا حقوقیه ، محكمه لرده بر حقك اثباتی و محاکمه نك
صورت جریان و اصولی بیاز ايدن قاعده لر در « اصول محاکمات
حقوقیه قانونی » كي .

حقوق تجاریه ، صرف تجارتلغه عائد معاملات و مناسباتدن
و و تجارتلر آراسنده اولان عادت و قواعددن بحث ایدر .

۱ — قوانین و نظامات و عرف و عادتک تعریفی :

قانون ، قاعده لر « قواعد کلیه ، قضیه کلیه » دیمکدر .
نظام ، دیزی ، صره ، اصول ، ترتیب دیمکدر . قاعده لر
صره ایله دیزلش بولس دینی ایچون « نظام » دینلمشدر . قانون

و نظام هر ایکی کلمه بر معناده قوللانیلور . بر برندن فرقی یوقدر .

علم حقوقه قانون ، حکومتدن صادر اولوب عموم هر کس حقنده اطاعت و اجرایی مجبوری اولان بر امر و یا نهی در . دیگر بر تعریفه کورده ده قوه قانونیه نك « یعنی حکومتك » بر اعلان رسمیسیدر که بونکه اداره امور داخلیه و منافع عمومیه به دائر هر کس ایچون اجرایی مجبوری بر طاقم قواعد وضع اولنور . بر قانون وضع ایدمك یا یلق ایچون درت معامله جریان ایدر . برنجیسی « تکلیف » در . هر هانکی بر دائریه قانون لازم ایسه اودائر بر قانوننامه یاپار لایحه یازار حکومته بونی قانون اوله رق وضع ایدیکز دیهرك تکلیف ایدر .

ایکنجیسی « مذاکره » در بر دائر طرفندن تکلیف اولنان قانون شورای دولته مجلس مبعوثان و اعیانده و مجلس وکلاده مذاکره اولنور .

اوچنجیسی « عرض » ایتمکدر مذاکره اولنوبده قبولنه قرار ویریلن قانون حضور پادشاهی به عرض اولنور . « مجلس اعیان و مبعوثانجه تصدیق اولنان اشبولایحه نك قانونیتی و قوانین دولته علاوه سنی اراده ایدرم » دیهرك اراده سنیسی چیقار .

دردنجیسی « اعلان » در . اراده سی چیقان قانون غرتهلرله وسائر صورتله اعلان اولنور . اکر قانونك شوزماندن اعتباراً

حکمی جاریدر دیهرک یازلمش ایسه اوقانون او وقتدن اعتباراً اجرا اولنور . بویله بر وقت تعیین ایدلماش ایسه اعلانندن اون بش کون صکره اجرا ایدیلور . وهرکس امرینه ویانهینه اطاعته مجبوردر .

عرف ، لغتده «معروف» بیلنن، بللی اولان شی دیمکدر . عادت ، ده معاوده دن عودت ایدن یعنی تکرار ایدن بربری آردنجه وقوعه کلن شیئه دینور . عرف وعادت کله لری هر ایکسی بر معناده قوللانیلور . بونلرک تعریفی ایسه : عرف وعادت، قانون ونظام ایله معین اولمایوب عموم ویا بر قسم انسانلر آراسنده یاپلسی تقرر ایدن وعقلک دلالت وشهادتی ایله معقول اولان وطبع سلیم اربابی یاننده معقول بولنان وبرچوق دفعه تکرر ایدن وبربری آردنجه وقوعه کلن « فعللر » امورددر . عرف وعادت، ایکی وجهله تقسیم اولنور . بریسی « عرف عام - عمومی عرف وعادت » دیکری ده «عرف خاص - خصوصی عرف وعادت» در . عرف عام، کیمک طرفندن ایجاد اولندیغی ووضع ایدلدیکی بیلنه میان وبرجماعته مخصوص اولمایان عادتلر در . مثلاً : برکیمسه فلان کیمسه نك خانه سنه ایاق باصمام دیهرک یمین ایتسه ، صکره بشقه بریسنك آرقه سنه یینه رک اوخانه یه کیرسه یمینده یالانچی اولور . چونکه « آیاق باصمام » دیمک حقیقه چپلاق ایاغنی اوخانه یه باصمق دیمک اولمایوب ، عرف وعادته

« اوخانه یه کیرم » دیمکدر. بناءً علیه اوخانه نك قپوسندن ایاغنی اوزاتهرق خانه نك ایچنه ایاغنی باصسه یمینده یالانچی اولماز، عرف خاص، برشیئی هر جماعتك بشقه بشقه معنارده قوللانمه نك عادت ایدلمسیدر. مثلاً: قانون لفظی عدلیه اصطلاحنده قاعده لردن مرکب نظامه؛ نظامنامه لره دینور. موسیقی اربابی قانون دیهرک معلوم اولان سازه چالنییه دیرلر. عسکری اصطلاحنده قانون انضباط عسکرییه مأمور اولان ذاتلره دینلور.

عرف وعادت، دیکر بر صورتلده تقسیم اولنور. بری عرف عملی، دیکری ده عرف قولی در.

عرف عملی، برشیئی بر جماعتك عادت ایتمسیدر. مثلاً: برکیمسه « بکات آل » دیسه اوکا قویون آتی آلنور. یوقسه دوه آتی آلتماز. چونکه استانبول اهالیسنجه « آت » دیننجه قویون آتی آکلاشیلور.

دیکری عرف قولیدر. بر جماعتك بر لفظی بر معناده قوللانمی عادت ایتمسیدر. مثلاً: بریسی دیکرینه « بکا اون آلتونه برآت آل » دیسه اون عثمانلی آلتونه آت آلمسی لازمکلور. اون انکلیر آلتونه آلهماز. چونکه هر نه قدر هر ایکسی ده آلتون ایسه ده استانبولده آلتون دیهرک عثمانلی لیراسنه دینور. عرف وعادتك معتبر اولمی ایچون مطرد اولمی یعنی اصلاً

تخالف ایتماسی و بعضاً تبدل ایدر سده اکثراً تخالف ایتماسی
یعنی : دکیشامسی لازمدر . یوقسه تبدل ایدن شیر عرف
وعادت صایلاز مجله موجبجه عادت محکمدر . یعنی منازعه‌لی
اولان مسئلهلرده — حقنده نظام وقانون اولمایان مسئلهلرده —
عرف وعادت نصل ایسه یعنی اهالی اولدن برو اوکی خصو-
صانده نه یاپه‌ککش ایسه او وجهله حکم وعمل اولنور .

۲ — حکومت

حکومت « دولت » — امنیت ومنفعت متقابلهلرینی قوای
متحدهلریله تأمین ومحافظه ایتمک ایچون برله شن وبرقطعه اراضی ده
متصرفاً ساکن اولوب بر اداره منتظمه ومشرکه تحتنده وصورت
دائمه ومستقلده یشایان ومعین بر رئیس مالک اولان افراد
انسانک هیئت مجموعه سنه دینور . یعنی : صاحب اولدقلری بر
طوپراقده مستقل ودائی ومنظم ومشرک بر اداره تشکیل
ایدرک بر برلرینک امنیت ومنفعتلرینی برلک اوله رق ، اتحاد ایدرک
وجوده کتیردکلری کندی قوتلریله تأمین ومحافظه ایدن
وبررئیس ویا حکمداری بولنان هیئت بشریه حکومت ویا خود
دولت دینلور .

شو تعریفه کوره : بر دولت تشکل ایتمک ، میدانه کلک

ایچون افراد اهالی بولنسی ؛ و بو افرادك امنیت و منفعتلرینی تأمین و محافظه ایچون اتحاد ایتمسی ، و برقطعه اراضی به صاحب بولنسی و مستقل « بر بشقه دولته تابع اولماق » اولنسی و دواملی و منتظم بر اداره لری اولنسی و منفعت و امنیتلرینی محافظه ایدمه بیله جك قدر قوتلی بولنسی و بر رئیس ویا پادشاهلری اولنسی لازمدر .

حکومتلرک « دولتلر » مطلقا بر جنسه ، بر عرقه ، بر قومه ، بر دینه ، بر مذهب منسوب اولان انسانلردن اولنسی شرط دکلدر .

بشقه بشقه دین و جنسلردن بیوک بیوک حکومتلر وجوده کلشدر . مثلا : دولت علیه عثمانیه ، آوستریا و مجارستان ، و روسیه دولتلری بشقه جنسلره بشقه مذهبلره منسوب اهالیدن مرکبدر . ذاتاً دنیاده صاف بر قومیه منسوب بر حکومت یوقدر مثلا : ایتالیا دولتی لاتین عنصرینه منسوب اهالیدن مرکب کی کورینورسده ایچارنده آرناوود و غره ق جنسلرنده آدملر وارددر . فرانسه دولتی ده لاتین عناصرندن عبارت کی تلقی اولنورسده فرانسه ده آنغلو ساقسون ، و فلامان قوملری بولندینی کی فرانسه نك رسمی دینی اولان قاتولیکلکدن ماعدا موسوی و پروتستان دین و مذهبلرینه منسوب خلق وارددر .

الحاصل دولت بشقه ، قومیت ، جنسیت ، دیانت بشقه در .

یالکز الویررکه بر دولتی « حکومتی » تشکیل ایدن خلقك منفعتلری بر درجه یه قدر بر اولسون و آرالرنده آز چوق رابطه و اتحاد بولنسون .

حکومتلر « دولتلر » اساس تشکلی اعتباریه — صوڪ نظریه کوره — باشلیجه ایکی قسمه آریلور. بریسی محکومیت ملیه اساسی اوزرینه اولان دولتلردر. فاس، افغان، سیسام وچین، ایکی سنه اول بزم دولت کبی. دیکری ده حاکمیت ملیه اساسی اوزرینه تشکل ایدن دولتلردر. شمیدیکی دولت عثمانیه و بالجله، آروپا و آمریکا و ژاپونیا حکومتلری کبی.

حکومتلر « دولتلر » صورت اداره لری اعتباریه اوج قسمدر.

برنجیسی « حکومت مطلقه » در. صورت مطلقه ده یعنی بر قانون و نظام دائره سنده اولیه رق کیف مایشاء اداره اولنان و محکومیت ملیه اساسی اوزرینه بنا اولتان دولتلردر. فاس و افغانستان و سیسام وچین دولتلری کبی در که بونلرده حکمدار، ملتی محکوم ایمش، اسیرایمش کبی هیچ برشیئه قاریشدیر مقسزین کندی تعیین ایتدیکی مأمورلر واسطه سیله و کیفی ایسته دیکی وجهله اداره ایدر. بویله بر اداره ده هیچ بر زمان استبداد، ظلم و غدر اکسیک اولماز. حکمدار نه قدر عقللی و عدالتلی اولور سه اولسون بر کیشنک بر دولتی اداره ایده جک قدر عقللی و عدالتلی اولمی فرض محالدر. مع مافیه بویله صورت مطلقه ده اداره اولنان دولتلر آز قالمشدر. یقین وقتنده آنلرده مشروطیتله اداره اولنه جقلردر.

ایکنجیسی « حکومت مشروطه » در . صورت اداره سی
بر طاقم قیود و شروط قانونیه « قانون اساسی » تابع اوله رق
مشروع بر حالده اداره اولنان و حاکمیت ملیه اساسی اوزرینه
تشکل ایدن یعنی اهالی و ملتکده اشتراکی اولان دولتردر .
دولت عثمانیه ، ایران ، المانیا ، و روسیه کبی بعض اوروپا
دولتریدر .

حکومت مشروطه ده قدرت و قوته مالک و مقام سلطنته
صاحب بر حکمدار بولنورسده ده هر ایستدیکنی کیف مایشاء
اجرا ایده میوب افراد ملتک انتخاب ایتدیکنی وکیلرینک یعنی
مجلس مبعوثان اعضالرینک یابدینی قانون اساسی و سائر مالیه
و اداره یه عائد نظامات دائره سنده اجرای حکومت و سلطنت
ایدر لر .

حکومت مشروطه نک بعضیلرنده « انکلتزه ، دولت عثمانیه ،
ایتالیا » کبی حاکمیت ملیه زیاده .. بعضیلرنده ده « روسیه
و بر درجه یه قدر المانیا » کبی حاکمیت حکمدار دها زیاده در .
اوچنجیسی « حکومت جمهوری » در . قانون اساسی ایله
اداره اولنان و صرف حاکمیت ملیه « حکومت عوام » اساسی
اوزرینه تشکل ایدن دولتردر . فرانسه و اسویچره و بعض
آمریقا جمهوریتلری کبی . حکومت جمهوری ده حکمدار بولنماز
ملت کندی وکیلرینی یعنی مجلس مبعوثان اعضالرینی انتخاب

ایدر. وینه کندی انتخاب ایلدکلی ولایات مجلس عمومیلری ده مجلس اعیان اعضالری انتخاب ایدرلر. بویکی مجلس یعنی مبعوثان و اعیانلر مرکب اولان مجلس ملی ده ینه افراد ملتدن بررئیس انتخاب ایدرلر. بورئیس، حکومتک یعنی قوه اجرائیه نك آمری اولور. رئیس جمهور دینلور.

۳ - حاکمیت ملیه

حاکمیت ملیه، افراد اهالی نك یعنی بتون ملتک حاکمیتی دیمکدرکه بر حکومت تشکیل ایدن بتون افراد ملتک اصول ونظامی دائره سنده امور دولتی اداره ایتسنه دینور.

انسانلر فطرتاً حروحقو قجه مساوی یارادلش اولدقلرندن برانسانک علی الانفراد «یا لکز اوله رق» دیگر انسانلر اوزرینه حکم ایتمه صلاحیتی یوقدر. ذاتاً دولت، افراد ملتک اشتراک کندن وجوده کلدیکی جهتله اداره دولته ده بالجمله افراد ملتک اشتراک ایتسی لازمدر.

ملت حاکمیتی، اداره حکومته اشتراک کنی، انتخاب ایتدیکی بلدییه مجلسلری و ولایت مجلس اداره لری، ولایت مجلس عمومیلری و مجلس مبعوثان واسطه لری ایله اجرا ایدر.

ملت، حق حاکمیت ملیه سی حسیله، امور حکومتک بعضالری

بلديه و ولايت مجلسلرينه توديع ايلديكى كې ، اداره حكومتك
بتون تفرعاتى و دولتك امور داخله و خارجيه سنى و معاملات
ماليه و عسكرىه سنى ده مجلس مبعوثانى واسطه سيله دائماً مراقبه ده
بولنديرر و تفتيش و معاينه ايدر .

حاكيت مليه نك تمثالى نمونه سى مجلس عمومى يعنى مجلس
ايعان و مبعوثاندر كه بوكا « قوه تشريعه — قانون يايان قوت »
دينور . مجلس مبعوثان ملته لازم اولان يعنى ملت كندى محتاج
بولندينى قانونلرى ياپار . اجرا اولنقى اوزره هيئت وكلايه
ويرر . وكلايعنى ناظرده او قانونلرى تماماً تطبيق و اجرا ايتديرر .
هيئت وكلايه ده « قوه اجرائيه » دينلور قوه اجرائيه اعضاسى
يعنى هيئت وكلايه مجلس مبعوثان اعضالردن ، بعضاً مبعوث
اولمايان ذاتلردن اولور مجلس مبعوثان هيئت وكلايه امنيت
و اعتماد ايدرايسه وكلا « ناظرلر » اجراى حكومت و مأموريت
ايدرلر . امنيت ايتمزسه استعفا ايدوب چكيلورلر . بشقه لرى
يعنى مجلس مبعوثانك امنيت و اعتماد ايتديكى ذاتلر وكلا اولورلر .
برده قوه تشريعه نك بر قسمى اولان « هيئت ايعان »
هر نه قدر ملت طرفندن انتخاب ايدليور ايسه ده يكي ياپيلان
قانون اساسى موجبنه هيئت ايعانك اوچده ايكي سى ملت
طرفندن انتخاب ايديله جكدور .

شو حالده قوه تشريعه « هيئت ايعان و مبعوثان » ملت

وکیللرندن وقوه اجرائیه « ناظر لر هیئت وکلا » ده هیئت اعیان و مبعوثانک امنیت و اعتمادینی قازانمق شرطیله کذالمک ملت وکیللرندن مرکب اولدینی جهتله اداره امور حکومت ملتده بولندیغندن « حاکمیت ملیه » بوصورتله وجوده کلمش اولور .

۴ — حق رأی و انتخاب

افراد ملت ، حاکمیت ملیه سی اقتضاسنجه مجلس مبعوثانه اعضا « وکیل » کوندرمک ایچون رأی ویرمک انتخاب ایتمک ، و اعضا « وکیل » اوله رق انتخاب ایدمک حقنه مالکدر . مجلس مبعوثان اعضالرینی انتخاب ایتمک ایچون باشلیجه ایکی اصول وارددر . بریسی « رأی عام — رأی عمومی » دیکری ده « رأی محدود — رأی محصور » اصوللریدر .

« رأی عام » اصولنجه : اهل اولان « عاقل و بالغ اولان و جنایت و افلاسله محکوم اولوبده حقوق مدنیه و سیاسیه سندن محروم اولمایان » وحق انتخابه مالک بولنان « برمقدار ویرکو ویرمک و معین بریاشده اولمق کبی شرطلری جامع بولنان » هرکس طوغریدن طوغری یه مبعوث انتخاب ایدر ، یعنی اصل مبعوث اوله حق ذات ایچون رأی ویرر . بو اصول معارف

ومدنیته و تربیه فکریه و سیاسیه جه ایلری کیتمش اولان ملتدره قابل تطبیقدر .

« رأی محدود » اصولجه ده : اهل اولان و حق انتخابه مالک بولنان افراد ملت بالواسطه یعنی اصل مبعوث اوله حق ذات ایچون دکل ، اصل مبعوثی انتخاب ایده جک ذاتلر - منتخب ثانیلر - واسطه سیله مبعوثلرینی انتخاب ایدرلر . بو اصول موجبنجه افراد ملت اولاً « منتخب ثانی » نامیله برطاقم ذاتلری انتخاب ایدرلر . بو ذاتلرده طوبلانه رق اصل مبعوث اوله حق ذاتلری انتخاب ایلرلر . شو حالده افراد ملت طوعریدن طوعری یه اصل مبعوث اولان ذات ایچون رأی ویرمیوب ، اصل مبعوث انتخابی منتخب ثانیلره ترك ایتمش وانلری توکیل ایتمش » وکالت ویرمش اولورلر .

بزده « رأی محدود » اصولی جاریدر . ومملکتتمزك حالته ومنافعنه شمديلك بواصول دهها نافعدر « انتخاب مبعوثان » قانونی موجبنجه هیئت مبعوثان اعضاسی تبعه عثمانیه دن هر اللی بیک نفوس ذکورده برنفر اولمق اوزره ترتیب اولمشدر . ممالک عثمانیه ده مبعوثان انتخابی سنجاقلر اعتباریله اجرا اولنور . وهر سنجاق بردائرة انتخابیه وهر ناحیه ده برشعبه انتخابیه عداولنور . انتخابه باشلانمازدن اول نه قدر عثمانلی ارکک نفوس وارسه براساس دفترینه قیداولنور . بودفتره اساس دفتری دنیلور . بو

دفترلرده یکر می بش یاشنی اکمال ایتیانلر حقوق مدنیهدن
ساقط و محروم بولنالر ، تابعیت اجنبیه ادعاسنده اولانلر موقتاً
خدمت اجنبیه امتیازینی حائز اولانلر ، افلاس ایدوبده اعاده
اعتبار ایتیانلر ، و محجوریتنه حکم لاحق اولوبده فك حجر ایدلماش
اولانلر «برکیمسه مجنون اولورسه و مالی یوق یره صرف ایدرسه
حاکم یعنی قاضی او آدمی حجر ایدر. حجر اولنان آدمک سویله دیکی
سوزویا پدینی ایشه اعتبار اولنماز مقبول و معتبر اولماز» و طوغریدن
طوغری یه ویرکو ویرمیانلر «طوغریرن طوغری یه ویرکو
دیمک اعشار و اغنام و تمتع ویرکولری دیمک اولوب بلدییه و مکرمک
رسملری ویرمک ویرکو صایماز» اشبواساس دفترندن چیقاریرلر.
باقی قالان نفوس حق انتخابه نائل اولان و «منتخب اول» دنیلن
برنجی درجه ده انتخاب ایدیجیلردر. بومنتخب اوللر انتخاب کونی
ناحیه لرده طویلا نورلر هر بش یوزکشی رأی خفی یعنی کندیلرینه
ویریلن مهرلی کاغدلر اوزرینه انتخاب ایتدکلری کیمسه نك اسمنی
یازارلر. کلیدلی و مهرلی اولان بر صندوقه آتارلر. بوبشیوز
کشینک انتخاب ایتدیکی برتک ذات «منتخب ثانی» یعنی ایکنجی
درجه ده انتخاب ایدیجی اولورلر. خدمت اجنبیه امتیازینی حائز
اولان یعنی «تبعه عثمانیه دن اولوبده بر اجنبی دولت سفارتخانه
سنده کاتب و یا ترجمان و یا خود قواس اولانلرده بر درجه یه قدر
اجنبیلرک امتیازینه مالک اولورلر. اشاغیده تفصیلات ویریه جکدر».

ویکرمی بش یاشنی اکمال ایتیانلر حین انتخابه بر کیمسه نك خدمتکار لغنده بولنانلر، افلاس ایله محکوم اولوبده اعاده اعتبار ایتامش اولانلر سوء حال ایله مشتهر اولانلر، محجوریتنه حکم لاحق اولوبده فك حجر ایدلمه ینلر، حقوق مدنیهدن ساقط اولنلر «بونك نه اولدینی اشاغیده بیان ایدیه جکدر.» تابعیت اجنبیه ادعاسنده بولنانلر دخی ایکنجی درجه منتخب اوله مازلر. بو صورتله ایکنجی درجه ده منتخب اولنلر انتخاب اولندقدنصکره هیئت انتخابیه «بو انتخاب معامله سنه باقق و آتیلان رأی کاغدلرینی طویلایوب صایمق و انتخاب صندوقلرینی کلیدلیوب مهر له مک الحاصل انتخاب معامله سنه عائد نه کبی ایشلر وارسه بونلری کورمک ایچون امام مختار مفتی و خرسیان رئیس روحانیلر یهودی خاخاملری و سائر اعیان و اشراف مملکتدن مرکب بر هیئبدر. برده بونلرک ایشلرینی تفتیش و معاینه ایتک ایچون ایریجه ینه بوکبی ذانلردن مرکب هیئت تفتیشیه لر واردر.» ایشته بو هیئت انتخابیه لر طرفندن اللرینه برر مضبطه ویریلور. بونلرده بومضبه لری آلوب قضا مرکزینه کیدر. اوراده بونلره مبعوث اولمغه لایق نه قدر ذات وار ایسه «بونلره مبعوث نامزدی دیرلر» انلرک اسملرینی ییلدیرلر. ویاخود مبعوث اولمق ایسته ین ذاتلر کندیلک لرندن نامزدلک لرنی وضع ایدرلر. یعنی بن شو فکرده شومسلکده بر آدم شویله ایشلر کورمک

ایسترم دیهرک کندیسنک مبعوث انتخاب اولمسنی ایسترم بونی
 غزته لر و بیان نامه لر ایله نشر و اعلان ایدر . منتخب ثانیلر ده
 ایسترم بوذاتلری انتخاب ایدر ایسترسه کندی آرزو ایتدکلری
 آدمی انتخاب ایدر لر . فقط مبعوث اوله حق ذاتک او ولایت
 اهالیسندن و یاخود او ولایتده توطن ایتمش اولسی شرطدر .
 بشقه ولایتک یرلی اهالیسندن انتخاب ایده مز لر . منتخب
 ثانیلر ، انتخاب نه کونی اوله جقسه اوکون سنجاق مرکزینه
 کیدر لر . کندیلرینه مهرلی برر کاعد و یریلور . او سنجاقده
 نفوس اعتباریله قاج مبعوث چیقیورسه « مثلا بر سنجاغک
 نفوسی چوق اولورده بش مبعوث چیقار ، دیگر سنجاغک
 آز اولورده ایکی چیقار » او قدر . مثلا : اوچ مبعوث چیقه
 یور ایسه کندیسنه مبعوث اولمغه لایق اولدیغی بیلدیریلن
 و یاخود نامزدلکنی وضع ایدن سائر ذاتلردن اوچ دانه سنک
 اسمنی و یریلن مهرلی کاغده یازار و یاخود یازدیرر کلیدلی
 و قپالی صندوق ایچنه آتار . هیئت انتخابیه و تفتیشیه حضورنده
 صندوق آچیلور رأی یوصله لر صاییلور . هرکیم چوق رأی
 قازانمش ایسه او ذات اکثریتله مبعوث اولور . تبعه عثمانیه دن
 اولمیان و موقه خدمت اجنیه امتیازینی حائر اولان ، ترکیه
 اوقومق یازمق بیلمه یین ، اوتوز یاشنده اولمیان ، حین انتخابده
 بر کیمسه نك خدمتکار لغنده بولسان ، افلاس ایله محکوم

اولوبده . فك حجر ايدلمه ين ، حقوق مدنيه دن محروم وساقط بولنان ، تابعيت اجنبيه ادعاسنده بولنش اولان كيمسه لر مجلس مبعوثانه اعضا اولمق اوزره انتخاب اولنه مازلر . بو صورته انتخاب اولنان مبعوثلر سنجاق مجلس اداره سندن بر مضبطه آلوب مجلس مبعوثانه كلورلر . مجلس مبعوثانده مضبطه سي اوقونور . اكر اكثريته قبولنه قرار ويريلورسه اوزات مجلس مبعوثان اعضاسي اولور . اكر مجلس قبول ايتيوبده رد ايدمك اولورسه ، او سنجاق اهاليسي يكي دن بشقه بر ذاتي انتخاب ايدرك مجلس مبعوثانه كونديرلر . هر مبعوث درت سنه اعضالق ايتك اوزره انتخاب اولنور . چونكه مجلس مبعوثانك اعضاسي هر درت سنه ده بر كره يكي دن انتخاب اولنور . بر كره مبعوث اولان ذاتي تكرار انتخاب ايدرلرسه اوزات ينه مبعوث اولور . يعني بر ذاتك بر چوق دفعه انتخاب اولنسي جائزدر .

۵ — قانون اساسينك تعريف و تفصيلاتي

قانون اساسي ، بر حكومتك صورت شكل و اداره سني و افراد ملتك حكومتله و حكومتك افراد ملتله اولان حقوق و مناسبات

اصلیه سنی بیلدیرن بر قانوندر . یعنی بردولت نه شکلدهدر . مشروطیتله می یوقسه جمهوریت ایله می اداره اولنور . نه کی مجلسلر بولندیغی و افراد ملتک نه درجه لره قدر امور حکومته اشتراك ایده بیله جکی و سائره کی دولتک اساس تشکله و اصول اداره سنه متعلق تفرعات و تفصیلاتدن بحث ایدر . بزم قانون اساسیمزك افراد ملته ، طرف حکومت و مقام حکمداری یه بخش ایلدیکی حقوق و صلاحیت ایله قانون مذکورک مندرجاتی بروجه آتی بیان اولنور :

۱ — ممالك دولت عثمانیه — ممالك عثمانیه آیالات ممتازه یی محتوی ویک وجود اولوب هیچ بر سبیله آیریله ماز . دولتک پایتخت و مرکز اداره سی استانبولدر . خاندان آل عثماندن اك بیوک اولان ذات عثمانیلرک پادشاهی و اسلاملرک خلیفه سی اولور . وکلایی عزل و نصب ایتمک ورتبه و نشان ویرمک ، نامنه خطبه او قونمق و پاره ضرب اولتمق ، دولترلره معاهده یایمق ، حرب و یا صلح اعلان ایله مک ، عسکره قومانده ایتمک ، قانون و نظاملرک اجراسنی امر ایتمک ، محکمه لردن ویریلن جزالری عفو ایتمک مجلس عمومی یی آچق و قیامق و اعضالری یکیدن انتخاب اولتمق اوزره مجلس عمومی یی « مجلس مبعوثان و اعیانی » طاغتمق حق بر صلاحیتی پادشاهکدر .

۲ — تبعه عثمانیه نك حقوق عمومیه سی — تبعه عثمانیه دن

اولان هر فرد هر هانکی دین و مذهبه اولورسه اولسون و هر هانکی جنس و عنصر دن بولنورسه بولنسون «عثمانلی» نامی ویریلور . هر عثمانلی حردر . هیچ کیمسه قانونک تعیین ایتدیکی اسبابدن بشقه بر سبيله کیفی اوله رق جزالندیريله ماز . دولت عثمانیه نك رسمی دینی دین اسلامدر . فقط ممالك عثمانیه ده معروف نه قدر دینلر و ارسه دولت جمله سنی حمایه ایدر . یعنی سربستجه عبادت ایتلرینه مساعده ایدر .

مطبوعات ، تجارت ، شرکتلر ، تدریسات سربستدر . هر کس نظامی دائره سنده غزته و کتاب چیقاریر ، مکتب آچار ، یساق اولیان شیلری آلوب ساتار . اسایشه طوقونماق شرطيله اییسته دیکی آدملر ایله شرکت عقد ایدر . هر عثمانلی ، قانونلر حقنده و مأمورلر علیهنده حقلی اوله رق شکایت ایده بیلور . و هر کس اهلیته کوره مأموریتلرده قوللانیلور . هر کسک خانه سی و اموال و املاکی محفوظدر . مصوندر . تعرض و تجاوز اولنه ماز ، و قانون اذن ویرمدکجه کیمسه نك خانه سنه جبراً کیريله من هیچ بر کیمسه نك مال و ملکی بهاسی ویرلمدکجه آله ماز . و نظام سنر اوله رق کیمسه دن ویرکو و سائر نام ایله پاره آله ماز . و هیچ بر کیمسه یه مصادره و انفاریه و جریمه و اشکنجه و هر نوع اذیت یا پیله ماز . قطعاً یساقدر .

۳ — وکلای دولت — صدراعظم و شیخ الاسلام پادشاه

طرفدن تعيين اولنور . سائر وکلایي صدر اعظم انتخاب ايدر .
 پادشاهده تصدیق و تعیین ایلر . صدر اعظم مجلس وکلانک
 وناظرلرک رئیسیدر . مجلس وکلاده دولتک خارجی وداخلی
 مهم ایشلری مذاکره اولنوب قرار ویریلور . وکلادن «ناظرلردن»
 هر بری هم کندی نظارتی ایشلرندن وهمده دولتک بالجمله
 امورندن مسئولدر . وکلالق صفتیله یعنی وظیفه مأموریتندن
 طولایي برجنایت و قباحتی اولورسه «دیوان عالی» ده محاکمه
 ایدیلور . فقط صرف شخصنه عائد جرملر و معامله لردن طولایي
 «مثلا بریسنی ضرب ایدرسه و بر کیمسه یه بورجی اولوبده
 ویرمزسه» عدلیه محکمه سنده محاکمه اولنور . وکلا ایجابنده
 مجلس مبعوثان واعیانیه کیده رک دولتک اداره سندن معلومات
 وایضاحات ویرر ، ویاخود مجلس مبعوثان اعضالری برناظرک
 کلوب ایضاحات ویرمسنی ایستر ، ناظرده کیدوب جواب
 وایضاحات ویرر . بوکا «استیضاح» دینلور . اکر مجلس
 مبعوثان اعضالری اوناظرک ویردیکی جواب وایضاحاتی کافی
 کوره رک امنیت واعتماد ایدرسه ناظرینه وکلالقه قایلر . امنیت
 واعتماد ایتمزسه وکلالقدن استعفا یه مجبور اولور . مجلس مبعوثان
 اکر یالکز صدراعظمک ویاخود وکلانک هپسی حقنده امنیت
 واعتماد ایتمزسه وکلانک جمله سی استعفا ايدر . بشقه هیئت وکلا
 تشکیل اولنور .

۴ — مامورین — هر کس نظاماً اولان مأموریتلره اهلیتلی نسبتنده تعیین اولنور. قانوناً موجب عزل بر قباحتی اولدقجه و کنديسی استعفا ایتدکجه هیچ بر مأمور عزل و تبدیل اولنه ماز. هر مأمور کندي وظیفه سندن مسؤولدر. مأمورلرک آمرلرینه قارشو حرمت و اطاعت ایتسی لازمدر. فقط آمر طرفندن خلاف قانون بر امر ویریلوبده مأمورده اطاعت ایده حکم ديه او آمری اوایشی یاپارسه کنديسی مسؤول اولور.

۵ — مجلس عمومی — هیئت اعیان و هیئت مبعوثانک هر اکیسندن مرکبدر. مجلس عمومی هر سنه ایلول ابتدا سنده طویلانور. مارت نهایتنده طاغیلور. مجلس عمومی یابالذات پادشاه و یا خود بالوکاله صدراعظم آچار و بر نطق هایون او قونور مجلس اعضا لری وطن و ملتہ صداقتله خدمت و قانون اساسی یه رعایت ایده جک لرینه یمین ایدر لر. و مجلسده بیان ایتدک لری و سویلدک لری فکر و رأیدن طولای اتہام اولنه مازلر و حبس و نفی کبی بر جزا ایله محکوم اولور لر سه اعضا لقتن ساقط اولور لر. کرک مأموریتلرینه و کرک شخصلرینه عائد بر جرم ایشله دک لری وقت طوتولوب محاکمه ایدلک ایچون مطلقا مجلسک اکثریتله قرار ویرمی لازمدر بو هیئت اعیان و مبعوثان اکیسی بردن طویلانور یعنی بر زمانده آیری آیری دائره لرده اجتماع ایدر لر. بر مجلس مثلاً: مجلس مبعوثان طویلانمق سزین مجلس اعیان اجتماع ایدوبده

برایش کوره مز. بوجلسلر ايجاب ايدرسه وقتندن اول طویلانور و مدتی بتمه دن طاغیدیلور. و برشخص ایکی مجلسه بردن اعضا اوله مازهیئت اعیان و مبعوثان، یاخود حکومت طرفندن و یاخود کندی اعضالری طرفندن یا پلسی تکلیف اولئان قانونلری ولایحه لری و هر سنه دولتک واردات و مصارفی کوستر موازنه مالیه قانون لایحه لری مذاکره و تدقیق ایدرلر، اکثریتله قرار ویررلرسه قبول اولنور. قبول ایتزلرسه رد اولنور. و آرتق او قانون لایحه سی قانون اوله ماز. مذاکره ترکجه اولور. رأیلر، رأی خفی ایله « کیزلی اوله رق » و یاخود ال قالدیرمق کبی اشارت ایله ویریلور. مجلسلرک مذاکره سی علنی در. هر کس دیکله یه بیلور فقط مجلس خفياً یعنی کیزلی اوله رق مذاکره ایتمه قرار ویررسه اعضادن بشقه سی مجلس سالونندن طیشا ری یه چیقاریلور.

۶ — هیئت اعیان — هیئت اعیان اعضالری هیئت مبعوثان اعضاسنک اوچده برینی کچمه مک اوزره پادشاه طرفندن انتخاب اولنور. فقط یکی قانون اساسی موجبجه اوچده بری پادشاه ایکسی ده ملت طرفندن انتخاب ایديله. جکدر. وکلایق، والیک، مشیرلک، فریقلق، قاضی عسکرلک، ایلچیلک، خاخاملق ایتش ذاتلر ایله ارباب صنعت و تجارتدن و ملتک امنیتی قازانمش سائر ذاتلردن انتخاب و تعیین اولنور.

اعیان اعضائی قید حیات ایله ایدیسدهده یکی قانون اساسی حکمنجه هر طقوز سنهده بر موجود اعضانك اوچده بری دکیشه جکدر هیئت اعیان، مجلس مبعوثان طرفندن تدقیق اولنان قانون لایحه لرینی تکرار تدقیق ایدر. قبول ایدرسه حضور پادشاهی به عرض اولنوبده اراده سنیه سی چیقارملق اوزره صدراعظمه کوندیریر. قبول ایتمزه اسبابی ایله برابر مجلس مبعوثانه کوندیریر اوراده یکیدن مذاکره اولنور.

۷ — هیئت مبعوثان — مجلس مبعوثانك مقدار اعضائی تبعه عثمانیه دن هر الی بیک ارکک نفوسدهده برکشی اولق اوزره ترتیب ورای خفی قاعده سی اوزرینه انتخاب اولنور. بر شخص هم مبعوثان اعضائی همده حکومت مأموری اوله ماز. فقط یالکزر ناظر اوله ییلور.

مبعوثان اعضاسنك هر بری کندینی انتخاب ایدن دائره نك یعنی سنجاق ویا ولایتك آریجه وکیلی اولیوب عموم عثمانیلیرك وکیلی در. اعضالرك مأموریتلری درت سنه در. اعضادن بری وفات ایدر ویا استعفا ایلرسه یرینه دیکری انتخاب اولنور. مجلس مبعوثان بالجمله قانونلری تدقیق ومذاکره ایدر ومالیه به عائد مصارف عمومیه « بودجه » قانوننی هیئت وکلانك هپسی ویاخود بعضیسی بولندینی حالده فصل فصل یعنی هر دائره ونظارتیه عائد اولان قسملرینی مفرداتیه برابر تدقیق ومذاکره

ایدر . و مصارفه قارشولق اوله رق کوستریلان وارداتک نه مقدار اولدیغنی و اهالی اوزرینه ناصل تقسیم ایدلمش بولندیغنی تفصیلاتیه برابر تدقیق و مذا کره ایدر . تدقیق ایلوب قبول ایتدیکی قانونلری هیئت اعیانه کونده ریر .

۸ — محاکم — طرف دولتن تعیین اولنان حاکم لار لایتغیرلر . عزل اولنزلر برجرمی اولورسه اووقت عزل او-
لنور . محکمه لرده هر نوع محاکمه علناً اجرا اولنور . بعض جرملر واردرکه قانون انلرک کیزلی محاکمه اولنمی امرایدر . بونلر کیزلی اولور . هر کس محکمه ده حقی اثبات ایچون لزوم کوردیکی کی مدافعه ایدر . بر محکمه وظیفه سی اولان بر دعوایی محاکمه ایتمکدن واز کجه مز . اهالی ایله حکومت آراسنده کی دعوالرده عدلیه محکمه لرنده کوریلور . محکمه لره مداخله اولنه ماز حاکم لار رأی وقرارلرنده قانونک تعیین ایتدیکی وجهله مستقذر . قانوناً شکل ایدن محکمه لرده بشقه بعض دعوالری محاکمه ایچون خصوصی محکمه لر ، قومیسو نلر تشکیل اولنه ماز . جزا دعوالرنده حقوق عمومیه بی وقایه و مدافعه ایچون هر محکمه یه برر مدعی عمومی تعیین اولنور .

۹ — دیوان عالی — اوتوز اعضادن مرکبدر . بونلرک اونی هیئت اعیاندن ، اونی شورای دولتن ، اونی ده محکمه تمیز واستیناف رئیس و اعضالرندن قرعه ایله تعیین اولنور بونلرک

وظیفه سی وکلا ایله محکمه تمیز رئیس واعضالری محاکمه ایتمکدر . دیوان عالی ایکی قسمدر . بری دیوان حکم ، دیکری دائرة اتهامیه درکه طقوز اعضادن مرکبدر . بودائرلرک حکملری ثلثان اکثریت آرا ایله اولورکه موجود اعضانک اوچده ایکسینک بررأی ده بولنمی دیمکدر . یکی قانون اساسی موجبجه دیوان عالی اعضالری هپ هیئت اعیان اعضاسندن اوله جقدر .

۱۰ — امور مالیه — بر قانون ایله تعیین ایدلمدکجه هیچ بر ویرکو توزیع اولنوب آلنه ماز . دولتک عمومی مصرف ووارداتی بیلدیره ن قانونه « بودجه قانونی » یعنی موازنه عمومی قانونی دینور .

بر قانون ایله تعیین ایدلمکسزین بودجه قانونی خارجنده بر پاره صرف اولنه ماز . بوقانونک حکمی بر سنه در . هر سنه یکیدن بودجه قانونی یاییلر . مثلاً : ۳۲۶ سنه سی ظرفنده دولتک نه قدر مصرفی اوله جقسه بو حساب ایدیور . نه قدر وارداتی وار ایسه بوده حساب ایدیور . بر قانون یاییلر . ایشته بوکا موازنه عمومی قانونی دینور . بوقانون موجبجه عموم واردات بالجمله مصارفه صرف ایدیور .

هر دولتده مصرف زیاده اولور . واردات آز کلور . بوکاده بودجه آچینی دینور . کله جک سنه لرک وارداتندن صرف ایدیور تا که یکی بر واردات بولنجهیه قدر . ایشته بو موازنه عمومی

«بودجه» قانونی ۳۲۶ سنه سی ایچون تطبیق اولنور . سنه نهایتنده وارداتدن نه قدر مبلغ طویلاشمدر ومصارفه نه قدر پاره صرف ایدلمشدر بوده حساب یدیلور بر قانون یاپیلورکه بوکاده «محاسبه قطعیه قانونی» دینلور . یعنی ۳۲۶ سنه سنک حسابی محاسبه سی قطعاً کورلمش اولور بو قانون نهایت درت سنه قدر مجلس مبعوثانه ویریلور . مجلسده ۳۲۶ سنه سی ایچون یامش اولدینی بودجه قانونی موجبجه پاره صرف ایدلمشیدر ایدلمه مشمیدر تدقیق ایدر . یعنی شورایه صرف اولونسون دینلن پاره اورایه صرف ایدیلوب ایدلمدیکنی تحقیق ایدر .

برده : دیوان محاسبات واردر . اون ایکی اعضاسی واردر . بونلر اولنجه یه قدر اعضاقلده بولنورلر . مجلس مبعوثان عزللرینی ایسته مینجه عزل وتبذیل ایدلمزلر . بودیوانک وظیفه سی دفتردار ومحاسبه جیلرک حسابلرینه ونظارتلردن یاپیلان وسال محاسبه سی دینلن حسابلره باقار . وتدقیقات و تحقیقاتی هر سنه مجلس مبعوثانه و هر اوچ آیده بر کرده صدر اعظم واسطه سیله ده ذات شاهانه یه ویرر .

۱۱ — ولایات — ولایتلرک توسیع مأذونیت و تفریق وظائف قاعده سی اوزرینه اداره اولنورلر توسیع مأذونیت دیمک هر ولایت ، یاپلمسی لازم اولان ونه کی شیلردن عبارت اولدینی برنظام و اصول ایله معین بولنان ایشلری ، حکومت

مرکزیه دن یعنی استانبوله صور مقسزین کندی کندیسنه یامسی دیمکدر. مثلاً: بر قصبه ده بیک لیرا صرفیه بر کوپری یاییلمسی لازم کلدکده بونی اوولایت استانبوله دانیشمه دن صورمه دن یابه بیلر فقط اوولایت اهاالسی بوسنه اعشار ویرلسون ویاخود بوسنه ایکی قات اغنام ویرلسون کی برشی یاپاماز چونکه بوکی شینلر عمومیدر. ولایاتک وظیفه سی خارجنده در. تفریق وظائف دیمکده هر دائره نک کندی وظیفه سی معین اولدیغدن بر برلرینک وظیفه لرینه مداخله ایتمایلی دیمکدر .

هر مرکز ولایتده سنه ده بر دفعه بر مجلس عمومی ولایت طویلانور. بو مجلسلر ولایتده یوللر یاییلماسنه و تجارت و زراعتک ایلری له مسنه و مکتبلر آچیلماسنه و سائر ایشلره باقارلر . هر ولایتده اوقافک محافظه سی چون براوقاف قومیسونی و سائر جماعتلرکده کندی کلیسا و خیراتلرینک اداره سی ایچونده اهاالی دن مرکب قومیسونلری بولتیور .

استانبولک وهر ولایتک بلدییه سی اهاالی طرفدن انتخاب اولنان بلدییه مجلسلری واسطه سیله اداره اولنور بونک ایچوندم آبروجه بلدییه قانونی واردر .

۱۲ — مواد شتی — ممالک عثمانیه نک بر جهتنده اختلال ظهور ایدر ایسه اومحله مخصوص اولمق اوزره حکومت « اداره عریفه » اعلان ایدر .

اداره عرفیه، قوانین و نظامات ملکیه نك و محاكم عدلیه نك موقه تعطیلله او محلك نظامات عسکریه ایله اداره سی دیمکدره. اداره عرفیه اعلان اولنان محللره آسایش زمانه مخصوص اولان قانونلر تطبیق واجرا اولنماز. هیئت عسکریه نظامات شدیدہ ایله او محلی اداره ایدر. وقوعبولان جرملر دیوان حربلرده محاکمه اولنور. اداره عرفیه نك ناصل اوله جغنه دائر برقرار نامه واردر. عثمانلی چوققلری ایچون مکتب ابتدائیه ده او قومق مجبوریدر.

قانون اساسینك بر ماده سی بیله هیچ بر سبب و بهانه ایله تعطیل ویا اجرادن اسقاط ایدیله مز. فقط قانون اساسینك تبدیلی هیئت وكلا ویا خود هیئت مبعوثان ویا هیئت اعیانندن بری طرفندن تکلیف اولنورسه اولاً: مجلس مبعوثانده، صکره مجلس اعیانده مذاکره اولنون قانونك تبدیل و تعدیلنه ثلثان اکثریتله قرار ویرلدکدن صکره او قرار صدراعظم طرفندن ذات شاهانه یه عرض اولنور اراده سنیه سی چیقارسه قانون اساسی تبدیل ایدلمش اولور.

۶ - قوای مؤسسه وقانون اساسی ایله

تأمین اولنان حقوق

قوای مؤسسه، بر حکومتی اداره ایدن قانونی قوتلردیمکدر.
 بوقوت حکومت مطلقه ده حکمدارک النده در. حکومت مشروطه
 وجهوریه ده، ملتک النده در.

حکومت مشروطه وجهوریه ده قوای حکومت اوچدر.
 برنجیسی : قوه تشریعیه - قانونیه درکه مجلس اعیان و مجلس
 مبعوثان دن عبارتدر. بونلز دولتک اداره سی ایچون لازم اولان
 اک اوفق قانونلره وارنجه یه قدر قانون تنظیم ایدر لر.

ایکنجیسی : قوه اجرائیه درکه حکمدار، هیئت وکلا
 وسائر مأمورین حکومت دن عبارتدر.

قوه اجرائیه، قوه تشریعیه طرفندن تنظیم اولنوبده
 کندیلرینه ویریلان قانونلری تطبیق واجرا ایدر. برشی حقنده
 قوه تشریعیه بر قانون یاپوبده قوه اجرائیه یه ویرمدکجه قوه
 اجرائیه اوشی حقنده برشی یاپاماز. مثلا : قوه تشریعیه،
 اهالیدن شو صورتله شویله برویرکو آلنسون ویاخود حکومته
 بر زرهللی کمی لازمدر. شوپاره آلنسون دیه بر قانون یاپار،

قوة اجرائیه یعنی هیئت وکلایه ویرر . هیئت وکلاده ویرکو
آلتامسیچون اولان قانونی مالیه ناظرینه، زرهللی کمی آلتامسیچون
اولانی ده بحریه ناظرینه ویرر . اولرده اوقانون دائره سنده
ویرکو آلور . وکمی صاتون آلیز . قوة تشریعیه کندی یاپدینی
قانونی کندیسی اجرا ایده مز . قوة اجرائیه کنیدیسی قانون
یابوده اوقانونله ایش کوره مز .

اوچنجیسی : قوة عدلیه درکه هیئت عدلیه وبالجمله محکمه لردن
عبارتدر . بو قوت افراد ملتک احقاق حقنه یعنی اهلینک حقن،
محافظه وامنیت وآسایش عمومیه بی اخلال ایدن ، بو زانلره
وبرجرم وجنایت ایشلیانلره لازم کلن جزالری ویرمکه مأمور
برقوت برهیئتدر . کرک وظیفه وکرکسه صلاحیت جهتله غایت
بیوکرر ومستقلدر . قوة عدلیه ، حقوق عمومیه وحقوق
شخصیه متعلق اوله رق قوة تشریعیه نک یامش اولدینی قانونلری
بیوک برصلاحیت ایله تطبیق و اوقانونلر موجبنجه حکم ایدرلر .
مثلا : قوة تشریعیه ، آدم اولدیره نک اعدام ایدلمسیچون برقانون
یاپار . قوة عدلیه ، یعنی محکمه لر بویله برآدم اولدیره نک اعدامنه
حکم ایدرلر . فقط کندیلری اعدام ایتمزلر ، اعدام اولنمق
اوزره قوة اجرائیه امر ایدرلر ویررلر . قوة عدلیه حبسنه
حکم ایتدیکی برکیمسه بی کنیدیسی حبس ایتمز قوة اجرائیه
حبس ایدر . بونک ایچون حبس خانه لرده حکومت اجرائیه تحت

اداره سنده در. قوه عدلیه نك تطبیق و حکم ایتدکلی قانونلری
 قوه تشریعیه یایار ، قوه عدلیه یی تشکیل ایدن مأمورلری یعنی
 محکمه هیئت و حاکم لری قوه اجرائیه تعیین ایدر . فقط قوه
 عدلیه بونلرک هیچ برینه مربوط دکدر . مستقل ولایتغزل
 بر هیئتدر . ایشته بر حکومت بو اوج قوتله اداره اولنور .
 بوقوتلر وظیفه و صلاحیت اعتباریله یکدیگرندن آیری و بشقه
 ایسه لرده بینه آرارلنده بر آهنگ بر اطراد بر دوزن واردر .
 قانون اساسی ایله تأمین اولسان حقوقه کلنجه : قانون
 اساسی ، حکمداره ، قوه تشریعیه « اعیان و مبعوثان » و قوه
 اجرائیه « حکومت و هیئت وکلایه » و افراد ملت « بالجمله اهالی به »
 بر طاقم حقوق و صلاحیت بخش و تأمین ایله مشدر .

حکمداره عائد اولان حقوق ، پادشاهک غیر مسئول
 اولسی ، هر نوع قانونلر تکلیفی و مجلس مبعوثانک اعتمادینی حائز
 صدراعظم و شیخ الاسلام تعیینیه دیکر وکلانک تصدیق مأمور-
 یتلری ، رتبه عسکریه و منصب توجیهی ، نشان اعطاسی ،
 ایالات ممتازده نك شرائط امتیازیه لرینه توفیقاً اجرای توجیهاتی
 مسکوکات ضربی خطبه لرده نامنک ذکر ، صلح و تجارت
 و ترک و مبادله و الحاق اراضی عهد نامه لرله تبعه عثمانیه نك
 حقوق اصلیه سی و شخصیه سنه تعلق ایدن و دولتجه مصارفی
 موجب اولان معاهداتک مجلس عمومی طرفندن تصدیق

ایدملک شرطیله عقدی ، حرب اعلانی ، قوای بریه و بحریه نك قومانداسی ، احکام شرعیه و قانونیه نك حسن محافظه سنه دوائر حکومتك معاملاتنه متعلق نظامنامه لر تنظیمی ، مجازات قانونیه نك تخفیف و یاعفوی و مجلس عمومینك تصویبیه عفو عمومی اعلانی ، مجلس عمومینك وقتنده عقد و تعطیلی ، مجلس عمومینك احوال فوق العاده ده وقتندن اول اجتماعه دعوتی مجلس مبعوثانك لدی الاقتضا اوج آیده بشقه سی انتخاب اولمق اوزره ^{مجلس} دخی حقوق پادشاهیدندر .

فوة اجراییه « هیئت وکلا » نك حقوقی ایسه : دولتک داخلی و خارجی سیاستنی « پولتیقه سنی » مذاکره و اداره ایتمک هر ناظر نظارتنده کی مأمورلری تعیین ایدرک اصول و نظام دائره سنده نظارتنك امور و خصوصاتی رؤیت ایتمک ، مجلس عمومینك قراریه و وظیفه موکوله و مأموره لرندن طولایی دیوان عالی ده محاکمه اولمق ، قانون یا پلسنی تکلیف ایتمک ، دولتی و مخاطره دن و امنیت عمومییه و قایه ایچون قانون اساسی احکامنه مغایر اولماق اوزره موقه قانون یا پمق ، بر محله اختلال ظهور ایدرسه اداره عرفیه اعلان ایتمک ، دن عبارتدر .

قوة تشریعیه « مجلس اعیان و مبعوثانك » حقوقی دخی ، قانون تکلیف ایتمک ، تکلیف اولنان قانونلری قبول و یاردا ایتمک ،

موازنه عمومی «بودجه» قانونی یا بقی یعنی هر سنه دولتک وارداتی حساب ایدهرک مصارفی تعیین ایتک ، عدم اعتماد بیانیه هیئت وکلای اسقاط ایتک ، وکلانک محاکمه آلتنه آلتسنه قرار ویرمک وکلای وظیفه مأموره لرندن طولای محاکمه ایدوب جزا تعیین ایتک ، هیئتک قرارى اولمدجه اعیان و مبعوثان اعضاسندن برینک دردست و محاکمه اولنهمامسى ، مجلس عمومی «قوة تشريعه» طرفندن تصدیق ایدلمکسزین عفو عمومی اعلان اولنهمامسى واجنبی دولترلله معاهده عقد ایدیلهمامسى ، مجلس عمومینک هر سنه بلا دعوت طولایمسی کبی خصوصاتدر . افراد ملتۀ تأمین اولنان حقوقده : عثمانیلرک کافهسى حریت شخصیه لرینه «قانونک تعیین ایتدیکی سبیدن ماعدا بر بهانه ایله چپس ونفی ایدلماک دیمکدر» و حریت مذهبییه «هرکسک منسوب اولدیغی دینی سربستجه اجر ایتمسی» و حریت وجدانه «هرکسک دیله دیکی اعتقاد واجتهادده بولمسی» و حریت اجتماعه «آسایش مملکتی اخلال ایتماک شرطیله سلاحسنز اوله رق بر محله طولایمغه ، میتینگ یایمسی» و حریت کلام و بیان «کیمسه نک حقوق و خبیثته طوقونماق شرطیله ایسته نلدیکی کبی دیله دیکی لسانله کتاب و غزته باصمسی» و حریت تدریساته «هرکسک ایسته دیکی کتابی دیله دیکی لسانی اوقومسی و اوقومسی و نظامی دائره سنده عمومی و خصوصی مکتبلر آچمسی» و حریت شرکت

و تجارت « هر كسك ايسته ديكي كي و ديله ديكي كيمسه لرايله شركت ايدرك يساق اولمايان كافه اموال اشياي صامسي » و حریت شكايته « حقسزلق كوره ن هر كسك مأمورلردن شكایت ایتسی و حقارنده دعوا ایدیه یلمسی » و حریت سیرو سیاحت « هر كسك ايسته ديكي يره ديلديكي مملكتته كیده یلمسی » حقوقدن عبارتدر .
 [حریت ديمك — قانون اساسينك تعريفی وجهله —
 آخر بر كيمسه نك حقوق حریتنه تجاوز ایتما مكله مكلفیت ديمكدرد . یعنی بر كيمسه بشقه سنك حقوقنه طوقونمقسزین و ضرر ویرمكسزین ديله ديكي معقول شیلری یایمقدرد .] .

بونلردن بشقه هر كسی اصولاً متصرف اولدینی مال و ملكدن امین در . هیچ بر كيمسه نك مالی دكر بهاسی ویرمكدجه آله ماز .

هر كسك مسكن و منزلی یعنی خانه سی و یا خود یاتوب قالدینی و اوطوردینی یری ولو كه بر قلیه اولسون تعرضدن مصوندر . تعرض و مداخله اولنه ماز ، قانونك تعیین ایتدیكي احوال دن واسبایدن ماعداد بر سبب و بهانه ایله حكومت طرفدن جبراً بر كيمسه نك خانه و مسكننه كیريله مز .

هیچ بر كيمسه قانوناً منسوب اولدینی محكمه دن بشقه بر محكمیه كیتمكه اجبار ایديله مز ، كوندریله مز . چونكه : هر كس اقامت ایتدیكي محل محكمه سنه تابع در اورایه كیدر .

هیچ بر کیمسه نك — قانون خارجنده — مالی ملکی حکومت طرفندن ضبط و مصادره اولنه ماز .

هیچ بر کیمسه ، — قانون خارجنده — آغاریه اوله رق اسیر کی قوللانیله ماز .

هیچ بر کیمسه دن ، — قانونك تعیین ایلدیکنی جزای تقدیدن بشقه — جریمه اوله رق اچه آله ماز و قانوناً تعیین اولنان تکالفلدن ماعدا — ویرکو و رسومات نامیله پاره تحصیل اولنه ماز هیچ کیمسه حقنده — ولوکه جانی و مجرم اولسون — اشکنجه و سائر هر نوع اذیت یاییله ماز .. ممنوعدر .

ایشته قانون اساسی ایله تأمین اولنان حقوق خلاصه بونلردن عبارتدر .

۷ — قوه عدلیه نك تطبیق و اجرا سیله

محاکمک درجات و وظائفی

قوه عدلیه ، محاکم واسطه سیله تطبیق اولنور ، یعنی قوه تشریعه نك حقوق عمومی و شخصییه دائر یابدینی قانونلر محکمه لر واسطه سیله تطبیق و حکم ایدیلور .

محاکمک درجات و وظائفی : محکمه لر باشلیجه ایکی قسمه

آریلور . بریسی « محاکم عمومیہ » دیکری ده « محاکم خصوصیه » در .

محاکم خصوصیه ، بعض خصوصاتی ، تعیین ایدیلن بعض دعواری کورور .

محاکم خصوصیه ، محاکم شرعیه « نکاح و طلاق و نفقه و مهر ، و وراثت و سایر دعواری رؤیت ایدر » و محاکم اداره « یعنی مجلس اداره لر در که ملکیه مأمورلرینک وظیفه لرندن دولایی اولان جرملرینی محاکمه ایدر . » و محاکم عسکریه « یعنی بری و بحری دیوان حربلر در که عسکر اولنلری صرف عسکری جرملرینی رؤیت ایدر . » کبی محکمه لر در .

محاکم عمومیہ ده « محاکم نظامیه محاکم عدلیه ده دینلور » محاکم خصوصیه نک رؤیت ایتدیکی دعوالر دن ماعدا بالجمله جزا و حقوق یعنی آله حق و یره جک دعوالرینی و تجارتہ عائد افلاس دعوالرینی صورت عمومیہ ده فصل و رؤیت ایدر .

بوراده هپ محاکم عمومیہ یعنی عدلیه دن بحث ایدیله جکندن محکمه دینلنجه عدلیه محکمه سی ا کلا شملیلدر محاکم عمومیہ ، ایکی درجه اوزرینه تشکیل ایدلشدر . برنجی درجه سنه « بدایت محکمه لری » ایکنجی درجه سنه ده « استیناف محکمه لری » دینلور . بونلر فوقنده ده — درجات محاکمدن معدود یعنی اوچنجی درجه بر محکمه اولیه رق — محکمه تمیز واردر .

ممالك عثمانیه نك هر قضا سنده بر بدایت محكمه سی وارد ر .
 بر رئیس ایکی اعضا سی بر مدعی عمومی معاونی و یا خود بر مدعی
 عمومی معاونی و کیلی ، بر مستنطق و یا خود بر مستنطق معاونی ،
 بر باشکاتب لزومی قدر کاتب و مباشری وارد ر . بو محكمه لر
 جزا جهتدن قباحه دعوالرینی - یالکز قابل تمیز اولمق
 اوزره - قطعاً و جنحه دعوالرینه ده - قابل استیناف و تمیز
 اولمق اوزره - استینافاً حکم ایدر لر . یعنی قباحه دعوالری
 استیناف اولنه ماز . یالکز تمیز اولنور ، جنحه دعوالری ایسه
 هم استیناف اولنور و همده تمیز اولنور . جنایت فعللرینک
 یالکز تحقیقات ابتدائیه سی بدایت محكمه لری مدعی عمومی
 و مستنطق لری طرفدن یاییلور . حقوق جهتندنده ، بشیک
 غروشه قدر اولان دعوالره تمیز اولنه بیلمک اوزره - قطعاً
 و بشیک غروشدن یوقاری اولان دعوالره ده - استیناف
 و تمیز اولنه بیلمک اوزره استینافاً حکم ایدر لر . یعنی بشیک
 غروشه قدر اولان دعوالر یالکز تمیز اولنور . استیناف اولنه ماز
 بشیک غروشدن یوقاری اولان دعوالره هم استیناف همده
 تمیز اولنه بیلور . آیریجه تجارت محكمه سی یوقسه تجارت
 دعوالری ده بدایت محكمه لرنده حقوق دعوالری کی و فقط
 تجارتدن ایکی اعضا محكمه یه آله رق رؤیت اولنور .
 قضا ده اولان بدایت محكمه لرنده جزا رئیس لری و ارسه ،

جزا دعوالرینه جزا رئیس‌لری حقوق دعوالرینه ده نائبلر
«قاضی‌لر» ریاست ایدرلر . جزا رئیس یوقسه هرایکی دعواده
دخی نائبلر رئیس اولورلر .

هر سنجاق مرکزنده دخی بر بدایت محکمه‌سی واردر .
فقط سنجاق ایشلری و دعوالری چوق اولدیغندن بو بدایت
محکمه‌سی جزا دائره‌سی ، حقوق دائره‌سی نامیله ایکی قسمه
آیریلور . حقوق دائره‌سنه نائبلر ، جزا دائره‌سنه مخصوص
تعین اولنان جزا رئیس‌لری ریاست ایدرلر . سنجاق «لوا»
بدایت محکمه‌لرنده ده بر مدعی عمومی ولزومی قدر مستنطق
باش کاتب اجرا مأموری مقاولات محرری کی مأمورین عدلیه
واردر . بونلرده قضا بدایت محکمه‌لری کی کندی قضالری
داخلنده کی جزا و حقوق دعوالرینی قضا بدایت محکمه‌لرنده
تعریف ایتدیکمز کی کورورلر قضا بدایت محکمه‌لرندن هیچ
فرقی یوقدر .

فقط سنجاق بدایت محکمه‌لری بعض دعوالری استینافاده

کوریر .

یعنی استیناف محکمه‌سی صفتی و صلاحیتی واردر . شویله که
سنجاغه تابع قضالر بدایت محکمه‌لرندن حقوق و جزا دعوالرینه
دائر قابل استیناف اوله رق ویریلن حکملر لوا بدایت محکمه
لرنده استیناف اولنور . بوکی دعوالری لوا بدایت محکمه‌لری

استیناف محکمه سی صفتیله کوریر. فقط اووقت بدایت محکمه سی کبی اوچ کشی ایله دکل دیگر دائره دن ایکی اعضا آله رق بش کشی ایله رؤیت ایدر. اگر استینافاً رؤیت ایتدیکی دعوا حقوق دعواسی ایسه محکمه یه نائب واکر جزا دعواسی ایسه جزا رئیس ریاست ایدر.

بعض لوا مرکز لرنده بدایت درجه سنده آریجه بر تجارت محکمه سیده بولنورایدی. شمدی تجارت محکمه لغو اولندیغندن بدایت حقوق، تجارت دعوالرینه ده باقار.

لوا بدایت محکمه لری اوسنجاق داخلنده وقوعبولان جنایت دعوالرینه ده اصول ونظامی دائره سته استیناف محکمه سی کبی بش کشی اوله رق رؤیت ایدر. ممالک عثمانیه ده هر ولایت مرکزنده براستیناف محکمه سی واردر. استیناف محکمه لری بر رئیس درت اعضا یعنی بش کشی دن مرکبدر. محکمه موجودندن براعضا اکسک اولسه دیکرینی آلمینجه محکمه لر محاکمه اجرا ایده مزلر. بونک بعض محکمه لرده اعضا ملازملری اولور ولایت استیناف محکمه لری ایکی قسمدر. کذالک بشر کشیدن مرکب اوله رق حقوق وجزا قسملرینه آیرلشدر. بو محکمه نزدنده برده استیناف مدعی عمومیی واردر. بومدعی عمومی اوولایت داخلنده کی بدایت مدعی عمومیلرینک اداره وضابطه عدلیه جهتندن امر قانونیسی در.

ولایت مرکز لرنده لوارده اولدینی کی ایکی دائره دن مرکب برده بدایت محکمه سی واردر. بوبدایت محکمه سی مرکز ولایتده کی دعوالری بدایت و ولایتک بولندینی لوايه تابع قضالر بدایت محکمه سندن کلن دعوالری ده استینافاً رؤیت ایدر.

ولایت استیناف محکمه لری مرکز ولایت بدایت محکمه سنک بدایت و یردیکی حکملر ایله او ولایته مربوط دیگر لوارلر بدایت محکمه لرندن بدایت و یریلان حکملری استینافاً روت ایدر. برده مرکز ولایتک بولندینی لواده وقوعه کلن جنایت دعوالرینی کوریر. ولایت مرکز نده برده «هیئت اتهامیه» واردر. اوج کشیدن مرکبدر. تحقیقات محکمه سی کیدر. بونک وظیفه سی اوولایت داخلنده یعنی کرک مرکز ولایتک بولندینی لواده و کرک دیگر اوولایته مربوط سنجاقلرده وقوعه کلن جنایتلردن طولانی جنایت مظنونلرینی اتهام ایدر. برده اوولایت داخلنده کی مستنطقلرک و یردکلری قرارنامه لری تدقیق ایلر.

استانبولک محکمه تشکیلاتی بر از فرقلیدر. هر نه قدر استانبولده برولایت اعتبار اولیور سه ده دیگر ولایتلرده کی تشکیلات عدلیه خصوصنده فرق واردر. استانبولده، برنجی جزا ایکنجی جزا، برنجی حقوق ایکنجی حقوق دائره لرینه تقسیم ایدلمش بربدایت محکمه سی، بک اوغلی سنجاغنده ده کذالک درت

دائره منقسم بر بدایت محکمه سی ، اسکارده حقوق ، جزا
نامیه ایکی دائره تقسیم ایدلمش بر بدایت محکمه سی واردر .
بودایت محکمه لری نك مدعی عمومینی و برچوقده مدعی عمومی
معاونلری واردر .

بو محکمه لر قضا محکمه لری کبی دعوالری صرف بدایه
کوریرلر . بک اوغلی ، اسکار سنجاق بدایت محکمه لری نك دیگر
ولایت سنجاق محکمه لری کبی استیناف صلاحیت و صفی
یوقدر .

استانبولده ، بر استیناف محکمه سی واردر . استیناف حقوق
استیناف جنحه « جزا » نامیه ایکی دائره ایرلمشدر . استانبول
بک اوغلی واسکار بدایت محکمه لری نك حکملری بودائره لرده
استیناف اولئور . بوندن بشقه ینه استیناف محکمه سی درجه سنده
آیریمجه برده جنایت محکمه سی واردر بوده بش کشیدن مرکبدر .
استانبول استیناف محکمه سنك بر استیناف مدعی عمومی و بر
قاچده مدعی عمومی معاونی واردر . جنایت دعوالرنده اتهام
وظیفه سیله مکلف برده « هیئت اتهامیه » واردر .

استانبولده ، برنجی وایکنجی تجارت محکمه سی و تجارت
بحریه محکمه سی نامیه اوج دائره ایرلمش بدایت محکمه سی
درجه سنده تجارت محکمه لری واردر . بو محکمه لرك استانبولده

و کر کسه بک اوغلی و اسکدار سنجاقلرنده اولان تجارت دعوالرینی کورور. برنجی تجارت محکمه سی اجنیه ایله عثمانیلر آراسنده کی تجارت دعوالرینه باقار. وایکی اجنبی اعضاده بولنور درت کشی اولور. عهد و عتیقه موجبنه بویله در بو خصوصده اشاعیده مفصلاً بحث اولنه جقدر. تجارت بحریه محکمه سنده ده بحریه دعوالریله افلاس دعوالری کوریلور. بو تجارت محکمه لرینک «برنجی تجارت محکمه سندن ماعدا چونکه بدایه ویردیکی حکملر استیناف ایدلر اعاده محاکمه طریقیله ینه کنیدیسی تکرار او دعوائی کوریر» بدایه ویردیکی حکملر، استیناف حقوق محکمه سنده استیناف اولنور.

ممالک عثمانیه محکمه لرینک جمله سنک فوقنده اوله رق استانبولده برده «محکمه تمیز» واردر. اوچ دائره یه تقسیم اولمشدر. بری، بش کشیدن مرکب «استدعا دائره سی» دیگر ی، یدی کشیدن «حقوق دائره سی» دیگر ی ده کذا یدی کشیدن مرکب «جزا دائره سی» در.

تمیز، بالجمله محکمه لردن قابل تمیز اوله رق ویریلان حکملری تمیز ایدر. تمیز ایدر دیمک، طرفینی یعنی مدعی و مدعی علیه ی محکمه یه چاغیروب محکمه ایدر دیمک دکلدر. دعوائی، اوراق دعوا دن تدقیق ایدر. یولسز برشی و یا خود قانونک تطبیقنده و اصول محاکمه ده یا کلا شلق کوریر سه تصحیح ایتسی ایچون او

حکمی ویرن محکمه یه کوند ریر. تمیز محکمه سی، محکمه لر طرفندن قانونک حسن صورتله تطبیق ایدیلوب ایدلدیکنی و حکملرده برکونا خطا اولوب اولمادیغنی تدقیق ایلر.

تمیز محکمه سنده برده مدعی عمومی واردر که بوکا باش مدعی عمومی دینلور. مقدار کافی معاو نلری ده واردر. بوباش مدعی عمومی بالجمله مدعی عمومی و معاو نلرینک آمر قانونیسیدر. ایشته بالجمله محکمه لر وظیفه و صلاحیت اعتباریله تماماً مستقل اولدقلری کبی درجه درجه بربرلرینه مربوط و متصل بولندیغندن عموم محاکم عدلیه « برهیئت واحدۀ عدلیه » تشکیل ایدر.

وقوۀ عدلیه بوضورتله وجوده کلور. بو هیئتک باشنده، هیئت وکلادن برذات « عدلیه ناظری » بولنور.

عدلیه ناظری محکمه لرك حکملرینه وایشلرینه اصلا قاریشه ماز شودعوا یه بویله حکم ایدک، بوآدمه شو قدر جزا ویرک کبی اصلا برامر ویره مز. ناظر یالکز محکمه لرك اداره سنه، مأمور لرك تعیننه و محکمه لر آراسنده کی رابط و مناسبتک حسن جریاننه و صرف اداره یه، « عدلیه یه و قانونیه یه دکل » تعلق ایدن امور و خصوصاته نظارت ایدر. فقط قانوناً تعین اولنان بعض احوالده فلان کیمسه حقناده اقامۀ دعوا ایدیکز دیهرک امر ویرر. او قدردر، دعوانک صورت جریاتی و نتیجه حکمنه اصلا قاریشه ماز.

شوبیان اولنان محکمه لردن بشقه ناحیه لرده صلح مجلسلری

وارد در . کوی اختیار مجلسلری اعضاسندن درت کشتی ناحیه
مدیرینک ریاستی آلتنده طویلانه رق کویلیلر بیننده اولان دعوا
وتزاعلری صلح ایدرک تسویه ایدرلر . واکر طرفین یعنی
مدعی ومدعی علیه صلح اولمازلر سه یوزاللی غروشه قدر اولان
دعوالری قطعاً کوریرلر . قباحت دعوالرنده یکرمی بش
غروشه قدر اولان جزای نقدی یه قطعاً حکم ایدرلر . بوندن
یوقاری قباحت جزای نقدیلر وحبسی موجب قباحتلری قضا
بدایت محکمه سنده استیناف اولنق اوزره رؤیت ایدرلر . فقط
بومحکمه لر منتظم دکلدرد . .

شمی دها واسع صلاحیتده یعنی برچوق وتجارت وجزا
دعوالرینی کورمک وظیفه سیله مکلف صلح حاکملری تعیین
اولنه جقدر . بوسال حاکملری ، کویلیر کزهرک کویلیلرک
ایکیبیک بشیوز غروشه قدر اولان آلاچق وتجارت دعوالرینی
وبالجمله قباحت وجنحه دعوالرینی رؤیت ایده جکلردر .

ایکینجی باب — اصول محاکمات جزائیة

۱ — اصول محاکمه یه دائر برفکر ابتدائی

هر حکومت، کندی ممالکی داخلنده کی آسایش وامنیت
عمومیه یی اخلال وافساد ایدنلره ومملکتکته یشایان بالجمله افراد

اهالينك «يرلى اولسون اجنبى بولونسون» مال و جان و عرضى
 عليهنه تعرض و تجاوز ايلنلره جزا لر تعيين ايلر. بوهر حكومتك
 حقى و صلاحيتيدر. بونك ايچون هر حكومت نه كى فعللرى
 منع ايدوب ارتكاب ايدنلره بر جزا تعيين ايتمش ايسه بونلرى
 بر قانونه درج ايدوب نشر و اعلان ايتمشدر. بوكا قانون جزا
 دينور. قانون جزايى ايجاب ايدنلر حقنדה تطبيق ايتمك ايچونده
 محكمه لر تشكيل و مأمورلر ، « حاكملر » تعيين ايله مشدر .
 شو حالده محكمه لرك وظيفه سى ، افراد اهالى آراسنده حق
 و عدالتك تأمين و اجراسى و هر كسك بر كونا تعرض و حقنّه
 تجاوز وقوع بولورسه ، واقع اولان فعلى ، و فاعلى ، و اوفعلك
 ناصل و نه صورته وقوع بولدينى اساس و ماهيتى اعتباريله
 و اطرافيله تدقيق و تحقيق ايدرك اوفعل قانون جزاده مندرج
 منع اولنان فعللردن ايسه قانون جزانك تعيين ايتديكى جزايى
 حكم ايتمكدور . ايشته محكمه لرده محاكمه نك منتظم بر اصول
 و مطرد بر قاعده آلتنده جريان ايتسيچون اصول محاكمات
 جزائيه قانونى وضع اولمشدر .

بو قانونك اسمنندن ده آكلاشلدينى اوزره محكمه لرده
 محاكماتك نه كى اصول و معاملات دائره سنده رؤيت اولنه جغنى
 بيلدير .

اصول محاكمات جزائيه قانونى . بر جرمك فاعلنك نصل

دردست ایدیله جکی ، وجرمک علت واسبابی و درجه سی
 آکلاشلمق ایچون نصل ونه کی تحقیقات و تدقیقات اجرا
 اولنه جنی و فاعل جرمک و شاهد لرك نصل استنطاق و استجواب
 ایدیله جکی و فاعلک هانکی محکمه یه نصل سوق اولنه جنی و انای
 محاکمه ده مدعی و مدعی علیهک « مدعی و مظنون علیه » حقوق
 و مدافعه سی ناصل تأمین و محافظه ایدیله بیله جکی و محکمه جه
 ویریلان حکمک نه صووتله اجرا اولنه جنی خصوصاتی اک
 اوفق تفرعاتنه قدر تفصیل و بیان ایدر. بوقانون حق و عدالتک
 حسن صورتله تطبیق و توزیعنه خدمت ایدر. برجرمک تحقیق
 و محاکمه سننده مأمورین عدلیه ، زیاده ویا اکسک ویا خود
 یا کلش بر معامله یاهرق ویا خود بر طاقم بی کناه اولان کسانک
 حقوق ویا حریتنه و حیثیت و ناموسلرینه تجاوز ایدلمکه و ضرر
 ویرمکه اصلاً میدان بر اقاماز . مدعینک حقوقی نصل محافظه
 ایدر سه اک بیوک جرم فاعل لرینک ده حقوقی کمال عدالتله مدافعه
 ایدر. الحاصل بوقانون کرک حاکم و عدلیه مأمورلری و کرک
 مدعی و مجرملر طرفندن رهبر و دستور العمل طوتیلان بر قانوندر.
 اصول محاکمات جزائییه قانوننک وضعندن مقصد، محاکمات
 و دعاوی جزائییه ده حقیقت حالک میدانه چیقمسی اولدیغندن ،
 بومقصدک حاصل اولمسی چون اصول محاکمه جه بش نوع معامله نک
 اجرایی لازمکلور .

برنجیسی — تحریاتدر — وقوعبولان برجرمك ثبوتنه ،
 وفاعل جرمك كیم اولدیغنك تعییننه دائر اولان دلیل و اماره لری
 و جرمك اجرا سنده قوللانیلان اشیا و ادواتی آراشدیر مقدر .
 بو وظیفه ضابطه عدلیه مأمورلرینکدر .

ایکتجیسی — تعقیباتدر — اجرا قلنان تحریات نتیجه -
 سنده جرمك وقوعه کلدیکی و فاعل جرمك کیم اولدیغنی میدانه
 چیقارسه فاعل جرم حقنده مدعی عمومیلرک دعوائی اقامه
 ایتسنه تعقیبات عدلیه دینلور .

اوچنجیسی — تحقیقاتدر — حقنده اقامه دعوا اولنان
 شخصك حقیقه فاعل جرم اولوب اولدیغنی بر درجه یه قدر
 ا کلاشیله رق محکمه ده محاکمه ایدیلوب ایدلامسنه برقرار ویرمك
 ایچون اجراسی لازمکلن استنطاق واستجواب معاملاتنه و تحقیقات
 نتیجه سنده فاعل جرم محکمه یه کوندرلش ایسه محکمه ده محاکمه
 ومدافعه ایدلمسنه دینلور . بو وظیفه ده محکمه لره و حاکمه لره عائددر .

بشنجیسی — اجرا آتدر — اگر محکمه بالحاکمه فاعل
 جرمك حبسنه و یا سورلمسنه حکم ایتش ایسه بو حکم انفاذ
 ایدلمسنه یعنی فاعل جرمك حبس ایدلمسنه اجرا آت دینلور که
 بو وظیفه ده مدعی عمومیلرک طلیله قوه اجراییه یعنی ملکيه
 مأمورلری واسطه سیله ایفا ایدیلور .

ایشته احوال محاکمات جزائیة قانوننك بحث ایتدیکی مواد

ومعاملاتك خلاصه سی شوبش نوع معامله دن عبارت اولوب
برآز تفصیلاتی اشاعی ده کوریه جکدر .

٢ — حقوق عمومی و شخصیہ دعوالرینک

تعریف و تقسیم

بر جرم وقوعه کلنجه ایکی حق میدانه چیقار . بری :
اوجرمک آسایش وامنیت مشترکیه تعلقی حسیله عمومه عائد
اولان حقدربوکا « حقوق عمومیہ » دیکری ، اوجرمدن
ضرر کورهن کیمسه لره عائد بولنان حقدرکه بوکاده « حقوق
شخصیه » دینور . تعبیر دیکرله : برجرم ایشله ین کیمسه ، ایکی
حقه بردن تعرض وتجاوز ایتش اولور .

بری ، آسایش عمومینک اخلاال ایدلسندن طولایی عموم
خلقک « هیئت اجتماعیہ نک » معنأ حق اولوب « حقوق عمومیہ »
دیکری او جرمدن طوغریدن طوغریه ویاخود طولایسیله
ضرر کورهن کیمسه لره ماده حق اولوب « حقوق شخصیہ » در .
مثلا : برکیمسه دیکر کیمسه نک مائی چالسه ، اول امرده
شوخرسزلقدن طولایی عموم خلقک آسایش وامنیتی اخلاال
ایدلش وبالجمله افراد اهالی « بنمده مالم چالینه حق » قورقوسنه

دوشوريلهرك - كويا برينك مالى چالمنغله هر كسك مالندن برر
 پارچه چالمنش كې - هيچانه كتيرلش اولمسندن « حقوق
 عموميه » .. حاصل اولور . وبوصورتله تعرض اولنان عمومك
 حقى تعمير و تاامين ايتك بوزيلان آسايش و امنيتى اعاده
 ودوزلتك وبوكې خرسزقلارك اوكنى آلق ايچون اوخرسزم
 جزا تعين اولنق اوزره حكومت ، عموم خلق نامنه اوخرسز
 عليه دعوا اقامه ايتديرر كه بوكا « حقوق عموميه دعواسى »
 دينور . برده خرسزلق نتيجه سى اوله رق مالى چالينان كي مسه نك
 مالك ضايع و غائب اولمسندن طولايى مالا و ماده ضرر
 كورمسندن « حقوق شخصيه » وجوده كلير . بونك ايچونده او كي مسه
 مالك كيرو آلمنى و يا خود پاره سنى و يرمنى خرسزدن
 طلب و دعوا ايدر كه بوكاده « حقوق شخصيه دعواسى » دينور .
 خلاصه : بر جرم وقوعه كلنجه ، برى عموم خلقه « هيئت
 اجتماعيه » ديكرى ده ، جرمدن ضرر كوره ن شى خصه عائد
 اوله رق ايكي حق وجوده كلير . عمومك « هيئت اجتماعيه نك »
 استعمال ايده چكى حق فاعلى جزايه چارپمسندن ، ضرر كوره ن
 شخصك ايستيه چكى حق ده ضرر وزيانك آلمسندن عبارتدر .
 اولكيسنه حقوق عموميه ، ايكنجيسنه حقوق شخصيه ديرلر .
 بناءً عليه : جهت جزائيه ده اصل و اساس اولان و موضوع بحث
 بولنان شى حقوق عموميه يعنى حقوق مشتركه اجتماعيه جهت

حقوقیه ده اصل و اساسی اولان و موضوع بحث بولنان شیده
حقوق خصوصیه یعنی حقوق شخصیه در .

حقوق عمومیه و حقوق شخصیه دعوالری آراسنده بیوک
فرقلر واردر . بودعوالر بر بردن مستقلا در هر نه قدر ایکسی ده
بر جرم دن وجوده کلیرایسه ده اسباب و حکمتلری بشقه بشقه در .
حقوق عمومیه دن مقصد ، جزا تعینی ، حقوق شخصیه دن
مقصوده ضررک تضمینی در .

حقوق عمومیه ده اصول بشقه ، حقوق شخصیه نك ده اصولی
بشقه در .

حقوق عمومیه ده اصول ، حقیقت حالک میدانہ چیقمنسی ،
حقوق شخصیه ده اصول طرفینک ادعا و مدافعه سیدر بوا یکی نوع
دعوائی اقامه ایتکده آیری آیری شخصلره عائددر . حقوق
عمومیه دعواسنی اقامه ایتک هیئت اجتماعیه به یعنی حکومتہ
« مدعی عمومیلره » حقوق شخصیه دعواسنی اقامه ایتکده
متضرر اولنلره « مدعی شخصی به » عائددر .

— تلبیه —

حقوق شخصیه ، مطلقا بر جرم دن وقوعه کلش ضرر روزیاندن
تولد ایدن برحقه دینور . جرم اولیان افعالدن ، و معاملات
سائرہ دن وقوعه کلن ضررلره « حقوق عادیه » دینور . مثلاً :

بر آدم بر کیمسه نك خانه سنده او طور یرده کیرا ویرمز . کیرا ویرمه مک بر جرم دکدر . خانه صاحبی حقوق محکمه سنده مراجعت ایدرک او کیمسه دن کیرای آلور . بودعوی حقوق عادیه دعواسیدر ، حقوق شخصیه دعواسی دکدر . چونکه : قانوناً جرم عد اولنان بر فعلدن وجوده ککش بر ضرر و زیان بر آله حق بر تضمینات دکدر .

برده : هر حقوق شخصیه دعواسی بر جرم دن حصوله کلور ، فقط هر جرم دن حقوق شخصیه دعواسی وجوده کلز مثلاً : تشبث جرم ، تشهیر سلاح بونلرده قانوناً مجازات ایدیلور برر جرمدر . فقط بونلردن حقوق شخصیه یی موجب بر ضرر و زیان کلز . بونلردن طولاییده حقوق شخصیه دعواسی اقامه اولنه ماز .

حقوق شخصیه اوچ قسمدر . بری ، طوغریدن طوغرییه جرم دن حاصل اولان ضرر و زیاندر .

دیگری . النان اموال و اشیانک استرداد یی یعنی کرییه آلتسیدر . اوچنجیسی ده مصارف محاکمه دن عبارتدر . مثلاً : بر کیمسه دیگر کیمسه نك دکاننده کی الماسلری چالسه و دکانی ده یاقسه او کیمسه «مدعی شخصی» هم الماسلرینک کندیسنه ویرلسنی وهمده یانان دکاننک قیمتی ، هم محاکمه ایتمک ایچون صرف ایتدیکی پاره لری فاعل جرم دن دعوی ایدر که بونک هر

اوجیده جرم‌دن حاصل اولمش ضرر و زیان و بناءً علیه حقوق
شخصیه در.

۳ — بودعوارلرک کیملر طرفندن نه کبی شرائط دائرة سنده اقامه ایدیله جکی

حقوق عمومیہ دعوالری، هیئت اجتماعیہ «حکومه» عائد
اولدیغندن، حکومت بودعوالری اقامه و تعقیب ایتمک ایچون
برطاقم مأمورلر تعیین ایتشدیر بونلره «مدعی عمومی» دینور.
بناءً علیه حقوق عمومیہ دعواسنی اقامه ایتمک مدعی عمومیلره
تودیع واحاله ایدلمشدر.

شوحالده حقوق عمومیہ دعواسنی اقامه و تعقیب ایدنلر:
اولاً: استیناف و بدایت مدعی عمومیلرله، معاونلری.
ثانیاً: قضا بدایت مدعی عمومی معاونلری، و مدعی عمومی
معاونی بولنمیان قضاالرده وکیللری اولان پولیس و ژاندارمه
مأمور و ضابطلری.

ثالثاً: اورمان دعوالرنده اورمان مفتشی و قولجی باشیلری
و بعض کمرک دعوالرنده رسومات مأمورلریدر.

مدعی عمومیلر، بر «هیئت واحده عدلیه» تشکیل ایدرلر.
یعنی بونلر قانوناً و وظیفهً بر برینه مربوط و متصلا درلر. مدعی

عموميلىك هيئتي ۱ — باش مدعى عمومى ۲ — استيناف مدعى عمومىلىرى ۳ — استيناف مدعى عمومى معاونلىرى ۴ — بدايت مدعى عمومىلىرى ۵ — بدايت مدعى عمومى معاونلىرى ۶ — بدايت مدعى عمومى معاونلىرىنىڭ وكىللىرى اولان پوليس وژاندارمه مأمورلىرىدر .

مدعى عمومىلىرىڭ حقوق عمومىه دعواسنى اقامه وتعتقيدهكى صلاحيتلىرى پك بيو كدر .

مدعى عمومىلىرى نىزدندە بولندىقلىرى محكمه يه تابع دكلدرلىر ، فقط محكمه نىڭ اجزاسىندىدر ، مدعى عمومىسىز محكمه تمام اولماز . مدعى عمىلىر ، حقوق عمومىه دعواسنى ترك وبودعواند صالح اوله مازلىر . چونكه حقوق عمومىه دعواسى حكومته عاندر بوندن واز كچمىك ، عفو ايتىمىك حكومته ، رئيس حكومت اولان پادشاهه عاندر .

مدعى عمومىلىر ، وقوعبولان برجرمى بش صورتله خبر آله بىلىرلىر . بونلرده :

۱ — ولوله ناسدن «برجرم وقوعنده اهالى يىنىنده اولان هييجان وفرياددن وحاصل اولان قىل وقالدىن» .

۲ — ضبط ورقه لرندىن «جرملىرى تحرى يه مأمورا اولان ضابطه مأمورلىرى طرفىن ويريلان ضبط ورقه لى وراپورلىرىدن»

۳ — اخبارنامه لردىن «كرىك مأمورلىرى طرفىدىن وكر كىنه

اهالی طرفندن ویریلان اخبار ورقلری ویاخود شفاهاً واقع اولان خبرلردن».

۴ — شکایتنامه لردن «جرمدن ضرر کورنلر طرفندن ویریلان عرضحاللردن»

۵ — حقوق شخصییه دعوا واستدعالرندن «جرمدن ضرر کوره نلر جرمی خبر ویرمکله برابر حاصل اولان ضرر و زیاننک اوده نمنسنی ده دعوا ایچون ویردیکی عرضحاللردن» عبارتدر.

حقوق عمومییه دعوا سنک کیملر طرفندن اقامه و تعقیب اولنه جنی اکلاشادی. شمدی ده بودعوا کیملر حقنده وعلپهنده اقامه اولنه بیله جکنی بیان ایده لم :

حقوق عمومییه دعواسی ، جرم طوغریدن طوغرییه ویاخود طولایسیله کیملر طرفندن ایشلنمش ایسه آنلر حقنده وانلرک شخصی علیهنده اقامه اولنور. بونلر ده: اصل فاعل جرملر آمر مجرلر «برجرم ایشلنمک ایچون جبر و تهدید ایدنلر» و شریک جرملر «جرمک ایشلنمه سنه واسطه اولنلر» و معین جرملر «جرمک ایشلنمه سنه معاونت ایله ینلر» و مسئول بالمال اولنلردر [مسئول بالمال اولانلر دیمک، جرمک وقوعندن طولای حاصل اولان ضرر و زیانی اوده مسی لازمکن کیمسه لر دیمکدر. هر جرمدن حاصل اولان ضرری فاعل جرم تضمین ایدر. فقط

بر قاج نوع جرم وارد رکه جرمی یاپان یالکز جزا کوریر .
 بشقه سی ده ضرر تضمین ایدر . مثلاً استانبول تراموای شرکتی
 آرابه چیلرندن بری بر آدم چکنه سه جزای آرابه جی کوریر .
 او آدمک دیتی ده قومپانیا ویرر . ایشته بو جرم ده قومپانیا مسؤل
 بالمال اولدیغندن قومپانیا حقنده ده حقوق عمومیه دعواسی اقامه
 اولنور] .

حقوق عمومیه دعواسنی اقامه ده کی شرطلر

علی الاطلاق مجازات قانونیه اجراسنی دعوا ایتک ، یعنی
 حقوق عمومیه دعواسنی اقامه و تعقیب ایتک مدعی عمومیلره
 تودیع ایدلش اولدیغنی بیان ایلشدک .

بودعوالری اقامه ایچون مدعی عمومیلر محکمه لردن وسائر
 طرفلردن امر آلمغه و رای صورمغه قطعاً مجبور دکلدرلر .
 مدعی عمومیلر کندیلرینه تودیع و حواله اولنان بودعوالری ،
 و وظیفه لرینی قانون و اصولی ، وقناعت وجدانیلری دائره سنده
 اقامه واجرا ایدرلر .

یعنی مدعی عمومیلر ، هر حقوق عمومیه دعواسنی اقامه یه
 مطلقاً مجبور دکلدرلر ؛ و ایسته دکلری حقوق عمومیه دعواسنی
 اقامه ایتک و ایسته مدکلرینی اقامه ایتماک کبی برحق اختیار ده

مالك دكلردر . بو خصوصده بعض مستثنا حاللر، و شرطلر
واردر شويله كه :

مدعى عمومىلر ، بعض حقوق عموميه دعوالرينى اقامه
و تعقيده مختار ، و بعضيلرينى اقامه و تعقيه مجبور ؛ بعضلرينى ده
اقامه و تعقيدن عاجز و ممنوع ديرلر .

مدعى عمومىلرك ، اقامه و تعقيده مختار اولدينى دعوالر :
اخبار و شكايه صورتيه مدعى عمومى يه خبر و يريلن ماده لردر كه
مدعى عمومى بونلرى تدقيق ايدرك حقوق عموميه يه تعلق ايدر
بر جرم كوريرسه اقامه دعوا ايدر كورمزسه صرف نظر ايدر .

مدعى عمومىلرك اقامه و تعقينه مجبور اولدينى دعوالرده :
عدليه ناظرينك و جنايت محكمه لرينك « ماده - ۳۱۱ » و هيئت
اتهاميه لرك « ماده - ۲۱۷ » امر ايتديكى و مدعى شخصيلرك
باستدعا طلب ايلديكى دعوالردر . عدليه ناظرى امور عدليه ده ،
حكومت اجرائيه نك اك بيوك مأمورى بولنديغندن قانوناً تعيين
اولنان بعض احوالده ايجاب ايدن بعض اشخاص حقنده اقامه
دعوا اولتمسنى مدعى عموميله امر ايدركه بو صورته اقامه
دعوى ايتكه مدعى عموميلر مجبورلر .

محكمه جنايته ، هيئت اتهاميه ده ، رؤيت ايتدكلرى بر دعوا دن
طولايي بشقه كيمسه لر حقنده دعوى اقامه سى ايجاب ايدورسه
انلر حقنده اقامه دعوا ايتسنى مدعى عموميله امر ايدر .

مدعی شخصیلرده ، بر کیمسه حقنده بر جرمدن طولای
 حقوق شخصیه دعواسی اقامه ایلد کیرینی مدعی عمومی یه استدعا ایله
 مراجعت ایدر لر سه مدعی عمومی ده او جرمدن طولای اول
 کیمسه حقنده اقامه دعوا یه مجبور در . جرم ثابت اولما زسه
 حقنده دعوی اولنان کیمسه ، مدعی شخصیدن ضرر و زیان
 و اعاده حیثیت دعواسی ایدر .

مدعی عمومی لر بو اوچ صورتله اقامه دعوی ایتمه مجبور
 ایسه لرده بو دعوا لر دن طولای محکمه لرده قناعت وجدانیه لر ی
 دائره سنده سوز سویلر .

بو خصوصده مدعی عمومی لر ک قلمی امره تابع ایسه ده ،
 وجدانلری دائما حردر .

مدعی عمومی لر ک اقامه و تعقیبندن عاجز و ممنوع بولند قلری
 دعوا لر دخی ، اسباب تأخیریه ، اسباب مانعه ، اسباب سقوطیه دن
 طولای اقامه و تعقیب اولنه میان دعوا لر در .

برنجیسی — اسباب تأخیریه ، یعنی : حقوق عمومی ده دعوا سنک
 اقامه سنی و یا خود تعقیبنی موقه تأخیر ایدن سبیل در در که بش
 نوعدر .

۱ — اقامه دعوا نك رخصت رسمیه یه وابسته اولمیدر .
 با اراده سنیه نصب ایدلش اولان مأمور لر و ضابطان و امرای
 عسکر یه حقنده اقامه دعوی ایچون اراده سنیه صادر اولنجه یه
 قدر مدعی عمومی لر اقامه دعوی ایده مز لر .

۲ — اقامه دعوانك استدعا ايله شكایت ایدلسنه متوقف بولنمیسدر. بناءً علیه بر خاتون علیهنه عرض دعواسنده زوجی ویا ولیسی طرفندن، رضا ايله اولان ازاله بکر ماده سنده قیز ویا ولیسی طرفندن وسب و شتم یعنی اطاله لسان دینلن ماده لرده سوکولن کیمسه لر طرفندن، بلاذن صید و شکار ماده سنده مال صاحبی طرفندن، علامت فارقه تقلیدندن طولای صاحب امتیازی طرفندن، مطبوعات ايله اولان ذم و قدح دعواسنده ذم اولنان کیمسه لر طرفندن عرضحال ویریلوب حقوق شخصییه دعواسی اقامه اولندجه مدعی عمومیلر طوغریدن طوغرییه اقامه دعوی ایده مزلر.

۳ — مسئله مستأخره در. یعنی اقامه اولمش بولنان بر دعواده مسئله مستأخره ظهور ایدر سه تعقیب اولماز دیمکدر. «مسئله مستأخره» شول بر مسئله در که تسویه و حل اولندجه حقوق عمومییه دعواسی رؤیت و فصل ایدیله مز. مثلاً: اقامه ایدلمش بر سرقت دعواسنده خرسز دینلن شخص «بو مال بکا ارثاً انتقال ایتمشدر. بن مال صاحبك وارثییم، بونی چالدم، بنم اولدینی ایچون آلام» دیسه او کیمسه نك حقیقه وارث اولوب اولمادینی اکللا شلق اوزره محکمه شرعییه مراجعت اولنور. محکمه شرعییه دن بر حکم ویریلنجهیه قدر جزا محکمه سنده کی حقوق عمومییه دعواسی تأخیر اولنور. محکمه شرعییه جه اول

کیمسه نك حقیقه وارثی ایدوکنه حکم اولنش ایسه جزا تعین ایدلر. وارث اولدیغنه حکم ایدیلورسه او مالی چالمش خرسر دهرک جزا حکم اولنور. ایشته مسئله مستأخره بوکبی مسئله واعتراضلره دینلور.

٤ — جرمك ممالك عثمانیه ده تعقیبی لازم کلوب فقط فاعل جرمك ممالك اجنبیه ده بولنمسیدر. بو حالده فاعل جرم ممالك عثمانیه ده دردست ایدیلنجهیه قدر حقوق عمومیه دعواسی تأخیر ایدیلور.

مثلا: یونانستانده اوطوران بر کیمسه قلب عثمانلی پاره سی یاپوبده ممالك عثمانیه سورسه ویاخود دولت عثمانیه نك امنیت داخله سنی اخلال ایده جك ارتجاع وفسادلره جسارت ایتسه، بو آدم ممالك عثمانیه ده دردست ایدیلنجهیه قدر حقنده حقوق عمومیه دعواسی اقامه اولنه ماز چونکه کندیسی ممالك اجنبیه ده در. ٥ — مظنون علیه و متهملرک جنت حالده بولنمسیدر.

بر کیمسه مجنون اولدیغی حالده بر جرم ایشلرسه معافدر. فقط عقلی باشنده ایکن ایشلیوبده، طوتوله رق محاکمه اوله جنی زمان مجنون اولورسه حقوق عمومیه دعواسی تأخیر ایدیلور. او آدم ایولشیرسه او وقت دعواسی کوریلور.

ایکنجیسی — اسباب مانعه، یعنی حقوق عمومیه دعواسنك اقامه و تعقیبه مانع اولان سیبلر درکه درت نوعدر.

۱ — اقربا بیننده و زوج ایله زوجه آراسنده وقوعه کلن اخذ و سرقت ماده لریدر .

بوده بر جرم اولدینی حالدہ قانون عائله بیننده کی حسن امتزاجی بوزمامق ایچون مدعی عمومیلری اقامه دعوا دن منع ایتمشدر .

۲ — قیز قاجیرمق و رضا ایله بربالغه نك بکرینی ازاله ایتک فعللرنده نکاح وقوع بولورسه بوجرملری ایشله ین کیمسه لر حقنده مدعی عمومی اقامه دعوی ایده مز . ایتش ایسه تعطیل ایدر .

۳ — دیار اجنبیه ده کرک عثمانلی و کرک اجنبی تبعه لری طرفدن ایشلنوب فقط محاکم عثمانیه ده محاکمه سی لازم کله ین جرائمدر . مثلاً: یونانستانده برعثمانلی بریونانلی بی جرح ایتسه ده ممالک عثمانیه به کلسه بوراده حقنده اقامه دعوی اولنماز .

۴ — خارج از مملکت امتیازینه نائل اولان سفرا و سائر مأمورین سیاسییه نك ایقاع ایلدکلری جرملردن طولانی مدعی عمومی اقامه دعوی ایده مز .

اوچنجیمی — اسباب سقوطیه در . یعنی حقوق عمومیه دعواسنک اقامه و تعقیبی اسقاط ایدن سبیلدرکه درت نوعدر .

۱ — فاعل جرمک وفات ایتسیدر . بر کیمسه بر جرم

ایشاید کدنصکره وفات ایدرسه حقوق عمومیه دعواسنه محل
قالماز ساقط اولور .

۲ — عفو عالی « عمومی ویا خصوصی اولور » اعلانیدر .
دولت بالجمله جرائم حقنده عفو عمومی ویاخود بعض جرملر
ویافاعل جرملر حقنده عفو خصوصی اعلان ایدرسه حقوق
عمومیه دعواسی ساقط اولور .

۳ — قضیه محکمه در . قضیه محکمه کسب قطعیت ایتمش حکم
دیملکردر . یعنی قانوناً معین اولان محکمه لردن کچهرک ویامعین اولان
مدتله مرور ایدرک کسب قطعیت ایدن حکملر در .

مثلاً : برسرقت فعلندن دولایی بر کیسه نك برائتنه حکم
اولنوبده اوحکم استیناف وتمیز ایدیلهرک تصدیق ایدیلوب کسب
قطعیت ایتدکدن صکره « بشقه سرقتدن دکل » اوسرقت فعلندن
طولایی فاعل جرم اولدینی صکره دن اکلاشله بیله اول کیسه
حقنده اقامه دعوی اولنه ماز .

۴ — مرور زماندر . بر جرمک وقوعندن صکره قانوناً
تعین اولنان زمانله مرور ایدنجه او جرمدن طولایی آرتق
حقوق عمومیه دعواسی اقامه اولنه ماز .

مثلاً : بر کیسه بر آدمی خفیف صورتنده ضرب ایتمسه ،
بوجنجه در . جنجه نك مرور زمانی اوچسنه در . بو اوچسنه
ظرفنده او کیسه حقنده اقامه دعوی اولنمیویده اوچسنه صکره

اقامه ایدیه مز. چونکه او چسبه کچنه حقوق عمومیه دعواسی ساقط اولور. مرور زمان بختنده تفصیلات ویریه جکدر.

ایشته یوقاریدن بری بیان اولنان احوالده مدعی عمومیلر اقامه دعوی ایده مدکلری کبی ضابطه عدلیه مأمورلری ده تحریات و تحقیقات اجرا ایده مز لر.

حقوق شخصیه دعوالری؛ مدعی شخصیلر طرفندن اقامه و تعقیب اولنور. یعنی وقوعه کلن بر جرمدن طولای کیمه بر ضرر و زیان کلش و کیمک حقنه تعرض ایدلمش ایسه او کیمسه لر عر ضحال ویره رک «حقوق شخصیه دعواسی» ایده بیلور لر. بو حالده مدعی عمومی ده حقوق عمومیه دعواسی اقامه ایتمک مجبور اولور.

مدعی شخصیلر، وقوعه کلن بر جرمدن طولای مطلقا حقوق شخصیه دعواسی اقامه سنه مجبور دکلر در. ایسترلر سه اقامه دعوی ایدر لر، ایسترلر سه کندیلرینک حقوق شخصیه سندن طولای فاعل جرم ایله صلح اولور لر، ایسترلر سه ده بتون بتون حقلرندن واز کچر لر. چونکه حقوق شخصیه دعواسنک هیئت عمومیه یه اسایش مملکته طوقونور بر جهتی یوقدر. مدعی عمومی به حقوق عمومیه دعواسنی تعقیبده دوام ایدر طوریر. حقوق شخصیه ترک اولنمقله حقوق عمومیه ساقط اولمدینی کبی حقوق عمومیه عفو اولنمقله ده حقوق شخصیه ساقط اولماز.

حقوق شخصیه دعواسی ، فاعل جرم وفات ایدرسه ساقط اولماز. فاعل جرمك ورثه سی حقنده مدعی شخصی اقامه دعوی ایدر .

فقط فاعل جرم وفات ایدنجه حقوق عمومیه دعواسی ساقط اولور . مدعی شخصیلر ، حقوق شخصیه دعوالرینی ، ایسترلرسه حقوق عمومیه دعواسیله برابر جزا محکمه سینه ، ایسترلرسه آیرنجه حقوق محکمه سینه اقامه ایدرلر .

حقوق شخصیه دعواسنی اقامه یه صلاحیتی اولانلر :

حقوق شخصیه دعوالری ، مدعی شخصیلر ، ویاخود وکیللری طرفندن ، ومدعی شخصی لر چوجق اولق ومجنون ومعتوه بولنق کبی برحالد ایسته لر ولی ووصیلری طرفندن ، ومدعی شخصی اوقاف وخزینۀ مالیه کبی دائره دن عبارت ایسه اوقاف متولیلری ویت المال مأمور وخزینۀ وکیللری طرفندن وبرجمیت وبرشرکت کبی بر شخص مغنوی ایسه اعضالری ویا مأذون وکیللری طرفندن ، ومتأهل برقادین ایسه یا کندیزی ویاخود وکیل طبعیسی اولان زوجی طرفندن ، ومدعی شخصی کوره ک جزاسیله مؤبدأ محبوس ایسه حکومت طرفندن تعیین اولنان وکیل امورلری طرفندن ومدعی شخصی اولان کیمسه وفات ایتمش ایسه ورثه سی طرفندن اقامه وتعقیب دعوا اولنور .

حقوق شخصیه دعواسنی اقامه ده کی شرطلر :

حقوق شخصیه دعواسنك اقامه و تعقیبنده لازم اولان شرطلر اوچدر .

۱ — مدعی شخصینك یعنی حقوق شخصیه دعواسنی اقامه و تعقیب ایده جكلرك صفت و صلاحیت قانونیه لری بولمسیدر .
بونی بالاده ذکر ایتدك .

۲ — حقوق شخصیه به اساس اولان ضرر و زیانك شخصی اولسی و یا خود شخصه عائد بولمسی لازمدر . یعنی حقوق شخصیه دعواسی مدعی شخصینك کنديسنك و یا خود و لیس و وصیسی و یا خود و کیلی بولندیفی کیمسه لرك مال و جان و عرضنه مخصوص و متعلق و عائد بولمسیدر . مثلاً : بر محله و چارشو خلقنك عمومیه بردن اولان بر ضرر و زیانك طولایی ایچلرندن بریسی عموم نامنه « وکالتی اولقسزین » اقامه دعوی ایده مز . فقط بر کیمسه اولادینه و یا خود حرمنه و قوعبولان بر ضرردن طولایی طوغریدن طوغری به « بلا وکالت » اقامه دعوی ایدر .

۳ — حقوق شخصیه دعواسنه اساس اولان ضرر و زیانك

واقع و محقق اولسی ، ملحوظ و محتمل اولماسیدر . یعنی بر جرمندن وقوعه کلن ضررك تحقق ایتسی و وجوده ککش بولمسی لازمدر . یوقسه ایلروده وقوعه کله بیله جك اولان و یا خود کلکی احتمال دائره سندن بولنان ضرر و زیانك طولایی حقوق شخصیه دعواسی اقامه اولنه ماز . مثلاً : بر کیمسه دیگر بر

کیمسه نك صاغيلور اينكنی چالهرق کسوب صاتسه، اينكك صاحبي هم اينكي و همده اينكي کسيلمسه ایدی شوقدر اوقه ياغ يابهرق بوقدر غروشه صاتمئش اوله جفندن اومقدار پاره نك دخی تضمين ايدلمسنى دعوا ايتسه يالکز اينه كنك قيمتى اولان پاره ويريلوب حاصل اوله جق ياغك پاره سنه حکم ايدلنز .

۴ — بوعوارلك نه صورتله وجود بولدينى :

برجرم وقوعه كلنججه « حقوق عموميه » و اوجرمدين برضرر حاصل اولنججه « حقوق شخصيه » وجوده كلديكنی بيان ايله مش ايدك .

« حقوق عموميه » دعوالرى ، مدعى عمومى طرفندن على الاصول اقامه دعوى اولمق ايله وجود بولور . مدعى عموميلر ، اخبار ، شکايت واستدعاى شخص ايله برجرمك وقوعه كلديكنی آکلانجه اکر جرم جنایت ويا آغير جنحه لردن ايسه مستنطقه خطاباً بر « طلبنامه » ويرر و [فلانك فلانى قتل ايلديكى مربوط ضبط ورقه سندن آکلاشلماقده بولنديغندن مظنون عليه مرقوم فلان حقنده تحقیقات قانونيه اجراسى طلبيله بوبابده کی اوراق مستنطقه توديع اولندی] ديهرك اومظنون عليه حقنده مستنطقه اقامه دعوى ايدر . واکر جرم خفيف جنحه ايسه رئيسه خطاباً بر « ادعانا مه » ويرر و [فلانك فلانى ضرب ايلديكى مربوط استدعانا مه دن آکلاشلمش ومظنون عليه

مرقومك بوحرکتی جنبه نوعندن بولنش اولديغندن بالجاب
اجرای محاکمه لری طلب و ادعاسیله بوبابده کی استدعاینامه محکمه
ریاسته تقدیم قلندی [دیهرک محکمه یه اقامه دعوی ایدر .

ایشته مدعی عمومینک شوطلبنامه و ادعاینامه سیله حقوق
عمومیه دعواسی اقامه ایدلمش و وجود بولش اولور . حقوق
شخصیه دعوالری ده، مدعی شخصیلر طرفندن مدعی عمومی یه
ویا خود محکمه یه عرضحال ویره رک اقامه اولنور . و عرضحال
دفتر مخصوصنه قید اولنوب بولی یاپشدیریلنجه حقوق شخصیه
دعواسی وجوده کلمش اولور .

۵ — حقوق عمومی و شخصییه دعوالری حقنده اولان

مرور زمان مدتلرینک تعریفاتی .
مرور زمان ، وقوعه کلن برجرمدن ویا خود ویریلن بر
حکمدن صکره قانوناً تعیین ایدیلن زمانلر ظرفنده اقامه دعوی
اولتماز، حکم اجرا ایدلمزسه آرتق آندن صکره دعوا اقامه
و حکم اجرا اولنه ماز .

مرور زمان، ایکی نوعدر . بریسی قبل الحکم «حکمدن اول»
دیگری ده بعد الحکم «حکمدن صکره» اولور مرور زمان قبل
الحکم واقع اولمش ایسه حق دعوی و تعقیبی اسقاط ایدر .

یعنی مرور زمانه اوغرامش فعل ایچون دعوی اولنه ماز .
مرور زمان بعد الحکم واقع اولمش ایسه حکم اولنان مجازاتی

اسقاط ایدر. یعنی حکم ایدیلن جزا اجرا ایدلمز. اشاغی ده ذکر اولنه حق مثاللردن اکلایشیله جقدر.

حقوق عمومییه دعواسنده کی قبل الحکم مرور زمانلر :
یعنی دها هیچ دعوی اولنمهدن و محاکمه اجرا ایدیلوب حکم ویزلمهدن اولان مرور زمانلر، حقوق عمومییه دعواسنک اقامه سنه مانع اولور. دعوی اقامه اولنمه ماز .

جنایت نوعندن اولان فعللرده اوجنایتک وقوعه کلدیکی آندن اعتباراً «اون سنه» ، جنحه نوعندن بولنان فعللرده او جنحه نك ایشلندیکی وقتدن اعتباراً «اوج سنه» ، قباحت نوعندن اولان فعللرده دخی اوقباححت اجرا اولندیغی دقیقه دن اعتباراً «برسنه» کچنجه اشبو فعللردن طولایی حقوق عمومییه دعواسی اقامه اولنمه ماز . شورایه دقت ایدلملیدرکه مرور زمان جرمک ایقاع ایدلدیکی کوندن اعتبار اولور. خبراندیغی ویاخود میدانه چیقدیغی وقتدن دکلدر .

جرائم متناهییه واعتیادییه و متسلسله ده مرور زمان جرمی تشکیل ایدن اک صوک معامله دن اعتبار اولنور .

مثلاً: بر اصناف بوزوق ترازى واکسیک درهم قوللانیرکن دردست ایدلسه وبونک اوج سنهدن بری بویله یاپدیغی اکلایشله مرور زمان وار دینلهمز. چونکه اک صوک جرم یاپدیغی کون یقالانمشدر. بونده صوک جرمدن اعتباراً مرور زمان باشلار.

مرور زمان سنه قمریه هجریه ایله حساب ایدیلور . یعنی عربی تاریخله حساب ایدیلور، رومی تاریخ ایله دکلدر، بوحسابده جرمك ایشلندیکی کون ایله اقامه دعوی اولدینی کونده داخلدر . قبل الحکم مرور زمانك قطعی: مرور زمان بعض سبیلر ایله قطع اولنوب یکیدن باشلار .

مرور زمانی قطع ایدن سبیلر ایکیدر، بریسی مدعی عمومینك ویاخود مدعی شخصینك حقوق عمومیه و شخصیه دعواسی اقامه ایتسیدر .

بوحالده مرور زمان قطع اولنوب باشدن باشلار . مثلاً : ضرب اولنان برکیمسه ایکی سنه دعوا ایتسه ده ایکی سنه دنصکره مدعی عمومییه عرضحال ویرهك اقامه دعوی ایتسه ، مرور زمان اولق ایچون ده بر سنه کچمسی لازم دکلدر . « چونکه ضرب فعلی جنحه در » یکیدن ده تام اوچ سنه کچمسی لازمدر . ایکنجیسی ده اجرای تحقیقاتدر . ضابطه عدلیه مأمورلری ویاخود مدعی عمومی ویا مستنطق طرفندن برجرم حقنده استطاق کی و توقیف مذکره سی ویرمك ویا فتح میت یاپدیر مق کی بر معامله تحقیقیه واقع اولورسه مرور زمان قطع اولنوب یاییلان تحقیقاتك اك صوك معامله سندن اعتباراً یکیدن باشلار . مثلاً : جنحه نوعندن برسرقت فعلندن طولایي فعلك وقوعبولدینی تاریخندن تام ایکی سنه اونبر آی صکره خبر آلتوبده مستنطق

طرفندن تحقیقاته واستنطاقه باشلانسه وبویله جه اثنای تحقیقاتده
ایکی آی کچسه اوج سنه برآی اولدی مرور زمان وارديه دینله مز.
چونکه مرور زمانه برآی قاهره تحقیقاته باشلانمش و بناءً علیه
مرور زمان قطع ایدلمش اولدیغندن تحقیقاتک صوک معامله سندن
اعتباراً بلا حکم یکیدن دهاتام اوج سنه کچمسی لازمدر .
بوکی خصوصاً صاندده مرور زمان تحقیقاتک اک صوک معامله سندن
اعتباراً دهاتام اوج سنه کچمسی که مرور زمان واقع اوله بیلسون.
حقوق عمومیه دعوالرنده کی بعدالحکم مرور زمانلر :

یعنی حقوق عمومیه دعواسی اقامه اولنوب محاکمهی اجرا
و حکمی اعطا اولندقدن صکره واقع اولان مرور زمانلر مجازات
قانونیه نک اجرا و انفاذینه مانع اولور. ارتق حکم اولنان جزا
محکومه چکدیرلمز. طوتولوب حبس اولنماز، بوده جنایت فعللرنده
حکم و جاهی ایسه محکمه تمیزدن تصدیقی تاریخندن ، غیابی ایسه
حکمک محکمه جنایتدن ویرلیدیکی تاریخندن اعتباراً - یکر می سنه در.
جنجه فعللرنده - حکم و جاهی اولسون غیابی اولسون
استیناف و تمیز ایدلمش ایسه استیناف و تمیز تاریخلرنندن، ایدلمه مش
ایسه استیناف و تمیز ایچون اولان مدت لک بتدیکی کوندن اعتباراً -
بش سنه در .

قباحت فعللرنده دخی - حکم و جاهی اولسون غیابی اولسون

تمیز ایدلمش ایسه تمیز تارینخندن، ایدلمه مش ایسه تمیز ایچون اولان مدتک بتدیکی کوندن اعتباراً - ایکی سنه در .

بعدالحکم مرور وزمانک قطعی : یعنی حکم ویرلد کدنصکره مرور زمانک قطع ایدلمسی، او حکم اجرا اولندیغی آنده مرور زمان قطع اولنوب یکیدن باشلار. مثلاً : برکیمه یه برجنجه فعلندن طولایی برسنه حبس جزاسی حکم ایدلد کدنصکره او کیمه حبسه قونق ایچون دردست ایدلمه دن تام درت سنه اونبرآی کچوبده اول کیمه دردست ایدیلوب حبسه قونلسه دردست اولندیغی آندن اعتباراً مرور زمان قطع اولنوب یکیدن باشلار. محبوس اولان او کیمه برآی حبسه قالدقن صکره بکا حکم ویریله لی بش سنه اولدی . برآی ده حبس قالد م مرور زمان مدتی بیتدی دیه مز چونکه مرور زمان حبسه قونولدیغی تارینخندن اعتباراً باشلار. او کیمه تام برسنه حبسه قالور.. قبل الحکم حقوق شخصیه دعوالرینک مرور زمانی :

دعوی ایدلمزدن و حکم ویرلمزدن اول اولان حقوق شخصیه دعوالرینک مرور زمانی، عینی قبل الحکم حقوق عمومیه دعوالرینک مرور زمانی کیدر . یعنی، حقوق شخصیه دعواسی جنایتدن متولد ایسه « اون سنه » جنجه دن ایسه « اوج سنه » قباحندن حاصل اولمش ایسه « برسنه » در . چونکه جراثمدن متولد حقوق شخصیه دعوالری او جرملره مربوط

بولنديغندن یعنی بر جرم ایقاع ایدلماش اولسهیدی . حقوق
شخصیه دعواسی حصوله کله میه جکندن و جرمک بر نتیجه طبعیه سی
اولدیغندن مرور زمانده دخی جرائمه مخصوص اولان مدتله
زمانله تابعدر .

قبل الحکم حقوق شخصیه مرور زمانلرینک قطعی :
مدعی شخصیلرک ویره جکلری حق شخصی استدعاری
اوزرینه حقوق عمومیه دعواسی اقامه ایديله جکندن و حقوق
شخصیه دعوالری حقوق عمومیه مرور زمانلرینه تابع بولنديغندن ،
حقوق عمومیه مرور زمانلرینده قطع ایدر . هیچ بر کونا
فرقی یوقدر .

بعد الحکم حقوق شخصیه مرور زمانی :

هرهائی نوع جرملردن - جنایت ، جنحه ؛ قباحندن -
اولورسه اولسون « مجله » احکامنجه تام اون بش سنه در .
قبل الحکم جنایتده اولدیغی کی یکر می سنه دکدر .

مثلاً : بر جنایتدن طولایی مدعی شخصیه ویرملک اوزره
شوقدر غروش تضمینات ویرلمسینه جنایت محکمه سندن حکم
اولوب محکمه تمیزدن تصدیق ایدلدیکی تاریخدن اعتباراً اون
بش سنه کچنجه یه قدر مدعی شخصی اول پاره یی محکوم اولان
کیمسهدن ایسته یه بیلور . اون بش سنه تمام اولوبده بر کون
کچدکدن صکره ایسته یه مر .

بعدالحکم حقوق شخصیہ مرور زماننک تعطیلی :
 حکم ویرلدکدنصکره حقوق شخصیہ مرور زمانی قطع
 اولنه ماز . یالکز تعطیل اولنور . مثلاً : بر جنایتدن طولایی
 مدعی شخصی اولان کیمسه یه ویرملک اوزره حکم اولنان بر مقدار
 پاره یی اول کیمسه اون درت سنه محکومدن ایسته مسه ، اوائنده
 کندییی مجنون اولسه و اوچسنه صکره کسب صحت ایدوب
 عقللانسده پاره یی محکومدن ایسته دکده محکومده مرور زمان
 واردر اون یدی سنه اولمش دیهرک پاره یی ویرمه مزلك ایده مز
 چونکه مدعی شخصی نك جنت حاليله کچن اوچسنه سی حساب
 ایدلنز . مدعی شخصینک دها برسنه سی واردرکه اون بش سنه
 اولسون .

حقوق شخصیہ دعوائینی تعطیل ایدن سبیلر : مدعی شخصینک
 چوجق اولمش ، مجنون بولمنی ، مدت سفر بعید اولان
 مملکتلرده بولمنی ، مدعی شخصینک دعوا ایده جکی آدمک
 متغلبه دن بولمنی ، امراض ساریه ظهور ایتمی کبی سبیلردر .

۶ — متن قانونک ضابطه یه تعلق ایدن اقسامنک

ماده بماده مثاللر ایله ایضاحی

اصول محاکمات جزائیہ قانوننک سکزنجی ماده سنده [متن
 ماده — ضابطه عدلیه مأمورلری جنایات وجنحه وقباحتلری

تحریر و دلائلی جمع و ضبط ایله متجاسر لرینی طوتوب متعلق اولدقلری محاکم جزائییه تسلیم ایتمه مأموردرلر [دییه محرردر .
بوضابطه بحی حقیله آ کلاشملق ایچون براز ایضاحات ویرمه لزوم واردر .

ضابطه — بیوک بر قسمی پولیس در — علی الاطلاق امنیت و آسایش عمومییه یعنی کرک دولتک امنیت و سلامتی و انتظام عمومی بی محافظه و کرک افراد اهلینک جان و مال و عرضی و قایه امرنده قوه اجرائیه نک «حکومتک» وظائفی صورت مخصوصه ده ایفا ایتک اوزره تشکیل اولنان هیئتک عمومیه ضابطه دینلور .
ضابطه — پولیس — اساساً اوج قسمدرکه ضابطه اداره ، ضابطه عدلیه ، — ضابطه سیاسیه دن عبارتدر .

۱ — ضابطه اداره ، قوه اجرائیه نک هر قسمنده و هر شعبه سنده انتظام عامه بی محافظه یه مأمور اولان هیئتلردر .
ضابطه اداره ، وظیفه اعتباریله ایکی در . بری ضابطه عمومییه دیگر ی ضابطه خصوصیه در .

ضابطه عمومییه پولیس هیئتی در که اوج نوع وظیفه و صفتلری واردر .

برنجیسی ، ضابطه مانعه در . بر جرم وقوعه کلامسنه دقت ایدرک مانع اولور .

ایکنجیسی ، ضابطه عدلیه در . منعه مقتدر اوله میوبده وقوعه کلن جرملری تحقیق ایتمکدر ،

او چنجیسی ده، ضابطه خصوصیه معاونت ايله مكدرد.
 ضابطه خصوصیه، منسوب اولدقلری دائرة وادارمنك
 انتظام و منافعی محافظه مأمور هیئتدر. التي نوعدر.
 ضابطه بلدیة، ضابطه بحریة، ضابطه صحیه، ضابطه صیدیة،
 رسومات ضابطه سی اورمان ضابطه سی در. هر نه قدر بونلر بویله
 ضابطه نامیله صراحة یاد اولنمازلر سه ده وظیفه و صفتلری اعتباریله
 برر ضابطه در.

۲ — ضابطه عدلیه، ضابطه مانعك منعنه موفق اوله میوبده
 وقوعه كلن جرملى تحری و تجسس ایدرك فاعل جرمی
 دردست ایتك و جرمك اثبات ایدلسی چون لازمكلن دلائل
 و اماراتی و اشیا و ادواتی جمع و ضبط ايله مك و فاعل جرمی عائد
 اولدیغی محكمه یه تسلیم ایتكله مكلف اولان مأمورلرك هیئت
 عمومیه سنه دینور.

بو مأمورلرك کیملردن عبارت اولدیغی و وظیفه لرینی نه
 صورتله ایفا ایلدكلری بیان ایده جكمز اصول محاکمات جزائیة
 قانوننك مواد مخصوصه سندن آ کلاشیله جقدر.

۳ — ضابطه سیاسیة، یالکز دولتك امنیت و سلامتی وقایه
 و محافظه ايله مكلف اولان هیئتدر. بو هیئتك وظیفه سی پك
 بیوك و نازكدر. بزده بو وظیفه شمديلك ضابطه عمومیه طرفندن
 ایفا اولنه كلكده در.

ضابطه عدليه هيئتي کيملردن مرکبدر

اصول محاکمات جزائيه قانوننک طقوزنجی ماده سی [متن
 ماده - جنایت دعوالرینی رؤیت ایدن محکمه لرك نظارتلری
 آلتنده اولمق و آتی ده تعیین اولنه حق احکام مخصوصه یه تابع
 بولمق اوزره ضابطه عدليه وظائفی قائممقام ویا مدیر و تفتیش
 مأمورلری و مدعی عمومیلر و مستنطقلر و ضبطیه ضابطانی و کوی
 مختارلری و اختیار مجلسلری اعضاسی و کوی واورمان بکجیلری
 معرفتیه اجرا اولنور .] دیهرک ضابطه عدليه مأمورلرینی بیان
 ایله مشدر . جرم عد اولنان فعللرك تحری و تحقیقی بومأمورلره
 حواله ایدلمشدر . بونلردن بشقه ایکنجی درجه ده ضابطه عدليه
 مأموری صاییلان ضابطه خصوصیه مأمورلریدر که قبودانلر ،
 لیمان رئیسلری ، دمیریولی قومیسرلری ، رسومات محافظه
 مأمورلری ، رژی قولجیلری ، بلدییه چاوشلری ، معدن
 مهندسلسلردن عبارتدر .

بومأمورلرك دائره و اداره لرنده کندیلرینه عائد برجرم
 وقوعه کلدکده بومأمورلر ضابطه عدليه ، مأموری وظیفه سنی
 ایفا ایده بیلرجهکی کبی اصل ضابطه عدليه مأمورلری ده ایفا
 واجرا ایدرلر . بونلردن بشقه اصول محاکمات جزائيه قانوننک

اوتنجی ماده سی [متن ماده - والیر و متصرفلر و پای تخته
 شهر امینی و ضبطیه ناظری و قوعه کلن جنایت و جنحه و یاقبا -
 حتک ثبوتنه مدار اولان معاملات لازمه بی بالذات و یاخود
 جرمک درجه سنه کوره عائد اولدینی ضابطه عدلیه مأمورلری
 واسطه سیله اجرا و فاعلرینی لازمکن محکمه یه تسلیم ایتدیره
 بیله جکلردر] دیه ضابطه عدلیه دن معدود اولان دیگر مأمورلری
 تعداد و بیان ایله مشدر. بونلرکده ایفا ایده جکی معاملات عدلیه
 سائر ضابطه عدلیه مأمورلرینک اجرا ایتدکری معامله کیدر.
 اصول محاکمات جزائیه نک اونبرنجی ماده سنده تفتیش
 مأمورلرینک « پولیس قومیسر و مأموری دیمکدر » ضابطه
 عدلیه یه عائد اولان وظیفه لرندن قباحته عائد اولانی تعیین ایده یور.
 [متن ماده - تفتیش مأمورلری و تفتیش مأمورلری
 بولنمیان قضالرده قائم مقام و یامدیرلر قباحث درجه سنده اولان
 هر نوع جرائمی تحری و اول قباحثلرده متفرع اولان اخبارات
 و شکایاتی حاوی بیاننامه لری اخذ ایلیه جک و قباحثک نوع
 و اسبابی و محل و زمان و قوعنی و دلائل و اماراتی مین بر ضبط
 ورقه سی تنظیم ایده جکلردر. و ذکر اولنان مأمورلر تحری
 و تحقیق اورمان و کوی بکجیلری و وظائفه عائد اولان جرائم
 حقه دهخی لدی الحاحه معاملات مذکوره بی اجرا ایده جکلردر.]
 بو ماده موجبنه پولیس قومیسر و مأمورلری قباحث

توغندن اولان جرملى تحرى و تحققيق ايتىك ونتيجه تدقيقات و تحقيقاتى ميين بر ضبط ورقهسى تنظيم ايتىك كنديلرينه عائد بوظيفه در. بوندن بشقه اورمانلر حقنده كى جرملى دخى طوغريدن طوغرى به تحققيق ايتىك وظيفه لرى ايجابنددر.

اصول محاكمه نك اون ايكنجى ماده سنده [متن ماده - متعدد دائره ضابطه به منقسم اولان قضا لرده بولنان تفتيش مأمورلى بولندقلرى قضا داخلنده على العموم ظهور ايدن قباحتلر حقنده ضابطه عدليه يى اجرا ايدى جك و قباحتك مأمور اولدقلرى دائره مخصوصه خارجنده وقوع بولسنى وسيله مانعه عد ايدى ميه جكلردر.]

ديه محرردر كه بو ماده مهمدر. جرملى دليل و اماره لرى و اثرلريله ميدانه چيقارا كلاشيلور. و اثرى غائب اولان جرملى اكثر يا ميدانه چيقماز، چيقسه ده اثباتى كوچ اولور. بر جرم وقوع بولور بولماز همان جرمك اثرلرinx و دليللرinx و اشيا و ادواتى طويللايوب بر ضبط ورقهسى ياپمى ليدر. ايشته بو ماده تحقيقاتك، چابوق ياپلسنى تأمين ايچون وضع اولنمشدر. مثلا فاتح بوليس مركزى قوميسرلرندن برى صماتيه ده بولنديغى ائنده بر قباحتك واقع اولديغى كوررسه همان تحقيقاته باشلا. مليدر. صماتيه بنم مركزم دكلدر ديه رك ياپمازلق ايتما مليدر. ايشبو ماده نك صراحة امرى موجب نه تحقيقات اجرا ايله مليدر.

ایشته شویان ایتدی کمز ماده لرك خلاصه سی: ضابطه عدلیه
 مأمورلرینک وظیفه لری جرملری تحری و تجسس ایله فاعل جرمی
 دردست، جرمک دلائل و اماراتی جمع و ضبط ایله ضبط ورقه سی
 یایمق، جرمک آلات و دلائلی ایله برابر فاعل جرمی مدعی
 عمومی یه تسلیم، ضابطه عدلیه وظیفه سنه دائر عدلیه دن ویریله جک
 امرلری و حواله اولنه جق تحقیقاتی اجرا ایتک دن و ضابطه
 مأمورلری کیملردر و قباحت جرملری حقننده کی وظیفه لری،
 نه اولدیغدن عبارتدر. بوماده لر حکمنجه بتون قباحت جرملرینی
 تحری و تحقیق ایتک عموم ضابطه عدلیه مأمورلرینک و بالخاصه
 پولیس قومیسر و مأمورلرینک اصل وظیفه لریدر.

دیگر نوع جرملره عائد وظیفه لری اشانغی ده بیان اولنه جی
 اوزره اصل ضابطه عدلیه مأمورلرینه بر معاونت و یار دیمدر.
 اصول محاکمات جزائیة قانوننک قرق بشنجی ماده سننده
 [متن ماده - قائم مقام و مدیر لر و اختیار مجلسلری رؤسای
 و ضبطیه ضابطانی و تفتیش مأمورلری دائره مأموریتلری داخلنده
 وقوعه کلن جرائمه متعلق اخباراتی قبول ایتمکه مجبور] اولدقلری
 بیان ایدی لور. بوماده وکله جک ماده لر ضابطه عدلیه مأمورلرینک
 و بالخاصه پولیس قومیسر و مأمورلرینک مدعی عمومیلره
 معاونت ده بولنه جقلری جرائم و معاملاتده کی وظیفه و صلاحیتلرینی
 تعیین ایتکده در. بوماده موجبنجه ضابطه عدلیه مأمورلری

جنحه وجنایت نوغندن اولان جرملره دائر اولان استدعانامه
واخبار وشکایتنامه لری قبول ایدهرک بیلدیریلن ویاخود دعوا
وشکایت اولنان جرمه دائر اولان معلومات و اماراتی جمع
وضبط ایلیهرک حاصل اولان تحقیقات ابتدائیله برابر همان
مدعی عمومیلکه کوندرمکه مجبوردرلر .

قانون مذکورک قرق آلتنجی ماده سی [جرم مشهود حالنده
ویاخود برخانه صاحبی طرفندن طلب وقوعنده ماده سابقه ده
بیان اولنان مأمورلر ضبط ورقه سی تنظیم وشهودک افاداتی
استماع ایلیه جککر و احوال مبسوطه ده مدعی عمومینک جمله
وظائفندن اولان تحریرات و زیارات و معاملات سائرینی اجرا
ایده جککدر . بومعاملاتک جمله سی مدعی عمومیلر فصلنده بیان
اولنان صور وقواعد تطبیقاً اجرا اولنه جقدر .] دیهرک ضابطه
عدلیه مأمورلرینک جرم مشهودده اولان وظیفه لرینی بیان
ایتمکده در .

بوراسی غایت مهم اولدیغندن براز تفصیلات ویره لم :
جرملر صورت وقوعی اعتباریله ایکی یه آیریلور . بری
جرم مشهود، دیگر جرم غیر مشهوددر . ضابطه عدلیه مأمور-
لرینک بوایکی جرم حقنده کی وظیفه لری آیری آیریدر .
جرم مشهود ، ایکی قسمدر . بری اصل جرم مشهود ،

دیگری، شبه جرم مشهود یعنی جرم مشهود قییلندن اولان
جرملردر.

اصول محاکمات جزائیة نك اوتوز سکننجی ماده نك برنجی
فقره سی [متن ماده - اجرا اولنمقده ویاخودهنوز اجرا ایدلش
اولان جرم، جرم مشهوددر.] دیه اصل جرم مشهودی
تعریف ایدر. دیگر فقره لری دخی [متن ماده - ولوله ناس
اوزرینه طوتیلان ویا جرمك ارتکابی متعاقباً آنک فاعلی
ویاخود شریکی اولدیغنی مؤید اولان اشیا واسلحه وادوات
واوراق ایله دردست ایدیلان اشخاصك مرتکب اولدقلری
جرائم دخی جرم مشهود قییلندن عد اولنور.] عباره سیله شبه
جرم مشهودی بیان ایلر.

ضابطه عدلیه مأمورلرینك جرائم مشهوده ده کی وظیفه لری:
برجرم مشهود ویا شبه جرم مشهود وقوع بولدیغنی خبر
آلان ضابطه عدلیه مأمورلری بر دقیقه بیله وقت غائب ایتمکسزین
هان جرمك وقوع بولدیغنی محله قوشمالیدرلر.

چونکه جرمك وقوعنی کوردهن کیمسه لر وقعه دن کندیلرنجه
حاصل اولان تاثیر حسیله حقیقت حالی سویله یوب فاعل جرم
نزهیه فرار ویاخود نزهده صاقلانمشدر. خبر ویره بیله جک لری کی
فاعل ویا سارقك بر اقدیردیغنی جرمك اثر و نشان لری بوزلمه دن
قولایلمکله کوریلوب فرق اولنور. جرم قتل ایسه قاتل جرمد

قوللاندىنى آلات وادواتى قىروب محو ايتەدن والبسەسى قانە بولاشمش ايسە چىقاروب آتەدن ويا يىقامەدن بولنور . فعل سرقت ايسە سارق چالدىنى اشىلارى صاتمەدن وبريرە صاقلامەدن هنوز يانندە واورستندە ويا خانە سندنە الدە ايدىلورکە بولنرا وجرى انکارە محل برامقە يەحق بر صورتە ميدانە چىقارير .

بوندن بشقە فاعل جرم قاجوب صاقلانمغە وقت بولمەدن دردست ايدىلەبىلەجكى جەتلە درحال استنطاق و استجواب ايدىلەجکندن دوشونوب طائىشوبدە انکار ايتمکە وقت قالمە يەجنى کي بويلە درحال استجواب اولنان فاعل جرملر ، تلاش وخاجانلە اکثريا انکار ايدەميوب اقرار جرم ايدرلر .

ايشتە درحال محل جرمە کيتمەنک فائەسى بو اولوب دائماً جرم تماماً ميدانە چىقار . ذاتاً قانونک دە بو وظيفە يى يعنى جرم مشهودە کيتمكى بر چوق مأمورلرە مدعى عمومى مستنطق وسائر يوقاريدە سايدىغمز مأمورلرە امر وحوالە ايتمى هانكىسى اول يتشيرسە برآن اول تحقيقات اجرا ايدوب جرمى ميدانە ، چىقارمى اچوندەر . چونکە دقيقەسى دقيقەسنە اولان تحقيقات هر حالە طوغرى اولور . آرادن وقت کچرسە هرشى الدن چيقمش محو ايدلمش ، فاعل فرار ايتمش اولور .

اصول محاکمات جزائىہ قانوننک يکرمى طقوزنجى مادە سندن قرق ايکنجى مادەسنە قدر اولان موادى جرم مشهودە مدعى

عمومیلر و سائر ضابطه عدلیه مأمورلریسک قانوناً یا یمغه مجبور اولدقلری معاملاتى مفصلاً بیان ایتکده در . بوماده لری قانونک تعریفی و عباره سی موجبنه ذکر و ایضاح ایده لم.

محل جرمه عزیمت — مدعی عمومی «ویا خود سائر ضابطه عدلیه مأمورلری» در حال جنایتک محل وقوعه عزیمت ایدوب ذات وقعیه ی «جرمک نه دن عبارت اولدیغی» و صورت وقوعی «جرمک نصل ایقاع و اجرا ایدلدیکنی» و موقعک احوالی «محل جرمک نه حال و شکله بولندیغی» ضبط و تحریر ایده جک وائئای وقعده حاضر بولنانلرک ویا خود وقعیه دائر معلومات ویره یله جک اولنلرک افاداتی ضبط ایده جکدر . مدعی عمومی کیفیت عزیمتی مستنطقه و سائر ضابطه عدلیه مأمورلری دخی محل جرمه کیتدکلرینی مدعی عمومی ویا خود مستنطقه خبر ویره جکلر . فقط کلسون دیه بربرلرینی بکله مک حاجت اوله یوب یالکز خبرویروب همان کیده جکلر در .

فاعل جرمک درستی — مدعی عمومی «ویا سائر ضابطه عدلیه مأمورلری» بر جرمک مشهوداً و قوعی و مجازات تریهیه یی استلزامی حالنده انک مرتکبی اولدیغی امارات قویه ایله اکلاشیلان اشخاص حاضر ایسه توقیف ایتدیره جک دکسه در دست ایدیلوب احضار ایدلسی ایچون امر ویره جکلر .

استجواب — مدعی عمومی «ویا سائر ضابطه عدلیه مأمورلری» وقعده حاضر بولنانلرک ویا خود وقعیه دائر

معلوماتی اولانلرک یعنی شاهدلرک افاده لرینی ضبط ایتدیکی کبی
وقعه حقنده معلومات ویرمکه مقتدر عداولنه حق فاعل جرمک
ومقتولک اقربا وقومشو وخدمتکارلرینی ده جلب ایدوب افاده-
لرینی آله حق واشبو افاده لرینی کندیلرینه امضا ایتدیره جکدر.
امضا ایتزلرسه ضبط ورقه سنه امضا ایتدکلری یازیله جقدر .

موقع جرمده حاضر اولنلرک کیتمسینی منع — مدعی
عمومی «ویا سائر ضابطه عدلیه مأمورلری» ضبط ورقه سی
تنظیم اولننجه یه قدر جرمک وقوعبولدینی خانه ویاخود محله
بولنلر کیملر اولورسه اولسون طیشاری یه چیقملرینی وقالقوب
کیتملرینی منع ایده جکدر .

اشیای جرمک ضبطی — مدعی عمومی «ویا سائر ضابطه
عدلیه مأمورلری» جرمی ارتکاب ایچون استعمال اولنان ویاخود
حاضرلندینی اکلاشیلان سلاحلری وهر درلو اشیایی وکذلک
جرمک ائارندن اولدینی کوریلان و الحاصل حقیقتی میدانه
چیقارمغه مدار اولان شیرلی ضبط ایده جک و اشیای مضبوطه یی
مظنون علیه ارائه ایله ایضاحات ایسته یه جک ایضاحات ویرمه-
دیکی حالده ضبط ورقه سنه درج اولنه جقدر .

اقامتگاه تحریری — جرمک ماهیتی اقتضاسنجه مظنون
علیهک نزدنده بولنان اوراق و اشیا و جرمک ثبوت و وقوعه
دلالت ایده بیله جکی اکلاشیلورسه بولنلری آرامق ایچون مدعی
عمومی و سائر ضابطه عدلیه مأمورلری مظنون علیهک در حال

اقامتگاهنه کیده رک اصولی دائره سنده تحریات اجرا ایده جکلردر.
ضبط اولنه جق اشیا — مظنون علیک خانه سنده جرّمک
ثبوتنه ویاخود برائت ذمته متعلق اوراق و اشیا واریسه مدعی عمومی
ویا ضابطه عدلیه مأمورلری طرفندن ضبط اولنه جقدر. بوضورتله
النان اشیا ممکن ایسه باغلنه جق و اوزرینه کیمه عائد اولدینی
یازیلوب مهرلنه جکدر.

مظنون علیک حضوری — بو ماده لرده بیان اولنان
معاملات، مظنون علیه اله کچیرلمش ایسه حضورنده و اگر
حاضر بولمنی ایسته مز ایسه — ویا یاره لی اولمق کبی — حاضر
اولغه مقتدر اوله مازسه تعیین ایده جکی وکیل مواجهه سنده اجرا
اولنور. وضبط اولنان اشیا کندیسنه کوستریله رک تصدیق و امضا
ایتمسی تکلیف اولنه جق امضا یتزسه کیفیت ضبط ورقه سنه یازیه جقدر.
طیب و اهل وقوف استصحابی — مدعی عمومی و سائر
ضابطه عدلیه مأمورلری برجنحه ویا جنایتک ماهیت و احوالک
اکلا شلمسی اهل فن و صنعتک برابر بولمنی ایجاب ایتدیکی حالده
برایکی کشی برابر انه جقدر. و کذا برکیمسه نک قتلی ویاخود
سببی مجهول و شبهه لی اوله رق وفاتی حالنده مدعی عمومی
و ضابطه عدلیه مأمورلری بر ویا ایکی طیب و جراح برابر
بولندیریه جقلر و بو طیبلر جنازه نک بولندینی حال ایله اسباب
موتی حقنده بر راپور یاپه جقلردر. کرک دو ققور و جراح لر

و كرك ديكر ارباب فن وصنعت «چيلينكر» اجزاجي كي اهل خبره» راپورلريني بي غرضانه ياپه جقلرينه ومطالعهلريني وجدان صحيح اوزرينه بيلديره جكلرينه دائر مدعي عمومي وسائر ضابطه عدليه مأمورلري طرفندن يمين ايتديريله جقدر وبوده ضبط ورقه سنه يازيله جقدر .

ضبط ورقه سنك صورت تنظيمي — مدعي عموميلر وضابطه عدليه مأمورلرينك تنظيم ايده جكلري ضبط ورقه لري جرمك ارتكاب اولنديغي قضانك پوليس مأمورلري ويا قائممقام ومديري ويا خود اوقضاده اقامتكاهي اولان ايكي شخص حضورنده ياييله جق وبونلردن هانكيسي حاضر ايسه انك امضاسيله امضائه جقدر. شوقدركه در حال شاهد تداركي قابل اوله مديني حالده شاهده حاجت قالميه رق ضبط ورقه سني تنظيمه مدعي عمومي وسائر ضابطه عدليه مأمورلري مأذوندر .

ضبط ورقه سنك هر صحيفه سي مدعي عمومي وياسائر ضابطه عدليه مأمورلري وموقع تحقيقنده حاضر اولان اشخاص طرفندن امضا ايديريله جك و حاضر اولانلرك حضارك استكافي ويا خود امضا ايتمي قابل اوله مديني حالده كيفيت ضبط ورقه سنده بيان اولنه جقدر .

استثنا — جرم مشهود اولسه بيله خانه دروننده وقوع بولش برجرمدن طولاي خانه صاحبي مدعي عمومي وياسائر

ضابطه عدليه مأمورلرينه مراجعت ايتدكده مدعى عمومى ويا سائر ضابطه عدليه مأمورلى جرم مشهود حقنده بيان اولنان معاملاتى تماميله اجرا ايدرلر .

شورايه قدرويريلن تفصيلاتى خلاصه ايدرك و قتل ايدلمش بر آدم فرض ايله رك بر مثال ايله ضابطه عدليه مأمورلرينك بوكى جرم مشهودلرده نره دن ايشه باشلايه جقلىرى و صره ايله نه كى معاملله يابه جقلىرى مختصر آده بيان ايده لم :

محل جرمه عزيمت — بر محمله بر كيمسه نك اولديرلديكى يعنى جرم مشهود وقوع بولديغى خبر آل نور آل نماز، همان پوليس مأمورلى محل وقعه يه كيتملى، ومدعى عمومى ومستتطقه ده خبر كوندرمليدرلر .

طبيب واهل وقوف استصحابى — محل جرمه كيدر كن همان دوكتور ويا جراح آلق، قابلسه آلوب برابر كوتورمك، قابل دكلسه در حال كلملى ايچون خبر بر اقلمليدر . « اصول محاكمه — ۴۵ و ۴۰ ماده » مضمون علمى در دست ايتمك — محل جرمه واريلىنجه همان فاعل جرم سؤال ايدملى ونره يه كيتمش ايسه مأمور كوندروب در دست ايدمليدر . « اصول محاكمه — ۳۷ ماده »

موقع جرمده بولنانلرك كيتمسنى منع ايتمك — جرمك وقوعه كلديكى محل ويا خانه هر نره سى ايسه اوراده بولنانلرك بشقه طرفه

صاووشمه لرینی نازکانه تنبیه ایلمی . و دیککه مزلرسه جبراً منع
ایتملیدر « ماده - ۳۱ »

مظنون علیه استتقاقی — فاعل جرم طوتولمش ایسه
درحال طوتولماش ایسه دردست اولدینی زمان همان استتقاق
ایدملیدر که دوشونوب طانیشوبده انکار جرم ایتمکه فرصت
بوله سون . « ماده - ۳۶ »

مجرور حک استجواب و تداوایی — اوریلان دهاصاغ ایسه
همان یاره لرینی ممکن اولدینی قدر صارمق لازمدر . بلکه اولماز .
برده درحال کیمک طرفندن نه ایچون جرح ایدلش اولدینی
سؤال ایتمک غایت لازمدر .

بلکه اولورده فاعلک کیم اولدینی آکلاشلماز . بونلر مهمدر
غایت سرعت وانتظامله ایفا ایتملیدر .

محل جرمی کشف — جرمک وقوعه کلدیکی محل
واولدیریلن آدم ناصل یاتمش قالمش ایسه اويله محافظه ایدوب
یری دکشتدیروب بوزولماملی و ناصل کوریلیور . ونه حالده
بولنیور ایسه ضبط ورقه سنه یازملی . وطیب آیریجه مفصل راپور
ویرملیدر . طیبه یین ویرلمسی ده اونودلما ملیدر . « ماده - ۴۱ »
شاهدلرک استجوابی — وقعده حاضر بولنانلر ووقعه دن
معلومات ویره ییله جککر ، وقاتل ویا مقتولک اقربا وقومشو

و خدمتکارلری کی جرمدن خبر ویره جکری صره ایله استجواب ایتلیدر .

تحریات اجرایی — فاعل و شریک جرمک یاننده و خانه سنده وقوعه کلن جرمه دائر و یا خود جرمک میدان چیقمسنه ، اثبات ایدلمسنه یارار . اشیا و اوراق بولندی آ کلاشینجه همان اراشدیریلوب بولدیریله رق آتلملیدر . « ماده — ۳۳ — ۳۴ »

ضبط ورقه سی تنظیمی — بوصایدیغمز معاملات ساریعاً و منتظماً یا بمقوله برابر اصولی دائره سنده « اشاغیده یازه جغمز نمونه لر کی » بر قطعه ضبط ورقه سی تنظیم ایدلملیدر . « ماده — ۳۹ » ایشته شویان ایتدی کمز معاملات بالجمله پولیس مأمورلری مدعی عمومی و مستنطقلر کلسنی بکله مدن در حال یا بمقوله قانوناً مجبور درلر . اگر بواشاده مدعی عمومی و یا مستنطق کلورسه انلرک ویره جکی امره کوره حرکت اولور . بونلر یا معامله نك ایشه باشلایان مأمورلر پولیسلر طرفندن یا ییلوب بیتلمسنی امر ایدرلر . و یا خود کندیلری بالذات یا پارلر .

بر جرم وقوع بولوبده — ایستر جرم مشهود اولسون ، ایستر غیر مشهود و عادی اولسون — خانه صاحبی ضابطه عدلیه مأمورلرینه خبر ویروبده چاغیریرسه پولیس مأمورلری او خانه یه کیدوب جرم مشهوده اولدینی کی تحقیقات یا پهرق ضبط ورقه سی تنظیم ایتلری .

— تنیه — شو تفصیلاتی ویررکن هپ جرم مشهوددن بحث ایتدک . بومعاملات هم اصل جرم مشهود همده شبه جرم مشهودده جاریدر. هرایکی قسمنده شامل اولق اوزره «جرم مشهود» دیه رک ذکر ایدلشد.

جرم غیر مشهوده کلنجه :

جرم غیر مشهود ، کیزلیجه اجرا ایدیلوب بر مدت کچدکدنصکره خبر آلتان و میدان چیقان جرملردر . بوکبی جرملرده ضابطه عدلیه مأمورلری — ضابطه عدلیه بحثنده بیان اولدینی اوزره — علی العاده تحقیقات اجرا ایدوب اوراق تحقیقیه بی ومدعی شخصی وارسه انک ویردیکی عرضحالی مدعی عمومی به کوندیرلر . جرم مشهودده اولدینی کبی مدعی عمومی ومستنطق درجه سنده وظیفه وصلاحیتلری واسع دکلدرد. قانون، جرم مشهودک اهمیتنه وفوق العاده لکنه بناءً پولیس مأمورلرینه ده مدعی عمومیلرک صلاحیتی ویرمشدر . جرم غیر مشهودده بویله دکلدرد . علی العاده مظنونک ومشتکی نک وشاهدلرک افاده لرینی الوب بر فذلکه یاپه رق یعنی خلاصه تحقیقاتی یازه رق مدعی عمومی به کوندیرر . یوقسه جرم مشهودده اولدینی مثللو غیر مشهودده دخی مظنونی توقیف ایتک، خانه تحری ایلهمک کبی معاملاتنی اجرا ایده من .

اوچنجی باب — قانون جزا

۱ — فکر قانونی حاصل ایده جک صورتده

نظریات جزادن معلومات مجمله

قانون جزا: جرم عد اولنان فعللر ایله، جزا اوله رق تعیین ایدیه جک شیلری بیلدیره ن قانوندر.

جزا: برکیمسه نک ایشله دیکی فعل خیره مقابل مکافات ویا خود یایدیغی کناهه مقابل چکدیریلن عقوباتدر. یعنی جزا: خیره قارشو ایدیلن خیر، شره قارشو ایدیلن شر در. بولغتیجه تعریفدر.

ارباب حقوقه کوره جزا: قانوناً جرم اولنان بر فعل ایشله دیکی ثابت اولان بر مجرم حقنده احکام قانونیه یه توفیقاً حاکم طرفندن حکم و تعیین اولنان شروع ذابدر دیه تعریف اولنور شو حالده جزا اجرا قلنان تضییق و تعذیبدن عبارتدر بو عذاب و تضییق بعضاً یا حیاته، ویا حریت شخصییه، ویا خود ماله ویا خودده بعض حقوقه قارشو اجرا اولنور. قانوناً اعدام جزاسنه محکوم اولان شخص قتل ایدلمکه، حبس جزاسنه محکوم اولان کیمسه یا

مؤبداً و یا خود بر مدت حریت شخصیه دن محروم اولمقله ،
 و جزای نقدی ایله محکوم اولان شخصده مالنك بر قسمنك
 و یا خود هپسنك آلمسیله و حقوق مدنیه دن اسقاط ایدیلان بر
 کیمسده مأمور اوله مامق و مبعوثلك ایده مامك و شاهد اوله مامق
 کبی بعض حقوقدن محروم ایدلمکله عذاب و تضییق ایدلمش اولور .
 جزا، امنیت و آسایش عمومینك تأمین و محافظه سی ایچون
 اك برنجی چاره در . جزانك فائده سی چوقدر .

مثلاً : جزا لرك نوع و درجه سنی بیلدیره ن قانون جزانك
 نشر و اعلانی جرم ارتکاب ایتك ایسته ینلری بر درجه یه قدر منع
 ایدر . و جرم ایشله ینلره و یریلان جزا لرك شدتی جرم ایشلمك
 ایسته ینلری اور کوده رك ارتکاب جرم دن صرف نظر ایتدیرر .
 و جرم ایشله ین کیمسه نك هیئت اجتماعیه یه و یردیکی ضرر معنوی ،
 جزا ایله تضمین و تعمیر ایدلمش اولور . و بر جرمك افراد اهالی یه
 و یردیکی قورقو و دهشت مجرمه تعیین اولسان جزا ایله ازاله
 ایدیلور . حکم اولنان جزا لرك مجرمك اصلاح حال ایتسنه سبب
 اولور . بونك کبی ده ا برچوق فائده لری واردر .

فقط جزانك بویله فائده لی اولسی ایچون بعض شرطلر
 واردر که بونلر زمانمرك قانون جزا لرنده واجرا اولسان مجاز
 زاتلرنده موجوددر . انلرده : جزانك عادلانه اولسی ، اسایش
 عمومی یی و حقوق خلقی اخلاص ایدن افعاله مخصوص بولنسی ،

جرم ایله جزا بیننده برنسبت عادلہ بولنسی، جزانک مجرمیتی ثابت اولان اشخاصہ حکم ایدلمسی «علی نک فعلندن ولی یہ جزا تعین ایدلما لیدر»، جزانک برعبرت مؤثرہ اولمسی مجرمک اصلاح حال و اخلاقی موجب اولمسی، جزانک شخصی اولمسی «یعنی علی نک فعلندن طولایی هیچ دخلی اولیان اولاد و عیالک ماللری مصادره ایدلمک و کندی لری حبس و تضییق اولنق کبی حاللر اجرا ایدلمسی» وهانکی فعلہ نہ کبی جزا ویریلہ جکی معین و درجہ لره منقسم بولنسی لازمدر .

حق مجازات کیسه عائددر؟

تعین جزا حق دولته عائددر . چونکہ : ایقاع ایدیلن بر فعلک ضرری هیئت اجتماعیہ و عموم افراد خلقہ امنیت واسا یشنہ ده دوقوندیغندن و عموم افراد خلقک و حقوقک محافظہ سی ده دولته عائد بولندیغندن مجرملر حقندہ جزا تعین ایتک حق منحصرأ دولته عائد برحقدر . دولت بو حق عدالتہ موافق بر صورتہ اجرا ایتک ایچون قانون جزا وضع ایتمش و محکمہ لر آچمش و اصول محاکمہ قانونلری نشر و اعلان ایتمش، حاکم لر تعین ایلشدر کہ بونلر واسطہ سیلہ ہم عموم خلقک حقوقی «یعنی حقوق عمومیہ یی» و ہم ده متضرر اولان شخصک حقوقی «حقوق شخصیہ یی» تأمین و محافظہ ایدر . بونک ایچون افراد ناسدن بری دیگر برکیسه ایچون کندی کندینہ جزا تعین

ایده مز. و بر کیمسه بی طو توب حبس ایلیه مز، ایدرسه کند یسی ده
جزا کوریر .

دولت تعیین جزای نه اساسه هانکی قاعده یه استناداً تعیین
ایدر ؟

بو خصوصده بر قاج فکر واردر . برر برر تدقیق ایده لم .
۱ — اخذ ناردر . یعنی هر شخص انتقام آلتق و مقابله ایتمک
ایسته دیکندن بو حق دولته ترک ایتمش دولت جرمدن ضرر
کوره ن شخصک انتقامنی المق اوزره مقابله بلمثل اوله رق مجرمه
جزا تعیین ایلدیکی قاعده سیدر .

۲ — مقاوله اجتماعیه در . یعنی دولت ایله اهالی بیننده
کویا بر مقاوله وارمش کبی جرمدن ضرر کوره ن شخصک
حقنی بو مقاوله یه استناداً المق ایچون جزا تعیین ایدر فکریدر .
۳ — مدافعه مشروعه در . یعنی هر کس نفسنی ویا مالی
مدافعه یه مجبور اولدیغندن بو حق دولته ترک ایتمش دولته
جرمدن ضرر کوره ن شخصک مال ویا نفسنی مدافعه ایچون
مجرمه جزا تعیین ایدر اساسیدر .

۴ — منفعت عامه در . یعنی دولت عموم خلقک امنیت
وسلامتنی محافظه ایدرک عمومک صرف منفعتنی تأمین ایتمک
ایچون جزا تعیین ایدر ، نظریه سیدر .

۵ — عدالت مطلقه در . یعنی جرم ایشله ینلره جرملریله

مثناسب بر جزا ویرمک عدالتدر . دولت بو عدالت مطلقه یی
یرینه کتیرمک ایچون جزا تعیین ایدر . قاعده سیدر .

حالبوکه بوقاعده واساسلرک هیچ بری یالکزاوله رق جزا
تعیینده کی حکمت واساس تشکیل ایده مز جزا هیچ بر زمان
صرف انتقام ، صرف مدافعه ، صرف عدالت ایچون تعیین
ایدیله مز .

شو حالده تعیین جزا حقنک صحیح و موافق اوله رق اساسی :
عدالت مطلقه یی اجرا ایتمک وفائده و عبرت عمومیه یی موجب
اولق و منفعت عامه یی تأمین ایتمک قاعده لری نظر دقته آله رق
بو اوج اساسدن مرکب اوله رق جزا تعیین اولملیدر ، که الیوم
جزالر بو صورتله تعیین واجرا اولنور .

۲ — جرمک صورت تشکلی

جرم نه در؟ جرم : قانونک بر جزا تعیینیله منع ونهی ایتدیکی
فعلی یا یمق ، ویا امر ایلدیکی فعلی یا پامقدر . دیه تعریف اولنور .
تعبیر دیگرله جرم : برشیئی یا یمق ، ویا خود یا پامق اوزره
اسایش وانتظام عمومیه یی محافظه ضمننده اولجه قانونه درج
واعلان و بر جزا ایله تهدید اولنان بر امر ونهیك خلافتده جواز
قانونی اولمقسزین ایقاع ایدیلن فعل وحرکتدر .

بر فعل جرم اولمق ایچون قانون یالکیز امر ویا منع ایتمکله
اوفعل جرم اولماز. مثلاً: اصول جزائییه قانوننده هر مأمورک
ائئای مأموریتنده خبر آلدینی برجنحه و جنایتی مدعی عمومی یه
اخبار ایتمسی امر ایدلمشدر.

بویله بر جرمی خبر آلوبده اخبار ایتمیان قانوناً بر جرم
ایشله مش اولماز. چونکه قانون بونک ایچون بر جزا تعیین ایتمه
مشدر. الحاصل بر فعل جرم اولمق ایچون قانوناً منع ویا امر
ایدلمی و قانوناً برده جزا تعیین اولنمیدر.

قانون جزا، فعللری هپ منع ونهی ایدر. مثلاً: بر کیمسه
من غیر تعمد بر شخصی اتلاف ایتمش ایسه اون بش سنه مدتله
کوره که قونیلور. دیهرک بر آدم قتل اولنسنی و کذا آخذ
ویانکسیجیلک کبی سر قتلره متجاسر اولانلر اوچ ماهدن بر
سنه یه قدر حبس اولنور. دیهده سرقت اجراسنی منع ونهی
ایتمشدر. قانونک امر ایتمدیکی فعل، بزم قانون جزاده «۲۵۶»
نجی ماده ده کی احوالده معاوتی امر ایدر. بشقه یرده امر یوقدر.
شو حالده بر فعل ممنوع هر حالده فاعلنه موجب مجازات اوله بیله جک
بر جرم اولمق ایچون اوچ شرط لازمدر.

۱ — جرم اهلندن یعنی عاقل و بالغ اولان بر کیمسه دن
صادر اولمیدر. بناءً علیه قوه ممیزه سنه مالک اولمیان صیلر
چو جقلر و عقل اراده سنه صاحب اولمایان مجنون و معتوهر

طرفدن قانونه مغاير بر فعل واقع اولورسه جرم عد اولماز.
وجزاده تعيين ايدلمز .

۲ — جرم، جبر واکراه ايدلمك صورتيله ايقتاع ايدلامش اولمليدر. يعنى مقاومت قابل اوله ميان بر جبر و تهديد واکراه و تضيق ايله وقوع بولمليدر. بناءً عليه بر کيمسه ديگر بر شخص طرفدن اولومله تهديد اولنه رق بر جرم ايشله مکه جبر واکراه اولنوبده او کيمسه ده او جرمي ايشلرسه بو کيمسه جبر و تهديد ايدن شخصك النده برالت قيلندن اوله رق او جرمي ايقتاع ايتمش بولنديغندن او کيمسه يه نظراً او جرم جرم دکدر .
وکنديسنه ده جزا ويرلمز . جبر و تهديد ايدن شخص جرم ايشله مش اولور واکراه جزا ويريلور .

۳ — جرم، انسانلرک شخصنه و يا خود مالنه قارشو ايشلنمش اولمليدر . بناءً عليه حيواناته قارشو ايشلنن فعللر جرم اوله ماز . ايسته بوشرطلر بولنورسه جرم حاصل و تمام اولش اولور . جرم نه صورتله تشکل ايدر :

جرم، تشکل ايتمک ايچون درت جزؤ لازمدر. بونلرده :
جزؤ مادی، جزؤ معنوی، جزؤ قانونی، جزؤ ناحقندن عبارتدر.
بو جزؤلردن بری بولمازسه تام بر جرم تشکل ایده من بر فعله جرم ديه بيلمک ايچون اولو بو جزؤلرک دردی بردن موجود اولوب اولما ديغنی تدقيق ايتمليدر. بو جزؤلرک دردی ده وارايسه اوفعل جرمدر. بودرت جزؤدن ولو بری اولسون بولمازسه

اوفعل جرم دکلدر. شمدی بو جزؤلری تعریف و مثاللر ایله ایضاح ایدلم .

۱ — جزؤ مادی: وقوعه کلن بر فعل، فاعل طرفندن ایقاع ایدیلوب ایدلمدیکنی تعیین ایتمکدن عبارتدر . بناءً علیه فاعل طرفندن، حس اولنور ویا کوریلور، بر فعل ایقاع اولنش می یوقسه فاعلک ذهنده و تصور ویا خود تشبث درجه سنده می قالمشدر. یعنی فاعل بر فعل تام ایشله مشمیدر ، ایشله مامشمیدر بوراسنی بيلمک لازمدر. مثلاً: بر آدمی قتل ایتسه، واول کیمسه نك او آدمی قتل ایلدیکی ثابت اولسه، جزؤ مادی حصوله کلمش وجرمک درنده بری ده وجود بولمش اولور. فقط ؛ مثلاً: بر کیمسه بر آدمی ضرب ایتک ایچون صوپا ایله اوزرینه هجوم ایتمش، لکن ضرب ایتامش اولسه، بو حالده فاعل فعل ضربی اجرا وایقاع ایتامش اولدیغی جهتله جزؤ مادی حصوله کلامش بولندیغندن جرم واقع اوله مش اولور .

۲ — جزؤ معنوی؛ وقوعه کلن بر فعلک فاعلی اولدیغی ثابت اولان بر کیمسه نك قانوناً مسئول اولوب اولمادیغنی تعیین ایتمکدن عبارتدر. بناءً علیه ایقاع اولنان بر فعلک فاعلی قانوناً بر جزا ایله مجازات اولنور کیمسه لردنمیدر. یوقسه صبی، مجنون و معتوه اولمق کبی حقنده جزا ویريله مین اشخاصدنمیدر . بورالری اکلا شلمق لازمدر .

مثلاً: برکیمسه بر آدمی قتل ایتسه واولکیمسه نك او آدمی قتل ایتمش اولدیغی ثابت، و فقط قاتل اولان اوکیمسه نك مجنون بولندیغی اكلاشلسه هر نه قدر فاعلك فعلی ایقاع ایلدیکی ثابت و بناءً علیه جزؤ مادی موجود ایسه ده مجنون اولنلره قانوناً جزا ویريله میه جکندن جزؤ معنوی حاصل اولمه مش بولندیغندن جرم تماماً تشکل ایده مز .

۳ — جزؤ قانونی : وقوعه کلن بر فاعلك قانوناً ممنوع و موجب مجازات اولوب اولمادیغی تعیین ايله مکدن عبارتدر . بناءً علیه فاعلك ایشله دیکی فعل قانوناً منع ایدلمش و بر جزاده تعیین اولنشمیدر ، اولنماشمیدر . بوراسی تدقیق اولنق ایجاب ایدر . مثلاً: برکیمسه نك قومار اوینادیغی ثابت اولسه — فاعلك قومار اوینادیغی اكلاشلمغله جزؤ مادی حاصل اولمش، و فاعل عاقل و بالغ اولوب مجنون و معتوه اولمادیغندن حقنده جزا ویريله بیلور اشلخا صدن بولنمغله جزؤ معنویده وجوده ککش ایسه ده — فقط قومار اوینامق فعلی قانون منع ایتماش اولد . یغندن جزؤ قانونی حصوله کله مدیکی جهتله بر جرم تشکل ایلیمز .

۴ — جزؤ ناحق : وقوعه کلن بر فاعلك بغیر حق « ناحق یره » ایشلنمش اولوب اولمادیغی تعیین ایتمکدن عبارتدر . بناءً علیه فاعل ایقاع ایلدیکی فعلی اوله رقی می ایشله مش ، یوقسه ناحق یره می ایشله مشدر . بوراسی ده اكلاشلمق لازمدر .

مثلاً : بر کیمسه دیگر بر شخصک عرضه کچمک ایسته یوبده
 او شخصی اول کیمسه اولدیرمدن الندن قور توله میه جغنی
 اکلایه رق او کیمسه بی قتل ایتدیکی ثابت اولسه — قاتل فعل
 قتلك فاعلی اولدیغی ثابت بولندیغندن جزؤ مادی ، و قاتل عاقل
 و بالغ اولوب مجنون و معتوه بولمادیغندن جزایه مستحق اولمغله
 جزؤ معنوی و فعل قتل قانوناً مجازات اولنور ممنوع فعللردن
 بولمغله ده جزؤ قانونی حصوله ککش ایسه ده فعل قتلك حقلی
 اوله رق ایشله نوب ناحق یره ایقاع ایدلمدیکی جهتله جزؤ ناحق
 وجوده کلدیکندن جرم تشکل ایتمامشدر . بناءً علیه بوکی فعللره
 جزاده تعیین ایدیله مز . الحاصل بر فعلله جرم دینله بیلمک
 ایچون اشبو درت جزئک هپسنک بردن موجود بولمنسی
 لازمدر مثلاً : بر کیمسه نك بر فعل قتل ایقاع ایلدیکنی فرض
 ایده لم : فاعلك فعل قتلی ایقاع ایلدیکی ثابت « جزؤ مادی
 موجود » و فاعل قاتل عاقل و بالغ بر کیمسه اولدیغندن جزایه
 مستحق « جزؤ معنوی موجود » و فعل قتل جنایت اولوب
 قانوناً ممنوع افعالدن « جزؤ قانونی موجود » و فعل قتل برحق
 و وظیفه یه و بر مجبوریته قانونیه یه بناءً یالمله یوب ناحق یره ایشلنمش
 « جزؤ ناحق موجود » بولندیغنی لدی التذقیق اکلاشیلورسه
 درت جزؤ موجود اولدیغندن تام بر جرم تشکل ایتمش اولور .
 و فاعلنه ده قانوناً ایجاب ایدن جزا ویریلور .

۳ — مجرمك اوصافی

مجرم ، قوهٔ عقلیه و ارادهٔ ذاتیه سنه مالك اولدینی حالدہ
بر جزا تهدیدی التنده اوله رق قانوناً جرمدن معدود اولان
بر فعل حرکته عمدأ و یا قصدأ و یا خود تقصیرأ بولنان کیمسه در.
ایشته بو و صفئرله موصوف، بو صفئرله متصف اولان بر شخصه
مجرم دینلور. بو صفئرک بری اولما زسه او کیمسه یه مجرم دینله من
اوصافی تعریف و ایضاح ایده لم :

اولاً: مجرم قوهٔ عقلیه و ارادهٔ ذاتیه سنه مالك اولمایدیر .
یعنی مجرم عاقل و بالغ اولوب صبی و مجنون و معتوه اولماسلی
ویا بدینی جرمی کندی ارزو و اراده سیله یاپوب بشقه طرفدن
اجبار و اکراه ایدلماش اولمایدیر. مجنون بر کیمسه یه مجرم دینله من
جبراً بر فعل ایشلندیر یلن کیمسه یه مجرم دینه من.

ثانیاً: مجرم قانوناً جزا تعیینله جرمدن معدود اولان بر فعل
و حرکته بولمایدیر. یعنی مجرم قانونک بر جزا ایله تهدید ایدرک
منع و یا امر ایلدیکی بر فعل و حرکتی ایشله ملیدیر. یوقسه قانونک
یا لکنز منع ایدوب جزا تعیین و تصریح ایتدیکی بر فعلی ایشله یلن
کیمسه یه مجرم دینله من. «بو خصوصده جرم بحثده کی تفصیلاته
مراجعت اولنه .»

ثالثاً: مجرمك ایقاع جرمدہ عمدہ و یا قصد و یا خود تقصیری

بولمليدر. يعني مجرم، جرمي عمدآ ويا قصدآ ايشله مش اولملى وياخود جرم، مجرم قصور و تقصيراتدن طولايى حاصل اولمش بولمليدر. بر كيمسه نك هيچ عمدى ويا قصدى وياخود تقصيرات و قصورى اولمقسزىن صرف خطا اثرى اوله رق وجوده كلن بر جرم دن طولايى او كيمسه يه مجرم دينله مز. مثلاً: بر كيمسه شهر ويا قصبه نك خارجنده اطرافى ديوارلى كندى بغيچه سنده آو اولانيركن بريسي او بغيچه يه كيرمش بولنوبده او كيمسه ده بونى كور مكسزىن آوه آتدينى تفنك ايله اوشخصى اولديرديكى فرض اولنسه بو صرف بر اثر خطادر. هر نه قدر بر شخص اولمش و قتل فعلى جزا تهديديله قانوناً منع ايدلمش و فاعل اولان بغيچه صاحبيده عاقل و بالغ و كندى اراده و اختياريله تفنك آتمش ايسه ده، فاعلك شو، فعل قتله عمدى ويا قصدى وياخود تقصيراتى بولماديغندن فاعله مجرم دينله مز و جزا ويرييله مز.

ولكن بر شخص بشقه بر كيمسه نك مالى اولان بغيچه يه كيدوبده آو اولانيركن آتدينى تفنك دن او بغيچه نك صاحبي اولان كيمسه وياخود بغيچوانى اوريلوبده وفات ايتديكى فرض ايدلسه، بو حالده هر نه قدر اوشخصك او كيمسه لرى اولديرمكه عمدى و قصدى يوق ايديله ده كنديسنك اولمايان بغيچه يه كيدوب آولانمق جائز اولمديغندن او بغيچه يه كيروب آولانمى بر قصور و تقصيرات اولوب وقوعه كلن فعل قتله اوشخصك تقصيراتندن

حصوله کلدیکی جهتله اوشخصه مجرم دینور . وقانوناً مجازات اولنور .

مجرمیتک اوصافندن اولان عمد وقصد وتقصیر اتندنده بحث ایدلم .

عمد — ایقاعی نیت اولنان بر فعل ممنوعک ذهنده برمدت تصور وتصمیم ایدلمسیدر .

یعنی مجرم بر جرمی بر دن بره ایقاع ایتمه یوب ، اجرا ایده جکی اول جرمی اولجه برمدت ، دوشونه رک ذهنده تصور وتصمیم ایلد کدنصکره اجرا سنه قرار ویره رک ایشلمسنه عمد دینلور . مثلاً : بر کیمسه بر آدمی اولدیر مک نیت ایدوب برمدت او آدمی ناصل اولدیره بیله جکنی ونزه ده بولنوب نره سندن اوره جغنی دوشونه رک قرار ویرد کدنصکره او آدمک یولی بکلیه رک قتل ایتسه بوقتل عمداً ایقاع ایدلمش وقاتل متعمد اولمش اولور که جزاسی اعدامدر . چونکه : قاتل فعل قتله نیت ایلدیکی آندن قتلی اجرا ایتدیکی زمانه دکی نندامت ایدرک بویله مدهش بر قتلدن واز کچه بیله جک قدر برمدت کچدیکی حالده ، ندامت ایتمه یوبده صغوق قانلیقله مدهش بر جنایتی یاپمغه قرار ویره رک اجرا ایتسی واجرای جنایت خصوصنده بوقدر عناد واصرار ایلمسی حسیله قانون بویله متعمداً قاتل اولانلرک اعدامنی امر ایتشددر .

قصد — خلاف قانون حرکت ایتک نیتی در . یعنی ،
ایقاعنه نیت اولنان فعل مغایر قانون اولمقدر ، ایستر بوفعلک
مغایر قانون اولدینی معلوم اولسون ، ایسترسه نیت اولنان فعلدن
مغایر قانون بر حرکت میدان کلسون .

قانوناً بر جریمه قصد ، در حال نیت ایدرک مغایر قانون
بر فعل ایقاع ایتکدر .

شو حالده ، عمدایله قصد بیننده بیوک فرق واردر .
عمده بر جریم بر مدت دوشونوب اجراسنه قرار ویرد کدنصکره
ایقاع اولنور . قصده همان نیت ایدیلهرک در حال اجرا ،
اولنور . مثلاً : بر کیمسه دیگر بر کیمسه یی اولدیرمک ایسته یوبده
بر مدت دوشونوبده ذهنده تصور وتصمیم ایلد کدنصکره بر
صره سنی کتیره رک اول کیمسه یی قتل ایتسه عمداً قتل ایتش
اولور . و فقط بر کیمسه دیگر بر شخص ایله اوطوریرکن
واوشخصی قتل ایتک عقل وخیالنه کلزکن ارالرنده بر غوغا
چیقبوب او کیمسه حدت و غضب ایدرک همان « شو حریفی
اولدیرهیم » دیهرک در حال او کیمسه یی قتل ایتسه قصداً قتل
ایتش اولور . اشبو فعللرک صورت اجراسی بیننده فرق اولدینی کی
جزالری بیننده ده فرق واردر . عمداً قاتل اعدام اولنور .
قصداً قاتل اون بش سنه کوره که قونور .

قصد ایکی درلو اوله ییلور . بری ، فاعل ایشلدیکی فعلدن

معلوم و معین بر ضرر حصوله کله جکنی بیلهرک یالکز اوضرری
ایقاع ایتمه قصد ایدرکه بوکا « قصد معین » دینور.

مثلا : برکیمسه دیگر بر شخص ایله غوغا ایدرکن « شو
حریفک قفاسنی یاره یم » دیهرک باستون ایله باشنه اوره رق جرح
ایدر. بوندن اوجارحک مقصدی اوشخصک باشنی جرح
ایتمکدر.

دیگری ، فاعل ایشلیدیکی فعلدن بشقه مضرترلده حصوله
کله بیله جکنی آکلا یوبده فقط نیت ایلدیکی مضرتدن بشقه ضررلری
مرام ایتمه یهرک ایقاع ایلدیکی فعلدن بشقه ضررلرده حاصل اولسه
اصل فعلک نتیجه طبعه سندن بولندیقی جهتله قصد ایتدیکی
بوزائد ضررلردن طولاییده مسئول اولسی ایجاب ایدرکه بوکاده
« قصد غیر معین » دینور. مثلا : برکیمسه دیگر بر شخصله
غوغا ایدرکن « شو حریفک قفاسنی قیره یم » دیهرک باستونله
ضرب و جرح ایتدکدنصکره اوشخص وفات ایتسه ، اوکیمسه
وفات ایدن شخصی اولدیرمک ایچون ضرب و جرح ایتماش
اولدیغندن کندیسنه قاتل جزاسی ویرلمزسه ده ، باشنه ضرب
اولنان برکیمسه نك اولمک احتمالی ده بولندیغندن اوکیمسه یه عادی
ضرب جزاسی ده ویرلمیه رک ایقاع ایلدیکی فعل ضربک نتیجه
طبعه سندن اوله رق وقوعه کلن وفاتدن طولایقانون بش سنده دن
زیاده کورک جزاسی تعیین ایتشددر ،

قانون بعض قباحت کبی اهمیتسز فعللرده اصلا قصد آرامز .
مثلا : ممنوع اولان بر محله میت دفن ایتک موجب مجازاتدر .
یونده قصد آرانماز .

تقصیر — قانونه مغایر اوله رق بر فعل ایشله مک قصدی
اولمدینی حالده مجرد دقتسزک ویا نظاماته رعایتسزک اثری
اوله رق بر جرمک وقوعه کلمسه میدان ویرمکدر . شو حالده
برکیمسه هیچ بر جرم ایشله مک قصدی اولمدینی حالده مجرد
ایشلیدی بر فعاک نتیجه سندن حصوله کلسی ملحوظ اولان
برضرك منع ودفعی ایچون لازم کلن احتیاط و تدبیرده ودقت
واعتماده قصور ایتش اولدیغندن طولایی مستحق مجازات
اولور . قانون بو کبی تقصیره بناءً ایشلنش اولان جرائمده
قصد بولمدینی جهتله ایقاع اولنان فعلدن دکل ، اوفعلک ایقاعنی
موجب اولان دقتسزک ونظاماته رعایتسزک دن طولایی جزا
تعین ایدر مثلا : بر آوجی ، آو اولارکن هیچ قصدی اولمدینی
حالده محضا دقتسزکله بر کیمسه یی اوروب اولدیرسه آوجی
او کیمسه یی اولدیردیکندن طولایی دکل ، اولدیرمامک ایچون
لازمکلن دقتده قصور ایلدیکندن طولایی جزا کوریر . بونک
ایچون قانون او آوجی یه اون بش سنه دکل ، آلتی آیدن ایکی
سنه یه قدر حبس جزا تعین ایتشددر . مجرمک اوصافی اکلا .

شله قدن صکره، جرم کیملر حقنده ایشله بیلور ؟. بر آزده ،
بوندن بحث ایدلم فائده دن خالی دکدر .

جرم، افرادک، انسانک شخصنه، حیاته، عرض و ناموسنه،
مالنه قارشو ایشاندیکی ^{بر} هیئته، یعنی هیئت اجتماعیه و شرکترلده
برر شخص معنوی اولدیغندن اولره قارشو ده بر جرم ایشله بیلور.
مثلا : بر شرکته اعتبار مالینی بوزان بر فعل او شرکته
ناموسنه قارشو ارتکاب ایدلمش بر جرمدر . بوندن بشقه جرم
یالکز حیاته اولانلره دکل اناسنک قارنده بولنان هنوز ،
طوغمه مش چوجقارله ، اولمش انسانلره قارشو ایشله بیلور.
چوجق دوشورنلره و دوشمه سینه سبب اولنلره جزا تعیین
ایدلیدیکی کبی قبرلرده کی موتالره تعرض ایدنلر جزا کوریر .
برده بر کیمسه همان اعدام ایدلمک اوزره بولنان بر شخصه
قارشوده بر جرم ایشله نور ، بویله بر آدمی جلاددن بشقه سی
اولدیرسه عادتاً قاتل جزاسی ویریلور .

۴ — جرمک تقسیماتی و بوتقسیماته نظر اتعریف و درجاتی

جرائمک بر تقسیمات نظریه سی ، برده تقسیمات قانونیسی
واردر .

۱ — جرمک تقسیمات نظریه سی : جرم تشکیل ایدن

فعللرك نوع و حالته و صورت و وقوع و اجراسنه موافق اسملر ايله اولان تقسيمدر كه بروجه آتی تعريف اولنور .

جرائم اجرائیه ، جرائم اهلایه — قانون بر فعلك یا پلسنی یامنع ونهی ایدر و یا خود امر و تنیه ایلر . بوصوله قانوناً منع ونهی ایدیلن فعلی یا مقی و یا امر و تنیه اولنان فعلی یا پامق جرمدر . قانونك نهی ایلدیكى فعلی یا مقیدن حاصل اولان جرمه « جرائم اجرائیه » دینلور . مثلاً : معین قاتل اولان کیمسه موقتاً کوره كه قونیلور كه قانون معین قاتل اولغی نهی ایتشدرد . قانونك امر ایتدیكى فعلی یا پامقیدن حاصل اولان جرمه ده « جرائم اهلایه » دینور . مثلاً : قانون جزانك ۲۵۴نجی ماده سنده « حانچی ولوقظه جیلردن کیجه لری فنار یا قسی کندوسنه جانب ضابطه دن تنیه اولندیغی حالده اهل ایدن بش بشلکه قدر جزای نقدی ايله محكوم اولور كه قانون فنار یا قلمسنى امر ایتشدرد . قانون ، دائماً نهی و منع ایدر . امر ایلدیكى فعللر بر قاچ قباحث فعاندن عبارتدر . جرائم عمومیه ، جرائم خصوصیه — جرائم عمومیه هر کس طرفندن ایقاع اولنه بیلن جرملردر . قانون جزاده کی جرملر کی .

جرائم خصوصیه ده ، بعض صنف اهلاییه و یا خود برمسلك و یا صنعت اربابنه مخصوص اولان جرملردر . مثلاً : عسکری جزا قانونی ، و طبابت قانونی ، واسپنچیارلق « یعنی اجزاجیلق »

نظامنامه سی کی قانون و نظام ملرده اولان جرم ملردر که بونلر
عسکر و دو قنور و اجزایار طرفندن ایشله نور . یعنی عمومی
اولمایوب بر قسم خلقه مخصوصدر .

جرائم مشهوده، جرائم غیر مشهوده — بو تقسیم جرم لک
صورت و قوعی اعتبار یله در . جرم مشهود دیمک و قوعه کلور کن
مطلقا هر کس طرفندن کورلمش بر جرم دیمک دکلدر . قانونک
تعریف ایتدیکی وجهله و قوعبولسی دیمکدر .

جرم مشهود : اجرا اولمقده و یا خود هنوز اجرا اولنش
اولان جرمدر . برده ولوله ناس اوزرینه و یا خود جرمک
ارتکابی متعاقب انک فاعلی و یا خود فاعلنک شریکی اولدیغی
مؤید اشیا و اسلحه و ادوات و آلات ایله در دست ایدیلن اشخا
صک جرم لری جرم مشهود قییلندندر . ایشته شو صورتله
اجرا اولنان و یا اولنش بولنان جرم لره قانوناً جرائم مشهوده
دینور .

جرائم غیر مشهوده : دخی کیزلیجه اجرا ایدیلوب اوزرندن
برمدت کچمش اولان جرم لره دینلور .

جرائم سیاسی، جرائم عادیه — جرائم سیاسی طوغریدن
طوغری یه دولتک داخلی و خارجی امنیت و سلامتی اخلا
ایدن و دولتک شکل و اداره سنی تبدیله و یا خود دولتک محافظه

و بقاسنه تعلق ایدن جرملردر . قانون جزاده بوکبی جرملر
ایچون ایکی فصل واردر .

جرائم عادیه دخی: افراد اهالینک جان و مال و عرضه
قارشو علی العاده ایقاع ایدیلن جرملردر که قتل و سرقت و هتک
عرض کبی قانون جزاده ذکر اولنان فعللردر :

جرائم آنیه - جرائم متمادیه - جرائم آنیه مغایر قانون
اولان بر فعلک یا پلاسيله برابر ختام بولان تمام اولان جرملردر .
قتل، ضرب، جرح، کبی

جرائم متمادیه ده : مغایر قانون اولان فعلک متمادیا ایشلنوب
دوام ایدلسیدر که فعلک ایقاعيله برابر مجرمیت حالی دوام ایدن
جرملردر . مثلاً: اشقیالق ایتک کبی که اشقیالغه باشلاندینی
زماندن دردست اولندینی زمانه قدر اشقیالق دوام ایدر . اکسیک
ترازو قوللانمق و بغیر حق بر کیمسه بی حبس ایتکده بویله در .
بونلرده اکسیک ترازو قوللانمغه باشلاندینی کوندن طوتلدینی
کونه قدر جرم دوام ایلر .

جرائم اعتیادیه - بر فعلک یا لکز بر کره ایشلنمسی جرم اولمیوب
بر قاچ دفعه ارتکاب اولنمسی جرم عد اولنان فعللردر . یعنی بر
دفعه ایشلنمسی جرم اولمیوب فقط اوفعلی بر قاچ دفعه ده
ایشلر سه اوفعلی ایشله مکّه الشمش، اعتیاد ایتش اولدینی اکلا -
شیلهرق اوفعل او وقت جرم اولش اولور . و فاعلی ده مجازات

کوریر لکن ایلک دفعه ایشلیدیکی وقت جزا کورمز اعتیاد ایدرسه کوریر. مثلاً: اقربا بیتنده اولان سرقتده بر اولاد باباسنک مالنی ایلک دفعه اوله رق چالارسه بو سرقت فعلی جرم اولماز او اولادهده جزا ویرلمز. او اولاد باباسنک مالنی بر قاچ دفعه بویله چالمش ایسه سرقت فعلنی اعتیاد ایتمش اولدیغندن - محضاً اعتیاد ایتدیکی ایچون - او وقت اوفعل سرقت جرمنی تشکیل ایدر و اولادهده سارق جزاسی ویریلور. کنج کیمسه لری فحشیاته سوق ایتک، خلقی قمار اوینامق اوزره بریره طوپلامق فعللری ده بویله در،

جرائم اعتیادیه صراحة ذکر اولنور. آندن بشقه جرم لر جرائم اعتیادیه قیاس اولنه ماز. قانون هانکی فعلی اعتیاد ایتمکی جرم عد ایتمش ایسه اوفعله جرائم اعتیادیه دینور. یوقسه، بر ضرب ویا جرح فعلی وقوع بولوب ده فاعل بونی ایلک دفعه اولمق اوزره یایمشدور. اعتیاد ایتما مشدر. دیه رک جرم عد ایدله مکملک اوله ماز.

جرائم مشترکه، جرائم مرتبطه — جرائم مشترکه متعدد اشخاصک، بر مقصد مشترک حصولی ایچون ایقاع ایلدیکی جرم لردر. اصول محاکمات جزائیئه نک ۲۰۹ نجی ماده سی جرائم مشترکه بی شو وجهله بیان وتعداد ایدر.

[اولاً: اشخاص مجتمعه طرفندن بر زمانده، ثانیاً: اولجه

بینارنده حاصل اولان اتفاق اوزرینه اشخاص متعدده طرفندن متفرقاً ازمنه و محال مختلفه ده ایشله ن، ثالثاً : بری دیگرینک ارتکاب و یا تسهیل و یا حصولی و یا خود جزاسز قالمسنی تأمینه مدار اولق ایچون ایدیلن جرملر جرائم مشترکه عد اولنور [یونلره برر مثال کوستره لم.

اولاً : اشخاص مجتمعه طرفندن برزمانده ایقاع اولنان جرملر . مثلاً : اون کشی دن مرکب بر قومیه اختلال حیقار مق فکر و مقصدیله هپ بردن بر بانقه یه هجوم و یا خود بر حکومت آدمی قتل ایتمک تصدی ایتملریدر که بو اشخاصک شو جرمنه جرائم مشترکه دینور .

ثانیاً : اولجه بینارنده حاصل اولان اتفاق اوزرینه اشخاص متعدده طرفندن متفرقاً ازمنه و محال مختلفه ده ایشنان جرملر مثلاً : اون کشی دن مرکب بر خرسز قومانیاسی تشکل ایدوبده یونلر بر بردن آیری آیری اوله رق بشقه بشقه زمانلرده شورادن بورادن اشیا چالوب آرالرنده تقسیم ایتمه لر ، بو اشخاصک شو جرملری جرائم مشترکه دندر .

جرائم مرتبطه — جرائم مرتبطه شویله تعریف اولنه بیلور : بر شخصک بر مقصدله ایقاع ایتمدیکی بر جرم ایله ، او جرملر ایقاعی ایچون ارتکاب اولنان بشقه بشقه جرملر اراسنده بر رابطه بر مناسبت بولمسیدر . شو حالده جرائم ارتباطیه ، جرملری

یکدیگرینه ربط ایله بونلرک توحید تحقیقات و محاکماتی ایجاب
ایدن مناسباتدن عبارت اولمقدهدر . مثلاً : برکیمسه بر قاصه
آچق ایچون براسقاریلا یاپدینی « بوباشلی باشنه بر جرمدر . »
برمغازه کیردیکی « سرقت ایچون بر یره کیرمکده آیری
برجرمدر . » مغازه کی قاصه یی آچهرق پاره لری و بر طاقم
سندلری چالدینی « بوده آیری بر جرمدر . » چیقارکن بکچی
کوروب طوتمق ایستدیکی وقت بکچی یی اولدیردیکی « بوده بشقه
برجرمدر . » وسندلری امضا ایتمک ایچون مال صاحبک امضاسنی
تقلید ایدرک سندلری ساخته کارلق ایله امضا ایتمدیکی « بوده
برجرمدر . » فرض ایدلسه ، بونلر آیری آیری برر جرم
اولدینی حالده اجرا ایدلمک ایسته نیلن سرقت فعلنه مناسبت
ورابطه سی اولان جرملردر . فاعل یالکز سرقت فعلنی ایقاع
ایده جکدی . فقط بونی ایقاع ایدرکن دیکر بعض جرملرکده
ایقاعی ایجاب ایلدیکندن بالمجوریه انلری ده ارتکاب ایدرک
قتل ساخته کارلق جرملری ده حاصل اولدی . لکن بونلر سرقت
فعلندن آیری اوله یوب سرقتیه مربوط بولندینی ایچون جرائم
مرتبطه تسمیه اولنور .

جرائم مشترکه ایله جرائم مرتبطه بیننده فرق واردر .
جرائم مشترکه ده ، فاعل بر قاق ، فعل برویا بر قاق دانه اوله ییلور .

جرائم مرتب شده ایسه مطلقا فاعل بر ، فعل ده بر قاج اولق لازمدر .

اجتماع جرائم — اجتماع جرائم: بر کیمسه طرفندن بشقه بشقه مقصدلرله بردن زیاده جرملر ایقاع اولنوبده بوجرملرک هیچ بری حقنده هنوز بر حکم لاحق اولیان متعدد جرملره دینور . شو حالده اجتماع جرائم حقنده ایکی شرط واردر . بری ، بر کیمسه طرفندن بردن زیاده بر جرم ایشلنمک ، دیکری ده ؛ بوجرملردن هیچ بری حقنده هنوز بر حکم ویرلماش اولمقدردر . مثلاً : بر کیمسه بو کون بر سرقت ایرتسی کونی بر طولاندیر یجلق ایدر او کیجه ده بر یسیله غوغا ایدرک جرح ایلر ، بر قاج کون صکرده ده بر یسینی قتل ایلر .

بوجرملر آیری آیری مقصدلرله اجرا ایدلش و هنوز دها هیچ بری حقنده بر حکم لاحق اولمامشدر . ایشه بو کی جرملره اجتماع جرائم دینور .

تنیه — جرملرک بویله نظری اوله رق تقسیمیه ده مهمدر . اصول محاکمه ، توحید محاکمه ، تعیین جزا و مرور زمان کی اسبابدن طولانی بوضورتله تقسیم و تفریق لازمدر .

۲ — جرائمک تقسیمات قانونیه سی : قانوناً مجازات اولنان جرائم اوج نوعدر .

برنجیسی جنایت ، ایکنجیسی جنحه ، اوچنجیسی قباحتمدر .

جرائم بو وجهله اولان تقسیم قانونیسی، جرملرک نوع و درجه لرله
جزالرینک تعیین ایدلمسینه و بونلرک هانکی محکمه لرده کوریله جکنک
تفریقنه اساس اولور. شمدی بونلری تعریف ایدلم.

۱ — جنایت : مجازات ترهیییه یی استلزام ایدن افعالدر.
مجازات ترهیییه ده اعدام و مع التشهیر مؤبداً و یاموقتاً کوره که
قونق و قلعه بند اولق ماده لرله نفی ایله و مؤبداً رتبه و مأموریتدن
محرومیت و حقوق مدنیه دن اسقاط ماده لریدر.

اعدام، برکیمسه یی جزا اوله رق قتلاً و یاصلباً اولدیرمکدر.
حامله قادینلر طوغوردق د نصکره اعدام اولنور.

کوره ک، ایاقلرنده تیمور اولدینی حالد خدمت شاقه ده
قوللانلقدر. بوجزایه مستحق اولان شمدی تشهیر اولنماز.

مؤبداً کوره ک، دولتجه تعیین اولنه حق محللرده جانینک
ایاقلرنده تیمور اوله رق وفات ایدنجه یه قدر خدمت شاقه «مشقتلی
ایشلرده» استخدام اولنمسیدر.

موقت کوره ک، دولتک تعیین ایده جکی یرلرده اوچسنه دن
اون بش سنه یه قدر تیمور بند اوله رق خدمت شاقه ده قوللانلقدر.
فقط شمدی کوره ک جزاسنه دوچار اولنلره تیمور اورلماز.
و خدمت شاقه ده قوللانماز.

مؤبداً قلعه بندلک، دولتجه تعیین اولنان قلعه لرک برنده
جرمک وفات ایدنجه یه دکن محبوساً توقیف ایدلمسیدر.

موقت قلعه بندك ، دولتجه تعیین اولنان قلعه لرك برنده
 اوج سنه دن اون بش سنه یه قدر محبوساً توقیف اولنمقدّر .
 نفی ابد، بر شخصك دولتجه تعیین اولنان بر محله مؤبداً
 كوندریلوب اقامت ایتدیرلمسیدر .

مؤبداً رتبه و مأموریتدن محرومیت، مجرمك آرتق دولتجه
 كرك طوغریدن طوغری یه و كرك التزام طریقیله بیوك و كوچك
 خدمته بولنمقدن و رتبه و معاشه نائل اولمقدن و نشان طاقدن
 محروم اولسی و اصحاب رتبه و مأموریتدن ایسه اول امرده رتبه
 و مأموریت و معاشك رفع اولنمسیدر . بوندن بشقه حقلرنده
 مؤبداً و موقتاً كورهك و مؤبداً قلعه بندك و نفی ابد جزالری
 حكم اولنانلر سالف الذكّر مؤبداً رتبه و مأموریتدن محرومیت
 جزاسنده مستحق اولورلر .

حقوق مدنیه دن مؤبداً اسقاط جزاسی، اولاً : مؤبداً رتبه
 و مأموریتدن محرومیت جزاسنه مستحق اولق ، . ثانیاً : كافه
 حقوق بلدیهدن یعنی مملكتجه و ملتجه و اصنافه بر مأموریت
 رسمیه ده بولنمقدن محروم اولق ، ثالثاً : بر مكتب خواجه لكنده
 قوللانماق ، رابعاً اجرای تحقیقاتده قوللانماق و بر دعواده
 شاهد اوله میوب كنندیسندن استیضاح کیفیت لازمكلیکی تقدیرده
 افاده سی بیانی معلومات حكمنده قبول اولنوب دعواجه حكمنسز
 طوتلق و بر دعواده و كالت ایده مامك ، خامساً : وصی اوله مامق ،

سادساً : سلاح طاشیمغه صالح اولماق خصوصلرندن عبارتدر .
 ۲ — جنحه : مجازات تأدیه بی مستلزم اولان افعالدر .
 مجازات تأدیه، برهفته دن زیاده حبس وموقتانی ومأموریتدن
 طرد وجزای نقدی ماده لریدر .

حبس جزاسی، دولت حبسخانه لرنده مدت محکومه ایچنده
 توقیف اولنمقدر . اشبو حبس جزاسنک مدتی مجرمک حبسه
 دخولی تاریخ ودقیقه سندن اعتباراً یکرمی درت ساعت دن نهایت
 اوچ سنه در . نفی موقت، مجرمک بولندینی یردن بر بشقه محله
 کوندریلوب اوچ آیدن اوچ سنه یه دک تغریب اولنمقدر .

موقتاً مأموریتدن طرد، مأموریتی اولانلرک قانون جزا
 حکمنجه مأموریتلرندن چیقارلسی ومأموریته مخصوص
 معاشلرینک قطع اولنمسیدر . وطررد جزاسنک مدتی دخی اوچ
 آیدن آلتی سنه یه قدردر . یعنی بوجزایه مستحق اولانلر مدت
 مجازاتلرنده مأموریت ومعاشه نائل اوله مزلر . ومأموریتده
 اولیانلر بوجزایه مستحق اولدقلرنده انلردخی مدت جزالرنده
 مأموریت ومعاشه نائل اوله مازلر .

جزای نقدی، مجازات نقدیه دخی برشخصدن قانونک
 تعین ایتدیکی اوزره آچه آلمسیدر . جنحه لرده یوزغر وشدن
 یوقاری باشلار .

۳ — قباحت : مجازات تکدیریه بی استلزام ایدن افعال و حرکاتدر .

معاملهٔ تکدیریه، یکرمی درت ساعتدن بر هفته یه قدر حبس و نهایت یوز غروشه قدر مجازات تقدیه در . بر جرمك هانکی نوع جرائمندن اولدیغنی یعنی او جرمك جنایت و جنبه و قباحت نوعلرندن هانکی سینه داخل بولندیغنی آ کلامق ایچون ، اولاً قانون جزانك او جرم حقنده تعیین ایلدیکی جزایه باقلی، صکره او جزا اوچ نوع جرائمندن هانکی سینه عائد ایه او جرم اول نوع جرائمندر . مثلاً : بریسی رشوت آلمش . بو جرم جنایت می یوقسه جنبه و یا قباحت می ، بونی آ کلامق ایچون قانون جزانك آلمش سکرنجی ماده سنه باقلی، اوراده مرتشی « رشوت آلان » ایچون موقه قلعبدند حکم اولنه جنی محرردر . بو قلعه بندك جزاسی هانکی نوع جرمه مخصوص ایدی باقیلور . جنایته، او حالده رشوت المق فعلی، جرمی جنایتدر .

جرم لرك نوعی بو صور قله جزا ریله بولنور . اسم لر یله بولنه ماز . بر جرح بر سرقت بعضاً جنایت بعضاً جنبه اولور . مثلاً : کیجه وقتی بر خانه ده اجرا اولنان سرقته قانون کوره ك جزاسی تعیین ایتشدور، شو حالده جنایتدر . کوندوز بر خانه ده ایقاع اولنان سرقته قانون حبس جزاسی تعیین ایله مشدر که جنبه در . و کذا : جرح قتل قصد یله اولور سه جزاسی

کوره کدر، نوعی ده جنایتدر . قتل قصدیه اولمازسه جزاسی
حبسدر، نوعی ده جنحهدر .

۵ — وقوعه کلن برفعلک جرم تشکیل ایدوب ایتیه جنک
مثالر ایله ایضاحی :

جرمک صورت تشکلی بختنده بیان اولدیغی اوزره، وقوعه
کلن برفعلک جرم تشکیل ایتیه ایچون اوفعل انسانلرک حیاته،
شخصنه، مالنه ویا عرض وناموسنه قارشو ایشلنمش اولمیدر .
حیواناته قارشو ایشله نفعلر جرم دکلدردر. وقوعه کلن برفعلک
جرم اولوب اولمادیغی بیلمک ایچون قانون جزایه باقیلور .
قانون جزا اوفعلی منع ونهی ایتیش و برده جزا تعیین ایدرک تهید
ایتیش ایسه اوفعل جرمدر. اونی ایشله نفعلر ده مجرم اولور .

مثلا : قانون جزانک ۲۱۴نجی ماده سی [متن ماده - بر ماده
مخصوصه اسنادی اولمه یوب فقط معا ییدن برشیء تخصیصیه یادیکر
صورتله برکیمسه دیکر کیمسه حقنده مخل ناموس سوز سویلر
ویا خود شتم « سوومک » ایلر ایسه یکر می دوت ساعتدن برآیه
قدر حبس اولنور. الح] موجبنجه برکیمسه حقنده مخل ناموس
سوز سویله مک ویا خود سب و شتم ایتیمک یعنی سوومک جرم
ایتمش چونکه قانون جزا بوفعلی منع ایتیش و بر جزاده تعیین
ایتمشدر .

قانونک یالکزمع ویا امر ایدوبده جزا تعیین ایتدیکی فعللرده

جرم تشکیل ایتمز . مثلاً : اصول محاکمات جزائیه قانوننک
یکرمی آلتنجی ماده سنده دولتک هر مأموری بر جنحه ویا
جنايتک وقوعنی خبر آلورسه در حال مدعی عمومی یه اخبار
ایتمسنی امر ایتمشدر . فقط اخبار ایتمهینلر حقنده بر جزا تعیین
ایتمامش اولدیغندن بویله بر جنایتی خبر آلوبده مدعی عمومی یه
اخبار ایتمه مک بر جرم دکلدرد .

وقوعه کلن بر فعلک جرم تشکیل ایتمسی ایچون - جرمک
صورت تشکلی بحثده بیان اولدیغنی اوزره - جرمک اجزا
وارکانندن اولان درت جزؤک بردن بولمسی لازمدر . اجرا
اولنان بر فعلده بوجزؤدن بری بولنمازسه اوفعل جرم اوله ماز .
مثلاً : مجرمک بر جرمی حین ارتکابنده جنت حالنده بولندیغنی
ثابت اولور ایسه مجازات قانونیه دن معاف طوتیلور . [دیه
محرردر . بناءً علیه مجنونک ایشله دیکی بر فعل جرم تشکیل ایتمز ،
چونکه جرمک اجرا سندن اولان « جزؤ معنوی » موجود
دکلدرد ، یعنی مجرم عقللی اولمایوب دلیدر .

قانون مذکورک قرق ایکنجی ماده سنده دخی [متن
ماده - بر کیمسه نک بر جرمی اصلاً رضاسی اوله یه رق مجبوراً
ایشلمش اولدیغنی ثابت اولورسه کذلک مجازات قانونیه دن معفو
طوتیلور .] دینلایکندن بر کیمسه طرفندن اولومله تهدید ویا
سلاحله اجبار اولنان بر شخصک ایشلادیکی فعلده جرم تشکیل

ایتمز . چونکه « جزؤ مغنوی » یوقدر یعنی او جرمی ایشله -
 ینک اختیار و رضاسی النده دکلدر . مثلاً : برکیمسه سلاح
 چکوبده بر شخصه « یاشو آدمی دو کرسک و یا خود سنی اولدیریرم »
 دیهرک اجبار ایتسه و او شخصده او آدمی دو کسه، بو شخصک
 شو ضرب فعلی جرم تشکیل ایتمز . و کندیسنده بر جزا ویرلر.
 بوبابده جزایی اجبار ایدن و سلاحله تهدید ایدن کیمسه کوریر.
 قانون جزانک یوزسکسان آلتنجی ماده سی [متن ماده - مدافعه
 و محافظه نفس و عرض ایچون وقوع بولان قتل و جرح فعللری
 معافدر .] موجبنجه برکیمسه نفسنی مدافعه و عرضنی محافظه
 ایچون بر شخصی قتل و یا جرح ایتسه، بو کیمسه نک شو قتل
 و جرح فعللری جرم دکلدر . چونکه جرم اجزاسندن اولان
 « جزؤ ناحق » یوقدر . یعنی او کیمسه بو فعللری حقی اوله رق
 ایشله مشدر . بناء علیه شو فعللر جرم تشکیل ایتمز . و فاعلی ده
 جزا کورمر . یوز طقسان سکزنجی ماده دخی [متن ماده - فقط
 ضابطه مأمورلری بوبابده مستثنا اوله رق آنلر « یعنی ضابطه
 مأمورلری » وظیفه مأموریتلرینی اجراده نظام مخصوصنک
 کوستردیکی مساع اوزرینه ایقاع ایده جکلری قتل و جرح
 و ضرب فعللرندن مسؤل اولمازلر . و آنلره مقابله ایدنلر بروجهله
 معذور اوله مازلر] دیه محرردر .

بوماده موجبنجه پولیس و ژاندارمه کی ضابطه مأمورلری

برجانی بی دردست ایتک ایسته دکلری وقت اوجانی سلاحه مقابله ایدرک اگر اولدیرلمزسه پولیسلری یاره لیه جفی آ کلاشلمسی اوزرینه پولیس ده اوجانی بی مقابله و مدافعه اولدیرسه او پولیس حقنده بر مجازات لازم کلز. چونکه بوقتل فعلی جرم تشکیل ایتمز. جرمک اجزاسندن اولان « جزؤ ناحق » یوقدر. او مأمور او جانی بی حقی اوله رق اولدیر مشدر. کذاب رنوبتجی یه « بورایه کیمسه بی قویمه کیرمک ایسته یین اولورسه اور. » دیه امر ویرلسه ده بر کیمسه اورایه کیرمک ایسترسه اونوبتجی ده اوشخصی اولدیرسه بو فعل جرم دکلدر. زیرا برنوبتجی آمرندن آلدینی امری ایفا ایتمشدر. او فعلی اجراده حقی در. جزؤ ناحق یوقدر. ایسته وقوعه کلن بر فعلک جرم تشکیل ایدوب ایتیه جکی بو صورتله تفریق اوله رق بیلنور.

دردنجی باب — حقوق اداره

حقوق اداره، مملکتک صورت اداره سی، و افراداهالینک منافع خصوصیه لرله هیئت دولتک منافع عمومیه سی آراسنده اولان مناسبات و حقوق وظائف بیلدیرن قواعدی جامعدر. شو حالده حقوق اداره، کرک دولتک و کرک افراداهالینک منافع عمومیه و مشترکه لرینه عائد قوانین و نظاماتک ناصل تطبیق

واجرا اولدیغنی تعیین ایدر . حقوق اداره‌نک شامل اولدیغنی مواد باشلیجه درت قسم در .

۱ — تنظیم اداره‌یه یعنی منافع عمومیه‌یه متعلق قوانینک اجراسنه مأمور اولان دوائر حکومتک تشکیلی ، و بو دوائر لازم کلن مجلس وسائر قلملرک تأسیسی ، و ایجاب ایدن مأمورلرک تعیینی و بونلرک حقوق و وظیفه‌لرینک تفریقی ماده‌لریدر . مثلاً : داخلیه نظارتنک صورت تشکیلی ناصلدردر . و مأمورلری قاچ کشی و کیملردن عبارتدر . نه‌کی قوانین و نظاماتک اجراسنه مأموردردر . و شورای دولت ناصل تشکل ایدر . و وظیفه‌سی نه‌در . بونلردن بحث ایدر .

۲ — آسایش و انتظام عمومینک محافظه‌سی ایچون لازم کلن تدبیرلری اجرا ایتمکدر .

قوة عمومیه‌نک حسن اداره‌سی ، عموم افراد خلقه آچیق اولان عمومی محللره نظارت ایتک ، و آداب و امنیت و صحت عمومیه‌یه مخالف افعال و حرکات و وقوعه کلمه‌سی ایچون ایجاب ایدن تدبیرلرک کافه‌سنی ایفا ایتمکدن ، عبارتدر که بو قسم وظیفه ضابطه عمومیه و خصوصیه تودیع ایدلمشدر .

۳ — اموال و املاک امیریه اداره‌سی ، و ویرکو و تکالیف عمومیه‌نک تقسیم و توزیعی و مصارفات عمومیه‌نک تسویه‌سی و واردات عمومیه‌نک تحصیل و بونلرک صرف و محاسبه معامله‌لرینک

ایفاسی قضیه سیدرکه، . . امور مالیّه عاّند وظیفه لری شاملدر .
بووظیفه مالیّه نظارتنه عاّنددر .

۴ — افراد ملتک معارف ومذاهب کبی امور مغنویه لرینه
عاّند حقوق ومناسباته تعلق ایدن مواددر . حکومت ایله مذاهب
مختلفه یه منسوب جماعتلر اراسنده کی مناسباتی و اوقافه وسائر خیراته
عاّند مسائلی، ومکتب ومدرسه کبی معارف عمومیه یه دائر اولان
خصوصاتی جامعدرکه بونک ایچون عدلیه ومذاهب ومعارف
عمومیه و اوقاف کبی نظارتلر تشکیل ایدلمشدر . ایشته حقوق
اداره نك بحث ایتدیکی مواد عمومیه نك خلاصه سی بونلردن
عبارتدر .

۱ — حقوق اساسیه حقنده معلومات مجمله :

حقوق اساسیه — علم حقوقک تعریف وتقسیمی صره سنده
دخی بحث اولدنی اوزره — حقوق عمومیه نك برشعبه سیدر .
بوکا حقوق عمومیه داخله دینور، فقط دها طوغریسی حقوق
سیاسیه دیمکدر .

حقوق سیاسیه : افراد اهاالیدن متشکل جمعیتلردن واز جمله
دولتدن، وقوای عمومیه حکومتک صورت تأسس وتشکلندن،
واشبو قوای حکومتک نه صورتله اداره، ونه وجهله تقسیم
اولدیغندن، وافراده ملتک — شخصلری اعتباریله دکل —
جمعیه دولته منسوبیتلری اعتباریله جریان ایدن معاملاتدن یعنی

دولتک جمعیت نامنه واقع اولان حقوق ووظائفندن بحث ایدن برعلمدر . علم تشریح انسانلرک وجودندن بحث ایتدیکی کبی بوعلمده دولترلرک وجودندن بحث ایدر . بونک ایچون حقوق اساسیه « علم دولت » ده دینلور .

حقوق سیاسیه، اوچ بیوک قسمة آریلیر. حقوق جزائیة، حقوق ادارهٔ ملکیه، حقوق اساسیهدر . حقوق جزائیة : هیئت اجتماعیهنک امنیت و آسایشنی و حسن انتظام و بقاسنی تأمین ایچون وضع اولنان قانونلره مخالف حرکت ایدنلر حقنده اجرایی لازمکن مجازاتک درجائی تعیین و بموجبازاتک ترتیب و اجراسنده رعایت ایدلمسی لازم کلن قواعدی بیلدیررکه قانون جزاء، اصول محاکمات جزائیة، نظریات و حکمت جزائیة، هپ حقوق جزائیةنک برر نوعیدر .

حقوق ادارهٔ ملکیه : مملکتک ناصل اداره اولندیغنی و افراد ملتک منافع خصوصیهلریله هیئت عمومیٔ دولتک منافع مشترکسی اراسندهکی مناسبات ووظائفی تعیین ایدن قواعددر . ولایات قانونی، بلدیة قانونی ودها سائر نظامات ملکیه حقوق اداره قسمنه عائددر .

حقوق اساسیه : بر دولتک ناصل تشکل و تأسس ایلدیکنی وهانکی اصول ایله اداره اولدیغنی و افراد ملتک دولته اولان مناسباتی و حقوق ووظائفی تعیین ایدرکه یا عرف و عادات ایله

تقرر ایتمش یرلشمش بر طاقم قواعددر . ویاخود قانون اساسی ایله تعیین ایدلمشدر . بتون اسلام حکومتلرینک وبالخاصه حکومت عثمانیه نك شكل واصول اداره سی احکام شرعیه دائره سنده تأسس ایتمش ، واحکام شرعیه دن آلتان و زمانك حالت موافق بولنان بر طاقم قاعده لرده طویلانوب قانون اساسی تنظیم ونشر واعلان ایدلمشدر . شو حالده عثمانی حکومتی احکام شرعیه یه موافق اوله رق تنظیم اولنان قانون اساسی موجبجه تأسس ایتمش و اداره ایدلمکده بولنمشدر .

حقوق اساسیه یی ، بر طاقم مؤلفلر بشقه بشقه تعریف ایتشلردر . ایکینسی بیان ایدلم : بری . حقوق اساسیه ، علوم اجتماعیه دندر که بر دولتک تمللرندن قواعد اصلیه واساسیه سندن بحث ایدر .

دیگر بر مؤلفک تعریفه کورده ده : حقوق اساسیه ، امور عمومیۀ دولتک طرز سوق و اداره سیدر . دیه تعریف ایدلش و برده اجرای حکومته مخصوص عملی بر فندر دینلمشدر . حقوق اساسیه ، ایکی قسمه آیریلور . بری : تشکیلات . دیکری : حقوق ووظائفدر .

اصول محاکمات جزائییه ایله تشکیلات محاکم قانونی ناصل آیری آیری و فقط آراالرنده منتظم بر رابطه وارسه حقوق اساسیه نك تشکیلات قسمیه حقوق ووظائف قسمی ده بویله در .

تشکیلات : دولتک مؤسسات عمومیه سی و شکل اداره سی
 حقنده کی قواعدی و اصولی بیان ایدر . مثلاً : حکمدار ناصل
 تعیین اولنور ، دولت مشروطیتله می یوقسه جمهوریتله می اداره
 ایدیلور ، ملت مجلسی ناصل انتخاب اولنور ، اعیان و مبعوثان
 نه در . کبی دوائر و تأسیسات اصلیه حکومتدن بحث ایدر .
 حقوق و وظائف ده : دولتک قوه اجرائیه سنک وظیفه سی نه در .
 نرهبه قدردر . صلاحیتی نه در جه در . افراد ملتک حقوقی
 نه دن عبارتدر ، بو حقوقه قارشی افراد ملت نه کی وظائفه
 مالکدر . بونلری تفصیل ایدر بیلدیرر .

کرك تشکیلات و كرك حقوق و وظائف نشر و اعلان اولنان
 قانون اساسی ایله تعیین و تعداد اولنور . نته کم قانون اساسی بحثنده
 تفصیلات ویرلمشدر .

شو حالده قانون اساسی : بر دولتک حقوق سیاسیه سنی و شکل
 اداره حکومتی و بو حکومتک مرکب اولدینی دوائر عمومیه نك
 تشکیلات اصلیه سنی و بونلر بیننده کی حقوق و مناسبات اساسیه پی
 ووظیفه و صلاحیتلرینی تعیین ایدن بر عهدنامه عمومی در .

۲ — تشکیلات اداره :

ممالك عثمانیه نك صورت اداره سی : قسماً کلاخانه خط
 هایونندن باشلا یه رق نشر اولنان فرمانلر ، وعادات ملیه و اصول
 قدیمه ایله ، قسماً ده قانون اساسی ایله تعیین ایدلمشدر . ممالك عثمانیه

ادارهٔ ملکیه جه طوغریدن طوغری به اداره اولنان ولایتلره ،
 وبعض امتیاز ایله اداره ایدیلن امارتلره تقسیم ایدلمشدر . ممالک
 عثمانیه طوغریدن طوغری به اداره اولنان قسم ولایتلره ،
 ولایتلرده لوالره یعنی سنجاقلره لوالرده قضالره ، قضالرده
 ناحیهلره ، ناحیهلرده قریهلره تقسیم ایدلمشدر که ولایتلرده والیر ،
 سنجاقلرده متصرفلر ، قضالرده قائممقاملر ، ناحیهلرده ، مدیرلر ،
 قریهلرده اختیار مجلسلری اجرای حکومت ایدرلر . بونلردن
 بشقه بروایت قدر بیوک اولمادیغی ایچون ولایت تشکیل ایدلمه یین
 بر قاج سنجاقده ولایتیه مربوط اولمیه رق طوغریدن طوغری به
 اداره اولنور . قدس شریف ، چتالجه ، بیغ ، زور ، بنغازی ،
 جانیک سنجاقلری کی .

ممالک عثمانیه ادارهٔ عسکری اعتباریه یدی اردویه آیرلمشدر .
 مرکزی استانبول اولان برنجی اردو ؛ استانبول وجوارینی
 جزائر بحر سفید ولایتی و اناتولینک غرب جهتلینی : مرکزی
 ادرنه اولان ایکنجی اردو : روم ایلینک قسم شرقیسی ، مرکزی
 سلانیک اولان اوچنجی اردو : سائر روم ایلی ولایتلینی ؛
 مرکزی ارزنجان اولان دوردنجی اردو : اناتولینک قسم شرقیسی ،
 مرکزی شام اولان بشنجی اردو : سوریه و حوالیسی ، مرکزی
 بغداد اولان آلتنجی اردو بغداد ولایتی و مرکزی صنعا اولان
 یدنجی اردو : یمن ولایتی اداره ایدر . طرابلس غرب آیری

برفرقه عسکریه ایله اداره اولنور . الیوم بواردو تشکیلاتی دیکشمش وقول اردو نامیه اون درت قدر اردویه تقسیم ایدلمشدر . اردولر فرقهلره ، فرقهلر لوارله ، لوالر آایلره ، آایلر طابورلره طابورلر بلوکلره ، بلوکلره طاقملره تقسیم اولنوب هر برینه لازم کلن ضابطه وقوماندانلر تعیین اولنمشدر . وهر اردویه سواری وطوچی واستحکام ومترالیوز وسائر صنوف عسکریده ن لزومی قدر تفریق وتعیین ایدلمشدر . قوه بحریده یعنی دونماده فیلوده تقسیم اولنمشدر .

ولایتلرک اداره عمومیه سی : ولایت اداره سنک رئیس والیدر . والی ولایتده حکومت اجراییه نیک بروکیلی در . ولایت معاملات عمومیه سنه والی نظارت ایدر . بوندن بشقه هر ولایتده اداره دولتک تقسیم ایدلدیکی شعبه لرک برر مأموری واردر . بو مأمورلرک بعضیسی طوغریدن طوغرییه والینک تحت اداره سنده ، بعضیلری ده کندی نظارت و اداره لرینه تابعدر . ولایتده بولنان مأمورلر شونلردر .

عسکری قوماندانی : ولایتک امور عسکریه سنی اداره ایدر . اکر ولایت اردو مرکزی ایسه اردو قوماندانی بولنور . حاکم : شیخ الاسلام طرفندن تعیین اولنان ذاتدرکه ولایتک امور شرعیه سنه وبعض امور عدلیه سنه باقار . ولایتده عدلیه مدیری یوقسه حاکم استیناف حقوق محکمه سی رئیس و محکمه نک رئیس اولیور .

دفتردار : ولایتک امور مالیہ سنہ و واردات و تحصیلانہ
اعشار و اغنام ایشلرینہ باقار . ولوارده کی محاسبہ جیلرک و قضا -
لرده کی مال مدیرلرینک و سائر مالیہ مأمورلرینک آمریدر .
استیناف مدعی عمومیسى : ولایتک امور عدلیہ سنہ ولوا
وقضالرده بولنان مدعی عمومیلرہ نظارت ایدر .
مکتوبجی : ولایتک امور تحریریه سنہ و اوراق معاملہ سنہ
مأموردر .

معارف مدیری : امور معارفہ ، و مکتبلرہ و معلملرہ نظارت
ایدر .

و یا امور عتیقہ :
امور اجنبیہ مدیری : بعض اجنبی چوق اولان و مهم بولنان
ولایتلرہ اجنبیلرک ایشنی تسہیل ایتک و دولتک اوولایتہ مخصوص
خارجیہ نظارتک وظیفہ سنی کورمک اوزرہ تعین اولنان
مأموردر .

دفتر خاقانی مدیری : املاک و اراضینک آلم صائینہ ،
واصول تصرفہ عائد معاملاتی کوریر .

اوقاف مدیری : ولایتدہ بولنان جامعلرک و سائر خیراتک
اوقافنہ و متولیلرک حساباتنہ باققلہ مکلفدر .

زراعت و تجارت مدیری : ولایتک زراعت و تجارتنہ عائد
معاملاتنہ باقار . بررہ اورنہ مدیری : واردات و موبہ داخلہ کی اورنہ مدیری
بومأمورلردن لشقہ رسومات ناظری ، دیون عمومیه ناظری

رژی ناظری، تلغراف و پوسته باش مدیرلری، صحیه مفتشاری،
نافعه مدیرلری، و ولایت سر مهندسی کبی مأمورلرده کندی
اداره و نظارتلرینه عائد امور و معاملاتنی اداره ایله مشغول
اولورلر.

ولایتک انضباطی ده ژاندارمه قوماندانلریله پولیس مدیرلرینه
عائددر.

ولایتلرده امور مذهبییه ایله مشغول مفتیلر بولندینی کبی
ملل غیر مسلمه نكده متره بولید مرخصه، خاخام باشی کبی رئیس
روحانیلری وارددر. لیمان اولان محللرده لیمان رئیسلری ده
بولئور.

مجلس اداره ولایت: هر ولایتده بر مجلس اداره وارددر.
رئیس والیدر. اعضای طبیعی و اعضای منتخبه دن مرکبدر.
اعضای طبیعی حاکم و دفتر دار و مکتوبچی و مفتی و ملل غیر مسلمه
رئیس روحانیلریدر.

اعضای منتخبه ده یاریسی مسلم یاریسی غیر مسلم اولمق اوزره
ولایت اهالیسی طرفندن انتخاب اولئور.

هر ولایتده سنه ده بر کرده بر مجلس عمومی ولایت اجتماع
ایدر. هر سنجاقدن اعضا لر کلور بو مجلسلرک وظیفه سی ولایتک
زراعت و تجارت و نافع و معارفه و سائر ولایتک ترقی و رفاه
سعادتنه عائد امور و خصوصاتی مذاکره ایده رک قرار ویرلر.

سنجاقلرک اداره سی — سنجاقلر متصرفلر واسطه سیله اداره اولنور و سائر شعبات اداره ایچون لازم ککن مأمورلر واردر. نائب، محاسبه جی، محکمه رئیس، مدعی عمومی معاونی، تحریرات مدیری، دفتر خاقانی مأموری، معارف محاسبه جیسی، زراعت بانک مأموری، عسکری موقع قوماندانی، ژاندارمه قوماندانی، نفوس مأموری، پوسته مدیری، دیون عمومیہ مدیری کبی سائر مأمورلر ایله مفتی و ملل غیر مسلمه رئیس روحانیلری واردر،

سنجاقلرده دخی برلوا مجلس اداره سی واردر. رئیس متصرفدر. اعضا لریده نائب و مفتی و محاسبه جی و تحریرات مدیری ایله ملل غیر مسلمه رؤسای روحانیه سنندن و یاریسی مسلم و یاریسی غیر مسلم اعضای منتخبه دن مرکبدر. وظیفه سی ده لوانک اعمار و اصلاحنه و سائر امور و خصوصاته باققدن عبارتدر.

قضالرک اداره سی — قضا لر قائم مقام لرله اداره اولنور. قضا لرده بولنان مأمور لرده شونلردر :

نائب، جزا رئیس، مدعی عمومی معاونی، مال مدیری، تحریرات کاتبی، طابو مأموری، نفوس مأموری، املاک مأموری، پوسته مدیری، دیون عمومییه مأموری، زراعت

باقه سی مأموری، مفتی، متره پولید و کیلری، ژاندارمه بلوک قوماندانی، پولیس قومیسر ویا مأموری و سائرہ در.

قضالردہ برر مجلس اداره قضا وارد در. رئیس قائم مقام در. اعضا لری ده: نائب، تحریرات کاتبی، مال مدیری، مفتی، رئیس روحانی و کیلری ایله یاریسی مسلم و یاریسی غیر مسلم اعضای منتخبہ دن مرکب در. قضانک معاملات عمومیه سنی مذاکرہ ایدر لر.

تنیہ — بو ولایت ولوا و قضا مجلس اداره لری، مأمورین ملکینک وظیفہ مأموریتلرندن طولایی اولان جرملری ایچون مال مدیری نفوس مأموری و سائر بعض مأمورلری محاکمہ ایدر لر. شو جهتلہ، بو مجلس اداره لر، برر (ادارہ محکمہ) سی اولمش اولور.

ناحیہ لری اداره سی — ناحیہ لر مدیر لر واسطہ سیلہ اداره اولنور. بعض ناحیہ لردہ ناحیہ کاتبی وارد در. بعضیلرندہ نائب و کیلی نامیلہ بر مأمور شرعی بولنور. ناحیہ سنہ کوره بر پولیس ویا ژاندارمه چاوش واونباشیسی اولور. سائر لازم کلن ایشار ایچون قضا مأمورلرینہ مراجعت ایدی لور.

ناحیہ مجلسلری، ناحیہ نک بولندیفی قریہ نک اختیار مجلسی ناحیہ مدیرینک ریاستی آلتندہ طویلانه رق اجرای وظیفہ ایدر. ناحیہ مجلسلری عدلیہ صالح محکمہ لری وظیفہ سنی ده کوریر.

جزادن قباحت دعوالرینه یکرمی بش غروشه قدر جزای نقدی به قطعاً ، یوز غروشه قدر جزای نقدی وحبس جزا- لرینه ده قابل استیناف اوله رق حکم ایدر لر . حقوقدن ده یوز الی غروشه قدر قطعاً دها یوقارینه قابل استیناف اوله رق رؤیت ایدر لر . فقط جزادن بشقه صلحاً هر نوع حقوق دعواسنی حل ایده بیلور لر .

شوحالده ناحیه مجلسی هم بر مجلس اداره ، هم بر اداره محکمه سی هم ده عدلیه محکمه سی اولمش اولور . قریه لک اداره سی — کویلرامام ومختار واختیار مجلسری معرفتیه اداره اولنور .

((ممالک عثمانیه نك امتیازلی اوله رق اداره اولنان قسملری دخی ، مصر خدیولکی ، جبل لبنان متصرفلغی ، سیدسام امارتی ایله قبریس وکرید آطه لریدر .))

مصر خدیوتی — مصر ایالتنک صورت اداره سی ۱۸۴۰ تاریخ میلادیسنده لوندره ده عقد اولنان قونفراس ایله ۱۲۸۳ سنه هجریه سنده صادر اولان برقطعه فرمان هایون ایله تعیین ایدلمشدر . مصر ایالتی محمد علی پاشا اولادن خدیو « پادشاه وکیلی دیمکدر » نامیه برذات طرفدن اداره اولنور . بر حکومت اداره داخلیه جه بر درجه به قدر مستقل در بر مقدار مقطوعاً ویرکو ویرر . فقط اداره خارجه اعتباریه دولت

عثمانیه نك تحت اداره و حمايه سنده در . لكن بوندن يكرمى بش
 اوتوز سنه اول ظهور ايدن بر وقعه اوزرينه انكلتره دولتى
 طرفندن موقه اشغال ايدلمشدر . حكومت عثمانيه طرفندن
 وزرادن بر ذات قوميسر وانكلتره طرفندن ده لوردلردن برى
 كذا لك قوميسر اوله رق بولنور .

جبل لبنان متصرفلى — بونك ده صورت اداره سى ۱۲۸۱
 تاريخلى نظامنامه ايله تعيين ايدلمشدر . جبل لبنان ، دول معظمه نك
 موافقتلى ايله واون سنه مدته ، قاتولىك مذهبندن ، رتبه
 وزارتله تعيين اولنان خرسيتيان بر متصرف طرفندن امتياز
 شرطلرينه موافق اوله رق متصرفلك منقسم اولدينى ىدى
 قضا مديرلكلى اهالىسندن انتخاب اولنان درت مارونى ،
 اوج درزى ، برسنى مسلمان ، ايكي روم ، بر متولى ، بروم
 قاتولىكى اوله رق اون ايكي اعضالى بر « مجلس كبير » واسطه سيله
 اداره اولنور . بو وجهله داخلى اداره جه بر درجه يه قدر مستقلا در .
 مقطوعاً بر مقدار ويركوده ويرر يلى اهالىسندن ژاندارمه
 و پوليس واردر .

سيسام امارتى — سيسام اظه نك اداره سى ، حكومت
 عثمانيه طرفندن ۱۸۳۲ سنه ميلاديسنده فرانسه وانكلتره و روسيه
 دولتلىرينه ويريلان بر نوطه ايله تعيين ايدلمشدر .

بونوطه موجبجه دولت طرفندن سيسام ليلرك مذهبي اولان

روم مذهبنده بر بك تعيين اوله رق اطه نك اشراقندن مركب
بر مجلس ايله اداره اولتور . و بر مقدار ويركو ويرر و يرلى
اهاليدن زاندارمه و پوليس تعيين ايدر . اطه ده طرف حكومتدن
بر قره قول كميسى ايله مركزز اداره سنده بر بلوك عسا كر عثمانيه
اقامت ايدر . بو صورتله اداره داخله جه مستقندر .

قبريس اطه سى بر معاهده نامه ايله موقه انكلتره حكومتى
اداره سنه ، كر يد اطه سى دخى ، دولت عثمانيه نك حقوق حكمران .
نيسنه مربوط اوله رق اداره داخله يه مستقل و مختار اولوب
شمديلك انكلتره و روسيه و فرانسه و ايتاليا دولترلر نك تحت
حمايه سنده در .

۳ — اداره مركزيه

حكومت عثمانيه نك اداره مركزيه هيئتى استانبولده اولق
اوزره نظار تله تقسيم و وكلاتك اداره لرينه توديع ايدلمشدر
وكلاتك هر برى ، قوه تشريعيه طرفندن ياپيلان قوانين و نظا .
ماتدن كندى نظار تله عائد اولانلرى اجرا ايدر لر ، هر ناظر
كندى نظار تنك قانون دائره سنده آمرى در . و اونظار تدرن
طوغريدن طوغرى يه كندى مسئول اولور .

حكومت اجرايه نك الك بيوك هيئتى ناظر لردن مركب

اولان «مجلس وکلادر» بو مجلس صدراعظمک تحت ریاستنده بولنور. و داخلی، خارجی دولتک بالجه امور مهمه سنک محل فصل ورؤیتی در. مجلس وکلایه داخل اولان نظارتلر شونلر در. مشیخت، حربیه، بحریه، داخلیه، خارجیه، عدلیه و مذاهب، مالیه، اوقاف، معارف، تجارت و نافع، اورمان و زراعت نظارتلریدر صدارت مستشاری ده مجلس وکلایه داخلدر. اشبو نظارتلرک ناظرلردن بشقه بر مستشار بر تحریرات مدیری بر محاسبه جی بر اوراق مدیری و سائر قلم مدیرلری وارددر.

مقام صدارت: بر نظارتی یوقدر. فقط صدراعظم اولان ذات ایسترسه بر نظارت ده آله ییلور. صدراعظم حکومت اجراییه نك اك بیوک مأموریدر. هیئت وکلانك رئیسیدر. حکومت ایله مقام سلطنتك واسطه مخبره سیدر. یعنی مقام سلطنته نه عرض اولنه جق ایسه صدر اعظم واسطه سیله عرض اولنور. مقام مجلس استشاره سی اوله رق بر شورای دولت وارددر. بونك رئیس شمدی عدلیه ناظریدر.

صدارته مربوط اولان دائره لر: امور تشریفاته و نشان ورتبه براتلرینه مأمور «تشریفات عمومیه نظارتی» و «دیوان هایون تشریفاتجیلانی» و مقام سلطنته عرض اولنه جق شیلرک تحریرینه مأمور «دیوان هایون آمدجیلکی» و اجنبی دولت ایله اولان یکی واسکی معاهده لرك ضبط و حفظنه و عموم برات

و فرمانلرك تحريرينه و جماعات غير مسلمه رئيس روحانيلىرينه و ايالات ممتازه رؤسائيه و يريلن فرمانلرك و بالجملة قوانين و نظا-
ماتك تحريرو و تسجيلايه مأمورا و لان « ديوان هايون بلكه كجىلكى »
دائرة ليدر .

مقام مشيخت اسلاميه : شيخ الاسلام افنديك نظارتنده در .
مقام مشيخت : جامعلر ، مسجدلر ، تكيه لرك و مدرسه لرك
و عموماً امور دينيه اسلاميه نك و محاكم شرعيه نك و فتوى امورينك
مرجعيدر . شيخ الاسلامدن ماعدا فتوى امينى و اناطولى و روم
ايلي قاضى عسكرلى و استانبول قاضيسى واردر . بونلردن بشقه
مجلس تدقيقات شرعيه ، مجلس انتخاب حكام ، مجلس مصالح طلبه ،
مجلس امتحان قرعه ، مجلس مشايخ ، مجلس اداره اموال ايتام كى
مجلس و دائرة لرى شاملدر .

حربيه نظارتى : امور عسكرى و حربيه به نظارت ايدوب ،
اركان حربيه عموميه دائره سى پياده و سوارى و طوپچى
و استحكام و محاسبات و محاكمات و صحيه دائره لرينى و طوپخانه
عامره رئيسلكنى حاويدر . اردولرك و قلعه لرك و عسكرى مكتب
و خسته خانه لرينك اداره سى دى حربيه نظارتنه عائددر . ژاندارمه
دائره سى ده بورايه مربوطدر . حربيه نظارتك اك مهم مجلسى
« شوراي عسكرى » در .

بحربيه نظارتى : امور بحربيه به نظارت ايدوب اركان حربيه

بحریه و شورای بحریه و سائر دائرہ لری و فابریقہ لری مدیر لکربی
و مکتب بحریہ نک نظارتی و فیلولرک و دونمانک تجہیزی بحریہ
نظارتہ عائددر.

داخلیہ نظارتی: عموم ولایات و سائر مأمورین ادارہ نک
مرجع نظامیسیدر. امنیت عمومیہ مدیریتی، شہراماتی استانبول
ولایتی، پوستہ و تلغراف و تلفون مدیریت عمومیہ سی، رسومات
مدیریت عمومیہ سی، سجل نفوس مدیریت عمومیہ سی، داخلیہ
نظارتہ مربوط باشلی باشنہ برر دائرہ در.

خارجیہ نظارتی: دولت عثمانیہ نک اجنبی دولتلر ایلہ اولان
مناسبات و مخبراتہ مأمورددر. دولت عثمانیہ نک اجنبی دولتلر دہ
بولسان ایلچیلری بو نظارتہ تابع اولدیغی کبی اجنبی دولتلرک
استانبول دہ بولسان سفیرلری دخی بو نظارتہ مخبرہ ایدرلر.
دولتلہ اولان ایشلرینی بونظارت واسطہ سیلہ کوریرلر. صحیہ
نظارتی ناظری دہ خارجیہ ناظری اولان ذاتدر. بونظارتک بر
چوق دواثری وارددر. دیوان هایون ترجمانلی امور شہبندری
و استشارہ اوطہ سی امور حقوقیہ مختلفہ، تابعیت دائرہ لری کبی.
عدلیہ و مذاہب نظارتی: عدلیہ ناظری بالجلہ محاکم نظامیہ نک
ادارہ جہتیلہ ناظری در.

حکومت ایلہ ملل غیر مسلمہ رئیس روحانیہ لری آرہ سندہ
واسطہ در. بونک ایچون مذاہب ناظرانی صفتی وارددر.

شمعی شورای دولته ریاست ایدر. امور جزائی، امور حقوقیه، مذاهب مدیریتی دائره لری بو نظارته مربوطدر. مالیه نظارتی: دولتك واردات و مصارف عمومیه سنه نظارت ایدر. بیت المال اداره سی و محاسبه عمومیه تحصیلات دائره لری بو نظارته تابعدر.

اوقاف نظارتی: بالجله اوراقه و باخصوص اوقاف همایونه و جامع لرك و مسجد لرك و عمارت لرك اداره سنه، محولات ایشلرینه مأموردر. اوقاف مفتشکی یعنی «محکمه تفتیش اوقاف» جهات، محولات، مصارف و تعمیرات اداره لری شاملدر.

معارف عمومیه نظارتی: بالجله مکتبلره و کتابلره نظارت ایدر. مکاتب اعدادیه و ورشديه و ابتدائیه دائره لری و کتبخانه لری معارفه عائددر.

موزه همایون مدیریتی: مطبعه عامره و صنایع نفیسه مدیریتی معارف نظارته مربوطدر.

تجارت و نافعہ نظارتی: مملکتک یوللرینه و شمندوفرلره، نهر و کول و لیمانلره عائد نه قدر امور و ارسه بو نظارته عائددر. تجارت اوطه سی ده بو نظارته تابعدر. تجارت و صنایع و استاتستیک و طرق و معابر تیمور یوللری، مجلس نافعہ هیئت فنیه و بورسه دائره لری نافعہ نظارتی دواړندندر. زراعت بانقه سی ده بو نظارت اداره سنده در.

اورمان وزراعت نظارتی: مملکتده نه قدر اورمان وارسه
انلر زراعت ایشلرینه باقار. زراعت مکتبی ونمونه چفتلکلی
بونظارتیه تابعدر.

دفتر خاقانی نظارتی: طابو معاملاتنه و سندات قیودات
خاقانیه نك محافظه سنه و فراغ وانتقال معامله سنك رؤیتنه مأمور
مخصوصدر.

دیوان محاسبات : دولتک بالجمله مصارفنك محاسبه سنه باقار
واون ایکی کشیدن مرکب بر مجلسدر.

دایون محاسبات رئیس نامیله بر رئیس طرفندن اداره اولنور.
ملکیه وعسکریه تقاعد صندوقی مدیرلکلی : مأمورین
ملکیه وعسکریه دن تقاعد اولنلرک ومعزول بولنانلرک معاشلرینی
ویرر آیری آیری برر دائره در.

دیون عمومی: دولتک اوروپا دولتلرینه اولان بورجلیرینی
اوده مک اوزره تأسیس ایدلمشدر. بوبورجه قارشولق اوله رق
طوز، ایپک، بالق ومسکرات وپول وتوتون عشری وارداتی
ویرلمش اولمغله بودائره بو آلتی اشیدان حاصل اولان وارداتی
طوبلایه رق بورجیزی تأدیه ایدر. اوروپالی ویرلی آلاچقلرک
بردانه وکیللرندن مرکب بر « مجلس اداره » واسطه سیله اداره
اولنور.

رسومات مدیریت عمومی: ممالک اجنبیه دن کلن اشیدان

کمرک المقله مکلفدر. اسکیدن قالان معاهده نامه لر موجبجه
یوزده سکز کمرک رسمی آلمقدهدر. فقط شمدی یوزده اون
بش آله جقدر.

امنیت عمومیه مدیریتی : استانبول و بالجله ممالک عثمانیه نك
آسایش وامینیتی تأمین ومؤسسات عمومیه دولتی محافظه ایتمک
وظیفه سیله مکلفدر . استانبول، بک اوغلی، واسکدار پولیس
مدیر لکلری امنیت عمومیه مدیریته تابعدر . ولایتلرده تعیین
ایدیلن پولیس مدیرلری کذلک بومدیریه مربوطدر .

دولتک اداره ویاخود دوائر مرکزیه سنک مهم وباشلیجه
لری بویان ایتدیکم نظارت ودائرهلردر. بونلرک ولایتلرده
وسنجاق وقضالرده شعبهلری ومأمورلری ده واردر . بونلر
طوغریدن طوغری به تابع بولندقلری نظارتلردن تعیین اولنورلر.
وانلرله مخابره ایدرلر. والیرک یالکز بودائرهلره عمومی برنظارتی
واردر. طوغریدن طوغری به قاریشماز ومداخله ایده مزلر.

بونظارت ودائرهلردن بشقه « ماین هایون باشکتابت »
دائره سی وار ایسهده دوائر مرکزیه دن صایلاز. یالکز مقام
سلطنته وذات حضرت پادشاهی به مخصوص ومنحصردر .

۴ — ادارهٔ ولایات ضابطه بحثی

ولایتلرکده آسایش وامینتک وانضباط وانتظامنک محافظه سی
 ژاندارمه وپولیسلره مودوعدر. هرولایتده برژاندارمه آلای
 بولنور. بونک برطابوری ولایت مرکزنده دیگر طابورلری
 لوالره وبلوکلری ده ایجاب ایدن قضالره تقسیم ایدلمشدر.
 ژاندارمه آلای سواری وپیاده افرادندن مرکبدر. آلای
 بیکباشیدن میرالای رتبه سنه قدراولان برذاتک عهده سندهدر.
 بوکا ژاندارمه آلای قوماندانی دینور. اوللری ملکیه
 مأمورلرندن ده ژاندارمه الای بکی نامیله قوماندان تعیین
 اولنوردی. طابورلرده قول اغاسی ویوزباشی قوماندالرنده
 بلوکلرده یوزباشی وملازم اول قوماندالرندهدر. یکی اجرا
 اولنان ژاندارمه تشکیلاتی موجبنه بو قوماندانلر مقتدر عسکری
 امر او ظابطانندن تعیین اولنور. هرولایتک ژاندارمه تشکیلاتی
 بوصورتله تنسیق ایدلمکدهدر.

پولیسلره کلنجه : هرولایاتده بر پولیس مدیری ولزومی
 قدر قومیسر وپولیس مأموری واردر. پولیس مدیرلری ده
 هرولایته تعیین ایدلمه مش ایسه ده یقین وقتده هرولایتده برر
 پولیس مدیری بولنه جقدر.

شمديك ادرنه، سالانيك، قوضوه، مناستر، خداوندكار،
 اطنه، سوريه ولايتلارنده پوليس مديرلري وارد. سنجاقلرده
 پوليس قوميسرلري و بعض قضاالرده كذا لك قوميسر ويا
 خود پوليس مأموريله مقدار كافي پوليس افرادي بولمقدهدر.
 فقط يكي تشكيلات موجبجه سنجاقلرده برر مركز مأموري
 ويا مركز قوميسري، قضاالرده قوميسرلر بولنه جقدر. اجرا
 بيوريلان تنسيقات ايجانجه ولايت پوليس هيئتتك يعنى قوميسر
 وافرادينك مقداري زياده لشه جك و معاشاري ده كافي بر
 مقداره چيقاريله جقدر. بوسورتله ولايتلرده كي پوليس تشكيلات
 و تنسيقاتي آز زمان ظرفنده اكمال و اتمام ايديله جك و هر شيدن
 وديكر شعبات اداره نك انتظام و تكملندن اول... ولايات
 پوليس هيئتي مكمل و منتظم اوله جقدر. بوانتظامك برآن اول
 حصوله كليسي ايجون دوائر عانده سي اقتضا ايدن همت وفدا كارلني
 بيوك بر غيرت و حميتله صرف ايتمكدهدر.

ولايات پوليس هيئتلري استان بولده كي امنيت عموميه مديرينه
 تابع در. مديرلر و لزومي اولان قوميسر و مأمورلر بورادن
 تعيين اولنور. بو هيئتلك آمري ده ولايت پوليس مديريدر..
 والي دخي بر درجه يه قدر آمر صايلور سه ده اولكيسي قدر
 دكلدر. چونكه ولايتك انضباط و آسايشنده والي قدر پوليس
 مديري ده علاقه دار و بوندن عين درجه و بلكه دهها زياده،

پولیس مدیری مسئولدر. یالکز والی نك نظارت و ولایت عامه سی
واردر .

استانبول ولایت نك انضباط و آسایش نك تأمین و محافظه سی
دخی امنیت عمومیه مدیریت عمومیه سیله استانبول ولایتی پولیس
مدیر لکنه مودوعدر .

استانبول ولایتی و استانبول شهری دیگر ولایتلر و ولایت
مرکز لری کبی اولیوب عموم ممالک عثمانیه نك پایتخت و مرکز
اداره و حکومتی اولدیغندن و استانبول شهرینک دیگر شهرلردن
چوق بیوک و زیاده غلبه لک بولندیغندن پولیس تشکیلاتجه
ولایتلردن فضله و فرقلیدر .

امنیت عمومیه مدیریت عمومیه سنه تابع اولان استانبول
ولایتی پولیس مدیر لکی هم بتون ولایتک و همده درساعات
وبلاد ثلثه نك پولیس مدیریتدر . شوخالده استانبول ولایتی
پولیس مدیر لکی نفس استانبول شهرینی طوغریدن طوغری به
وبک اوغلی و اسکدار سنجاقلرینی ده بک اوغلی و اسکدار پولیس
مدیر لکلری واسطه سیله اداره ایدر . استانبول، بک اوغلی
و اسکدار اوتوز آلتی پولیس مرکز مأمورلغنه و هر مرکز مأمور-
لقلری موقعلره تقسیم ایدلمشدر . هر مرکزده مکتب حقوقدن
مأذون ایکیشر قومیسر و هر موقعدهده ، قومیسر معاونی
و مقدار کافی پولیس مأموری بولنورکه پولیس افرادینک عددی

کوندن کونه تزیدایدلمکدهدر. درسعادت وبلاد ثلثه ژاندارمه اعتباریلهده بر چوق منطقهلره تقسیم ایدلمش و منطقهلر بلوک مرکزی اولهرق برر بلوک قوماندانی و بعض موقعلردهده طاقم قوماندانلری ادارهسنة ویرلمشدر .

ژاندارمه هیئتی ده وظیفه اعتباریله امنیت عمومیہ مدیریته مربوطیتی واردر . مقتدر و معلم پولیس و ژاندارمه یتشدرمک ایچونده امنیت عمومیہ مدیریتک تحت ادارهسندہ پولیس و ژاندارمه مکتبلری، آچلمش و بومکتبلر بر چوق مقتدر افراد یتشدرمکده بولنمشدر .

ولایاتده اولدینی کبی بالخاصہ استانبول پولیس تشکیلات و تنسیقاتی فوق العاده بر حال انتظام و مکملیته کتیرلمکدهدر . هله بوسنه ظرفنده اجرایی متصور اولان بعض ترتیبات و هممات تطبیق ایدیلنجه آزوقت ظرفنده استانبول پولیس هیئتی آوروپا پولیس هیئتلرندن منتظم بر حاله کیره جکدر . بو تشکیلات موجبنجه : پولیسلر وظیفه اعتباریله اداره وعدلیه قسملرینه آیریله حق و تحری بلوکی نامیله ارباب جرائمی تحری ایتک اوزره بر قسم پولیس احداث اولنه جقدر .

۵ - حقوق دولدن سفرا وقونسلوسلر

۱ - سفرا

حقوق دولك تعريفينده [حقوق بين الدول ، دولتلرك يكدىكرى آراسنده جارى اولان مناسبات ايله افراد تبعه لرى بيننده جريان ايدن معاملاتى بيلديره ن قواعددر] دينلمشدى . دولتلرك كرك هيئت دولت وكرك يكدىكرينك ممالكنده بولنان كندى تبعه لرى نامنه وقوعه كلن مناسبات و معاملاتى ايچون بربرلرينه مأمورلر كوندريرلر . ايشته دولتلرك كوندر دكلرى بومأمورلره سفارت مصدرندن « سفير » ديرلر جمعى سفرا كلوركه سفيرلر ديمكدر ترجمه سى ده « ايلچى » در .

سفير كوندر مك حق ، حاكميت داخله و خارجيه مالك و صاحب مستقل دولتلرك حقى در . بوكاده دولتلرك « حق سفارتى » دينور . يالكز حاكميت داخله سنه مالك اولوبده حاكميت خارجيه سنه صاحب اولمايان حكومتلر سفير كوندره مزلر . بزم مصر حكومتى كې .

بر دولت سفير كوندر مزدن اول ، كوندره جى دولته سفيرك كيم اولديغى بيلديره رك بو ذاتى قبول ايدوب ايتيه .

جکني صورار، بوکا استمزاج ديرلر . او دولت قبول ايدرسه
کوندريلور بعض معقول و مقبول سبيلر کوستره رک قبول
ايتزسه کوندرلمز .

سفرا، درت صنفه تقسيم ايدلمشدر . برنجي صنف « بيوک
ايلچيلر » ايکنجی صنف « اورته ايلچيلر » اوچنجی صنف
« مقيم ايلچيلر » دردنجی صنف « مصلحتکذارلر » در . ايلچيلرک
بوصورتله صنفله آيرلمسی تشریفات مراسمنده يکديکرينه تقدم
ايدءبيامک ايجونددر . رسمی بر ضيافت وياخود بر محله اک اول
بيوک ايلچيلر کلور صکره صره سيله ديکرلری کلير و صنفلری
اچنده اک قدمليسی هانکيسي ايسه برنجی اوله رق اوتقدم ايدر .
استانبولده ايران ، المانيا ، آوستريا ، ايتاليا ، روسيه ، فرانسه
وجماهير متفقۀ آمريقانک سفيرلری بيوک ايلچي در . اسپانيا ،
رومانيا ، بلغاريا کي دولتلرک اورته ايلچيدر . بيوک ايلچيلر
مقام حکمدارينک تمثال مشخصی درلر يعنی بالذات حکمدار ،
حکمدارلق صفتيله وکیل و مرخصلر درلر . اورته و مقيم
ايلچيلر حکومتک تمثال وکیل ، مصلحتکذارلر خارجيه نظا .
رتلرينک وکيليدرلر . بيوک ايلچيلر ايسته دکری وقت
حکمدارلرله کوريشيرلر ، بيوک ايلچيلر تعين ايدلکلری
دولتک حکمدارينه خطاباً کندي حکمداری طرفدن
بر « اعتمادنامه » آلوب کوتوريرلر . سفير بو اعتمادنامه يي آلايله

سرایه کیدرك بالذات حکمداره تقدیم ایدر . اورته ومقیم
ایلیچیلرده حکومتلری نامنه اعتمادنامه آلهرق کیتدیکی حکومته
تقدیم ایدر . مصاحتکذارلرده خارجیه نظارتلری طرفندن
کیده جکی دولتک خارجیه نظارتنه خطاباً بر تحریرات آلور .
بوصورتله سفیرلر آره سنده صنفلر وارایسه بوصرف تشریفات
مراسمنه عأدر . یوقسه وظیفه وحقوق اعتباریله هپسنک وظیفه
وحقوقی بردر . هر مستقل دولت بری نه قدر بیوک دیکری
نه قدر کوچوک اولورسه اولسون هپ مساویدر . سفیرلری ده
اوله در . بعض تشریفاتده فضلجه رعایت واعتبار ایدیلور .
برذات سفیر اولهرق برقاق دولت نزدینه تعیین اولنه بیلور .
مثلاً: دولت عثمانیه نك فرانسه سفیری اسویچره حکومتی ،
وکذا اسپانیا سفیری پورتیکز دولتی ، نزدنده سفیردر .
حکمدارلرک وفات ایتسی وبشقه بر حکمدارک جلوسی ،
وحکومتک شکل اداره سنک دیکشمسی سفیرلرک دیکشمسی
ایجاب ایتمز . یالکز ایلیچیلرک اعتمادنامه لری تجدید اولتور .
مثلاً: صوک زمانده حکومت عثمانیه نك شکل اداره سی دیکشمسی
ایله دولتلر نزدنده کی سفیرلری دیکشمی . وکذا ذات حضرت
پادشاهینک جلوس مسعدت مانوس هایونلری سفیرلریمزک
دیکشمسی ایجاب ایتدی .. یالکز ایلیچیلریمزک اعتمادنامه لری
تجدید اولندی .

بوسفيرلردن بشقه — دولترلر يېئنده عادت اولديغى اوزره — بر حڪمدار يكي جلوس ايتديكي وقت ديكر دولتره جلوسنى تبليغ ايتك اوزره ايلچيلر كوندريرلر. بونلره « موقت ايلچي » وياخود « فوق العاده مرخص » دينور. مثلاً : ذات حضرت پادشاهينك جلوس هايونلرينى دولتره تبليغ ايتك ايچون طاقم طاقم هيئت سفارتلر كوندردىكي كې اخيراً وفات ايدن بلچيقا قرالئك يرينه جلوس ايدن يكي بلچيقا قرالى طرفدن ذات شاهانهيه « فوق العاده مرخص » صفتيله ايلچي كوندروهك جلوسنى تبليغ ايلدى. بوندن بشقه نشان وياهديه اعطاسى وياخود بعض مراسم فوق العادهك اجراسى ايچونده بويله موقت ايلچيلر كوندريلور. بونلره حڪمدار طرفدن كوندريلن حڪمداره خطاباً مكتوب يازيلور. بشقه جه اعتماد نامه لر ويرلر. بوموقت سفيرلر يالكز مأمور اولدقلى ايشى كوروب عودت ايدرلر. بشقه جه دولتك مناسباتنه قاريشمازلر. چونكه آيريجه مخصوص سفيرلى واردة. دولترلر يېئنده بعضاً قونغره وقونغراس ناميله دولت وكيل ومرخصلردن مركب مجلسلر اولور. بونلره كوندريلن اعضالر اكر ايلچي عنوان رسميسنى حائز دكلسه حقارنده ايلچي معامله سى ياپلاز. فقط همان اودرجه ده حرمت ورعايت اولنور.

برسفيرك شخصنه تعرض وحقارت ايتك اوسفيرك منسوب

اولدینی دولت وملت تحقیر ایتمک و حقوق دول قواعدینی آلت اوست ایله مک دیمکدر . معاذاه بویله بر حال وقوعنده یالکز اوتحقیر اولنان سفیرک منسوب اولدینی دولت دکل بتون دولتر دعواجی اوله رق قیام ایدر لر . بوکی احوالک نتیجه سی مدهش بر حربدر . بونک ایچون دولتر نزدنده بولنان سفیرلره سوء معامله دکل فوق العاده حرمت و رعایت ایدر لر . اک وحشی زمانلرده بیله سفیرلره — زمانه کوره — فنا معامله یاپمازلر چونکه ایلچی یه زوال یوقدر .

بر سفیر ، نزدینه مأمور اولدینی دولتن جزئیجه بر سؤ معامله کوره جک اولورسه همان پساپورطنی ایستر بویله عادت اولمشدر . یعنی کیده جکنی خبر ویرمک دیمکدر . یوقسه پساپورطنی آله نیجه کیده مز دکلدر . بر دولته ، کندی نزدنده بولنان بر سفیرک آسایش مملکتی افساد ایتدیکنی و حقوق حاکمیتی اخلال ایتدیکنی و بیوک بر جنایت ایشلیدیکنی کورنجه پساپورطنی و یروب کندیسنی صاغ و سالم حدودی خارجه چیقاریر . بویله بر سفیری چیقارمق یک مهم بر مسئله اولدیغندن او یله هر بر معامله ایله بو طرد معامله سی یاییله ماز . بر دولت دیگر بر دولته اعلان حرب ایدر سه بر برینک سفیرینی صاغ و سالم اوله رق مملکتدن چیقاریر و حقیقجه یه قدر محافظه ایدر .

۲ — قونسولوسلر

دولتلك بربرلرينه كوندر دكلى سفيرلردن ماعدا بر قسم مأمورلردى كوندر يرلر كه بونلرده قونسولوس «زده شهنذر» ديرلر. قونسولوسلر معاملات و مناسبات سياسيه قارشمازلر معاملات تجاريه ومدنيه باقغه مأموردلر.

قونسولوسلر، كندى دولتى تبعه سيلاه، مملكته بولندينى دولت تبعه سى، و كندى دولتى تبعه سنك بربرلى اراسته كى معاملات و مناسبات تجاريه باقغه مأموردلر. شهنذرلرده دوت صنفدرلر.

برنجيسى «باش شهنذر - ژنه رال قونسول» ايكنجيسى «شهنذر - قونسول» اوچنجيسى «شهنذر وكيلى - ويس قونسول» دردنجيسى «شهنذر مأمورى - قنچلار» در.

شهنذرلرك وظيفه سى: كندى دولتى تبعه سنك منافع تجاريه سنى محافظه و كندى دولتى طرفندن تجارته عائد نظامات و اوامرى تبعه حقنده اجرا ايتك و معاونته محتاج اولان تبعه سنى معاونت ايتك و كندى دولتى تبعه سى يينده ظهور ايدن بعض دعوالرى كورمك و تجارت بريه و بحريه دائر اولان ترقيات و كشفياتى كندى دولته بيلديرمك و دولت مبتوعه سنك تجار

کمیترینه عائد اوراقی تنظیم ایله مک و کندی دولتی تبعه سنه و اجنبی دولتری تبعه سندن کندی دولتی ملکنه کیده جک اولانلره پساپورط و یرمک و تبعه نک هویتلرینی تصدیق ایتمک و وفات ایدن تبعه نک ترکه لرینی تحریر و حفظ ایتمک کبی خصو- صاتدن عبارتدر. الحاصل بر قونسولوس کندی دولتی تبعه سنک ممالک اجنبیه ده بر مأموریدر بر قائم مقام کیدر .

شهبندر لر بر مأموریت سیاسیله لری اولدقجه دولترلرینک دیگر دولتلرایله اولان معاملات سیاسیله سنه اصلا قاریشمازلر. شهبندر لر اراده سنیه ایله تعیین اولنور لر. و کندیلرینه برر برات و یریلور. و کیده جکی دولتک خارجیه نظارتنه ده بر تحریرات یازیلور . ممالک عثمانیه یه کلن قونسولوسلره حکومت عثمانیه طرفندن مأموریتلری تصدیق اولدیغنه و کندیلری قونسولوس اوله رق قبول ایدلدکلرینه دائر برات و یریلور .

بر دولت مملکتک بعض محللرینه قونسولوس قبول ایتمز . فقط بویالکز بر دولته قارشى اوله یوب عموم دولتلرک قونسو- لوسلرینی قبول ایله مز . مثلا : المانیا دولتی « الساس لورهن » ولایتلرنده هیچ بر دولت قونسولوسی قبول ایله مز . کذا دولت عثمانیه ده مکه ایله مدینه یه قونسولوس قبول ایتمز . فقط جده ده واردر .

قونسولوسلرک بعض دولتلرده آزچوق امتیازلری واردر .

هله قونسولوسك اوراقى واقامتگاهلرى هر دولته محافظه اولنور. بزده قونسولوسلر عهد عتيقه موجبنجه دها چوق امتيازله مالكدرلر. فصل مخصوصنده بيان اولنه جقدر. خلاصه بعض مملكتلرده قونسولوسلر خارج از مملكت امتيازينه مالكدرلر. بعضيلريده هيچ مالك دكلدر. مثلاً امريكا حكومتى قونسولوسلر ايچون بر صفت رسميه طائىماز.

۶ — خارج از مملكت بحث

خارج از مملكت امتيازى : بر كيمسه حقيقه بر مملكتده بولندينى حالده حكماً او مملكتده بولنمايورمش كى عد ايدملك امتيازيدر. يعنى : خارج از مملكت امتيازى شول بر امتيازدر كه اكا نائل اولان بر كيمسه بولندينى مملكتده هر نه ياپارسه ياپسون او مملكتك قانونلرى — او كيمسه او مملكتده يوق ايمش — آنى مسئول ايدمهز. مثلاً : ممالك عثمانيهده بولنان بر فرانسه سفيرى حقيقه استانبولده او طوردينى حالده كندى مملكتده يعنى فرانسهده ساكن عد و فرض اولنور. شو حالده فرانسه سفيرى اولان ذات استانبولده بر سنى جرح و قتل ايتسه، عثمانلى قانونلرى موجبنجه او سفير، توقيف و محاكمه ايديلوب جزاسى و يريله مز.

کندی حکومتی اوسفیری عزل ایدرک جزاسنی فرانسه ده اجرا ایدر .

بوخارج از مملکت امتیازی: اسکی زماندن بری هر حکومتده عادت اولمش و بوکونده رعایت ایدلمکده بولمشددر . بویله بر امتیازک سبی ایسه ، سفیرلر کندی حکمدار و حکومتلرینک وکیل و تمثاللری اولدیغندن سفیر بواندینی حکومتک قانونلرینه تابع بولنسه و او قانونلر حکمنجه تعقیب و توقیف و محاکمه ایدیلهرک جزالندیرلسه او سفیرک کندی حکمداری و یاخود حکومتی جزا ویرلمش دیمک اولور . بوایه هم قابل دکلدر همده جائز دکلدر . چونکه بر حکومت دیگر حکومتک حکمدارینی و حکومتی جزالندیره مز . بونک ایچون بویله بر امتیازک عادت اولسنه لزوم وارددر . برده بر سفیر اگر سفیر اولدینی حکومتک قانوننه تابع اولورسه او آدم سفیرلک ایده مز . چونکه کندی حکومتک سوزلرینی تکلیفلرینی سفیر اولدینی حکومته سویله مز ، بلکه بنی جزالندیررلر دیهرک چکنورسه سفیرلک ایده مز .

خارج از مملکت امتیازینه مالک اولانلر: حکمدارلر ، سفیرلر ، مصلحتکذارلر ، بر درجه یه قدر قونسولوسلر ممالک اجنبیه ده بولنان قوه بریه و بحریه قوماندانلریله بوذاتلر معیتلرنده رسماً یولنان ذاتلردر .

خارج از مملکت امتیازینه نائل اولانلر حقنده بولندقلری

مملکتک قانونلری وضابطه ملکیه و عدلیه سنک حکم نفوذی جاری دکلدر . بوامتیاز مالک اولانلردن بری بر جرم ایقاع ایتدیمی پولیس آنی دردست ایده مز . محکمه محاکمه ایده مز . بوامتیاز شخصه اولدینی کبی اقامتگاه واشیایه ده شاملدر .

سفیرک اقامتگاهی حکومت مأمورلری طرفندن کیریلوب تحری اولنه ماز . مثلاً : جرم ایشله مش اولان بر شخص، بر سفارتخانه یه کیرسه ضابطه مأمورلری اوسفارتخانه یه کیروب او مجرمی آله مازلر . اکر سفیر اذن، ویررسه اووقت کیروب آلورلر . سفیرلرک آرابه سی واپوری و صندالیده بویله در بونلرده ده هیچ برضابطه مأموری کیره مز . و ال سوره مز .

سفرانک بوامتیازی زوجه لرینه و چو جق لرینه و خدمتجیلرینه ده شاملدر . بوامتیاز مالک اولانلردن ویرکو آلتماز واشیالری کمرکلرجه ده معامله ایدلز وعلیهرینه جزا و حقوق دعواسی اقامه اولنه ماز . بونلردن آله جفی ویا حق بولنانلر اودولتک محکمه سنه مراجعت ایده بیلورلر .

بوامتیاز نائل اولانلر طبعی اوله رق بونی سؤ استعمال ایتملر ویرکونا جرم ایقاع ایله مزلر شاید بر جرم ایشله مک ویا خود مجرملری وارباب فسادی سفارتخانه یه قبول ایله مک کبی یولسز و مناسبتسز بر فعله تشبث ایدرسه دولت قانون و محکمه لری واسطه سیله دکل وسائط دیپلوماتیقه و مراجعات سیاسی ایله مسئله یی حل ایدر .

۷ — قره صولری

قره صولرینی بیان ایتمک ایچون، بردولتک احکام قانونیه سی
یعنی بر حکومتک حکم و نفوذی نره لرده جاریدر. بوندن بحث
ایتمک لازمدر.

اولا بردولتک قانونک، حکم نفوذی، حدودی ایله ممالک
اجنبیه دن آیرلمش اولان کافه ممالکنده و شهر قصبه کی اراضیسنک
بالجمله تقاطنده و کندی مملکتی مشابه سنده عداولتان محملرده
و سفینه لرنده و درت بر اطرافی کندی ملکیده چورلمش اولان
دکز لر، کول لر، ونهر لر و لیمانلر و بوغازلرده جاریدر.

مثلا : دولت عثمانیه قانونی حکم و نفوذ حکومتی، تا ادرنه دن
یمنه، اشقودرده دن بصره یه قدر بالجمله ولایاتنده و ایالات ممتازه سنده
و دولت اجنبیه ممالکنده کی سفارتخانه لرنده و دکز لرده کی کیلرنده
جاریدر. — چونکه اوسفارتخانه لرهر نه قدر بردولت اراضیسنده
ایسه ده سفارتخانه اولدجه عثمانی طیراغی صاییلور. — و اطرافی
عثمانی ممالکی ایله چورلمش اولان مرمره دکزنده و سلانیك
وازمیر لیمانلرنده و چناق قلعه و استانبول بوغازلرنده عثمانی قانونی
مرعیدر. بورالرده برجرم اولورسه دولت عثمانیه مأمورلری،
ضابطه سی دردست ایدر عثمانی محکمه لری محاکمه ایلر. فقط

بر طرفی دولت عثمانیه دیگر طرفلری روسیه و رومانیا و بلغار حکومتلرینک اولان قره دکزه نه دولت عثمانیه ونه دیگرلرینک قانونلری تماماً جاریدر. و بر طرفی دولت عثمانیه نک دیگر طرفی قره طاغ حکومتک اولان اشقودره کوانک یاریسندده دولت عثمانیه نک دیگر یاریسندده قره طاغ حکومتک، و کذا بر قسمی دولت عثمانیه نک دیگر قسمی یونانک اولان پرهوزه لیماننک ده نصفندده دولت عثمانیه نک نصف دیگرندده یونان حکومتک، قانونلرینک حکم و نفوذی جاریدر. ثانیاً: بردولتک قانونلری، و حقوق حکمرانیسی «یعنی حق حکومتی» قره صولرنده جاریدر. ثالثاً: کندی مالک اولدینی سفینه لره شاملدر.

قره صولری، دنیاده نه قدر دکرلر وارسه — مرمره دکزی کبی اطرافی بردولتک مملکتلریله چورلمش اولمیان دکرلر — جمله سی سربستدر. هیچ بردولتک مالی دکلددر. نه قدر دولتلر، نه قدر ملتلر وارسه جمله سی اودکرلردن استفاده ایدر، مشترکدر. بری دیگرینی استفاده ایتمکدن منع ایده مز. بناءً علیه او یله دکرلرده منفرداً هیچ بر حکومتک حکمی جاری دکلددر. اودکرلرده هر دولتک کمیلری طولاشیر. کیدر کلور. بودکرلره «آچیق دکرلر» دینلور.

مثلاً: آچیق دکزده — آق دکز کبی — کیدن بر فرانسز کمیی ایچنده برفرانسز، بر آلمانی و یا خود بر ایتالیالی

بر امریقالی بی یعنی هر هانگی بر دولت تبعه سندن اولور لرسه
اولسون - قتل و جرح ایدرسه کمینک تابع اولدینی فرانسر
قانونلری موجبنجه معامله و مجازات اولنور . بود کز لرده کمی
کیمک ایسه سنکم آنک در .

شو حالدۀ اوزاق و آچیق دکر لرده هیچ بر دولتک حق
حاکمیتی، حکم و نفوذی یوقدر . فقط بر دولتک مالک اولدینی
ساحله یقین ، یعنی ساحلی بوینجه بر مقدار دکرده حق حاکمیتی
حکم و نفوذی واردر . ساحله یقین اولان دکر اوزاق و آچیق
دکر لر کی دکلدر . بوراده ساحله مالک اولان دولتک او
ساحلی محافظه ایتسی ایچون ساحلنک یاننده بولنان بر مقدار
دکرده حاکم و مالک اولسی لازمدر . بناءً علیه ساحله یقین
دکردن بر مقدارینسه مالک اولق حتی عموم دولترجه قبول
ایدلمش و بوکاده «قره صولری دینلمشدر . قره صولری بر دولتک مالک
اولدینی ساحلی بوینجه و او ساحله موازی و محازی اوله رق چیزیلن بر
موهوم خط ایله ساحل اراسنده قالان دکره قره صولری تعبیر
اولنور که بومو موهوم اولان خط ساحلدن اتیلان اک قوتلی برطوبک
ایریشدیکی یردن کچدیکی فرض اولنور . و کولله نک دوشدیکی
نقطه قره صولری ایله آچیق دکرک آیرلدینی نقطه در ساحل
طرفی قره صولری، او بر طرفی آچیق اولمش اولور . دیه تعریف
اولنور . دها مختصر تعریفده شونلر در :

قره صولری ، بردولتک سواحلدن طوپ آتشی آلتنده
بولندیره بيله جی مقدار دكزه دینلور . ديكری قره صولری ،
اك قوتلی برطوپك ایریشدیكى یره قدر سواحلی محیط اولان
دكزدر .

شو حالدہ بردولتک ساحلدن برطوپ منزلی اوزاغه قدر
اولان دكز اودولتک مالی وملکیدر . اوراده نه ایسترسه یاپار ،
بشقه دولت اورالرده بالق طومتق « صید ماهی » حقنه مالک
دکلدر . اوحق اورایه صاحب اولان دولتکدر . اودولت اورا-
لرده وقوعه کلن قچاقیلغی ده منع ایدر .

ایشته بوقره صولری دینلن ساحله یقین دكزلرده وقوعه
کلن جرملر حقنده او دكزه مالک اولان دولتک قانونلری
جریان ایدر .

۸ — اجنبی سفائن حربیه و تجاریه سی

درونده ایقاع ایدیلن جرائم

آچیق دكزلرده ، كرك حرب کیملری و كرك تجار کیملری
ایچنده ایقاع اولنان جرملر — هر هانکی دولت تبعه سی آراسنده
اولورسه اولسون — هر حالدہ کیمینک تابع اولدینی دولتک

قانونلرینه کوره معامله اولنور. مثلاً: قره دکزه کیدن برروس
تجار کمیسی ایچنده بر عثمانلی ایله برفرانسز ویاخود برروس ایله
برانکلیز اراسنده بر جرم وقوعبولور ایسه — کینک تابع اولدینی
روس قانونلری موجبجه معامله و مجازات اولنور .

شمدی قره صولری ایله لیمانلرده طوران اجنبی سفائن
حرییه و تجاریه سی دروننده وقوعه کلن جرائمدن بحث ایدمه لم که
اصل مقصوده بودر .

اولا : بردولتک قره صولرنده بولنان ویا برلیمانده طوران
اجنبی سفینه سی اکر حرب کمیسی ایسه منسوب اولدینی دولتک
برقلعه سی و بناءً علیه مالی و ملکی دیمک اولدیغندن بونک ایچنده
وقوعه کلن جرملر کینک صاحب اولدینی دولتک قانونلرینه
تابعدر .

ثانیاً : بردولتک قره صولرنده بولنان ویا برلیمانده طوران
اجنبی سفینه سی تجار کمیسی اولوبده ایچنده وقوعه کلن جرمده
صرف اوکینک طائفه سی اراسنده اولور ولیمانک امنیت و آسا-
یشنی اخلال ایتمز ایسه او جرمدن طولایی اجرای محاکمه
و مجازات کینک تابع اولدینی دولتک قانونلرینه عائددر .

مثلاً: استانبول لیماننده بولنان بر یونان تجار کمیسی ایچنده
طائفه لردن بر قاقچی بر برینی جرح ایتمه حکومت عثمانیه مداخله
ایتمز بونلری جزالندیرمق یونان حکومتته عائددر .

ثالثاً : بر دولتک قره صولرنده بولنان ویاخود لیمانده
طوران اجنبی برسفینه تجار کمیسی اولوبده ایچنده وقوعه کلن
جرم صرف طائفه اراسنده اولور و فقط لیمانک اسایشنی بوزار-
لر سه اجرای محاکمه و مجازاتلری بولندیغی لیمانک صاحبی اولان
دولتک قانونلرینه عائددر .

مثلاً : فرانسه نك مارسیلیا لیمانده طوران بر انکلز تجار
کمیسی طائفه لری بر برلریله غوغا ایدرک و اطرافه ده سلاح آتاراق
لیمانک اسایشنی بوزارلر سه فرانسه حکومتی ضابطه عدلیه
مأمورلری کمی یه کیده رک وظیفه قانونیه لرینی اجرا ایدرلر
و مجازات ایدلسی لازمکلن اشخاصی در دست ایدوب فرانسه
محکمه سنه تسلیم ایلرلر .

رابعاً : بر دولتک قره صولرنده بولنان ویاخود لیمانده
طوران اجنبی برسفینه تجار کمیسی اولوبده ایچنده وقوعه کلن
جرم طائفه لری ایله یولجیلر بیننده ویاخود صرف یولجیلر اراسنده
اولور سه یولجیلرک هانکی دولت تبعه سندن اولور سه اولسون
ولیمانک اسایشی اخلال ایدلسون ایدلمه سون او جرمدن طولایی
تعقیبات قانونیه اجرا ایتمک لیمانک صاحبی اولان دولته عائددر .
مثلاً : لوندره لیمانده طوران بر المان تجار کمیسنده کی
فرانسز یولجیلر ایله المان طائفه لری اراسنده ویاخود یولجیلردن
ایتالیان ایله برروس بیننده بر جرم وقوع بولور سه — لیمانک

اسایشی اخلال ایدلسون ایدلمهسون — مطلقا لیماک صاحبی
اولان انکلتزه حکومتی فاعل جرملری انکلیز قانونی موجبنجه
جزالندیرر .

خلاصه ۱ — برلیاتده بولنان تجار کمیسی طائفه سی بیننده
بر جرم اولورسه کمینک تابع اولدینی دولتک، ۲ — طائفه بیننده
اولوبده لیماک آسایشی اخلال ایدرسه لیماک تابع اولدینی
دولتک، ۳ — صرف یولحیلز ویا طائفه ایله یولجی آراسنده
وقوعه کلورسه برلیماک تابع اولدینی دولتک قانونلری احکامنه
کوره معامله و مجازات اولنور .

— تذبیه —

اجنبی سفینه لر دروننده وقوعه کلن جرائم حقنده کی معاملات
بالجمله دولتر بیننده بیان ایلدیکمز کبی ایسه ده دولت عثمانیه ده
بویله دکلدرد. آشاغیده بحث ایده جکمز وجهله «عهود عتیقه»
دینیلن واجنبیلره وقتیله ویرلمش اولان بعض امتیازات و مساعدات
نتیجه سی اوله رق بزده طوغریدن طوغری به بویولده معامله
جریان ایتمز او کمینک منسوب اولدینی دولتک قونسولوس ویا
ترجمانی بولنق لازمدر .

بونلر بولنمه نیجه او کبی به کیریله مز. امتیازات اجنبیه دولته
قالدیر نیجه به قدر بویولده معامله اجرا اولنمی لابددر فقط کمی

اگر یونان دولتک ایسه — دولت عثمانیه ایله یونان دولتی
 اراسنده اولان قونسولوسلر معاهده سی حکمنجه — مذکور
 کمی ایچنده اولنه حق تحریات اجرایی لازم کلدکده مأمورین
 عثمانیه طرفندن یونان قونسولاتوسنه تحریراً اخبار و بیان اولنور
 اوج ساعته قدر یونان قونسولاتوسی مأمورلری کمرسه عثمانی
 ضابطه مأمورلری کمی یه علی الاصول کیدرلر وایجاب ایدن
 معامله یی یاپارلر و قونسولاتو مأمورلرینک کلدکلرینی مین برقطعه
 آریجه ضبط و ورقه سی ده تنظیم ایدرلر. بو حال یالکتر یونان دولتی
 کیلرینه مخصوصدر. دیگر دولت کیلرینه مطلقاً قونسولاتو
 مأمورلریله برابر کیلور.

۹ — اجنبی سفائن حربیه و تجاریه سی مرتباتک

قره ده ایقاع ایلدکلری افعال جرمیه

اولا: حرب کیلرندن بحث ایدم.

بر لیمانده بولسان اجنبی حرب کیلری افراد وضابطائی
 طرفندن قره ده ایکی صورته جرم ایقاع اولنه بیلور،
 برنجی صورت: حرب کیلری افراد وضابطائی البسه
 رسمیه لرینی کیمش اولدقلری حالده و برایش ضمنتده قره ده

بولندقلری ائئاده كرك بربرلری حقنده و كرك ليمانك بولندينى
دولت تبعه سيله سائر دولت تبعه لری عليهنده بر جرم ايقاع
ايلدكلری حالده ضابطه مأمورلری او مجرملری دردست ايدرك
كمينك قوماندانه تسليم ايدر . كمى قوماندانى انلری تأديب
ومجازات ايدر . دولتر ييننده كى عادت بويولده در .

مثلا: استانبول ليمانده بولسان فرانسر سفارت كيسى
افرادندن برى البسة رسميه سيله غلطده كزر كن بر عثمانلى
تبعه سيله منازعه ايدرك آنى جرح ايتسه ، پوليس وضابطه عدليه
مأمورلری اونفرى دردست ايدرك كمينك قپودانه تسليم ايدرلر
قره قوله كوتوروب استنطاق واستجواب ايتزلر .

فقط مجروحى وشاهدلری استجواب ايدرك تحقيقات لازمه
اجرا ايدرلر وتنظيم ايده جكلری ضبط ورقه سنده بوجهتى يعنى
فرانسه سفارته مأمور فلان نام كمينك مرتباتندن نفر فلان
طرفندن جرح ايدلمش ونفر مرقوم دردستله كيسى قوماندانه
تسليم ايدلمش در ديهرك تصريح ايدرلر . حكومت عثمانيه سفارتيه
مخبره ايدرك ايجاب ايدن معامله يى ايفا ايدر . بوجهت پوليس
وضابطه نك وظيفه سى دكلدر . خارجيه نظارتك سياسى بر
وظيفه سيدر .

ايكنجى صورت : بر ليمانده بولنان حرب كيملى افراد
وضابطانى البسة رسميه سز اوله رق كز مك واكلمك اوزره

قره ده بولندقلری ائاده كرك بربرلری حقنده و كرك سائرلی
 واجبی اهالی علیه برجرم ایقاع ایده جك اولورسه اولیمانك
 ضابطه مأمورلری مجرمی دردست ایدرك حقلنده تحقیقات
 قانونیه اجرا ایدوب عدلیه تسلیم ایدرلر . یعنی مجرم نفرلر
 منسوب اولدقلری کمی قوماندانه تسلیم ایدلر . لیما صاحبی
 اولان حکومت او نفر حقنده اجرای محاکمه و مجازات ایدر .
 مثلاً : انكلتره حرب کیسی ضابطانندن بریسی سیویل
 اولدینی حالد بر مأموریت مخصوصه و رسمیه ایله اولمایوب صرف
 كزملك و اكلنمك ایچون بك اوغلنده كزرکن عثمانلی تبعه سندن
 بریله غوغا ایدرك جرح و قتل ایتسه پولیس و ضابطه عدلیه
 مأمورلری اوضابطی دردست و حقنده تحقیقات قانونیه اجرا سیله
 محاکم عثمانیه تسلیم ایدرلر . کمی قوماندانه معلومات و یریلور .
 اوروپا دولتلری بینده جاری اولان عادت بویولده اولدینی
 کبی ۱۰۸۶ تاریخده انكلتره دولتیله اولان معاهده مزك بر ماده
 سنده دخی بو خصوصده صراحت واردر . فقط اوضابط قتل
 اجرا ایتدك نصرکه قاچوبده کیسنه کیدرسه کمی یه کیدیلوب
 اوضابط دردست اولنه ماز .
 چونکه سفینه حریه لره بشقه بردولت مأموری کیره مز .
 اوزمان ایش ضابطه دن چیقمش خارجیه نظارتك وظیفه سنه
 تعلق ایتمش اولور .

ثانیاً : تجار کیلری نی بیان ایدلم :

تجار کیلری احوال داخله اعتباریه منسوب اولدقلری دولتک قانوننه تابعدر. فقط بر دولتک قره صولرنده ویالمانلرنده بولندقلری وقتده معاملات خارحیه لرندن طولای لیمان صاحبی دولتک قانونلرینه تابع بولنورلر . شو حالده تجار کیلری افراد و قبودانلرندن بری قره ده کرک بر برلری حقنده و کرک یرلی واجبی قره ده کی اهالی علیهنده بر جرم ایقاع ایده جک اولورلر سه طوغریدن طوغری یه لیمانک صاحبی اولان دولتک محکمه سی وقانونی موجبجه اجرای محاکمه و مجازات اولنور . حتی فرار ایدوبده کمی یه قاجسه بیله ضابطه مأمورلری کمی یه کیدرک فاعل جرمی دردست ایدرلر .

مثلاً : استانبول لیماننده بولنان آوستریا تجار کیلری افرادندن بری عثمانلی تبعه سندن بر کیسه یی جرح ویا قتل ایتسه پولیس و ضابطه عدلیه مأمورلری اومجرمی - امتیازات اجنبیه بختنده بیان اولنان اصول دائره سنده - دردستله محاکم عثمانیه ده ینه اصولی دائره سنده محاکمه و حکم اولنور .

۱۰ — ممالک عثمانیه ده متوطن اجانبک نائل

اولدقلری امتیاز و مساعدات

هر دولتده تبعه اجنبیه یه حقوق دول قواعدنجه ، وینلرنده

مقابله بالمثل قاعده سی اوزرینه عقد ایدیلن معاهده لر موجبجه معامله اولنور .

مثلا: حقوق دول قواعدنجه المانیاده بولنان فرانسه دولتی تبعه سی عسکره آله ماز. وکذا المانیا ایله فرانسه بیننده بر معاهده عقد ایدلسه ده بونده المانیا دولتی فرانسه تبعه سندن یوزده یکر می بش ویرکو آلمنی قرارلشدیرلسه بوکا مقابله بالمثل دینور . یعنی بر دولت دیگر بر حکومت تبعه سنه نه معامله ایدرسه او حکو- متده اول دولت تبعه سنه او یولده مقابله ایدر دیمکدر . ایشته بالجمله دولتلر یکدیگرینه بویولده معامله ایدرلر ، مناسبتری بویله در .

فقط اسکی زمانلردنبری ممالک شرقیه ده شوقواعده مغایر اوله رق شرق مملکتلرینه کلن غرب اهالیسنه بر چوق امتیازلر ویرلمشدر . شرقه کلن غرب دولتری اهالیسی او امتیازه نائل اولدقلری حالده غربه کیدن شرق اهالیسی اصلا اولیه بر امتیازه نائل اوله ماز. یعنی مقابله بالمثل قاعده سی جریان ایتمز .

دولت عثمانیه ، شرق طرفلرینی قدس شریف و مصری حتی استانبولی ضبط ایلدیکی زمان اسکی حکومتلر طرفندن غرب اهالیسنه و بالخاصه فرانسلره ویرلش بر چوق امتیازلر بولدی . بونلر مضر ایدی . بونلری دولت او وقت برسوز ایله قالدیره ییلور ایدی . فقط اهمیت ویرمدی . او وقتک حکمنجه

بونلرك مضر اولديغى اكلاشيله مدي، بك زياده اهميتسز كورلدى. اووقت فرانسلرده بونك ايچون يالوارديلر دولته بر لطف اولق اوزره بوامتيازلىر حاليله براقدى. كيت كیده دولتمزله اولان معاهده نامهره يازلمغه باشلادی، دها صكره لرى كندی طرفمزدن احسان ايديلن بوامتيازلىر عليهمزده قوللانلمغه ومأمورلر يمزك غفلتلىيله چوغالمغه باشلادی. شمدي دولت بونلرك قالدیرلمسيه اوغراشيور امين اوله لم كه قانونلر يمزك تنظيم وتكملى ومأمورلر يمزك كمال عدالت وبى غرض وبى طرفلقله ايفای مأموريت ايتلىر ايله بوامتيازلىر يقين وقتده قالدیريلور. فقط قالدیريلنجه يه قدر بونلره رعایت ايتمه مجبورز لكن رعایت ایده جكز ديه ركه ايلرى يه كيدوب هيچ يوقدن بر طاقم امتيازلىر دها چيقارمامغه صوك درجه ده دقت اولنمليدر.

نته كم برقاج امتياز واردركه هيچ بر معاهده ده يوق ايكن مأمورلر يمزك يابدقلىر ياكلش معامله هيچ يوقدن امتيازلىر وجوده كتير مشدر.

بوامتيازاتك بر قسمي حقوق دول قواعدن بولنديغى جهتله مضر اولمايوب هر دولته بدرجه يه قدر عادت اولمشدر. ديكر قسمي ايسه دولتك طوغرى دن طوغرى يه حقوق حكمرانيسنه، دوقونور مواددن عبارت اولوب بشقه هيچ بردولته جارى اولمايان معاملات ومساعدتدر كه دولت فرصت

بولدجه قالدیرلمسنة همت و غیرت ایتمکده در . از جمله : ممالك عثمانیه ده املاك و عقار و اراضی آلوب تصرف ایتمک ایستہین اجنبی دولت تبعه لری حقنדה « ۱۲۸۵ » تاریخنده تنظیم و نشر اولنوب انکلترہ، فرانسه، بلچيقا، اسوچ، اوستریا، دانمارقه، المانیا، اسپانیا، یونان، روسیه، ایتالیا، فلمنک، آمریکا دولتلری طرفندن قبول اولنان « استملاك املاك پروتوقولی » ایله بوی امتیازات املاك و عقارده بر درجه یه قدر قالدیرلمشدر . بوی پروتوقولی قبول ایتمه یین دولتلر ممالك عثمانیه ده املاك آله مازلر . امتیازات اجنبیه ویا عهود عتیقه ویا خود قایتولاسیون دینلن واجنبیلرک نائل اولدقلری مساعدات بروجه آتیدر :

۱ — ممالك عثمانیه ده بولنان تبعه اجنبیه دن ایکی کیمسه آراسنده — طرفین ایستر بردولت، ایستر سه بشقه بشقه دولت تبعه سندن اولسون — ظهور ایدن هر نوع حقوق و جزا دعواسنک محاکمه سنے حکومت عثمانیه اصلا قاریشمه یوب طرفینک منسوب اولدقلری قونسولاتو طرفندن باقلمسیدر . ایشته بوماده امتیازاتک آغریدر دولت عثمانیه نک حکومت و حقوق عدلیه سنے تعرضدر .

مثلا : فرانسز دولتی تبعه سندن ایکی کشتی ویا خود بر المانیالی ایله انکلیز آراسنده فرضا بک اوغلنده بری دیگرینی جرح و قتل ایته، جرم مشهوداً وقوع بولسه بونلرک محاکمه سی

مظنون علیه اولان هانکی دولت تبعه سندن ایسه انک قونسولاتو-
سنده اجرا اولنور ،

فقط ، استملاک املاک پروتوقولی موجبجه املاک و اراضی
تصرفه دائر اولان و ایکی اجنبی بیننده ظهور ایدن دعوالر
عثمانی محکمه لرینه عائددر . و بومحا کملرده ترجمانده بولنماز . لکن
بر اجنبینک خانه و یا عقاردن جبراً چیقاریلوب اول خانه نک
تخلیه سی لازم کلدکده بو تخلیه معامله سی ایچون اجنبینک
قونسولاتو ترجمانی بولنق لازمدر . ایشته بو صورتله شو آغیر
امتیاز املاک و عقار دعوالرنده بر درجهیه قالدیرلمشدر .

۲ — ممالک عثمانیه ده وفات ایدن اجنبیلرک ترکه سینه
حکومت عثمانیه طرفندن مداخله ایدله یوب بو کی ترکه لرک
قونسولوسلر طرفندن تحریر و ورثه یه تقسیم ایدلسی و بلا
وارث وفات ایدنلرک ترکه سی ده بیت المال طرفندن ضبط
اولنیموب متوفانک قونسولاتوسی طرفندن آلتوب کندی دولتی
قانوتجه اقتضا ایدن محله تسلیم ایدلسیدر . شو قدر که ترکه املاک
و عقاردن عبارت ایسه استملاک املاک پروتوقولی موجبجه
محاکم عثمانیه طرفندن قوانین عثمانیه دائره سنده معامله اولنور .
ومتوفا اجنبینک وارثی یوقسه و املاک بیت المال طرفندن ضبط
اولنور و یا محلول اولور .

۳ — تبعه عثمانیه ایله اجنبیلر بیننده ظهور ایدن حقوق

وجزا دعوالرینک محاکم عثمانیه ده رؤیتی اثناسنده اواجنینک
قونسولوسی ویاخود ترجماننک محکمه ده حاضر بولنمسیدر .
بوماده حکمنجه ترجمانلر اجنینک ضابطه عدلیه مأمورلری
طرفندن اجرا اولنان تحقیقات اثناسنده مستنطق جانبندن
ایفا اولنان استنطاقده و محاکمه اثناسنده حاضر بولنمقده درلرکه
بونی عهدده مخالف اوله رق تفسیر ایتمکده درلر . لکن املاک
و عقار دعوالرنده پروتوقول احکامنجه ترجمان بولندیرلماز .
دعوی ایکی عثمانلی ارسنده ایمش کی اجرا اولنور . برده :
اشاغیده بیان اولنه جنی اوزره قونسولوسک اقامتگاهندن
طقوز ساعت دن زیاده مسافه ده اوطوران اجنبیلرک بیک غروشه
قدر حقوق و بش یوز غروشه قدر جزای نقدی دعوالرنده
ترجمان بولنماز . فقط بو دعوالر قابل استیناف اولوب حین
استینافده ترجمان ویا وکیلی حاضر بولنور .

۴ — محاکم عثمانیه یه جلب اولنه حق تبعه اجنبیه قونسو-
لوسی ویا ترجمانلری معرفتیه جلب اولنوب محکمه محضر
و مباشرلری طرفندن طوغریدن طوغری یه احضار اولنه مامسیدر .
فقط املاک و عقار دعوالرندن طولایی اولان محاکمده محکمه
طوغریدن طوغری یه اجنبی یه جلبنامه کوندیرر قطعاً ترجمان
توسیط ایدلر .

۵ — تبعه عثمانیه ایله اجنبیلر ارسنده ظهور ایدن دعوالرک

اثباتی مطلقاً سند ایله اولوب شهود شخصیه ایله اثبات ایدیه -
مامسیدر .

شمی نشر اولنان عثمانلی قانونلری موجبجهده معامله
هان بو یولده اولدیغندن بوامتيازك بر مضرتی یوقسهده ینه بر
امتياز اولدینی ایچون مضر در .

۶ — تبعه اجنبیه علیهنه ویریلن اعلالات ایله حکم اولنان
مبلغدن یوزده ایکی دن زیاده خرج الیه مامسیدر مع مافیه قیدیه،
تسجیل وکالت و صورت خرجلری آلنور . یالکز سفارتلرک
تقریرندن قیدیه آلتاز .

۷ — محاکم عثمانیهده تبعه اجنبیه علیهنه ویریلن اعلالات
عائد اولدینی قونسولوس طرفندن اجرا اولنوب اعلامی ویرن
محکمه طرفندن اجرا ایدیه مامسیدر . یالکز املاکه عائد اولان
اعلالات و وضع اولنه حق مخبرلر پروتوقول حکمنجه محکمه
عثمانیه طرفندن طوغریدن طوغری به اجرا اولنور . فقط
تخلیه معامله سنده ینه ترجمان بولنق لازمدر .

۸ — تبعه اجنبیهدن برینک مسکننه کیرمک قانوناً لازم
کلن احوالده ضابطه عدلیه مأمورلری طوغریدن طوغری به
کیره میوب اول اجنبینک قونسولوسی طرفندن بر مأمور بولنمسیدر .
بوامتيازده استعمالک املاک نظامنامه سیله بر درجه به قدر
تعديل اولنمشدر . شویله که :

اولاً: ضابطه نك بر اجنبى نك خانه سنه كيرمى لازم كلديكى
تقديرده اجنبى نك منسوب اولدينى قونسولوسى ايشى تأخير
ايتمكسزىن معاونته مجبور اولوب قونسولوسه خبر ويرلديكى
زماندن كنديسنىك وياخود وكيلىك حركت ايده جكى وقته قدر
آلتى ساعتدن زياده زمان مرور ايتمه جك و حكومتك معاملات
لازمه سى هيچ بر حالده يكرمى دوت ساعتدن زياده تعطيل
اولنه ميه جقدر .

ثانياً: جنات نوعدن اولان بر جرمك ظاهره چيقارلسى
ايچون تبعه اجنبيه نك خانه سى تحرى اولنق ايجاب ايتديكى زمان
دخى قونسولوسك اقامتگاهندن طقوز ساعت اوزاق اولدينى
تقديرده حكومت محليه نك طلبى اوزرينه قريه اختيار مجلسرينك
اوچ نفر اعضاسيله برابر ضابطه مأمورلرى قونسولوس ويا وكيلى
حاضر بولنمكسزىن اول اجنبى نك خانه سنه كيره بيلورلر شوقدر كه
اجراى تحريات ايدن ضابطه مأمورلرى اختيار مجلسى اعضاسيله
برابر جريان حالى مين بر ضبط ورقه سى يابه رق حكومته تقديم
واورادن ده اجنبى نك منسوب اولدينى قونسولولا تويه ارسال
اولنور .

ثالثاً: اجنبى مسكنى اعتبار اولنان محلكك خارجنده امور
ضابطه بلا قيد و شرط جريان ايدر . يعنى تبعه اجنبيه دن برى
مظنون عليه اولوبده تحرى ايديلوركن سوقاقده وياخود اجنبى

مسکني اولمايان سائر بر محله کورولديکي تقديرده منسوب اولديني قونسوسک کلسي بکنمسنه حاجت اولمقسزين طوغريدن طوغري يه ضابطه مأمورلری طرفندن در دست ايديلور . مسکن لفظی خانه و اقامت اولنان محل ايله اطرافي ديوارله چورلمش اولان قهوه، تياترو، بالو، اوتل کي اجنبي مسکنلرينه کيجه کوندوز آحيق اولديني زمان ضابطه مأمورلری کيره بيلورلر . فقط بو محللر قبالو اولنجه اقامتگاه عد اوله جغندن بويله قبالي اولديني زمان کيرمک ايجاب ايدرسه قونسوس ويا ترجمانک حاضر بولنسي شرطدر .

— تنبيه — برکيمسه نك اجنبي اولديني اوراق رسميه سيله على الاصول ثابت اولنجه يه قدر کنديسنه تبعه عثمانيه کي معامله اولنور .

۹ — محاکم عثمانيه طرفندن برينک حبسنه حکم اولندقدہ شخص محکوم عثمانلی حبسخانه لرنده حبس اولنميو ب اجراي مجازاتي ايچون عائد اولديني قونسوسه تسليم اولنور . بر مدت نبري انکلتره و يونان و اوستريا دولتلي بوا امتيازدن صرف نظر ايتشلردر .

اشبو طقوز نوع امتيازدن بشقه هيچ بر معاهده يه وعادات و معامله مبني اولمايان و يقين زمانلرده مجرد بعض مأمورلرک دقتسزک و جهالتلرندن ايلري کلوب امتيازات عتيقه صره سنه کچن دهها درت نوع معامله واردرکه شونلردر .

۱ — بر عثمانلی ایله بر اجنبی اراسنده کی دعوانك عثمانلی محكمه. لرنده محاكمه سی بیتوبده هیئت حاكمه مذاكره اوپه سنه کیروب مذاكره ایده جكلری زمانده ترجمانك بولنمسیدر. یعنی اثنای مذاكره ده دخی ترجمانك حاضر بولنمسیدر. حتی بعض ترجمانلر اعضا ایمش کی مذاكره یه ده قاریشه رق شوقدر جزا ویره لم. بویله براءت ایتدیره لم دیه رك بیان رأى بیله ایدر لر. فقط حاكملر بونلره مساعده ایتاملیدر.

۲ — بر عثمانلی ایله بر اجنبینك عثمانلی تجارت محكمه سنده دعوالری رؤیت اولنه جنی ائاده محكمه ده او اجنبینك منسوب اولدینی قونسولاتودن ده ایکی اعضانك محكمه ده بولنمسیدر. بوده تجارت مجلسلری ایلك تشكیل اولدینی وقت اجنبی تجارلردن آلمان اعضالردن قالمش بر دقتسزلكدر. استانبولده کی برنجی تجارت محكمه سی صرف بویله عثمانلی ایله اجنبی اعضادن تشكیل ایدرك «مختلط بر محكمه» صورتنده اجنبیلر ایله عثمانلیلر بیننده کی دعوالری کوریر.

۳ — بر عثمانلی ایله بر اجنبی اراسنده کی حقوق دعوالری، حقوق محكمه لرنده اصول محاکمات حقوقیه قانوننه توفیقاً کورملك لازم کورکه مستثنا اوله رق موقتاً تجارت محكمه لرنده اصول محاکمات تجاریه قانونی موجبجه کورلمسیدر. شوقدرکه بیك غروشه قدر جزئی حقوق عادیه دعوالریله علی العموم ایجار

واستيجار دعوالری عائد اولدینی حقوق محکمه لرنده کوریلور.
 ۴ — ممالک عثمانیه ده اعلان افلاس ایدن بر اجنبی نک بتون
 آله جقلیلری عثمانلی دخی اولسه ینه افلاس دعواسی اواجنینک
 قونسولاتوسنده رؤیت اولنور. شو حالده ممالک عثمانیه ده بر عثمانلی
 اجنبی بردولتک قونسولاتوسنه مراجعت مجبوریتنده در. فقط
 بو کامقابل ده بر عثمانلی تاجری اعلان افلاس ایدوبده، آله جقلیلری
 اراسنده اجنبی وارسه اوده طوغریدن طوغری یه محاکم عثمانیه یه
 مراجعت ایدر وترجمان واعضا بولندیرلماز.

ممالک عثمانیه ده مقیم اجنبی دولت تبعه لرینک نائل اولدقلری
 امتیازات ومساعدات بولردن عبارتدر. دولته اسکیدن بری
 مناسباتی اولان دولتلرک تبعه سی بوامتیازدن استفاده ایدرلر.
 ایران و یونان دولتلری بوامتیازادن تماماً استفاده ایده مزلر،
 لکن جزئی بعض فرقلر ایله ینه نائل امتیازدرلر. فقط یکی
 تشکل ایدن صربستان، قره طاغ، بلغارستان حکومتلری تبعه سی
 بویله برامتیازه نائل دکلدرلر. بونلر حقنده تماماً حقوق دولجه
 معامله اولنور. بناءً علیه ضابطه مأمورلری هر نوع جرائمده
 بونلر حقنده عثمانلی تبعه سی کی عادلانه و بی طرفانه معامله
 ایتلیدرلر.

۱۱ — اجنبیلرک یکدیگر علیهنده ایقاع ایلدکلری جرأئمه پوایسک وظیفه سی

هرهانیکی دولت اولورسه اولسون کندی مملکتده کرک تبعه سی کرک اجنبیلر حقنده کندی قانونلری احکامی جاریدر. فقط ممالک عثمانیه ده اجنبیلرک عهد عتیقه یه استناداً بر دولت تبعه سی بینده و کرکسه آیری آیری دولتلر تبعه سی آراسنده بر جرم واقع اولدقه بر دولت تبعه سندن ایسه لر کندی قونسولاتولرنده و آیری آیری دولت تبعه سندن ایسه لر مدعی علیه ک قونسولاتوسنده محاکمه لری اجرا و اودولتک قانونی موجبنجه حکم اولنور. فرضاً : برفرانسز دیگر برفرانسزی جرح و قتل ایتسه فرانسز قونسولاتوسنده، برایتالیان بر المانی جرح و قتل ایتسه مجروح و مقتول اولان المانک قونسولاتوسنده محاکمه اجرا ایدیلور .

بونک ایچون در سعادته قونسولاتو محکمه لری واردر . و ممالک عثمانیه کلن اجنبی قونسولوسلری کندی تبعه لری حقنده «حقوق و جزا حاکمکی» صفت و وظیفه سنی ده حأزدر . اجنبیلرک یکدیگری علیهنده ایقاع ایلدکلری جرم یاغیر

مشهود و یا خود مشهوداً وقوعه کلمش اولور . بویکی نقطه دن پولیس وظیفه سی دیکشیر .

اگر جرم غیر مشهود اوله رق وقوعه کلمش ایسه پولیسه طوغریدن طوغری یه بر وظیفه ترتب ایتمز . قونسولاتو مأمورلری طرفندن تعقیبات و تحقیقات اجرا ایدیلر . یالکر قونسولاتو طرفندن حکومته مراجعتله معاونت طلب اولنورسه اووقت پولیس مأمورلری ایجاب ایدن تسهیلات و معاونتده بولنور . مثلاً : فرانمز تبعه سندن بری دیگر بر فرانمزك خانه سنه کیره رك اچقه واشیاسنی سرقت ایتمش اولدیغنی ادعا ایدرك قونسولاتوده دعوی اقامه ایتسه بوکا پولیس مأمورلری مداخله ایده مز . لکن قونسولاتو معاونت ایسترایسه فرضا سارق اولان فرانمزی قوه جبر استعمال ایتمه نیجه در دست ایده میسه جکنی آکلارسه و یا خود فرار ایده جکنی کشف ایدرسه حکومت عثمانیه یه مراجعت ایدرك پولیس وضابطه نك معاونت ایتمنی ایستر ، پولیسلرده او فرانمزی قوه جبریه ایله طوتارلر . و یا خود فرار ایتمه سنه میدان ویرمز لر . الحاصل بویله جرائم غیر مشهودده پولیسك وظیفه سی قونسولاتویه بر معاونتدن عبارت قالور .

جرم ، مشهوداً وقوع بولش ایسه ، طبیعی اوله رق هر کسدن اول پولیس مأمورلری جرمك وقوعندن خبرلری اوله جنی جهتله همان محل جرمه عزیمت ایدرك بر طرفدن فاعل جرمك

دردسته ، بر طرفدندده جرمندن مغدور اولان شخصك
استجوابنه باشلايه رقبجرم مشهودده پوليسك وظيفه سي نه ايسه
تماماً اجرا ايتمكه مباشرت ايدرلر. بواشاده طرفينك يعنى فاعل
جرم ايله جرمندن مغدور ومتضرر اولانك تبعه اجنيه دن
اولدقلى صورت صحيحده واوراق رسميه ومثبته ايله ميدانه
چيقتجه همان قونسولاتورينه معلومات ويريلور .

قونسولاتو مأمورلى كلهرك تحقيقاته دوام ايدرلر. عثمانى
ضابطه سي آرتق مداخله ايدمهز . مثلاً : بر كيمسه نك ديكر
كيمسه يي مشهوداً جرح و قتل ايتمش اولدينى پوليس وسائر ضابطه
مأمورلرنجه خبر آلمسى اوزرينه همان محل جرمه عزيمت اولنه رقب
اوراده حاضر بولسانلردن مقتولك وقاتلك كيم اولدينى طبعى
سؤال اولنوب مقتولك فرانسزلى فلان وقاتلكده كذا فرانسز
تبعه سندن فلان اولوب شوطرفه طوغرى فرار ايتديكى آكلا-
شلقده همان فاعل دردست اولنه رقب محل جرمه كتيريلور .
مقتول ايله قاتلك اوزرلى آراندقده حقيقه فرانسز اولدقلى
پساپورطلريله تين ايدرسه برطرفدن تحقيقاته دوام اولنق ايله
برابر ديكر طرفدنده پوليس مركزينه قاتل ايله مقتولك
فرانسزلى اولدينى بيلديريلور، مركزده قونسولاتويه معلو-
مات ويريلهرك قونسولاتو مأمورلى كليرلر ، بو مأمورلر
كلنجيه قدر پوليس مأمورلى جرم مشهودده كي وظيفه لرى

دائرہ سنده تحقیقاتہ دوام ایدر لر . شو قدر کہ اجنبی خانہ سی تحریری ، و قاتل اولان فرانسر خانہ سنہ قاجش ایشہ دردست ایتک اوزرہ ترجمانسر قاتلک خانہ سنہ کیرمک جائز دکدر . الحاصل بویله بر جرم وقوعندہ طرفین اجنبی در ، تحقیقات قونسولاتولرینہ عائد در دیہ رک پولیس مأمورلری وظیفہ قانونیہ لرینی تماماً و کاملاً ایفادن اجتناب ایدہ مز لر ، بو بابده اہمال وقصور اتمام ایدر لر .

قونسولاتو مأمورلری کلوبده ایشہ مداخلہ ایدنجہ یہ قدر و تحقیقاتہ باشلانجہ یہ دکن پولیس مأمورلری وظیفہ نظامیہ لرینی بحق کورمایدر لر . قونسولاتو مأمورلری کلوبده معاونت ایسترلرسہ همان معاونت لازمه و مطلوبہ دہ بولمق دہ پولیس لرک باشلوجہ وظیفہ لریدر .

— تنبیہ — پولیس مأمورلری بو کی خصوصاتده عہود عتیقہ و نظامات موضوعہ احکامنہ رعایت ایدرک تحقیقات واجرا آت لرینی نہ قدر مکمل و منتظم یاپارلرسہ اجنبیلر جہ او قدر تقدیر ایدیلہ جکی و پولیسک بویله منتظم و وظیفہ و قانون شناس اولدینی اجنبیلر جہ تقدیر و تصدیق ایدیلنجہ امتیازات و مساعدات اجنبیہ قالدیریلہ جنی جہتلہ پولیس مأمورلرینک بو کی نقطہ لرده وظیفہ سی غایت نازک و پک مهم اولوب بو امتیازاتک النفا و یا ابقاسی کندی انتظام و یا قصور لرینہ وابستہ ایمش کی صرف غیرت و جہد و ہمت ایللری لازمه حیتنددر .

۱۲ — اجنبیوں کے تبعہ عثمانیہ دن بریلہ مشترکاً وقوعہ کتیردکلی جراثیم ده پولیسہ تعلق ایدن وظائف

عثمانی تبعہ سندن برکیمسه اجنبی تبعہ سندن بریسیله مشترک
اولدقلى حالده كرك عثمانی تبعه سی، وكر كسه اجنبی بردولت تبعه
حققرنده برجرم ایقاع ایلدکلی تقدیرده بونلرك محاکمه واجرای
مجازاتی عثمانی محکمه لرینه عأددر. مثلاً: بریمی عثمانی دیکری
فرانسز وبریده ایتالیالی اوج کشی فرانسز تبعه سندن برینك
قاصه سنی قیره رق آچه سنی سرقت ایتسه لر بونلرك جمله سنك
محاکمه سی عثمانی محکمه لرنده قانون عثمانی موجبجه اجرا اولنور.
شوقدرکه فرانسز وایتالیالی مظنونلرك قونسولاتو ترجانلری
عهد عتیقه موجبجه اثنای محاکمه ده بولنور.

وبالعکس بری فرانسز بری یونانی اولق اوزره ایکی کشی،
تبعه عثمانیہ دن بریلہ المانیا تبعه سندن برشخصك مشترکاً متصرف
اولدقلى خانه بی یاقسه لرینه محاکمه لری عثمانی محکمه لرنده
اولور.

الحاصل طرفیندن بری عثمانی تبعه سندن بولنور، یعنی كرك
فاعللردن، وكر ك مغدور ومتضرر ومشتكى ومدعى شخصیدن

بری عثمانلی تبعه‌سندن اولور ایسه بوکی جرملرک تحقیقات و محاکماتی عثمانلی ضابطه عدلیه مأمورلریله محکمه‌لرینه عائددر .
 بوکی جرائمده ، پولیس و ضابطه عدلیه مأمورلرینک وظیفه‌سی دیگر جرملرده اولدینی کی یعنی عثمانلی تبعه‌سی آراسنده وقوع بولش برجرم کی تحقیقات اجرا اولنور . تبعه اجنبیه‌دن اولان مظنونلر ایچون قونسولاتویه خبر ویریلور . قونسولاتو مأمورلری ده کلور . تحقیقاتده بولنورلر فقط طوغریدن طوغری‌یه اجرای تحقیقات ایده‌مزلر . یالکز تحقیقاتی کوروب دیکلرلر .

مثلا : بری عثمانلی ، دیکری فرانسز ، برده ایتالیا دولتلری تبعه‌سندن اوچ کشتی فرانسز تبعه‌سندن بریسنک مغازه‌سنی آچوب قاصه‌سنی قیره‌رق پاره‌لری چالوب قاجارلرکن پولیس‌لر طرفندن کوریلوب جمله‌سی دردست ایلدک‌لرینی فرض ایده‌لم .
 پولیس مأمورلری بویله برجرم مشهوده ایفاسی لازمکن معامله‌ی - یعنی مدعی عمومی و مستنطقه خبر ویرمکی - یایمقله برابر دردست ایدیلن اشخاص ایله برابر آچیلان مغازه‌یه یعنی محل جرمه کوتوره‌رک استجوابه باشلانلقدده کرک کندیلرینک و کرک مغازه صاحبنک تبعه اجنبیه‌دن اولدقلرینی سویله به‌رک‌پسپورطلرینی کوستره‌رک حقیقه تبعه اجنبیه‌دن بولندقلری آکلاشینجه پولیس مرکزینه خبر کوندریلوب مغدور ایله مظنونلرک تبعه اجنبیه

ادعا سنده بولند قلربی وقونسولاتورینه خبر ویرلسی لازم کلدیکی بیلدیرر . مرکز دده قونسولاتورله خبر کوندریلور .

ترجمانلر کلیر، فقط ترجمانلر کلنجه یه قدر پولیسلر تحقیقاتده دوام ایدر . تحقیقات واستجوابات هیچ بر سیبله ترک وتأخیر اولنه ماز . اگر اجنبی اولان مظنون علیهلر ترجمان کلینجه افاده ویر مامکده اصرار ایدر لر ایسه دیگر عثمانلی مظنون علیه استجواب اولنور . محل جرمک حالی وبولنان الات وادوات جرمیه نک شکلی ضبط وتحریر اولنور . شاهدلر استجواب ایدیلور . ترجمان کلنجه دیگر مظنونلرده استجواب اولنور لر . فقط ترجمانلر اجرا اولنان تحقیقاته اصلا قاریشمازلر . قاریشماق ایستر لر ایسه غایت نازکانه بر صورتده قاریشماملری واکر بر قصور ویا خطا کوریر لر سه پولیس مدیریته بیلدیروب اورا جه تصحیح ایتدیر ملربنی وایفای وظیفه ده سربست بر اقلربنی کندیلرینه سویلنمیلیدر . ترجمانلر یالکز حاضر بولنور، تحقیقاتی کوروب ایشیدیر . یوقسه بونی بویله یاپک ، شونی شویله یاپمه یک کبی امر واطخارده بولنه مازلر .

تحقیقات ختام بولدقد نصکره تنظیم اولنان ضبط ورقه سنی ترجمانلره امضا ایتملری تکلیف اولنور . امضا ایدر لر سه ایدر لر ایتزلر سه ضبط ورقه سنه امضا ایتدکلری یازیلور . عثمانلی مظنونی توقیف ایدلک اوزره تحت نظارته آلنور . اجنبی مظنونلرده قونسولاتورینه کوندریلیر .

الحاصلی عثمانی تبعه سی ایله اجنبی تبعه سی برابر اولدقلری
 حالده بر جرم مشترک ایقاع ایدرلرسه عثمانی پولیس وضابطه
 عدلیه مأمورلری طرفندن تحقیقات قانونیه تمامیه اجرا ایدیلور.
 وشوقدر که اجنبی مظلونلرک منسوب اولدینی قونسولاتو
 ترجمانلری ده حاضر بولندیریلور . وبوکی تحقیقاتده امتیازات
 اجنبیه فصلانده صاییلان مواددن بری ومثلاً: بر اجنبینک خانه سنه
 کیروب تحریات اجرایی لازمکده ترجمانلرایله برابر کیریلور.
 شوراسنی ده بیان ایدلم که عثمانی واجنبی تبعه لریله مشترکاً
 ایقاع اولنان جرائمده وبرایشک ایچنده عثمانی تبعه سی بولندی
 نه قدر اجنبی اولورسه اولسون وایش نه درجه اجنبیلره تعلق
 ایدرسه ایتسون مطلقاً بر عثمانی ایشی کی عثمانی پولیس وضابطه
 عدلیه مأمورلری قوانین عثمانیه دائره سنده ایقاع وظیفه ایدرلر.
 یالکز مستثنای اوله رق عهد عتیقه موجبجه ترجمانلر حاضر
 بولنور . اصلاً تحقیقاته مأمور ایش کی قاریشه ماز . بو نقطه لره
 فوق العاده دقت ایتلیدر .

بشنجی باب — تطبیقات

بر علمی او قویوب او کر نمک ایکی درلو اولور . بری نظری
 دیکری عملیدر . بر علمک یالکز نظریاتی بیلنورسه او علمک

یاریسی بلکه‌دها آزی اوکره‌نمش اولور. فقط عملیات و تطبیقاتی بیلنورسه او علمک تلی اوکره‌نمش اولور. پولیس وظائفک نظریاتی بیان ایدلدی شمدی تطبیقاتندن بحث اولنه‌جقدر. هر علم ده برده لسان علم یعنی بعض تعبیرات و اصطلاحات وارد. برده کتابت وارد. او علم اولسان و او تعبیرات ایله یازلمزسه اوکره‌نمز. بونک ایچون هر علمک برده یازیلشی وارد. هله پولیس وظائفی کی قانونه تعلق ایدن علملرک کتابتی مهم در. برسطری برسوزی اکسیک ویا برکله‌سی بشقه درلو اولورسه اوشی هیچ یازلامش کی اعتبار ایدیلر. ایشته شمدی بونلردن بحث ایده‌جکزر.

۱ — شکایتنامه‌لر، اخبارنامه‌لر، ضبط ورقه‌لری، راپورلر، تحقیقات ابتدائی، و بوکی اوراقک تنظیم و ترتیبی حقنده قواعد اساسیه و بوکا دائر عملی مثاللر.

یوقاریده‌کی بابلرده دخی بیان اولندیغی اوزره بر جرمک وقوعنه، قوه عدلیه، اخبار و یا شکایت طریقله و یا خود استدعای شخص و یا پولیس و ضابطه عدلیه مأمورلرینک راپورلری ایله واقف اوله‌رق تعقیبات و تحقیقات قانونیه اجراسنه مباشرت اولنور. کرک اخبار و کرک شکایت و کرکسه استدعای شخصی و راپورلر وقوعه کلن بر جرمی خبر ویرمکدن عبارت اولنمسه

کوره مقصدجه هپسی بر ایسه ده ارالرنده قانوناً فرقلری وارد در .
بو فرقلر برر برر کور یله جکدر .

اخبارنامه — بشقه لری حقنده وقوعه کلن بر جرمی
بیلدیره ن ور قیه « اخبارنامه » و بیلدیره ن شخسه ده « مخبر »
دینلور . اخبارنامه لر ایکی نوعدر . بری رسمی دیکری غیر
رسمیدر . اصول محاکمات جزائییه قانوننک یکر می آلتنجی
ماده سی موجبجه دولت مأمورلری طرفندن ویریلان اخبار
نامه لر رسمی، یکر می یدنجی ماده موجبجه افراد اهالی طرفندن
ویریلن اخبارنامه لر غیر رسمی در . اخبارنامه لرده ممکن اولدینی
قدر جرمک نوع واسبانی و محل و زمان وقوعنی و دلائل و اماراتی
و شاهدلرک و مظنون علیهم اسم و شهرت و سنلرینی و صنعت
و محل اقامتلرینی یا زمق لازمدر . اخبارنامه لر، مخبرلری و یا وکیل
مخصوصلری و طلب اولدینی تقدیرده مدعی عمومی و یا پولیس
و یا ژاندارمه و سائره کبی ضابطه مأمورلری طرفندن یازیلور .
اخبارنامه لرک هر صحیفه سی تنظیم ایدنلر ایله مخبرلر طرفندن
امضا ایدلمی و مخبر امضا ایله مک بیلمدیکی و یا خود ایتک
ایسته مدیکی حالد اخبارنامه یه شرح ویرلمک اقتضا ایدر . وکیل
طرفندن بر اخبار ویرلدکده وکالتنامه سی مربوط اولمیدر .
مع مافیه قانوناً لازم کلن شو شرائط بولنمازسه بونلر اخبارنامه نک
تفرعاتندن اولدینی جهتله، او یله بر اخبارنامه حکمسز عداولنه ماز .

پولیس و ضابطه مأمور لری طرفندن تنظیم ایدیه جک اخبار نامه لرده
ممکن اولدینی قدر بوشر طوره رعایت اولماید. و اهالی طرفندن
ویریلن بر اخبارده جرمک زمان وقوعی یازلما مشدر دیره رک
او اخبار نامه ییده قبول ایتمکدن چکینما میدر. بویله بر اخبار
کتیرلده کده مخبره امضا ایتدیریلوب قبول اولماید.

اخبار نامه لره مثال :

مأمورین دولت طرفندن ویریلن رسمی بر اخبار نامه نمونه سی
داود پاشا پولیس مأمورلغنه

شهر حالک یکر می دردنجی کونی صبا حاین ساعت اون
ایکی ده قشله یه کیدرکن داود پاشا جاده سنده کائن وقف بوستانک
دیواری کنارنده کندیلرینی طانمیدینم فقط شخصلرینی کورسه م
تعین ایده جکم طلومبه جی قیافتلی ایکی شخصک بر برلریله غوغا
ایتدکلرینی و بونلردن بیقسز اولان شخصک بر قما حیقاره رق
دیکرینک اوزرینه هجوم ایتش ایسه ده طوتک دیه باغر مقلغم
اوزرینه دیکر شخص اور مقسزین بنی کوروب هر ایکسی بردن
قاجدقلری و صباح ایرکن اولمق مناسبتیه اورالرده اهالیدن
کیمسه اولمیدینی ویا لکز بوستانک قارشو سنده کی یکر می بش

۱۳
مأمورین دولت طرفندن تنظیم ایدیه جک اخبار نامه لرده
ممکن اولدینی قدر بوشر طوره رعایت اولماید. و اهالی طرفندن
ویریلن بر اخبارده جرمک زمان وقوعی یازلما مشدر دیره رک
او اخبار نامه ییده قبول ایتمکدن چکینما میدر. بویله بر اخبار
کتیرلده کده مخبره امضا ایتدیریلوب قبول اولماید.

نومرولی خانه دن ایکی خرسستیان قادینی پنجره دن کوردکلری
جهتله متجاسر لرینک دردستی ایچون کیفیتی اخبار ایدرم .

۲۴ مارت سنه ۳۲۶ داود پاشا قشله سنده آرامساز سواری

اوچنچی الایک برنجی بلوک یوز باشی

مهر ویا امضا

افراد اهالی طرفندن ویریلان غیر رسمی اخبار نامه نمونه سی

بوکون قومشوم یاغ تجاری واسیل افندی ایله کوریشیرکن
چراغی طاطاولالی اولوب یکریمی بش یاشلرنده بولنان اپوستول
تام شخص بش لیرا وکسور اچقه سنی چاله رق اوچ کوندنبری
مغازه سنه کلدیکنی و آراشمش ایسه ده کلیه جکنی خبر کوندردیکنی
واسیل افندی بکاسویله مسی اوزرینه پولیسه کیدوب خبر ویرمسی
بیان ایتمش ایسه مده . «الله دن بولسون» دیه رک خبر ویرمیه جکنی
سویلدی . بوکبی خرسنزلر جزاسنزلر قالدورسه جسارتلری
آرته جغندن بالتصادف مطلع اولدیغم شو جرمی امین اوکی پولیس
مرکزینه عرض و اخبار ایلرم .

۳ مارت سنه ۳۲۶ آصمه آلتنده «۲۸» نومرولی

مغازه ده صابون تجاری

مهر ویا امضا

طلب وقوعده پولیس وضابطہ عدلیہ مأمورلری
طرفدن تنظیم اولنان اخبارنامه نمونه سی

اخبارنامه

بیك اوچیوز یکر می بش سنه سی شباطنك یکر می برنجی
جمعه ایرتسی کونی بك اوغانده مسك سوقاغانده یکر می طقوز
نومرولی خانه ده ساکن بویاجی اصنافدن پترونك زوجهمی
اللی یاشلرنده ماریا نام خاتون بك اوغلی پولیس مرکزینہ کلہ رك
بروجه آتی اخباراتده بولنشدرد . شویله که : ساکن اولدیغ
خانه مك برنجی قاتنده مستأجراً اقامت ایدن دمیرجی بغوصك
خدمتجیسی یکر می یاشنده طوطی نام قیز چکن سنه طوغوردینی
برچوجنی غلطده بیوك خندقده اقامت ایدن فوتیقه نام قادینه
براقه رق او وقتدنبری بو چوجق حقنده بر شی ایشیدلماش
اولدینی حالدہ دون اقشام کیجه ساعت ایکی راده لرندہ مرقوم
بغوصك اقامت ایلدیکی دائرہ نك مطبخه ناظر اولان یتاق
اوطه مك پنجره سی اوکنده بولندیغ صرہ ده بر خاتون خدمتجی
طوطی دن چوجفك اولدیلمسی ایچون وعد اولنان پاره نی
ایستہ دیکنی و ویرمدیکی صورتده حکومتہ خبر ویره جکنی
بیان ایتدیکنی و خدمتجی ده آی یاشنده کلدیکنده پاره نك هپسینی
ویره جکنی بیان ایله کندیسنی الویرمامسی ایچون بر چوق

يالوارديغنى ايشتديكمده همان يواشجه مرد يوندن اينوب قيونك
ياننده بکله ين مز بوره خاتون کيدرکن باقديغمده فوتيقه قادين
اولديغنى طانيدیغمی عرض و اخبار ایلوم .

۲۱ شباط سنه ۳۲۵ مسک سوقاغنده «۲۹» نومرولى خانه ده
سا کن بویاجی پترونگ زوجه سی
مهر و یا امضا

اشبواخبار نامه مز بوره ماریه یه او قوندقه افاده سنه موافق
اولدیغنى سویله مسیله امضا ایتسی تکلیف اولمش و مز بوره دخی
مهرله مشدر .

۲۱ شباط سنه ۳۲۵ بک اوغلی مرکز قومیسری
امضا

شکایتنامه لر :

ایقاع اولتان بر جرمدن طولای، مغدور اولانلر طرفندن
شکایتی حاوی ویریلان ورقه لره، «شکایتنامه» و ویره ن شخصه ده
«مشکی» دینور .

بناءً علیه بر کیمسه دیگری طرفندن شخصه ، مالنه ،
ناموسنه قارشى بر جرم بر تجاوز وقوع بولدیغی بر کونا ضرر
وزیان و حقوق شخصیه و تضمینات ادعا ایتمکسزین - قوه

عدلیه به ، وپولیس ویا سائر ضابطه عدلیه مأمورلرینه بیان ایتسنه شکایت دینلور . ارکک وقادین هر قاج یاشنده اولورسه اولسون ویرلی ویا اجنبی بولنورسه بولونسون هر کس عرض شکایت ایده بیلور .

اخبار نامه لرده اولدینی کبی ، شکایتنامه لرده دخی آی وسنه تاریخلری ومظنون علیک اسم وشهرت وصنعت ومحل اقامتی وقاج یاشنده اولدینی وجرمک نوع واسبابی وزمان ومکان وقوعی یازلق وپول یاشدیرلق ومهر ویا امضا ایدمک لازمدر . وکیل طرفندن ویریلورسه وکالتنامه ده ربط ایدمش بولنق شرطدر .

۱ — مشتکی طرفندن ویریلان شکایتنامه نمونه سی :

ایاصوفیه پولیس مرکز مأمورلغنه

سلطان احمدده قباصقال محله سنده کائن یکرمی نومرولی خانه ده ساکن اولوب چارشوی کبیرده مغازه سی بولنان یاغلقچی اصنافندن نوری افندی بوکون مغازه سنده بلا سبب عاجزلرینی ضرب وباشمدن جرح ایتمش اولدیغندن مومی الیهک جلیله حقنده تحقیقات قانونیه اجراسنی طلب واستدعا ایلرم .

۲۰ مارت سنه ۳۲۶ چارشوی کبیرده « ۲۹ » نومرولی

دکانده اشجی

پول

مهر ویا امضا

۲ — استدعای شخصی :

ایقاع اولسان برجرمدن طولایی متضرر ومغدور اولان شخصك هم جرمی خبر ویرمك وهمده ضرر وزیان وحقوق شخصیه وتضمنیات دعواسی ایتك ایچون ویردیکی ورقهیه «استدعای شخصی» ویا «حقوق شخصیه عرضحالی» وویرهن کیمسهیاده «مدعی شخصی» دینلور.

استدعای شخصیلر عین شکایتنامه لرده کی شرطلر کی یازیلوب فضلله اوله رق ضرر وزیانك ده نهدن ویا قاج غروشدن عبارت اولدیغی بیان ایدلمکله برابر بوضررك ده اوده نوب تضمین ایتد- یرلسی طلب ودعوی اولنمقده شرطدر.

۳ — مدعی شخصی طرفندن ویریلان استدعای شخصی نمونه سی :

فاتح مرکز مأمورلغنه

سلطان سلیم جاده سنده ۴۸ نومرولی دکانده ساکن بقال اصنافندن عمر اغا دونکی کون مذکور جاده ده کائن خانه مك قپوسنه کله رك عاجزلرندن مطلوبی اولان سکزیوز غروش اله جغنی ایسته مسیله برهفته صکره کلمسنی بیان ایتمککم اوزرینه حدت ایدرك بتاجقی وطولاندیریجی تعبیرلریله اطاله لسانده بولندقدن بشقه النده بولنان زنجیرلی اناختارله ده باشمدن ضرب

و جرح ایتش اولدیغندن و بو حال قوشومز توتونجی آوادیس
ایله عسکری ملازملرندن خیری افندیلر کورمش اولدقلرندن
مرقوم عمر اغا حقنده حکم قانونک اجراسیله برابر بوندن
طولانی اوچ کون خسته اوله رق ایشمه دوام ایده مامش بولندیغ
جهتله محروم قالدیغ تجارتیه مقابل یوز اللی واجرت تداوی
اوله رق اللی که جمعاً ایکی یوز غروش ضرر و زیانمک تضمین
ایتدیلمسنى و بالتحصیل طرفه اعطا بیورلمسنى طلب و دعوی
ایلرم .

۲۸ مارت سنه ۳۲۶ فاتحده ترلکچی چارشو سنده ۳۵ نومرولی

دکانده ترلکچی اصنافندن

بول؛ مهر و یا امضا

راپورلر :

برجرمه ویا برتحقیقاته عائد اوله رق پولیس مأمورلرینک
ما فوق و آمرلرینه ویردکلری ورقه لره دینلور . بر پولیس
مأموری ایفای وظیفه حالنده ویا سائر برزمانده بر جرملک
وقوع بولندیغی آمر ویا موقعلرینه بیلدیرمک مجبوری اولدیغندن
بویله بر جرم وقوعنده ویا مأمور ایدلیدیکی برتحقیقاتک خلاصه
سنی بر راپور تنظیمیه بیان ایدر . راپورلردخی اخبار و شکایتنا
مه لرده کی شرائط قانونیه دائره سنده اوله رق تنظیم اولنور . طبیعی
رسمی اولدیغی ایچون پول ایسته مز .

۴— بر پولیس مأموری طرفدن تنظیم اولتان راپور لر نمونه سی :

غلطه پولیس قومیسر لکنه

بوکون ساعت درتده تراموای جاده سنده کی درت یول
آغزنده نقطه ده بولندیغ ائاده طوپخانه طرفدن کلوب کوپری یه
کیدن آلتنجی دائره ده مقید « ۹۶ » نومرولی فایطون ارا به سی
نظامندن زیاده قوشدیره رق کیتمکده ایکن اورادن کچن یوکللی
بر حاله چار به رق حمالی یره دوشور مشدر . همان حالک یانسه
کیده رک بریرینک یاره لنوب یاره لنمدیکنی سؤال ایتدیکمده هیچ
بریرنده یاره و آغری اولمادیغنی سویله یوب ینه یوکنی آله رق
یولنه کیتمشدر . مذکور ارا به جینک شو حرکتی نظاماته مخالف
اولدیغندن حقنده ایجاب ایدن معاملهنک ایفا بیورلسی ضممنده
اشبور راپور تنظیم و تقدیم قلندی .

۲۷ مارت سنه ۳۲۶ غلطه مرکزنده مستخدم ۱۱۴ نومرولی

پولیس مهر و یا امضا

۵ — دیگر نمونه

لغه قومیسر معاون لکنه

دون کیجه ساعت یدی دوریه سی اوله رق کزدیکمز ائاده
لغده بیوک بوستان قارشوسنده برخانه ده فوق العاده برکورولتی

وشماته اولديغنى ايشتمكلكمز اوزرينه مذكور خانه نك بولندينى
 محله كيتديكمزده محله بكجيسى رمضان اغايه تصادف ايدرك
 نه اولديغنى لى السؤال بالقجى يانقونك خانه سنه برطاقم سر خوشلرك
 طويلانه رق باغروب چاغرمقده اولدقلى آكلاشلدى. مذكور
 خانه نك قابوسى چالنه رق چيقان آنيقه نامنده كى اختيار برخاتونه
 بوقدر باغروب چاغرمه ملرى تنيه ايتمىنى اخطار ايتدكدن صكره
 برمدت سسلرى كسلمش ايسه ده صكره دن ينه باغرمه يه باشلا.
 ملر يله ينه كيدىلوب مزبوره خاتونه مسافر لره تكرار اخطار كيفيت
 ايتمىنى سويله يوب مزبوره ده كيده رك مسافر لره سويلديكنده
 خانه صاحبي بالقجى يانقو اشاغى يه اينه رك كنديسنه لسان مناسب
 ايله بويله، باغرملى جائز اولديغى وصكره مجازات كوره جكلرىنى
 سويله مكلكمز اوزرينه «طورك بقايم سر خوشلرى قانديره بيلير
 ايسه باغرم تام» ديه رك ايجرى يه كيره رك نهايت يارم ساعت
 صكره صوصوب ياتدقلى جهته بالقجى يانقو ايله آنيقه نك
 افاده سنه نظراً مسافر بولنان قوم قپوده بالقجى يوركى وصاوه
 وخرستونك بوحر كترلرى موجب مجازات اولديغدن حقلرنده
 لازم كلن معامله نك ايفاسى ضمننده اشبو راپور مرتظيم وتقديم
 قلندى ۲۹ مارت سنه ۳۲۶

لغه موقعنده مستخدم پوليس لغه موقعنده مستخدم پوليس
 مهر ويا امضا مهر ويا امضا

۶ — دیگر نمونه

غلطه مرکز مأمور لغنه

شهر حالک یکر می دردنجی چهارشنبه کونی صباح ساعت
اون راده لرنده مرکز داخنده دور و تفتیش ایتک اوزره
طولاشدیغ ائنده غلطه کمرکی اوکنده کی جاده دن طوپخانه
طرفه طوغری بر شخصک قوشمقده اولدیغی وارقه سندن
بر دیگرینکده طوتوک « خرسز یانکسیجی » دیه باغرمقده
اولدیغی کوره رک در حال قاقمقده اولان شخصی تعقیب و قلج
علی پاشا جامعی حولیسنده دردست ایدوب او آراق طوتک دیه
باغران شخص دخی کلوب کیفیتی سؤال ایتدیکمده یلکی جیندن
ساعتک مرقوم طرفندن چالیش اولدیغی و کندوسنک
قومیسینو نجی داوید اولوب قوزغنجقده « ۹۷ » نومرولی خانه ده
اقامت ایتدیکنی افاده ایلدی. دردست ایدیلن شخص استجواب
اولدقده غلطه ده واسیلک قهوه خانه سنده بر برلک ایدن اناسطاس
اوغلی یورکی اولدیغی و یکر می آلتی یاشنده بولندیغی و جینده بر
ساعت و ارایسه ده کندی ساعتی اولوب عجله برایشی اولدیغندن
قوشدیغنی بیان ایلدی. مذکور ساعت آنوب مدعی داویده
کوسترلده کندی ساعتی اولدیغی و مرقومک چالیدیغی
آرایجی محمد و جمال باشی حسن و کاتب نوری ایله اثبات

ایده جکئی سویله مش و مرقوم یورکی مرکزہ کتیرلمش اولغله
اشبو راپور تنظیم و تقدیم قلندی .

۲۴ مارت سنہ ۳۲۶
وو یوادی قومیسر معاونی
مهر ویا امضا

تحقیقات ابتدائیه

پولیس و سائر ضابطہ عدلیہ مأمور لر نجہ اجرا ایدیلن
تحقیقات واستجواباتی حاوی اولان اوراقہ « تحقیقات ابتدائیه »
اوراقی دینور .

پولیس دائرہ لرینہ شفاہاً و یریلان خبر و یا خود اعطا اولنان
اخبارنامہ ، شکایتنامہ واستدعای شخصی، و راپور لر اوزرینہ
پولیس مأمور و قومیسر لری طرفندن تحقیقات اجرا اولنور .
اولا مخبر و مشتکی ویا مدعی شخصی صکرہ مظنون علیہ
دها صکرہ ده شاهد لر استجواب اولنور .

وہر استجواب اولنان شخصہ افادہ سی اوقونوب امضا
ایتدیریلور . امضا ایتمک بیلمز و یا خود ایستہ مز سہ امضا بیلیمہ یور .
و یا امضا ایتمہ دی دیہ رک شرح و یریلوب استجوابی یاپان و شرحی
و یرن مأمور طرفندن امضا ایدیلور . استجواب لر بتدکدن
صکرہ نتیجہ و خلاصہ تحقیقاتی حاوی بر فذلکہ یاپیلور امضا

ایدیلور. ایقاع اولنان فعل بر جرم قانونی ایسه وثابت اولیورسه اخبار نامه وشکایتنامه استدعا یه ربط اولنه رق مدعیء عمومی که تودیع اولنور. اگر فعل جرم دکل ویا خود ثابت اوله میورسه دلیل و اماره سنی وشاهد و اثباتی آرایوب بولد قد نصکره اوراقی مدعیء عمومی یه تودیع ایتملیدر .

استجواب اولنه حق مدعی ویا شاهد خبر عادی ایله کلورسه استجواب ایتملیدر. کلمزه پولیس ایله جبراً قره غوله کتیرلما ملی در. « شاهد فلان دعوت اولنه رق کلمدیکی جهته افاده سی ضبط ایدیه مامشدر » دیه رک شرح ویرلملیدر .

وکذا قباحت وخفیف جنحه دن طولایی مکنون علیه اولان اشخاصیده قره غوله کلمک ایچون جبر ایتململیدر . فقط آغیر جنحه اولور ، واقامتکاهی فلان اولمازسه او وقت حال وشانه کوره در دست ایدیه رک قره غوله کتیریلور. واستجواب اولند قد نصکره اوراقیله برابر مدعیء عمومی یه تسلیم اولنور . ویا اقامتکاه تعیین ایتدیریلوب صالیویریلور .

تحقیقات ابتدائیه ، جنایت نوعندن اولمایان افعاله جنحه وقباحتلرده اجرا اولنور .

فعل جنایت ویا خود جرم مشهود اولورسه ایفا اولنه حق معامله یوقاریکی بحثلرده بیان ایدلمش ایدی. تحقیقات ابتدائیه ، یاسؤال وجوابی اوله رق تنظیم ایدیلور ویا خود ضبطنامه اصولیه

هر كسك افاده سنك لزوملى وروحلى جهتى يازلق صورتيله
تنظيم اولنور . اك موافقى ضبطنامه شكلنده افاده لرك مختصر
ومفيد اوله رق طويل يازلمسى اصوليدر .

تحقيقات ابتدائيه دخی اخبار وشکایتنامه لرك تنظيمنده کي
شرطلر لازم اولديغی کي مظنون اولان شخصك سابقه لی اولوب
اولديغی واقعاتکاهی بولنوب بولمديغی وبکار ویا متاهل اولديغی
دخی سؤال اولنوب يازلميلدر . چونکه بونلر اوشخصی توقیف
ایتمک ویا ایتمک ایچون بیلنمسی لازمکلن شیلردندر . برده
افاده لرمطلقا استجواب اولنان شخصك سویلديکی کي يازلميلدر .
يازان مأمور کندی فکر وحیاتی اصلا قاریشدير مامليدر .
صکره اوراقك عکسی ظهور ایتمکله بونی يازان مأمورلر محجوب
اولديغی کي بیوک جزاسیده واردر . مأمورلر افاده ویره نه
تکرار تکرار سؤال ایتملی ومسئله یی ای آکلادقدنصکره يازمغه
باشلاميلدر . حدت وانفعال وقورقو حسیله بعض کیمسه لر افاده سنی
طویلايه ماز . پراکنده برصورتده سویلر . مأمورلر آکلادمن
يازار ایسه ویا خود مقصدی شودردیه کنديلکندن عباره ترتیب
ایدرسه اوتحقيقات یا کلش اولور . برده ممکن اولديغی قدر
افاده لری بر مأمور سؤال دیگر مأمور يازوب هر ایکسی ده
امضا ایلدکن صکره افاده صاحبنه امضا ویا مهرلته ليدر که
صکره دن او افاده یی انکاره محل قالماسون . برده اوراقك باش

طرفه نه حقنده ونه کي اوراق اوزرينه تحقيقات اجرا ايدلديکني
ذکر ايتلیدر . بردنبره فلانك اخذ اولنان افاده سیدر دیهرک
ایشه کیریشاملیدر .

۷ — پولیس مأمورلری طرفندن تنظیم اولنان تحقيقات
ابتدائیة نمونه سی :

تحقيقات ابتدائیة

برنجی صحیفه :

شهر حال رومینک یکر می دردنجی چهارشنبه کونی غلطه
کمرکی اوکنده قومیسوونجی داویدک بر عدد جیب ساعتی چالهرق
قاچارکن دردست ایدیلوب وویواده قومیسر معاونی حسین
افندینک ۲۴ مارت سنه ۳۲۶ تاریخلو برقطعه راپوریله مرکز
تسلیم اولنان اناستاس اوغلی یورکی حقنده اجرا قلنان تحقيقات
ابتدائیة بی حاوی ضبط ورقه سیندر .

۲۵ ربیع الاول سنه ۳۲۸ ۲۴ مارت سنه ۳۲۶

مشتکی : قوزغنجقده « ۹۷ » نومرولی خانه ده اقامت
ایدوب غلطه ده قومیسوونجیلق ایدن تبعه دولت عثمانیه دن قرق
سکزیاشنده ایساق اوغلی داوید افندینک شکایتی نه اولدینی
وکیمدن ایدوکی سؤال اولندقدہ : یارم ساعت اول غلطه کمرکی

قبوسنده كمرک آرایجیسی محمد افندی ایله کوریشیرایکن بر شخص
 کوکسنه طوغری چارپه رق کچدیکنی وکیم اولدیغنه باقدیغنده
 شخص مذکور پانطالونك جینه برشی قویدیغنی کورمسی
 اوزرینه خاطرینه کله رك ساعتنه باقدقه ساعتی جینده اولدیغنی
 وقوردونی قویش بولندیغنی کوره رك همان مر قومك آرقه سندن
 طوتك ديه باغردیغنی وبر پولیس افندی مر قومی جامع حولیسنده
 دردست ایلدیکنده لدی التحریر مر قومك اوزرندن چیقسان
 ساعت کندی ساعتی اولدیغنی وكرك ساعتك کنديسنك اولدیغنی
 وكرك شخص مر قومك چارپوب کچدیکنی آرایجی محمد و جمال
 باشی حسن وکتاب نوری افندیلرله اثبات ایده جکنی وشخص
 مر قوم طانیدینی وکوردیکی بر آدم اولدیغنی و مر قوم دن دعواسی
 اولدیغنی بیان ایدوب افاده سی کنديسنه او قونوب امضا ایده جکنی
 سویله مسیله امضا ایتدیرلدی . ۲۴ مارت سنه ۳۲۶

قومیسو نیجی داوید غلطه مرکز مقیدی پولیس غلطه مرکز
 امضا امضا قومیسر معاونی
 امضا

مظنون علیه : غلطه ده یوکسك قالدی رمدہ پراشکوینك
 آپارتماننده مستأجراً اقامت ایدوب غلطه ده آرقادی سواقانده
 قهوه جی واسیلک دکاننده بربرك ایتدیکنی ویکرمی آلتی یاشنده

بکار و سابقه سز بولنديغنى بيان ايدن اناستاس اوغلى يوركى يه
 مشتكى نك دعواسى آكلاديله رق نهديه جكى سؤال اولندقدە :
 مذكور ساعت كندى ساعتى اولديغنى ويكى جامعه ايكى
 طائيدىغنى اياقده كزر برقولتو قچيدن ساتون آلدیغنى وچالديغنى
 وعجله ايشى اولديغندن قوشديغنى ومشتكى نك ساعتى چالمنش ايسه
 قوشديغندن طولايى كنديسندن شبهه ايتديكى واصللا بويله
 بر خرسزلقده شمدي يه قدر بولنماديغنى سويله مكله افاده سى
 او قونوب امضا ايتسى تكليف اولندقدە امضا بيلور سه ده نه يازلديغنى
 او قويه مديغندن امضا ايدە ميه جكنى سويلدى . ۲۴ مارت سنه ۳۲۶

مظنون عليه يوركى	مقيد پوليس	قوميسر معاوونى
امضادان استنكاف ايتشد	امضا	امضا

مقيد پوليس امضا

شاهد : غلطه كمركى قپوسنده آرايچيلىق ايدن اوتوز بش
 ياشنده طربزونلى على اوغلى محمد افندي نك مشاهداتى استفسار
 اولندقدە : قوميسر ونجى داويدايله كوريشيركن - حاضر بولنان
 مظنون عليه يوركى يى اشارت ايدرك - بو شيخصك داويدە
 چارپديغنى متعاقب داويد بر كره الينى يلكنيك جينه صوقه رق
 واى ساعتم ديه مرقومك آرقه سندن طوتك خرسز يانكسيجى
 ديه رك باغيروب قوشديغنى - وساعت ارانه اولندقدە - وبوساعتى

هر زمان داویده کوردیکی و داویدک مالی بولندیغنی بیان ایله
افاده سی او قونوب امضا ایده جکنی سویله مسیله امضا ایتدیرلدی.

۲۴ مارت سنه ۳۲۶

غلطه کمرکی آرایجیلرندن طربزونلی محمد مقید پولیس قومیسر
امضا و مهر امضا معاونا امضا

دیگر شاهد : غلطه کمرکی جمال باشیسی بتاسلی قرق بش
باشنده ولی اوغلی حسین اغانک مشهوداتی صورلدقده : قومیسونجی
داوید اقدی آرایجی محمد اقدی ایله کوریشیرلرکن یانلرینه کلدیکی
و داویده خاطرنی صوروب کوریشمکده ایکن حاملردن بری
کلوب کندیسنه برشی سویلدیکندن باشنی او طرفه چووروب
قونوشیرایکن طوتک دیه باغریلسی اوزرینه باقدیغنده قومیسونجی
داویدک قوشدیغنی ونه اولدی دیه محمد اقدی یه صوردیغنده
غالبا داوید ساعتی چارپدیردی. دیدیکی و حاضر بولنان مظنون
علیمی کوستره رک بوشخصی یدی سکز آی اول ینه بورادن
پولیسار طوتوب کوتورمشار ایسه ده نیچون اولدیغنی در خاطر
ایده مدیکی و پولیس دفترینه باقیلورسه قیدی اوله جغنی وهر
زمان بورالرده کوریرمز کوزی اوکندن غائب اولمقده بولندیغنی
وبشقه معلوماتی اولدیغنی سویله مسیله افاده سی او قونوب امضا
ایده جکنی بالیان تمهیر ایلدی . ۲۶ مارت سنه ۳۲۶

غلطه کمرک جمال باشیسی حسن مقید پولیس قومیسر معاونا
مهر امضا امضا

دیگر شاهد : غلطه کمرکنده یازیچی آستانه‌لی یکرمی سکر
 یاشنده عبدالله افندی اوغلی نوری افندی برای شهادت قره‌قوله
 کلیسی ایچون خبر کوندرلش ایسه‌ده پک‌زیاده ایشی اولدیغدن
 شمعی کله‌میوب بروقت مناسبده کله‌جکنی بیان ایتش اولدینی
 شرح ویریلور . مقید پولیس قومیسر معاوی
 ۲۴ مارت سنه ۳۲۶ امضا امضا

« خلاصه تحقیقات و یا فذلکه » دینلیدر

اشبو تحقیقات واستجوابدن مظنون علیه سابقه‌لی اناستاس
 اوغلی یورکی مشکی قومیسونجی داوید افدینک بر عددالتون
 قابلامه ساعتی چالهرق قاچارکن قومیسر معاوی حسن افندی
 طرفندن دردست ایدلش و مرقومک بوحرکتی شاهد محمد
 وحسین افندیلر طرفندن کورلش اولدینی آ کلاشلمش و قیوداته
 مراجعت اولندقدمه مرقوم یورکی ۲۷ حزیران سنه ۳۲۶ تاریخنده
 نوری اغا نامنده بریسنک پاره چانطه‌سنی اخذ ایدرکن دردست
 ایدیلوب تنظیم اولسان اوراق ایله برابر بک اوغلی مدعی
 عمومیلکنه تسلیم ایدلش بولمقله مرقوم یورکی به تعین ایتدیریلن
 اقامتگاه سندی و اوراق سائر سیله برابر ایفای مقتضاسی ضماننده
 غلطه مرکز مأمورلغنه تقدیم قلندی .

۲۴ مارت سنه ۳۲۶ مقید پولیس غلطه قومیسر معاوی
 امضا امضا

ضبط ورقه لری :

وقوع بولان جرائم حقنده اجرا قلنان تحقیقات و معاملات
دائر مدعی عمومی ویا مستنطق ویا خود سائر ضابطه عدلیه
مأمورلری طرفندن یازیلان اوراقه « ضبط ورقه سی » دینور.
ضبط ورقه لری وقوعه کلن برجرمی میدان چیقاره جنی
وجرمی اثبات ایلیه جکی جهتله اوراق رسمیه وعدلیه آراسنده
پک بیوک براهیتی واردر. بونک ایچون ضبط ورقه لری قانونک
تعریفی دائره سنده تنظیم اولنق لازمدر. هله جنایاتده ویا خصوص
جرم مشهودده تحقیقاتک اساسی، روحی ضبط ورقه لری در.
یوکی خصوصاتده ضبط ورقه لری اولماز ویا اولوبده نقصان
وغیر منتظم بولنورسه قوجه برجنایت غائب اولوب آثار جرم
محو اولمش اولور. بناءً علیه ضبط ورقه لری، حقوق عمومیه
وانتظام عامیه تعلق ایدن اوراق رسمیه دندر. بونلرنده تنظیمنده
پک زیاده دقت وواقع حاله موافق اولسنه غیرت ایدملی وشرائط
قانونیه سنی تماماً وحرفیاً ایفا ایله ملیدر. ضبط ورقه لرنده
وجودی قانوناً لازم کلن شرائط شونلردر.

- ۱ — جرمک نوعی واسبابی ودرجه سی ۲ — جرمک
- زمان و مکان وقوعی ۳ — مظنون علیک کرک لهنده و کرک
- علیهنده اولان دلائل و امارات ۴ — مظنون علیه و مشتکی
- وشاهد لری اسم و شهرت و سن و صنعت و محل اقامت لری ۵ —

جرم مشهوده ذات وقعه یعنی وقعه و جنایتك نه دن عبارت اولدیغنی ۶ — جرم مشهودك صورت وقوعنی یعنی جرم ناصل وقوعه كمش ونه سبیدن ظهور ایتش بولندیغنی ۷ — جرمك موقعك احوالی یعنی موقع جرم نره سیدر و ناصلدر ونه شكده در جنازه نه حالده بولمشددر بورالینی ۸ — ضبط ورقه سی اكر قباحت دعوالری حقنده ایسه كه بعض احوالده قباحت دعوا لرنده ده ضبط ورقه سی لازمدر . هر حالده ایقاع اولنان ضرر وزیانك مقداری، مفصلاً ذكر و بیان ایدلك لازمدر .

ایشته بوشرائط دائره سنده عائد اولدیغنی مأمورلر طرفندن تنظیم اولنان ضبط ورقه لری خلاقی ، یعنی مندرجاتك عكسی اثبات اولنجه یه قدر معتبردر . حاکمرا اویله منتظم ضبط ورقه لریله حکم ایدرلر .

ضبط ورقه لرنده حك وسیلتی اولیه جق ویا كلش عبارهلر اوقونه جق صورتده چیزیلوب یانته یازیله جق وهر صحیفه سی مأمورلر طرفندن امضا ایدیله جكددر و الت طرفی دخی موقع جرمده وائناى تحقیقات وكشفده حاضر بولنانلره امضا ایتدیریله جكددر .

۸ — ضبط ورقه سی نمونه سی

ضبط ورقه سی

برنجی صحیفه :

اشبو بیك اوچیوز یكرمی بش سنه سی كانون ثانیسك

اون دردنجی بازار ايرتسی کونی صباحلین طوپخانده قره باش
 محله سنده چنار سوقاغنده یوز یکرمی طقوز نومرولی خانه ده
 ساکن قباطاشده بربر علی اوسته مرکزه کلرک محله مذکورده ده
 واقع خالی بر عرصه یه قضای حاجت ایچون کیردیکنده عرصه نك
 نهایتنده بر انسان نعشی کوردیکنی بیان و اخبار ایتسیله
 وقوعاتن بك اوغلی پولیس مدیر لکیله مدعی عمومیلکنه معلومات
 ویرلمشده بر موجب قاتون ورودلرینه انتظار اولمیه رق پولیس
 مأمورلرندن شا کر و شکری افندیلر ایله مخبر علی اوسته برابر
 اولدینی حالده در حال محل وقعه یه عزیمت اولندی .

محل جرمه وصولزده اوراده حاضر بولنانلرک بریره
 صاوشاملری امر و تنبیه اولنه رق جنازه نك بولندینی محک تفتیش
 و معاینه سنه ابتدار ایدلدی. محل مذکور ذکر اولنان قره باش
 محله سندن طوپخانه یه اینه جک جاده نك چیقماز سوقاق دینلن
 سوقاغنده و طوپخانه تحریرات قلمی کتبه سندن مصطفی افدینک
 خانه سی یاننده خالی بر عرصه اولوب بونک نهایتنده و صاغ
 جهتنده یورغانچی اصنافدن عبده افدینک بغچه سی دیواری
 یاننده آلت جارحه ایله صول بوکرندن اورلمش بر انسان نعشی
 کورولدی. نعش مذکور ارقه سی اوستی یاتیرلمش واللری یانه
 اوزادلمش اولوب ایکی آدیم مسافه ده بر فس و بر قانلی مندل
 و درت بش مترو اوزاقده بوش برپاره کیسه سی ویرلرده قان

طامله لری وایکی آیاق ایزلری کوریلوب بری طولومباحی یمنیسی،
دیگری اوکجه لی بو طین ایزلری اولدینی اکلشدی .

مذکور عرصه جزئی عارضه لی اولق حسیله نعلک
بولندینی محل اورایه کیرلدکجه کورولمز بر حالد ایدی مقتول
اولان شخص تخمیناً اوتوز یاشلرنده ضعیف واورته بویلی
اولوب صاچلری سیاه وباشنک اورتسی طراش و آلی آچیق
قاشلری سیاه واورونجه صاری الا کوزلی ومطروش وچکه سی
یووارلاق وجهی اوزونجه وصولوق اولوب بورننک صاغ طرفده
طیرناق یاره سی بولندینی مشاهده ایدلدی .

شخص مقتولک آرقه سنده سیاه چوقه دن ژاکت و سیاه
چزکیلی بر یلک وقوی لاجیورت بر منتان ایله ایاغنده بیاض
چزکیلی قورشونی بر پانطولون و سیاه قالوش بو طین بولنمده ایدی .
اوزری آراندقه پانطولون ویلکنک جیلری طیشاری یه
چورلمش ویلکنک اوچ دوکمه سی قویمش وپانطولونک جینده
سیاه مقوادن بر توتون طبقه سی وکیرازدن بر سیغاره آغزلنی
بولنمشدر .

مذکور عرصه نك هر طرفی دقتله تحری اولنش سده بشقه
برشی بولنماقله نعلش مذکور عرصه نك دوز بر محله کیریلهرک
محل جرمه کلش اولان بك اوغلی پولیس مدیرلکی اطباسندن
بهرام وعوادیس افندیله ارئه اولنهرق راپورلرینی بی غرضانه

ياپوب مطالعه لرینی وجدان صحیح اوزرینه بیلدیره جکلرینه دائر
طرفزدن تحایف اولندقدن صکره جنازه نك کشف و معاینه سی
اجرا ایتدیرلدی .

نتیجه معاینه ده مقتولك آلت جارحه ایله اشبو معاینه دن
تخمیناً اوج بش ساعت اول جرح ایدیلهرك اثر جرح دن
متأثراً وفات ایتدیکنی مومی الیها طیب افندیلر شفاهاً بیان
ولازم کلن تفصیلاتی حاوی برقطعه راپور تنظیم و اعطا ایده .
جکلرینی درمیان ایلدیلر . وقعه دن معلومات ویره بیله جك اولان
امام و مختار ایله عرصه جوارنده خانه لری بولنانلر جلب
ودعوت اولنه رق بروجه آتی استجواب اولندیلر .

مذکور عرصه یه بتشیک خانه لری بولنان کساندن طوبخانه
چارشوسنده لوله جی اصنافدن حاجی سلیم افندی وقعه دن اصلا
معلوماتی اولمادینی و طوبخانه ده آرپه جی اولان طاهر اغاده صباح
نمازندن صکره بر ایکلکی ایشتمش ایسه ده قومشولرده خسته
اولدینی ظنیله اهمیت ویرمدیکنی و بشقه برکونا معلوماتی اولدیغنی
بیان ایلدیلر . ۱۴ کانون ثانی سنه ۳۲۵

لوله جی سلیم آرپه جی طاهر بولیس مأموری تقسیم مرکز قومیسری
امضا امضا امضا امضا

محلہ امامی حافظ حسن ایله مختار و توتونچی و عطار اولان

واسم افندیلر شخص مقتولک محله لری اهاالیسندن ۴۹ نومرولی
خانه ده ساکن متقاعدین عسکریه دن ملازم ولی اغانک اوغلی
طوپخانه عمله لریندن یوسف کنعان اولدیغنی و خانه سنده پدریه
بروالده سی بولندیغنی ونه دن طولای قتل ایدلیکنی و کندیسنک
خصمی اولوب اولدیغنی بیلمدکیرینی و کندی حالده کزر
کیمسه یه ضرری طوقونماز بر آدم اولدیغنی علاوه درمیان
ایلدیلر .

مقتول مرقوم یوسفک خانه سنه کیدیلهرک پدری ملازم
ولی اغادن بوکیجه مخدوملری یوسفک اوه کلوب کلدیکی سؤال
اولندقده اوکیجه خانه سنه کلدیکی وبوندن طولای پک زیاده
مراقده اولدقلرینی بیان ایتسی اوزرینه اوغلنک کیفیت قتلی
افهام اولنوب اسبابی استفسار ایدلده : هیچ کیمسه دن
شبهه سی اولمادیغنی قاتلک میدانه چیقارلسنی حکومتدن بکله دیکنی
ایان ایلدی .

اجرا قلمان تحقیقات واولنان استجواب ایله جنازه نک بولندیغنی
حاله وطیب مومی الیه مانک افاده لرینه نظراً مقتول یوسفک
سرقت قصدیه جرح و قتل ایدلمش اولدیغنی اکلاشلمش اولغله
تعمیق تحقیقات اولنق اوزره اشبو ضبط ورقه سی تنظیم ایدلمش
وحاضر بولنانلرله برابر امضا وتختیم قلمشدر .

محله مختاری محله امامی بك اوغلی اطماسندن بك اوغلی اطماسندن
امضامهر امضامهر امضا امضا

تقسیم مرکز قومیسری قومشو قومشو پولیس مأموری
امضا امضا امضا امضا

§

۹ — تبعه عثمانیه ایله اجنبی تبعه لری طرفندن مشترکاً ایقاع
ایدیلن سرقت جرمی حقنده ضبط ورقه سی نمونه سیدر:

ضبط ورقه سی

اشبو بیک اوچیوز یکرمی بش سنه سی اغستوسک یکرمی
طقوزنجی صالی کونی صباحلین ایرکندن بالق بازارنده نوشهر
خانی بکجیلرندن شیرولی حیدر مرکزہ کلہ رک خانہ خرسزلر
کیرہ رک قاصه قیردقلری خبر آله رق دوریه مأمورلری پولیس
افندیلر طرفندن دردست اولدقلری ائنادہ ایچلرندن بری
روولور آله رق دیگر بکچی علی بی تهلکلی صورتد جرح
ایلدیکنی وبریسی فرارایدوب دیگر اکیسنک دردست ایدلدکلرینی
خبر ویرمسی اوزرینه کیفیت تلفونله استانبول پولیس مدیرلکنه
ودر سعادت مدعی عمومیلکنه معلومات ویریلہ رک همان پولیس
فرهاد و عمر ورضا افندیلر استصحاب اولنه رق محل جرمه
عزیمت اولندی .

مذکور خان بالق پازاری جاده سنده کائن اولوب خانک
جاده یه ناظر اولان قپوسندن کیریلوب ایجری ده اولانلرک بر
یره تباعد ایتمه ملری امر و تنیه اولاندقن صکره تحقیقات
و کشفیات لازمه اجراسنه ابتدار اولندی .

شویله که اول امرده خانه کیریلنجه مجروح بکچی علی نک
یاتمده اولدینی بکجیلره مخصوص او طیه کیدلده لدی السؤال
مذکور خانک بکجیسی یکر می طقوز یاشلر نده خر بوطلی عبدالله
اوغلی علی اولدینی و خرسزدن برینی طو تبق ایسته دیکی وقت
مرقوم روولورایله کن دیسنی قاصیغندن یاره لیهرق فرارایتدیکنی
بیان ایلدی .

مجروح مرقومک یاره سی آچیلوب باقیدقه اوافق قطعه ده
برروولور قورشونی صاغ باجانک قاصیغنه یقین یرندن کروب
ایجری ده قالدینی کوریلرک تداویء ابتدائیسنک اجراسی ایچون
جوار اجزا خانه لردن بردو قتورایله لازمکلن علاجلرک آلنوب
کلسی ضمننده پولیس فرهاد افندی مأموراً اعزام قلندی .

مذکور خانک حولیسندن یوقاری حیقہ حق مردیوه نک
آلتنده کی کومورلک کی بریرده اولدقلمی آکلاشیلان مظنونلر
دخی مجروحک یاتدینی بکجیلره مخصوص او طیه جلب اولنه رق
اوزرلری تحری ایدلده سلاح وسائر آلت جارحه و جرمیه
اولدینی آکلاشلدی. بونلردن فسلی اوزونجه بویلی اسمراللون

ضعیف الوجود قره صاج و بیق و کوزلی و آرقه سنده سیاه
 و نکهده چوخه دن جاکت و پانطالون اولان شخصدن هویتی
 سؤال اولندقدده ایشسر اولدیغنی و غلطه ده ایزانی کریک قهوه .
 سنده یاتار بولندیغنی اوتوز یاشنده بکار اولوب اسمنک جمال
 اوغلی محمد اولدیغنی و سابقه سی بولمادیغنی و شیطانیه او یارق بویله
 بر حرکتده بولندیغندن طولایی ندامت ایتمکده اولدیغنی
 سویلدی .

دیگری کمی طائفه لرینه مخصوص شایقه لی و اوزونجه بویلی
 بر از شیشمانجه و اسمر قره صاج و بیق و کوزلی و آرقه سنده
 قویو لاجورت چوخه دن جاکت و پانطالون اولان شخصدن
 هویتی صورلدقدده : ایتالانو دیهرک کندیسنک ترجمه بیلدیکنی
 ایما ایله برابر جینندن ده بر پساپورط چیقاروب کوستردی .
 خانک او طه باشیسی بدروس آغایه بر ایتالیانجه بیلن بولنمی
 تکلیف اولندقدده گوشه صرافانی ایدن میشونک بیلدیکنی
 سویله مسیله پولیس عمر افندی واسطه سیله میشون افندیکنک
 بر آز کلسی لزومی کندیسنه تفهیم اولندقدده همان کله رک اسمنک
 میشون پدرینک ایساق اولوب قرق بش یاشنده بالق بازارنده
 گوشه صرافانی ایتدیکنی و بلاطده فنار جاده سنده « ۱۰۸ »
 نومرولو خانه سنده اقامت ایلدیکنی بیان ایتمی اوزرینه طوغری
 ترجمه و ترجمانلق ایده جکنه دائر یمین ایتدیرلکدن صکره

مومی الیه میشون افندی ترجمانغیله ایتالیا تبعه سنهن اولان
 شخصك اسم وهیتی صورلدقده کندیزی ایتالیان اولدیغندن
 قونسولوسندن بشقه سنه افاده ویرمیه جکنی مصرأ بیان ایلوب
 اسمنك نه ایدوکنی بیله سویلهمدی .

مرقوم ایتالیانك ویرمش اولدینی پسپورط میشون افندی به
 ترجمه ایتدیرلدکده یکرمی بش کون مقدم طرانتو ایالتنك
 بزارطه حکومتدن اعطا ایدیوب اوراده عثمانی شهنبدری
 بولنمادیغندن محلی پولیس قومیسرلکندن ویزه ایدلایکنی
 ویونانستانك پیره شهرندن ده ویزه ایدلمش بولندیغنی و پسپورطده کی
 اشکالك مرقوم ایتالیانك اشکالنه موافق اولدینی و پسپورط
 جورجی پسالدو نامه محرر اولدینی آکلاشیله رق شخص
 مرقومه اسمنك جورجی پسالدو اولدینی ترجمان واسطه سیله
 سویلندکده [اوت] جوانی ویروب محل اقامت وصنعتی نه
 اولدیغنه دائر قونسولوسدن بشقه سنه جواب ویره میه جکنی
 درمیان ایلدی .

بونك اوزرینه همان بر مذکره یازیله رق ایتالیا قونسولاتوسنه
 اخبار کیفیت ایدلمسی و سریعأ بر ترجمانك کلمسی پولیس مدیرلکنه
 عرض واشعار اولندی .

بوانثاده عثمانی اجزاخانه سی صاحبی کیغورق افندیله دو قنور
 آرتین افندی ورود ایتلمیله مجروح علینك تداویء ابتدائیه سنی

اجرا ایتملی و یاراسنی صارملری رجا اولنه رق مع الممنونیه
تداوی ایده جکلرینی بالیان مداوات لازمه یه مباشرت ایلدیلر .
مظنون علیه محمد وجورجی برابر آلتوب بربریه کوریشما-
ملریچون آیری آیری اولدقلری حالد خانک مر دیوه نسدن
یوقاری یه چیققدده آچیق اولدینی کوریلان اوطه نك نومروسنه
باققدده سکر نومرولی اولدینی کوریلوب سؤال ایدلدکده چوخه
اوزرینه تجارت یاپار قومیسو نجی شاملی حاجی راشد افندینک
اولدینی و اوچ سنه دنبرو مذکور اوطه ده اوطوردیغنی سویلدی .
مذکور اوطه تخمیناً بش متره مربعه و ایکی دمیر پارمقلقلی
نجره و بر دمیر قبولی اولوب ایچریسنه کیرلدکده بریازی خانه بر
قاج صندالیه رقولتوق و نجره لره قارشی کوشه ده ویانه فابریقه لری
معمولاتدن تخمیناً بر متره عرضنده ایکی متره طولنده اولدجه
یکی و قالین برقاصه نك قپوسی آچیق اوک طرفنده یره بر چوق
کاغدلر دوشمش اولدینی کورولدی یازی ماصه سنک اوستنده
یاریسنه قدر یانمش بر موم ، آلتلری یاغلا یوب سس چیقمامسی
ایچون قوللانیلان بر اوافق شیشه زیتون یاغی و یاغلی بزلر بر اوافق
چکیچ ایکی چلیک اوزون و اینجه تورپی بر مقاب بر دیگر اوافق
مقاب ایکی اوزون بری دها قیصه او جلری بیلنمش چلیک
چیوی و یرده چوالدن بر اوافق کیسه وینه یرده قپویه طوغری
ژاکت اولدینی و نجره لردن صاغ طرفنده بولنان نجره نك دمیر

پارمقانی یرندن چیقارلمش و آلت طرفی بر دکانک طامی اولدینی
مشاهده ایدلدی .

مذکور سیاه قماش اوزرینه ایجه بیاض چیزکیلی ژاكت
یردن النهرق مطنون علیه محمدہ کندی ژاكتلری آرقہ لرنده
اولدیغندن بو ژاكت کیمک اولدینی صورلدقده ارقداشلری
یونانی قوسطی نک اولدیغنی و کندیسى فرار ایتدیکنی و بکچی
علی بی ده مرقومک یارالدیغنی سویلدی .

مذکور ژاكتک جیبلرینه باقلدقده برقطعه یونان پسایورطی
ظهور ایدوب تاریخندن اوچ آی اول پیره عثمانلی شهنشدرلکندن
ویزه ایدلمش اولدینی و کریاقو اوغلی قوسطی نامنه محرربولندیغنی
واشکالی ده قیصه بویلی اسمرجه سیاه صاج و بیق و صقاللی اولدینی
ویوزینک صول طرفنده بیوک برسیاه بن بولندیغنی اکلاشلمسی
اوزرینه مطنون علیه محمددن بو اشکالک قوسطی نک شکلنه
بکزه یوب بکزه مدیکی صورلدقده کندیسنه بکزه دیکی و شمعی
آرانه حق اولورسه غلطده خندکده شیرالی اوستولک خانه سنده
ویاخود یوکسک قالدرمده آنیقه نک آپارتماننده بولنه بیله جکنی
درمیان ایلدی .

مطنونیتی آکلاشیلان یونانی قوسطی نک هویت واشکالی
یازیلهرق همان دردستی ایچون بک اوغلی بولیس مدیرلکنه بر
قطعه مذکره یازلدی .

ایقاع ایلدکلری سرقتدن طولای مظنون علیه محمد استجواب
اولندقدده : اوتهدنبری یونانی قسطی بی میخانه لرده کوره رک
احباب اولدق بوندن اوچ کون اول اقشام اوستی ازمیرلی
قوسطی نك میخانه سنده اوطور مقده ایکن قوسطی کله رک بکا
« محمد کلپور برایش وار . برخاندن ایکی یوز اللی لیرا قدر پاره
آله جغز ، بوایتالیان قاصه قیرمقده و بوکی ایشلرده مهارت لیدر ،
پشین بخشیش » دیدی . بنده پاره سزایدم پاره یه احتیاجم واردی
شیطانہ اویدم پی دیدم . دون کیجه ساعت آلتی راده لرنده
غلطه ده بولشدق بوخانه کلدك قوسطی بزه یول کوستردی .
شونجره نك یاننه چیقدق اوچمز بردن دمیرنی یرندن اویناتدق .
ایچری یه کیردك ، ایتالیان چالشدی قاصه بی آچدی ، پاره لری
آلدق صایدق . ایکی یوز لیرا قدر پانقنوط اللی لیرا قدرده لیرا
پاره ایدی . هپسینی قوسطی آلدی پنجره دن چیقارکن بکجیلر
کورددی . بزقپودن قاچق ایسته دک اوراده ده پولیسلر و بکجیلر
واردی بزى طوتدی قوسطی پنجره دن قاچدی برده سلاح
آتلدی بزپولیسلر آتدی صاندق مکر قاچارکن قوسطی آتوب
بکجی بی اورمش ایشته بویله اولدی دیمسیله افاده سنی اوقویه رق
امضا ایتسی تکلیف اولندقدده مهری اولمادینی ویازی بیلمدیکنی
وافاده سی طوغری اولدیغنی سویلیدی .

بکچی ترجمان میشون اوطه باشی پولیس پولیس پولیس
امضا امضا امضا امضا امضا امضا

امین اوکی مرکز قومیسری
امضا

مجروح بکچی علی تداوی اولنوب و یاره سی صاریلوب براز
استراحت ایتدیکی آ کلاشلدیغندن افاده سنه مراجعت ایدلد کده:
بن اوطه لرك اوکنده کز رکن حاجی راشید افندینک اوطه سنده
سسلر ایشتم خرسز کیردیکنی آ کلادم همان یواشیجه
ارقداشلی او یاندر دم. خرسز لرك کیرمک احتمالی اولان پنجره نك
یاننده کی ایچی مصطفی نك دکاننک اوزرینه چیقان خلانک
پنجره سندن دکانک اوستنه چیققدق بکله دک. نه دن صکره خرسز لر
پنجره دن چیقارکن طوتمق ایسته دک دیکری ینه اوطه ایچنه
قاجدی. آرقه سنده ژا کتی اولمایان قیصه بویلی آدم بکاطوغری
بر روولور صیقوب خانه قاجدی بنده اورلدیغنی آ کلایه رق
ایچری کیردم. ده ا ایکی کشی یقالانمش اولدیغنی آ کلادم.
بیلدیکم بوقدر در دیه رک افاده سنی مهرلیه جکنی سویله یه رک
مهرلندیرلدی.

۲۶ مارت سنه ۳۲۶ بکچی پولیس پولیس قومیسر
مهر امضا امضا امضا

بوصره بولنديغمز او طهيه تلاشله قيرصقاللي بر افندی
 کیره رک قاصه نك باشنه کيتديکنده مال صاحبي اولديني آکلاشيلوب
 اسم وهوي تي وبومسئله حقنדה ديه جيکي استفسار اولندقدده : بن
 شاملی يم يکرمی سنه در استانبولده يم اسمم حاجي راشيد بابامک
 سليماندر الی ياشنده يم اوج سنه درده بو او طهده قوميسیونجیلق
 ایدرم تجار ياننده معتبر بر آدم . پاره لرم چالندی ايسه اعتبارم
 باقیدر . دون ايکي يوز ليرا باتقو ط الی ده عثمانلی ليراسی بر
 تجاردن آلام بوکون بانقه يه ویره جک ایدم . چالمنش . هيچ
 کيمسه دن شهيم يوقدر دشمنده يوقدر . حکومت فاعل لرينی
 البت بولور . ديمسيله در دست ایدلمش اولان محمد ايله جور جي
 مومی ايله حاجي راشيد افندی يه کوسترلده کده مرقومانی کورمديکني
 واصلا طانيديني کيمسه لر اولديغنی سويله يوب يونانلی قسطنطينی
 طانيوب طانيديني صورلدقدده بويله بر اسم ايشتمش ايسه ده نه
 سبيله وکيمدن اولديغنی در خاطر ایده مديکني بيان ايدوب
 افاده سنی اوقويه رق امضا ایلدی .

تجاردن شاملی	پوليس	پوليس	قوميسر
امضا	امضا	امضا	امضا

بو ائانده ياننده رسمی بر قواص ايله کلن وایتاليا دولت
 فخيমে سنك استانبول جنرال قونسولاتو برنجی ترجانی اولديغنی

ابراز ایلدیکی رسمی قارت ویزیتدن آ کلاشیلان موسیو لوشو-
 والیه آلفونس حاضر اولدینی حالدله لسان ترجمانی میشون افندی
 واسطه سیله مظنون علیه جورجی استیجواب اولندقدده : اسم
 جورجی پسالدودر ، بزارطه قصبه سنده طوغدم دمیرجی
 عمله سییم . استانبوله ایش بولمق ایچون کلدیم قوسطی ایله تصادفاً
 کوریشدم برایش بولسنی سویله دم پکی دیدی دون کیجه کل
 ایش بولدم دیدی بویله وقتسز نره یه دیدم . کل دیدی . بنده
 خانه سنه کوتوربور ظن ایتدم بورایه کلدک چیق بقالم دیدی
 چیققدق . یاغزده بو مسلمان واردی . چیققدق دمییر پارمقلنی
 قیرمغه باشلادیلر بن ایشی آ کلادم بو اولماز دیدم . قوسطی
 آرتق ایشه باشلادق شمعی کیتمک قابل اولدینی کبی کیتسه کده
 قاقسه کده خرسزسک قالورایسه ک الی عثمانلی لیراسی آلورسک
 سنک الی عثمانلی بی بریرده کوردیکک وارمی دیدی بنده قاقچق قابل
 اولیه جنی جهتله و ذاتاً یول بیلمدیکدن ایچری یه کیردک ، صکره
 طوتولدق قاصه بی بن آچادم دیمنی اوزرینه اللرنده کی سیاهلق
 وزیتون یاغلی اولسی قاصه نک کندی طرفندن قیرلیدیغنی
 کوسترمکده اولدینیغنی آ کلاتدیرلدقدده : بن یالکز قوسطی یه
 یاردم ایتدم ، قاصه بی او قیردی بن بز و یاغ ویردیکدن اللرم
 یاغلاندی دیمنه مقابل مظنون علیه محمد قاصه نک جورجی
 طرفندن قیرلیدیغنی بیان ایتدیکی افهام ایدلمسی اوزرینه : بن

محمدك افاده سنی قبول ایتم بکا افترا ایدیور کندینی قورتارمق
ایچون دیعی ایله افاده سنی امضا ایتمی تکلیف اولنوب امضا
ایلدی . ۲۶ مارت سنه ۳۲۶

مظنون علیه ایتالیالی تجاردن شاملی راشد افندی
امضا امضا

مظنون علیه جورجینک استجوابنده حاضر بولندم قومیسر
ترجمان امضا امضا

بولیس بولیس لسان ترجمانی میشون
امضا امضا اعضا

محل جرم اولان مذکور او طه ده بولنان وقاصه نك قیرلسنده
قوللانیلان آلات وادوات برطوره ایچنه قونه رق دیکلدکن
صکره قرمزی مهر موميله طرفزدن مهرلنوب ضبط ایدلدی .

۲۶ مارت سنه ۳۲۶ قومیسر
امضا

بوراجه اولان تحقیقات وکشفیات بتدیکی ودیکر مظنون علیه
قوسطی دردست ایدیلوب الآن کلدیکی جهتله بالذات تحریری ده
مناسب اوله جنی ایچون مظنون علیه ایتالیالی ایتالیا قونسولاتوسنه
کوتورملک اوزره ترجمان وقواصه تسلیم ایدلمش ومظنون علیه
محمدده قوسطی نك تحریرسنده بولنق ایچون برابر آلنه رق اشبو

ضبط ورقه سی محل جرمدہ بالتنظیم حاضر بولساندر ایله برابر
امضا و تختیم قلندی. ۱ اغستوس سنہ ۳۲۶

پولیس	پولیس	لسان ترجمانی میشون
امضا	امضا	امضا

تجاردن شاملی	ایتالیا ترجمانی	امین اوکی پولیس قومیسری
امضا	امضا	امضا

مظنون علیہ محمد	ایتالیالی مظنون علیہ	بکچی	بکچی
امضاسی اولمدینی	امضا	مهر	مهر

بکچی	اوطہ باشی	پولیس
مهر	مهر	امضا

ذیل

یوم مذکورده ساعت آلتی راده لرندہ نزد مزده پولیس
مأمور لرندن شا کر افندی ایله مظنون علیہ اولدینی حالده بک
اوغلی پولیس دائره سنہ کیدیله رک مرکز مأموری بک ایله ملاقات
اولندقدہ یونان ترجمانی کلوب قوسطی نک تحریری ایچون تعین
اولنان پولیس مأمور لرلیله برابر قوسطی نک اقامتگاهنه کیتمش
اولدقلریخی ونرمده ایسه بر خبر کله جکنی سویلسنی متعاقب یونان
ترجمانی ایله مأمور لر کله رک قوسطی نک اقامتگاهنده اولمادینی

آکلاشلدی . طرفزدن قوسطی نك خندکده میخانه جی شیرالی
 آپوستولك خانه سنده بولنه بیله جکی بیان ایدیلهرك یونان ترجانی
 موسیو آکیادیس ده برابر اولدینی حالدده غلطه یه اینلوب ولزومی
 قدر پولیس مأمورلری دخی النوب خندکده شیرالی آپوستولك
 میخانه سی اوستنده اقامت ایلدیکی خانه سی آبلوقه ایدیلهرك محله
 مختاری قوچه یانقو دخی موجود اولهرق مذکور میخانه یه
 کیریلوب میخانه جی آپوستولدن قوسطی نك میخانه سنده اولوب
 اولمدینی سؤال اولندقدده رنکی آتهرق بوراده یوقدر دیمش ایسه ده
 میخانه و خانه سی تحری ایدیله جکی تفهیم اولنهرق تحریاته باشلانوب
 اوست قانده بر او طه نك کلیدی اولدینی کوریلوب آچیلمیسی
 مرقوم آپوستوله تکلیف ایدلدکده اناختاری غائب اولمشدر
 دیهرك آچقدن استنکاف ایتسی اوزرینه برقاچ دکان اشاعیده
 بولنان چلینکر بغوص جلب اولنوب او طه اچیله جنی ائنده
 سوقاقده برکوروالتی اولوب صوفه نك پنجره سندن باقلدقدده پولیس
 افندیلرک بر شخصی در دست ایدرک قوسطی طوتولدی دیهرک
 باغرملی اوزرینه یوقاری کتیرلمسی امر ایدیلوب آچیلمش
 اولان او طه یه کیریلوب کوریلان بر قونسول وبرصندق تحری
 ایدلدکده هیچ برشی بولنه مامش ایسه ده دیوارده بولنان اوافق
 بر دولاب آچیلوب ایچنده کیرلی چاشیرلر و ایکی پانطالون
 وژاکتله طیشاری یه چیقاریلهرق هپسی اراندقدده بونلردن

سیاه پانطالونك چيینده قرق عدد بانقنوط چيقوب بشقه برشی
ظهور ایتدی .

بانقنوطلر تدقیق اولندقدده هپسنگ اوزرندده قومیسینوچی
شاملی حاجی راشید تمغاسی اولدینی کورلدی پولیس شا کر
افندیله کامل افندیدن قوسطی نك صورت دردستی استفسار
ایدلکده مرقومك اوست قاتده کی اوطه نك پنجره سندن چیقارق
پنجره نك اوکنده بولنان اغاجدن اشاغی یه اینرکن کوریلوب
دردست ایدلدی کی اکلاشادی مضمون علیه مرقوم قوسطی استجواب
اولندقدده عن اصل یونانستانك پیره اهاالیسندن ویونان تبعه سنده نم
یکرمی طقوز یاشنده یم بش سنه در استانبولده اوطور یرم
میخانه لرده اینبکدن راقی چیقارمق صنعتیله اشتغال ایدرم .
بوسرقتدن اصلا معلوماتم یوقدر بومحمدی وایتالیالی بی طانیام
قاجدیغ سببی ده قورقومدندر . نه اولدیغنی بیلمدیکم جهته قورقدم
اوطه ده چیقان پاره لر نم دکلدرد . میخانه جی اپوستولك در . نه
بانقنوطلری بیلیرم نه ده اللی لیرایی نم بش اون غروش پاره م
واردرد . دیعی اوزرینه محمد ایله مواجهه اولندقدده : بو آدم
کندیسنی قورتارمق ایچون ایشی نم اوزریمه یوکلهدیور . بن
بوی نه کورددم نه طانیرم دیهرك بواقاده سنك امضا ایدلمسی تکلیف
اولنوب امضا ایلدی ۲۶ مارت ۳۲۶

مظنون محمد پولیس پولیس مختار مظنون علیہ
امضا امضا امضا امضا

ترجمان قومیسر
امضا امضا

میخانہ جی یونان تبعہ سندن طناس اوغلی ابوستول دن کیفیت
صورلد قدہ: قوسطی بنم میخانہ دہ راقی چیقاریر بشقہ میخانہ۔
لر دہ دہ چالیشیر . بورایہ کلنجه یوقاریکی او طہ دہ یاتار قالقار ،
سارق اولدیغنی بیلمیورم سرقتدن دہ معلوماتم یوقدر . بولنان
پارہ لر دہ بنم دکدر . دیوب افادہ سنی امضا ایلدی .

پولیس پولیس مختار میخانہ جی ترجمان قومیسر
امضا امضا امضا امضا امضا

قوسطینک یتوتت ایتدیکی او طہ دہ بولنان قرق عدد
بانقنوط برظرف درونہ قونوب مهرلنش واللی لیرانک مرقوم
طرفندن صرف وخرج ایدلمش اولدیغنی اکلاشلمش اولمغله
مظنون علیہ قوسطی محفوظاً بک اوغلی پولیس مرکزینہ اعزام
قلنمش ودیکر مظنون علیہ محمد ایله تعمیق تحقیقات ایدلمک
اوزره امین اوکی مرکزینہ عودت ایدیلہ جکنی مین اشبوضبط
ورقہ سی تنظیم ایدلمش و حاضر بولنانلر ایله برابر امضا و تختیم
قلنمشدر . ۲۶ مارت ۳۲۶

مظنون علیه محمد مظنون علیه قوسطی میخانه جی پولیس
امضا امضا امضا امضا

پولیس مختار یونان ترجانی قومیسر
امضا امضا امضا امضا

§

یانغین حقنדה ضبط ورقه سی:

شهر حال رومینک طقوزنجی بازار کونی صباحلین ایرکندن
قائمده صاری کز جوارنده ملاخسر و محله سنده چیقماز سوقاقده
ملکیه قائمقاملغندن متقاعد شوقی نورالله افندینک حرمی عصمت
خانمک متصرف اولدینی طقوز نومرولو خانه ده حریق ظهور
ایتمش اولدینی اول طرفلرده دوریه کزن پولیس مأموری
رائف ورؤف افندیلر طرفندن خبر ویرلسی اوزرینه همان محله
طلومبه سنه و اطفائیہ قوماندانلغنه و مدعی عمومیلکه و پولیس
مدیر لکنه معلومات ویریلهرک محل حریقہ کیدلدی .

خانه مذکور چیقماز سوقاغک نهایتنده ایکی قات اخشاب
و خراب بر خانه اولوب قیوسی ایله آلت پنجره لرندن دومان
چیقماقده ایدی .

قپودن ایچری کیرلده برطاشلیق ایله قپودن کچیلوب
دیگر برطاشلغه و طاشلغک کوشه سنده اولان مطبخه کیریلهرک

مطبخك اوجاغى ياننده كمورلك قپوسنك اوست تحته لرى
ياتمقده اولديغى كوريلوب طلومبه واسطه سيله يانغين سونديريلوب
آتش باصديرلدى .

حريقك سبب ظهورى حقنده تحقيقات و كشفياته ابتدار
اولندقدده: يانغين مطبخك كمورلكه اينن وبر مترو طولنده بر
آرشون عرضنده اولان قپونك ايچ طرفدن يعنى كمورلك
جهتدن اخشاب اولان بوله ديوارينك ديركلرى ارسنه غازلى
بزلقونيله رق ايقاق ايدلديكى ظهور ايدن بزردن و غاز قوقوسندن
اكلاشديغى كې بزلك خارجدن قونمق احتمالى اولماديغى مذكور
كمورلك پنجره سنك بغچه يه ويا سوقاغه ارتباطى بولماديغى
و خارجدن خانه داخلنه بر كي مسنه كيرمش اولديغنه دائر بر
كونا ايز و اماره كوريله مديكى جهته حريقك داخلأ ايقاق
ايدمش اولديغى اكلاشدى .

خانه صاحبه سى اللى ياشنده عصمت خانمك افاده سنه مراجعت
ايدلده: ياتمقده ايكن برونه بز قوقوسى كلديكندن هان ياتاقدن
قالقوب مرديون باشنده بسلمه سى تركيس نام قيزه سسلنمش
ايسه ده جواب آله مديغندن آشاغى اينوب مطبخدن دومان
چيقمقده اولديغى كوره رك باغريدغى متعاقبأ مأمور لرلر تشديكى
وبسلمه قيزك ميدانده اولمديغى و مزبور نهك بويانغىنى قصداً
ياپديغى سويلدى . بسلمه قيزك نرهلى اولديغى ونه مناسبتله بويانغىنى

یابدیغنی سؤال اولندقدہ : قیزک بولیلی اولدیغنی وپک کوچک
ایکن آلوب بویوتدیکنی وقیزک اوغلی نوری افندی بی سودیکی
اوغلنی اولندیرمسی اوزرینه قیزک فوق العاده قیصقانیدیغنی کرک
کندیسنه وکرکسه کلیننه چوق حقارت ایلدیکی وداثما کندیسيله
غوغا ایدرسده اولاد کی بیوتدیکندن قصورینه باقماز ویا لکز
اولدیغندن خانه سندن قوغماز اولدیغنی وقیصقانجلق ایله بویانغینی
یاپه رق قاقچش بولندیغنی بیان ایلدی. قیزک نره یه کیتمک احتمالی
اولدیغنی واشکالی نه ایدوکی صورلدقدہ نره یه کیتدیکنی بیلمدیکنی
واستانبولده اقربا واحباسی اولمادیغنی وبلکه کندیس ی برکیده جک
یر بولندیغنی بیان وقیزک اورته بویلی شیشمانجه قره کوز وقاشلی
واوزونجه سیاه صاحلی دیلی برآز پلتهک و بویینک صاغ شاح
طاماری یاننده بر چیمان نشانه سی بولندیغنی وصول الی سرچه
پارماغنک اوجی قیرناق یری کسیک بولندیغنی درمیان ایلدی .
مطبخک یاننده کی اوطه یه کیرلده کده : یرده بریتاق کوریلوب
مذکور یتاق هنوز صیجاق ایدی کوشه ده براوفاق صندیغک
قپاغی آچیق اولوب اسکی انتاریلر و بز وباصمه پارچه لری میدانه
صاچلمش اولدیغنی کورلدی : یرده کی بز وباصمه پارچه لری
تدقیق اولندقدہ یانغینک ظهور ایتدیکی یرده بولنان مور رنگ
اوزرینه بیاض داللی پرلانطه باصمه پارچه لری اره سنده بولندی
خانه صاحبی عصمت خانمدن بو اوطه ایله صندوق کیمک اولدیغنی

صورلدقده: بسلامه سی نرکیسک اوطه سی و صندیغنی اولدیغنی
واشیالری برابر اوب کیتمش اولدیغنی بیلدیردی: خانم مومی الیهان
قیزک دهها بشقه شیر آلوب آلمادیغنی استفسار اولندقدده بیلمدیکنی
و هنوز یاتاقدن قالمش اولدیغنی و برابر یوقاری یه چیقلوب
باقلمسنی افاده ایلمی اوزرینه یوقاری قاته چیقلدی .

ایکی اوطه بر صوفه دن عبارت اولان بوقاقدده سوقاق اوزرنده
اولان مسافر اوطه سی اولوب یاننده کی اوطه ده خانمک یاتدیغنی
اوطه ایدی . خانم ایله برابر اوطه یه کیریلوب خانم قونسولک
اوست کوزینی آچهرق باقدیغنده برچفت آلماس کوبه سیله بر
یاقوط یوزیکنک قوطی ده اولمادیغنی برش لیرا سکر مجیدیه بی
حاوی پاره کیسه سنک دخی آلمش اولدیغنی بیان ایلدی .

خانه نک بولندیغنی سوقاغک قارشوسنده بولنان بقال اوتوز
سکر یاشنده نیکده لی یانقو اوغلی واسیل دعوت اولنوب بسلامه
قیزک سوقاغه چیقدیغنی کوروب کورمدیکی سؤال اولندقدده :
صباحین دکاننک کینکارینی آچارکن سیاه اطلاس چارشافلی
برینک قولتوغنده بویوجک بر بونجه اولدیغنی حالدده سوقاقدن
چیقمقده اولدیغنی کوردیکنده دقتلیجه باقوب عصمت خانمک
بسلامه سی اولدیغنی طانیهرق [نره یه] دیکنده [حامه] دیه جواب
ویروب سرعتله آشاغی طوغری کیتدیکنی کوردیکنی و براز
سکره خانمک [یانغین وار] دیه باغیردیغنی افاده ایتدی مذکور

بقالك بر آز آلت طرفنده قهوه خانه نك مستأجری وارنہلی ممش
آغا جلب اولنوب سیاه چارشافلی بر قادین كچوب كچمدیکی
صورلدقده قهوه سنی سوپورمكده ایكن بر چارشاف خیشردیسی
ایشیدوب دونوب باقدیغنده سیاه جانفس چارشافلی اورته بویلی
شیشمانجه بر قادینك سرعتله کیتدیكنی کوروب آلقته کروهندن
بریسی ظن ایتدیكنی وقوسنك اوکندن مزبورہ نك ارقه سندن
باققده ایكن بقال واسیلک [نه باقیورسك] دیه سسلندیكنی
وکندیسی ده کیم اولدیغنی اکلماق ایچون باقدیغنی سویلیسی
اوزرینه بقالك [عصمت خانمك بسلمه سی حمامه کیدیور]
دیدیکنی وبر آز صکره یانغنك ظهور ایتدیكنی بیان ایلدی .

اجرا قلنان کشفیات وتحقیقاتدن حریقك اسباب ظهوری
اکلاشلمش ومظنون علیها اولان مزبورہ ترکیسك تحری
ودردستی ایچون ایجاب ایدن معامله اجرا قلنمق اوزره اوامر
لازمه ویرلمش اولغله اشبو ضبط ورقه سی تنظیم وحاضر بولنانلر
ایله برابر امضا وتختیم قلندی. ۵ اغستوس ۳۲۶

بکچی شاهد شاهد صاحب خانه پولیس

پولیس فاتح پولیس مرکز قومیسری

§

سؤ مظنه حقنده ضبط ورقه سی:

شهر حال رومینك اون طقوزنجی بازار ایرتسی کیجه سی

بك اوغلنده قومارخانه ده مأمورین ضابطه طرفندن دردست
ایدیلوب بك اوغلی پولیس متصرفلنی دائره سندن غلطه مرکزینه
سوق ایدیلورکن فرارایله تکرار دردست ایدیلن سابقه مکرره
اصحابندن آقسرایده یوسف پاشاده حاجی بیرام خفتانی محله سنده
ساکن مشهور مصطفی نام شخص دائما تشهیر سلاح و مأمورینه حقارت
و سرقت و قومار بازلق و دولاندر یحیلق و سائره کی افعال مذمومه
و ممنوعه ارتکابیه امرار اوقات ایتدیکی و ایقاع جرائمی اعتیاد ایتمش
بولندیغی و محکوم و غیر محکوم بر چوق جرائمه اجتناسار ایلدیکی
و آقسرای جوارنده ایقاع ایدیلن سرقتلرک همان جمله سنده
مرقوم مصطفانک پارمنی بولندیغنه ضابطه جه ظن غالب حصوله
کلدیکی و ازان جمله ۳۲۰ سنه سنده ۱۵۴۲ نومرولی درسعات
اعلامیه سرقت ماده سندن بر سنه و سنه مذکورده ۱۵۰۸
نومرولی بك اوغلی اعلامیه کذالك سرقت فعلندن اوج آی
و ۳۲۲ سنه سنده مأمورین حکومت تشهیر سلاحندن طولایی
۱۲۶ نومرولی درسعات اعلامیه آلتی آی حبس جزاسیه
محکوم و سابقه سی اولدیغی و بر چوق کره دردست و محاکمه
سوق ایدلمش ایسه ده کسب برأت ایلدیکی و الیوم قوم قپو
پولیس مرکز نه دولاندر یحیلقدن طولایی مظنون علیه بولندیغی
و کندیسی غایت تهلکه لی بر شریر ایدوکی جهتله سر سری نظامنا-
مه سنک اوتجی ماده سنک صراحتی موجب نه مرقوم سرقت

فعلندن ایکی دفعه بر موجب قیودات رسمیه محکوم اولش
بولندیغندن تعریفات قانونیه دائره سنده تام مظنه سؤ طاقندن
اولغله حقنده نظامنامه مذکورک اونبرنجی ماده سی حکمنجه
معامله لازمه واک آغیر جزا حکم واجرا ییورلق اوزره
اشبو ضبط ورقه سی بالتنظیم اوراق متفرعه سیله برابر در سعادت
مدعی عمومیلکنه تقدیم و مرقوم مصطفی ده موجوداً و محفوظاً
اعزام قلمور . تموز ۳۲۶

مرکز مقیدی مرکز معاونی مرکز مأموری
آقسرائ پولیس مرکز قومیسری

تذیبه

ضبط ورقه لری بوصورتله تنظیم ایدیلور تنظیم اولندیغی
اثانده مدعی عمومی و یامستتق کلورسه بونلره تسلیم اولنور .
ونقصان کوریرلرسه اکمال ایدرلر ، و بشقه بر تحقیقات حواله
ایدرلرسه پولیس وضابطه عدلیه مأموری صفتیه بوا مره کوره
اجراسنی وظیفه ایدرلر .
مدعی عمومی و یامستتق موقع جرمه کمزسه تنظیم ایدیلن
ورقه مظنون علیه و اشیای جرمیه ایله برابر همان کندیلرینه
تسلیم و تودیع اولنور .

ضابطهٔ بلدیہ وظائفی

ضابطهٔ بلدیہ وظیفہ سی حقیلہ اکلا شلمق ایچون اول امرده ولایات ودر سعادتک بلدیہ دائره مجلس لرندن بحث ایدمک لازمدر. ولایات بلدیہ اداره سی — طشره بلدیہ لری حقنده قانون موجبجه هر شهر وقصبه ده بر بلدیہ هیئی تشکیل ایدلمشدر هر بلدیہ هیئی بلدیہ رئیسک تحت اداره سنده اوله رق بر بلدیہ مجلسی ایله برکاتب وبر صندوق امینی ولزومی قدر بلدیہ چاوشندن مرکبدر .

بلدیہ مجلس لری ، مملکت اهالیسنک املاک صاحب لرندن وتبعه عثمانیه دن اولق اوزره مملکتک بیوکلکنه کوره آلتیدن اون ایکی یه قدر دوت سنه مدتله اهالی طرفندن انتخاب ایدیلن اعضادن تشکل ایدر. وبواعضانک نصفی ایکی سنه ده بردکیشدیریلور و آیلق آمازلر . وخرستیان اولان محللرده بونلرک یاریسی مسلم یاریسی ده غیر مسلم اولور. وبواعضادن الکچوق رأی قازانان معاشلی اوله رق بلدیہ رئیس یی نصب ایدیلور . بلدیہ طیبی و مهندس و بیطرده بلدیہ مجلسنک اعضای مشاوره سندنر .

بلدیہ مجلس لرینک وظیفه سی ، امور بلدیہ یه دائر اولان

ایشلرک بلنذا کره قرارلشدیرلمسی، دائره نك عادى وفوق العاده موازنه جدوللری وسال محاسبه لرینی تدقیق وتنظیم ایتک، موازنه جدولنه داخل مبالغك صورت صرفیاتك تعینى، ودائره نك املاكى واریسه انلرك اداره سى و برسنه ده یاپیله حق انشاآتك تعینى وبونلری مزایده ومناقصه یه قویق، بلدیة مأمورلرینك عزل ونصبی، بلدیة صندوقك آی باشى اجماللرینی تدقیق ایله معاملاتى تفتیش ومنهدسلرك كشیفاتنه نظارت ایتك كی برچوق وظیفه لردر.

مجلس ودائرة بلدیة نك امور تحریریه سى وحسابیه سى واوراق ودفترلرك تنظیم ومحافظه سى بلدیة کاتبه عائددر بلدیة صندوق امینى ده کفالت ایله تعین اولوب بلدیة واردات ومصارفى ایفاایدرو سائر رسم وبلدیة ویرکولرینی اخذ وقبض ایلر.

واردات بلدیة، دواتجه تخصیص اولنان رسومات ایله وضع اولنان ویرکولردن اچیلان یوللردن قالان یول فضله سى اوله رق قالان محللرندن صاتمئسندن وشرفیه نامیله آلمان اچه لردن بلدیة لره عائد جزای نقدی لردن قنطار وچكى وکیل و قونطوراتو وذبجیه رسومیله حیوان آلوب صاتمئندن آلمان پاره لردن دائره بلدیة یه ویریلن اعانه وایدیلان هدیه وهبه لردن عبارتدر.

بلدیة دائره لرینك وظیفه سى بك چوقدر. از جمله : شهر وقصبه لرده منتظم یوللر وكوپر یلر وصویوللری لغمسلر وكمرلر

یایمق شهر وقصبه لری تزیین وتنویر ایتمک (سوپوروب فنارلرله آیدینلق ایتمک) یول آچمق ایچون ایجاب ایدن یرلری صاتون آلوب کنیش جاده لر یایمق سوقاقلری صولایوب سوپورمک ، سیرمحللری وکزینتیلی میدانلری وخسته خانه لر دکزحماملری یانغین طولومبه لری یایمق ، چارشو وپازارده کی اصناف وتجارک تمیز مال صاتمهلرینه نظارت ایتمک وسرایت ایدن بر خسته لق اولماق ایچون شهر وقصبه ده بیسلک بر اقامق وحیوان کسمک ایچون قصابخانه لر وتیاترولر آچمق ، یوللره آغاچ دکمک ، والحاصل برشهر وقصبه نک اعماری وسوسلی وتمیز اولسی ایچون نه لازم ایسه آنلری یایمق بلدیهلرک وظیفه لرندندر .

درساعات اداره بلدییه سی

درساعات اداره بلدییه سی، بلدییه دائره لریله شهر امانتندن عبارتدر . بلدییه قانونی موجبجه بالعموم استانبول یکر می دائره بلدییه آیرلمشدر . هر دائره بلدییه هیئت ایکی سنه مدتله اهالی طرفندن انتخاب اولنان وآیلقسز اوله رق فخریاً ایفای خدمت ایدن سکزدن اون ایکیه قدر اعضادن واشبو اعضادن دولتجه تعیین اولنان آیقلی بر رئیسدن مرکبدر .

بونلردن بشقه هر دائره نک محاسبه جیسی وباش کاتب وهندسه

خانه و املاك و نفوس و قونطوراتو قلملری بولمسی لازمدر .
(فقط اليوم بونلر تامایله تشکیل ایدیله مامشدر) و ایجاب ایدن
کاتبلر و بلدیة چاوشلری کبی مأمورلر وارددر .

استانبولک تنظیم و اصلاحی اشبو یکر می دائرة بلدیة یه
مودو و عدد . بوندن بشقه مبعوثان انتخابی ده اشبو بلدیة دائرة لری
معرفتیله اجرا ایدیلور استانبول بیوک بر شهر اولدیغی ایچون
بلدیة دائرة لرنک اهمیتتی و یایه جقلری ایشلریده چوق در . بلدیة
دائرة لری رئیس و مجلسلرنک وظیفه سی و لایات بلدیة لری کبی
اولدیغندن بوراده ذکر ایدلمدی . شهر امانتی ، دولت طرفندن
تعیین اولنان بر شهر امانتی ایله بر رئیس و لزومی قدر اعضادن
مرکب (مجلس امانت) نامیله بر مجلسدن ، و محاسبه و تحریرات
و هندسه خانه و صونظارتی و زنه قلملریله لزومی قدر کاتب و بلدیة
چاوشی و مفتش لرندن عبارتدر . شهر امانتی عموم بلدیة دائرة
لرنک ایشلرینه نظارت و (مجلس امانت) ایله (جمعیت عمومیة
بلدیة) ریاست ایدر .

(در سعادت جمعیت عمومیة بلدیة) سی شهر امانت ریاستنده
اوله رق سنه ده ایکی دفعه اجتماع ایدوب شهر امانتی مجلس و بلدیة
مجلسلری رئیس لریله بو مجلسلردن کوندریلن ایکی اعضادن مرکبدر
بو جمعیت عموم استانبول بلدیة سنک یاپدیغی و یایه جنی معاملاتی
تدقیق و تعیین ایدر ، لزومی اولان پاره یی استقراض ایدر و بیانقو

وسرکی احداث و کشادایدر و شهر ایچون یاپیله جق بیوک انشا آتی
وسائر خصوصاتی تحت قراره آنور . [استطراد — استانبول
ولایتی ایله شهراماتی بربرینه قلب اولنه رق یکی برشکله صوقلمسی
یکرمی دائرة بلدییه چوق اولدیغندن آزاتلمسی دولتجه تقرر
ایتمشدر .]

ضابطه بلدییه وظیفه سی

ضابطه بلدییه وظیفه سی — شهر وقصبه لرك تنظیمات و
تنظیفاته وصحت و راحت عمومیه بی محافظه ایتمک و تجارت
واصنافک مضر صحت اشیا صاتمماسنه دقت ایتمک کبی بلدییه امورینه
باقمقدن عبارتدر ضابطه بلدییه هیئت بلدییه دائره لری و شهر
اماتی چاوش ومفتش لرندن مرکب در . فقط ضابطه بلدییه
وظیفه سیده بو چاوشلردن آلنه رق پولیس مأمورلرینه تودیع
اولنه جقدر .

ضابطه بلدییه مأمورلرینک باشلیجه وظیفه لری ، سوقاقلرده
طولاشان دیلنجیلری منع ایتمک ، کیله وقنطار و ترازولر
حقنده کی نظامنامه بی محافظه ایدرک اکسیک ترازو و درهم
قوللانمماسنه و اصناف و تجارک اکسیک اشیا صاتیلماماسنه
دقت ایتمک و اصناف و تجارک صحت مضر زهرلی ویا قاریشیق
یاغیر واشیا وارزاق صاتممسنه میدان وفرصت ویرمامک ، عموماً

شهرک آب و هواسنی وصحت عمومیه بی بوزہ حق شیلری ویانغین وقوعنه سبب اوله حق حرکات و افعالی منع ایتمک ، رخصتسز یاییلان ابنیه لری وبرکیمسه نک عرصه سنه وقوع بولان تجاوزی دفع ایتمک وسوقاقلرده کلوب کچنلری راحتسز ایده جک شیلری وکوفه جی وصاتیجیلری براماق ، آرابه جیلرک تعرفه دن ریاده پاره آلاملرینه ویوللرده طور ماملرینه دقت ایتمک ، وآشجی و قهوه جی کبی اصنافک دکانلرینک پیس طور ماملرینه نظارت ایتمک وآت و آرابه لره حد نظامیسندن فضله یوک یوکله دلمسینه محل براماق وآچیق قویو وییقلمغه یوز طوتمش خانه و دیوار- لری قبادوب ییقدر مق کبی وظائفدن عبارتدر .

خلاصه ، شهر وقصبه داخلنده منعی مقتضی وصحت عمومیه جه مضرتی موجب احوالک واستراحت وسلامت عامه یه متعلق موادک وصورت عمومیه ده اصنافه عائد نظاماتک تمامی^۱ اجراسی ضابطه^۲ بلدیهنک وظیفه سی جمله سندندر . بونلردن بشقه قانون جزاده امور تحفظیه وتنظیفیه دائر بر طاقم ماده لر واردر که بونلرک بر تفصیل بیلنمسی لازم اولدینی جهتله اشبو ماده لر برر برر بیان ایدیلور .

فانون جزانک ۲۵۴ نجی ماده سندده :

۱ — خانجی ولوقانطه جیلردن کیجه لری فنار یاقاسی کندیسنه جانب ضابطه دن تنیه اولندیغی حالده اهل ایدن .

۲ — انسانلرک قولایقله کیدوب کلسنه طوقونه جق شیلری یوللره وضع و ترک ایلیان .

۳ — وبو مثللو شیلر حسب الایجاب زقاق و میدانلره وضع اولندینی و یاخود ممرناس اولان محللرده صویولی و لغم قازیلوبده کیجهلری آجیق قالدینی حالده کلوب کچنلره برکونه سقطلق اولماق ایچون ییقلمش اشیا و قازلمش محل اوزرینه بر قنیدیل و فنار قویمایان .

۴ — ویوللر نظاماته و خراب اولان ابنیه یی تعمیر و یاییقمق اوزره طرف حکومتدن اولان تنبیهاته مغایر و سواققلره سوپروتی و تعفتاتی موجب شیلر آتالر .

۵ — قیدسزلک ایله بر کیمسهنک اوزرینه سوپروتی و یاییسلک دوکنلر .

۶ — یولدن کچنلره ضرر ویره جک شیلری سواقغه آتالر .

۷ — کرک نظامات ملکیه و کرک بلدییه دائرهلری طرفندن نشر و اعلان اولنان نظاماته توفیق حرکت ایتمیلر .
(برچاریک مجیدیه دن بش چاریک مجیدیه قدر جزای نقدی ایله مجازات اولتور .)

۲۵۵ نجی ماده سننده دخی :

۱ — آتش استعمال ایدن اصناف دکان و فرون و فابریقه لر ینک اوجاق و باجالرینی آرالق آرالق تطهیر و تعمیر ایتمیلر .

۲ — محلات آراسنده و مضرتی موجب اوله جق یرلرده
فشنگ آتانلر .

۳ — شهر و قصبه و قریه ایچنده طپانجه و تفنگ آتانلر .
(بش غروشدن یکر می بش غروشه قدر جزای نقدی
آلندقدن بشقه یکر می درت ساعتدن اوچ کونه قدرده حبس
اولنورلر .)
۲۵۶ نجی ماده :

۱ — خانجی ولوقانظه جیلردن و سائر کرا خانه جیلردن
کلوب کیدنلری قیدایتمکده و اصول اوزره طوتملری لازم
کلن دفترلری مأمورینه و قتیله ابرازده اهل و قصور ایدنلر .
۲ — غلبه لك اولان محللرده آت قوشدیرانلر .

۳ — محافظه لری آلتنده بولنان دلیر و یرتجی حیواناتی
صالیویره نلر .

۴ — دولتک پاره سنی کچر بهاسنه آلمقدن امتناع ایدنلر .
۵ — بیوک بر حادته و قایق و کمی قضاسی و صو طغیانی
ویانغین و آفات سائر و حیدودلق و نهب و غارت و علنی برجنایت
و فریاد عمومی و شکایت و قوعنده طلب اولنان خدمت و معاونته
مقتدر ایکن معاونت ایتیانلر (اوتوز غروشدن الی غروشه قدر
جزای نقدی ایله مجازات اولونورلر .)

۲۵۷ نجی ماده دخی :

۱ — ینلمسی صحت وجوده مضر اولان و یاخود دکانلرده

قالوب چوریه رک تعفن ایلیان میوه وسائر شیلر دکره ویا نهره
ویا خود خارج شهره آتیلور . بونلری صاتانلردن ده اوتوز
غروشدن اللی غروشه قدر جزای نقدی آنور .

۲۵۸ نجی ماده :

۱ — بالاختیار برآدمک اوزرینه یاخود خانه سنه ویا ابنیه
سائره سنه وحولیسنه وبغچه سنه طاش وسائر اجسام ویایسلاک
آتانلر .

۲ — کیرمک حق اولیان محللره کیرنلر .

۳ — کچمک حق اولیان محللردن کچنلر .

(اوتوز غروشدن اللی غروشه قدر جزای نقدی ویکرمی
درت ساعتدن بش کونه قدر حبس ایله مجازات اولونورلر .

۲۵۹ نجی ماده :

۱ — دیکرلرینک اموال منقوله سنه بالاختیار ایراث
خسار ایدنلر .

۲ — دلی ویا مضر ویرنجی حیواناتک سالویرمکله ،
ویا خود حددن آشوری قوشدیرمق ویایوکلتمک . ویا خود
طاش وسائر اجسام صلبه آتمق ، ویا بر محلی قازمق ، ایله
برکیمسه نک حیوانات وطوارینک هلاکته یاجمرو حیتته سبب
اولانلر .

(بوضررلری اوده دکن صکره اللی غروشدن ییلاش بش
غروشه قدر جزای نقدی یه محکوم اولورلر .)

۲۶۰ نجی ماده :

۱ — اھالینک راحتى سلب ایدہ جک صورتدہ بلا موجب کورلتی وشماتہ ایدنلر .

۲ — امر حکومت ایلہ یاپشدرلش اولان اعلانات اوراقتی بالالترام قویارائلر وییرتائلر .

(الی غروشدن یتمش بش غروش جزای نقدی ایلہ اوج کوندن برھفتہ یہ قدر حبس ایلہ مجازات اولنورلر .)

۲۶۱ نجی ماده :

بر کیمسہ نك آیرلش ویا اکیلش ویا خود ایچندہ محصور-
لات و مزروعات بولنان اراضیسنہ و باغ و باغچہ سنہ حیوان
صالیورن کیمسہ .

(الی غروشدن یتمش بش غروشہ قدر جزای نقدی
اخذیلہ مجازات اولنور .)

۲۶۲ نجی ماده :

۱ — دکان و مغازہ سندہ و چارشو و بازارده و پنایر یرلرنده
کسیک درهم و ترازو و قنطار و اولچو و کیله صاقلایان .

۲ — نظاماً تعین اولنوب قوللانیلان درهم و اولچودن
بشقه درهم و اولچو قوللانیلان اشخاصدن .

(الی غروشدن یتمش بش غروشہ قدر جزای نقدی
الانور .)

۲۶۳ نجی ماده :

۱ — نظاماً تعیین اولنان نرخدن (فیأندن) زیاده
اشیا صاتان (اتمک کبی) .

(الی غروشدن یتش بش غروشه قدر جزای نقدی
اخذ و یکریمی درت ساعتدن اوچ گونه قدر حبس اولنور .)
۲۶۴ نجی ماده :

عمومی یوللر و میدان و سیر یرلری کبی محللری بوزان
ویرچالان کیسه لرده .

(الی غروشدن یوز غروشه قدر جزای نقدی اخذ و اوچ
کوندن برهفته یه قدر حبس اولنور .)

ایشته قانون جزاده صاییلان و تعریف اولنان اشبو افعالی
ضابطه بلدییه مأمورلری منع ایتمه و متجاسرلری حقنده لازم
کلن راپوری و کشف ورقه سنی یا پوب مافوقنه و یرمه مجبوردر .
بونلردن بشقه کرک بلدییه دائره لرندن و کرک حکومت
وامنیت عمومیه و پولیس مدیریتندن بلدییه امور و خصوصاته
دائر نشر و اعلان اولنان و یا خود امر و تعمیم بیوریلان هر
گونه اوامر و تنیهاتی ایفایه ضابطه بلدییه (پولیس) مأمورلری
مجبور و مأموردرلر .

مداوات ابتدائیه

ضابطه مأمورلری، ایفای وظیفه ایتدکلی ائاده یارهلی
 وخسته لقلی ومعلول کیمسه لره تصادف ایدرلر ایسه دوقتور
 کلنجه یه قدر بوکبی یارهلی وخسته اولانلری تداوی ایتمیدرلر.
 دوقتورلر کلنجه یه قدر بریارهلی تداویسز براقیلورسه قانی آقا
 آقا وفات ایدر. مأمورلر بویله یارهلی ومهلاک خسته لق وعلتلی لره
 تصادف ایدرسه بر طرفدن همان دوقتوره واجزاخانه لره خبر
 کوندرمکه برابر دیگر طرفدنده کندیلری بیان ایده جکمز
 اصول دائره سنده همان امداد وتداوی ایتکه هم وظیفه و همده
 انسانیّه بورجلیدرلر.

یاره لیلره امداد

برجرم مشهودک تحقیقی ایچون محل حادثیه طیبندن اول
 یتیشن برضابطه مأموری یارهلی بی کورور کورمز، عجله امداده
 باشلامیدرلر.

یاره لیلرده تطبیق ایدیله جک امداد ایکی درلودر: بری
 هر درلویارده یاپلسی لازم اولان عمومی یاردملر دیکری بایلمه،

قیرله، فضله قانامه، کوکس، قارنده کی ایچ آلتلرینک یاره لنمسی کبی
حالرده کی خصوصی یاردملردر .

عمومی یاردملر : ۱ یاره لی یی او یغون بر وضعیته قویمق ،
۲ آغز، برونده تنفسی کوجاشدیره جک برشی وارسه چیقارمق؛
۳ وجودک صیقیلی یرلرینی کوشتمک؛ ۴ یارهنک یرینی آکلامق؛
۵ یاره یی میدانه چیقارمق؛ ۶ قانی دیکدیرمک؛ ۷ یاره یی تمیزله مک؛
۸ یاره یی هوادن قوروتماق :

یاره لی یی ایی بروضعیته قویمق: یاره لی صرت اوستی یاتیریلیر.
باشی آلتنه یاصدیقلق ایده جک برشی قونور، قول و با جاقلری
براستقامتده اوزادیلور .

آغز برونی تمیزله مک : آغز و برونده قان پیختیسی ،
چامور کبی تنفسی کوجاشدیره بیله جک شیلر وارسه هپسی
چیقاریلوب، ایجه تمیزله نیر .

وجودک صیقیلی یرلرینی کوشتمک : یاقه آچیلیر. یاقه لق ،
بیون باغی چیقاریلور، آصق، یلک، قوشاق چوزولور دوکمه لر
آچیلور .

یارهنک یرینی آکلامق : یاره یی سویله یه بیلورسه صو -
زارق، سویله یه مزسه وجودینک هر طرفنه باقه رق آکلاشیلور
والبسه اوزرنده کی یرتیق، یانیق، قان لکه لری کبی اشارتله
یارهنک یری آکلاشیلیر .

یاره بی میدانہ چیقارمق : یارہ چبلاق بر یرده اولمایوب
البسه ایچنده اولورسه شہلی یرده کی البسه سوکیلہ رک ویا
کسیلہ رک میدانہ چیقاریلیر .

قانی دیندیرمک : [قان قرمزی سیاہ دامارلردن کلدیکنہ
کوره اسم آلیر . قرمزی دامارلردن کلن قان «نزف شریانی» سیاہ
دامارلردن کلن قان «نزف وریدی» ؛ ایجہ دامارلردن کلن قان
«نزف شعری» اڭوخیمی نزف شریانیدر . دیکرلری یا کندیلکندن
ویا کوچک بریاردم ایله دینه بیلیرسه ده نزف شریانی قولایلقله
دیندیریلہ مز . هله پک بیوک قرمزی قان دامارلردن کلیورسه
انسانی بردنبره اولدیره بیلیر . بر قانک آقیشنه باقمقله هانکی جنس
قان دامارلردن آقیدینی آکلاشیله بیلیر : قرمزی دامارلردن کلن
قانک رنکی آچیق قرمزی اولور . ویوکه بردامارلردن کلیورسه
کسیک کسیک آتیلوب فیشقیرہ رق آقارویارہ ایله قلب آراسنده کی
پارچه سی صیقیلیرسه فیشقیرمسی آزالیر . ایجہ باصیلیرسه قان
دینر . سیاہ قان دامارلردن آقان قانک رنکی قویو قرمز مسی
یعنی سیاهمسی قرمزی اولور . وفیشقیرمقسزین ، بر دوزی یه
آقار ، قلب ایله یارہ آرمسی صیقلمقله ینه آقار . ایجہ قان دامارلردن
کلن قان غایت خفیف بر صورتده یاییله یاییله آقار [آقان برقانی
دیندیرمک ایچون قانک دامارلردن چقمسنک اوکنی آلق لازمدر .
اهمیتسز ، فیشقیرمقسزین بر قانامق ایسه یارہ اوزرینه اجرا

ایدیلن خفیف بر تضیق ایله دینه بیلیر. یاره بی تمیزله یوب اوزرینه
 تیمار طاقنی قویمق و صارغی ایله ازجق صیقمق بویله خفیف
 قانامه لری دیندیره بیلیر. اگر فضله قان کیورسه تضیق اصوللری
 قوللانیلیر. دامار یاره ایله قلب آره سنده یارمقله باصیلیر و یا قول،
 باجاق کبی یرلرده یاره نك اوست طرفنی بر باغ ایله بوغمق و یا یاره
 ایچنه تمیز طیارل صوقوب اوزرینی صیقیجه باغلامق ایله یا خود
 دامار صیقیجی آلاتلر قوللانمقله قان دیندیریلر. بیوک قرمری
 دامارلر بوکبی تضیق اصوللرندن بریله صیقشدیریلر رق موقه
 قان دیندیریلر. صکره کسیلن دامار طیب و یا اوپراتور
 طرفدن دیکیلیر.

تضیق اصوللریله قان دیندیرمک

طوغریدن طوغری یه یاره بی تضیق ایتمک :

۱ یاره نك ایچنه تمیز، پاموق یوماقچقلرله باصه رق یاره لانان
 قان طمارلرینك آغزینی طیقماق .

۲ یاره نك دیشاریسندن قان طمارینك کچدیکی یر اوزرینه
 باصه رق یاره لانوب آچیلمش اولان قان طمارندن قان ککسینی منع
 ایتمک . . « هانکی اصول قوللانیلیر ایسه قوللانیلسون .
 قوللانیله جق شیر حاضر لانه یه قدر قانی یارمقله دیندیرمک
 چالیشملی، تمیز یارمنی عجله یاره نك دلیکنه قویوب طمار اوزرینه

باشمیلدر . بونی پك چوق یاره لیلر کندیلری یابه بیلیر .
 یاره نك ایچنه تضییق : برویا ایکی پارمنی مفاد تعفن باصغی
 بزلیری ویا قایناتیلشمش تولبندلرله صارارق پارمقلر یاره نك دینه
 صوقیلور . بزراوراده براقیلمق اوزره پارمقلر یاواشجه چکیلیر .
 وبوعملیات برقاچ دفعه تکرار لایوب یاره نك ایچی ایجه طولدیریلور .
 صکره یاره یه طولدیریلان طپانك اوزری برایی قات باصقی
 بزیه اورتیلوب برقاچ صارغی قویریمی ایله صیقیجه صاریلیر .
 صارغی یوقسه مندیله ، چوره ، بیون باغی کبی برشی قوللانیله .
 بیلدیکی کبی باصغی بزلیری ویا تولبندیرینه تمیز پاموق ، یپاغی ،
 قاو کبی برشیئده اولور .

یاره نك دیشاریستدن تضییق : بونکچون شبهه ایدیله قان
 طمارینه یاره ایله قلب آراسنده پارمقله باصیلیر . وقول ، باجاق
 یاره لرنده یاره نك اوست طرفندن برباغ ایله صاروب صیقمقله
 تضییق اولنور . قول و باجاق یاره لرنده قولک ویا باجاغک شدتله
 بوکولسی قان طمارلرینی شدتله صیقه جفندن قان قولده دیرسکدن
 ویا باجاقدده دیزطپوغندن یوقاری یه کچه میه جکندن قان دینه بیلیر .
 اکر بویه جه قان دینرسه قولى ویا باجاغی بوکمش وضعیتده
 طوتدیرمایدیر .

قرمزی قان طمارلرینك تضییق محلی — قرمزی قان
 طمارلری الكسطحی بولنان ویا پارمقله میک آره سنه صیقشدیرلمسی

قولای اولان قسمندە تطبیق ایدی‌لور. قول ویا باجاقده یارەنک
 خداسی نرەسی اولورسە اولسون قان طمارى دائما یوقاری
 طرفدن تضییق ایدملیدر. یارە الدە اولورسە قولتوق آلتندن
 آشاغیدە وقولک اوزرندە بیلک وقول طمارلرینە . . باجاقده
 اولورسە قاصیق‌دن آشاغیدە اویلوغک اوک ویوقاری طرفندەکی
 قرمزى داماری بولوب صیقمق لازمدر. اویلو قان طمارى قاصیق
 یوکومنک آلتندن، اوموز دامارلریچون کوپریجک کیکنک هان
 آرقەسندن واورتەسندن کوپریجک قان طمارینە ... بویون
 یارەلرندە غرتلاقک طیش طرفندن صرت کیکنە طوغری
 عموداً باصیلیر. باش یارەلرندە باشک سطحی قرمزى طمارلری
 تضییق اولنوب یوز یارەلرندە آلت چکە کیکنک اوستندە یوز
 قرمزى قان طمارى... آلین وباشک یان طرفلرندەکی یارەلردە
 قولاغک اوک کنارندن کچن قرمزى قان طمارى باصیلیر .
 وباشک آرقەسندەکی یارەلریچون قولاغک آرقەسندەکی چیقینتی
 اوزرینە باصیلیر .

یارەنی تمیزلەمک

یارەنک کنارلرندە وایچندە بولنە بیلن قان یختیسی توز ،
 طوپراق، الیسە پارچەلری کبی یابانجی شیلری چیقارمق ایچون
 ایلکین اللر صابونلە وقاینامش صوابلە ییقانوب تمیزلەنیر . صکرە

قايىنامش صويه باتيرلش تميز پاموق ويا تولبند پارچه جككريله
يارەنك كنارلرى ايجه تميزلەنير . و يارەنك ايچنە خفيفجە
طوقنەرق ھەردرلو كيرليكلرى تميزلەنير . راقى، قولونىا صويى
كېي اسپرتولى برشى ايله يارەنك كناريني كوزلجە سيلمكده ايدىر .
يارەيى تميزلەمكە يارەيى تيمار ايتمك دىنور .

يارەيى ھوادن قورومق

ھوادە بولنان توز وميقروبلرك يارە ايچنە دوشوب يارەيى
آزدىرمامسى ايچون ايجه تميزلەنن بر يارەنك اوزرىنى آچىق
براقيوب برقاچقات تميزتولبند ويا پاموق ايله اورتىك واشبواورتولرك
دوشمەملرى ايچون اوزرلرينى صارغى ايله صارمق لازمدر .
يارە اوزرىنە قونىلان شيلرە تيمار طاقى اسمى ويريلور .

صارغى صارمق

صارغى صارمقدن مقصد پانسەن طاقلرينى ، تولبند ويا
پاموقلرى يارە اوزرندە طوتدىرمق ويا صارىلان يرە تضيق
ايتمكدىر . صارغىيى ايجه طوتدىرەيىلمك ايچون ايلك صارغىنك
اوجنى ايكي دفعە اوست اوستە چويرملىدر . قول، باجاق كېي
مخروطى محللرە صارغى صارمق ايچون صارغىيى اشاغىدن
وچقورجە برىردن صارمايدىر . دىرسەك قالچە كېي مفصللردە
مفصلى تاماماً اورتەيىلمك ايچون صارغىيى خچوارى صارملىدر .

تیمار پاکتجیکی — حرب پاکتجیکی

تیمار پاکتجیکی قرق سانتیمترو طولنده ویکرمی سانتیمترو عرضنده مضاد تعفن ایکی عدد تولبند باصقیسندن و برده اوچ مترو طولنده و بش سانتیمتره عرضنده بز بر صارغیدن و برر قانجه لی ایکنه دن عبارتدر . بونلرک جمله سی صوچکمز بر قوماش داخلنده صارلمش بولنور . اشبو تیمار پاکتجیکی مرور زمانله رطوبتله نوب بوزلدیغندن کلخانه سریریات خسته خانه سنده دها قوللانیشلی پاکتکل اعمال ایدلمشدر . صوچکمز کاغد ایچنه فنا تمیز بر صارغی قونمشدر . صارغینک بر طرفنده تولبند و بر طرفنده بر پاموق پارچه سی واردر . بر ایپلک پارچه سی ایله طوتدیرلمشدر . ایکی یه آیرمق لازم کلیرسه ایپلک قوپارلملیدر . اوزری تمیز بزله اورتلشدر . اولدن میقروبلری اولدیرلمش یاقیلرده تیمار پاکتجیکی ایشنی کوره بیلیر .

یاره لیلره خصوصی یاردیملر

بایلمق: یاره لیلر چوق دفعه بایلیرلر . بوبایلیمه قورقودن و یاشدتلی صانجیدن و یاخود فضله قان غیب ایتمکدن ایلری که بیلیر .

کندندن کچوب بایلیمش اولان یاره لی بی آییتمق

۱. — یاره لی صرت اوستی یاتیرملی . . بی آلتنه یاصد یقمسی

برشی قویملی، باشنی آلچقجه بر اقلی. ۲ — تنفسه مانع اوله بیلن
یا قهلق، بویون باغی کبی شیلری چیقارملی؛ ایلیکلنمش دو کملری
آچلی؛ قوشاق، آصق کبی شیلری چیقارملی. ۳ — کوکسی
وقوللر ایله باجاقلری اسپرتولی برشیه ایصلا تلش بز لرله او غمالی؛
یوزینه سرین صوده ایصلا تلش بز لر قویملی؛ ۴ — تنفس
صناعی یا یملی.

قریق لرنده امداد

قریق یاره ایله بر لکده ایسه اولا یاره یه باقلی، صکره یاره
ایله برابر قیری قیده صارملی. یاره یوق یالکز قریق وارسه
قیریلان یری دستکله ملی (اگر دستکلنمزسه قیریلان کیمک
اوجلری بر طاقم اویقونسز حرکتلرله هم زیاده آغری یاپار
همده یاننده بولنان اعضایی زده لیه بیلیر.

قول و باجاق قریق لرنده قریق یری دستکله مزدن اول
قوله و باجاقه طبیعی وضعیتلرینی ویرملی و قریلان طرفک یانلرینه
جبیره دیدکلری قریق تخته لرینی قویملی (حاضر یاپیلش جبیره لر
یوقسه تخته و یا مقوله پارچه سی، باستون، سونکو قینی، قیلنج
قینی کبی برشی آلیر و اوزرلری بز، پاموق و یا صمان ایله اورتیلور)
صکره صارغی، بویون باغی، سیجیم، تفنک قایشی کبی برشیه
صارملی.

یاجاق قریق لرنده قیریلان باجاق صا غلام باجاقه یاقلاشد.

یریلور، اوزون بر قیریق تخته سی ویا بر تفنك ایله برلکده صاریلیر.
قیریلان قولى قیمیدل آتامق ایچون مندیله، ینی، بویون باغی کبی
برباغ ایله بویونه آصملى و یاخود جاکت و پالطونك بر ایکی
دوگمه سنی آچهرق قولى آرهلق یره صوقوب بوکوک طوتملیدر.

باش، کوکس وقارنى نهلن یاره لرده امداد

بوکی آغر یاره لیلری صارصمقدن صاقنملى. یاره اوزرینه
آرتضییقلی بر تیمار یاپملى و یاره لی کندنده دکلسه هیچ برشی
ایچیرتمه ملی. قارنده یاره اولانلره کندیسی صو ایسته سه دخی
ویرمه ملی در.

یاره لیلرک و خسته لرک نقلی

یاره لی یورویه بیلدیکی وقت بر کشی ویا ایکی کشی قولنه
کچهرک یاردیم ایدیله بیلیر. اگر یورویه مزسه، فقط یاره سی
بك آغیر دکلسه وچوجق ایسه برکشی قوجاغنه آلوب طاشیه
بیلیر. طاشیرکن یاره لی طرفی کوکسنه چارپماغه دقت ایتملى.
اگر بیوکسه ایکی کشی، بری باش بری آیاق طرفندن
قاورا یوب کوتوره بیلیر. یاره لی اوزاق بریره نقل ایدیله جکسه
سدیه، تسکره قوللانیلور.

خسته بی سدیه ویا تسکریه یرلشدیررکن هیچ بریرینی
ایچتمه مکه واصل صا صامماغه دقت ایتملیدر. لکن سدیه،

تسکره بولنه مازسه اوزمان اونك يرينى طوته بيله جك بر شى
بولمى .. قابوت ، چارشاف ، چوال ، مردیون و سائر ایشه
یاره یه بیلیر . خسته لرده عینی وجهله نقل ایدیلیر .

§

آنسزین باش کوسترن بر قضا ویا خسته لکده حکیم
کلنجه یه قدر یاپیله جق ایلک یاردیملر

یاره لره ایلک یاردیم

یاره میدانده دکلسه الیسه یی کسه رک ویا سوکهرک یاره یی
میدانه چیقارملى؛ یاره یی تمیزله مى . تمیز بر پارچه پاموق ویا تولبند
قاینامش صویه ویا آزاجق اسپرتو ، راقی یه دالدیروب یاره نك
کنارلرینی ایجه تمیزله مى ، یاره نك ایچنده یبانجی بر شى بر اقاملى .
اگر قان آقیورسه ، قانی دیندیرملى . قانك کلدیكى بره تمیز
پاموق ویا تولبند قویوب اوزرینه پارمقله باصیلیر یاخود یاره
اوست طرفندن باغلانیر . اگر قان فیشقیره رق فضله کلیورسه
تمیز بر تخته ویا طاش پارچه جغنی بر تمیز تولبندك ایچنه قویوب
صارملى . صکره بزك ایکی اوجنی بردو کوملى حلقه ایله باغلاملى .
وحلقه نك دو کوملى یرینه بر جوق پارچه سی صوقه رق یاواشجه
بوکوب چویرملى ، بوچوریلدکجه ایچنده کی طاش ویا تخته پارچه سی
یاره نك اوزرینی صیقیشدیروب قانی دیندیره بیلیر . یاره یه تیمار

پانسان ياپملى . تىمىز لەنن وقانى دىندىرىلن يارە اوزرىنە تىمارپا كىتچىكى
 وارە اونكلە يوقسە اونك يىرىنى طوتەبىلەك پانسان طاقلىرى
 تىمىز تولىند وياپاموق قويوب اوزرىنى صارملى .

يارەلى يى كىتورمك : يارەسنە پانسان ياپملى يارەلى اكر
 آياغىدن يارەلمىش ايسە كىندى كىندىنە يورويەمىە جىكندن يا ال
 اسكىمەسى اوزرىنە اوطورتەرق ويا قوجاقدە طاشىەرق ياخود
 سدىە تسكرە اوزرىندە كىتورىلور .

اكر يارە باشندە ايسە بىزكىشى يارەلنك قولنە كچەرك كو-
 تورەبىلىر . باشندەكى يارە آغىرچە ايسە سدىە ايلە كوتورىلور .
 يارەلىلرى كوتورركن اصلا صارصاملى ، برىرە چارپاملى ، يارە
 اوزرىنە هىچ برىشيلە طوقوناملى ، يارە كوكسى ويا قارنى دەلمىش
 بر يارە ايسە هكىم كىلدن خستەنى هىچ قىمىلداتماملىدر . (يارە
 اوزرىنە اورومجك آغى ، كىرلى بىز پارچەسى ، توزلى ياغ مرهم ،
 صوغان كى مىقروبلرلە ملوٹ شىلرى قويماملى ويارە اىچنى هىچ
 برىشيلە قورچالاماملى .)

قىرىقلردە ايلك ياردىم

قىرىلان ىرى ميدانە چىقارملى . البسەلرى كسەرك ويا
 سوكرەك قىرىق ميدانە چىقارىلىر . قىرىغك بولندىنى ىرە كورە
 وجودە وضىعت وىرىلىر . اكر قىرىق باشدە ايسە قىرىقلىنى
 اوزون ياتىرىلوب باشنى يوكسكجە طوتملى اكر باجاقدە ايسە

باجاڭنى يوكسىتملى. قىرىق يرنده ياره وارسه ايلك اوڭجە ياره نى باقملى . ياره لردە اولدىنى كې ياره ميدانه چىقاريلير ، تىزله نير ، قانى دىندىريلير. قىرىنى قىلدا ناماز برحاله كىتىرملى . اكر قىرىق قولده ايسه ، قول بويىچە ؛ باجاقده ايسه ، باجاق بويىچە ؛ بىلكلردە ايسه ، بىلكلردن اوزونچە وقىرىق يرينك بېچمنە كوره اينچە تخته ويا قالىنچە مقوا پارچە لرى كىسوب قىرىق اطرافنە قونىلير واو- زرلرى صىقچە صاريله رق قىرىق قىلدا ناماز برحاله كىتىريلير . قىريلان باجاقسە ، صاغلاقام باجاغە باغلانە بىلير. قىرىقلى يى كىتورمك طبقى ياره لىلر كې كىتورىلور .

(كوتورر كن قىرىق كىمك اوڭلرينك بر برىنە سورونمە . مەسنە باقملى ، قىرىق پارچە لرىنى قىلدا تىمغە قالىقشاملى ، قىرىق يىرىنى قىلدا ناماز برحاله كىتىرمە دن خستە نى بردن برە قىلدا تاماملى .)

بورغولمە دە ايلك ياردىم

بورغولان ىرك اوزرىنە صىق صىق صغوق صويه باتىرلىش بىزلىر قويملى ، وياخود بورغولان ىرى ، بول صوايله يىقاملى واغرىسى ، شىشى كىنچە يە قدر قىلدا تاماملى ، و خفیفچە آشا- غىدن يوقارى يە طوغرى اوغىلىدر .

بورغولان ىر اوزرىنە پىس ياغلر ، كىكىن صولر قويماملى وسلوك ياپشدىروب قان دە الماملى .

بره لئمه ده ايلك يارديم

بور غولمه ده كي ياردينلر ياپيلير . بره لئمن ير آل ، آياق كي
صويه دالديريله بيله جك بر ير ايسه صغوق صوده طوتولميدر .
صودن چيقاردقن صكره اوزرينه صغوق صوده ايصالتمش
بزلر قويمليدر .

بره لئمن يرى قادينلرك ياپديغى كي دوكمه ، پاره كي شيلرله
باصدرمغه صواشاملى واوزرينه پس ياغلر سورمه مى و سلوك
ياپشديروب قان آلامليدر .

چيقيقلرده ايلك يارديم

چيقيق يرينه صوئوق صوده ايصالتيلوب صيقلمش ياش
بزلر قويملى؛ صويه دالديريله بيله جك بر ير ايسه همان صويه صو-
قوب بر آاز صوده طوتولى . اويناق يرندن چيقان كيكي يوواسنه
صوقمغه چالشمالى . بونكله برابر ياكلش برايش يامهمق ايچون
هكىمي بكله مليدر .

(چيقيق يرينه پس ياغلر ، صولر قويمالى ، سلوك ياپشدر .
ماملى . چيقيقى يرينه يرلشديرمك ايچون فضلّه اوغراشاملى .)

يانيقلرده ايلك يارديم

طوتوشان يريني سوندورملى . اوزرينه برچاكت ، يورغان
كي برشى آتهرق باصديريلير ، خفيف يانيقسه اوزرينه ياسودالى

صو ویا تمیز صوئوق صوده ایصلادلش بزلر قویملی و (ال آیاق
 کبی بر یرایسه) یانان یری بویله بر صو ایچنه دالدیروب بانیو
 ایتملی . بادم یاغی . زیتون یاغی ، غلیسرین کبی بر یاغ سورملی ،
 یانیق اورتیه درجهده اولوب اوزرنده قبارجقلر وارسه قبار .
 جقلری آلت طرفندن علودن کچیرلمش بر ایکنه ایله دملی ، صکره
 اوزرینی زیتون یاغی ، یانمش کیرج صوی قاریشدیره رق یاییلان
 یانیق مرهمنی سورملی یاخود عادتا یاره لرده اولدینی کبی پانسان
 یاییلی . آغیر یانیق ایسه عجله هکیم چاغیرمه لی وهکیم کلنجه یه قدر
 یانیغک آتشی آلتق ایچون اوزرینه تمیز صوئوق صوده ایصلا .
 دلمش تولبندلر قویملیدر آغز ، بوغاز یانمسندیه ایسه ابه کومه جی
 حتمی کبی یوموشاتیجی شیلری چای کبی یاپوب غرغره ایتملی .
 (خسته اوشوتمک ، قبارجقلری قوپارمق ، یانیق اوزرینه
 چورچوپ قویمق ، یانیغی ازدیریحی یاغلر سورمک ویا کیرلی
 بزلر قویمق پک ضررلیدر .)

اوتالانمه « زهرلنمه ده » ایلك یاردیم

وجوده کیرن زهری چیقارمغه چالیشملی . بونک ایچون
 قی ایتدیرمک . سورکون ویرمک ، ترلمک ادراری آرتیرمق
 لازمدر . قی ایتدیرمک ایچون . خسته نک بوغازینه پارمق ویا
 برتوی صالهرق کوچک دیلنی غیجیقلاملی ویا بول ایلیق صو

یاخود طوزلی ویایاغلی ، صابونلی برصو ایچیرمیدر . سورکون ویرمک ایچون . بول صوایچیرمک ، طوزلی ویا صابونلی صوایله اشاغیدن تنقیه یایمق ویا برسورکون علاجی ایچیرمک لازمدر . ترلتمک ایچون . بول صیجاق صو ، چای اخلامور کبی برشی ایچیرملی . ادراری آرتدیرمق ایچون . بول صو ، سود ، ایچیرمک لازمدر . اکر زهرهنوز یوتیلش ایسه زهر معدهده ایسه قی ایتدیرمک . ارادن ایجه کچمش ایسه یعنی زهر باغیرصقلره کچمش سه هم قی هم سورکون ویردیرمک . دهها زیاده اولمش سه یعنی زهر قانه قاریشمش سه هم ترلتمک وهمده ادراری آرتدیرمق لازمدر .

زهرله نن اویشوقلق کوسترر ، اوشورسه وجودی اویندیروب ایصتمق لازمدر . خسته یی او یوتاملی وجودینی اسپرتو کبی برشیئله اوغملی وصیق صیق بول وقیو ساده قهوه ایچیرمیدر . زهرله نن صایقلا یوب صیچرایورسه وجودینی صیجاق صویه باتیریلوب صیقلمش ایلیق چارشافه صارملی ویا ایلیق صویه طال دیرملی ، اکر تنفس کیلمش ، بوغولش بر حالده ایسه همان تنفس صناعی یایلمیدر . زهرک جنسی بیلنیرسه جنسنه کوره برپان زهر ویرمیدر . صوهر زهرک پان زهریدر . قی ایتدیرمک ، سورکون ویرمک ، ترلتمک ، ادراری بوللاتمغه وزهرک قویولوغنی صولاندیرمغه یارار . زهرک جنسی بیلنمیورسه

هکیم کله دن هیچ بر پان زهر ویرمه ملی. کبریت باشی ایله یعنی
فوسفورله زهرله نلره سوت ویاغلی شیلر ویرمه ملی.

بایلمه ده ایلک یاردیم

باییلان کیمسه یی شیلته، یتاق کبی برشی اوزرینه اوزاتوب
یاتیر ملی، باشنی آچقجه و قوللرینی یوکسکجه بولندیر ملی، الیسه سنی
آچ ملی، یوزینه صغوق صو سر ملی، برونه کسکین سرکه، لقمان
روحو، نشادر روحو کبی برشی قوقلات ملی، بوغازینی کوچک
برتوی قلمیله قیقلاملیدر. بایلمشک باشنی یوقاری یه قالدیر ماملی.

برون قانامه سنده ایلک یاردیم

قانایان برون دلیکنک اوتیه طرفنده کی قوی بر قاچ دقیقه
قالقمش طوتم ملی، خسته یی سرین بریره آلوب تازه هوا آلدیر ملی،
آلته صغوق صو بزلری قوی ملی، برونه صیجاچه صو ویا صیجاق
طوزلی صو چکمه ملی. آیاقلری صیجاق سرکه لی صویه دالدیر.
مه لی، قان کلن دلیکی پاموقله طیقاملی برونی قانایانی پک صیجاق
یرده طوتماملی.

آغز دن قان کلکسنده ایلک یاردیم

آغز دن قان کلن کیمسه اوزون یا تم لی سرین وهوالی بریرده
اوطورمه ملی، صیجاق ییوب ایچمه ملی، کوچوک بوز پارچه لری
قوی مالی، براز طوزلی صو ویا ایصیرغان حاشلامه سی صوی ایچیر ملی.

کوزه چوب قاقچسندە ايلك يارديم

کوزه توز کيرپيک، چوب کبي برشی قاقچجه برپارچه جک
پاموق ويا کاغدی پک اينجه برسیغاره کبي بوکوب کوز قباغنی
چویرملى، توز، چوب، کيرپيک، صاچ، هر نه وارسه بويله جه
آلغه چالیشملى، کوزه قاقچان دمير توزی کبي شيلر صاپلانوب
قالیرسه چيقارمغه اواغراشلمايوب هکیمه کوسترلملیدر. کوزی
اوغمقسزین بول صو ايله ییقاملیدر. «کوزی اوغمالی، باتوب
صاپلانان شیلری سیوری اوچلی بر آتله المغه قالقیشمالی.»

قولاغه سینک، پیره، ويا توز کبي برشی قاقچسندە

ايلك يارديم

قولاغه بر قاقچ دامله تمیز زيتون یاغی داملاتملى ويا ايلیق
صو شریغه ایتلی. قولاغه کیرن شیلری چيقارمق ایچون
قولاق ایچنه برشی صوقاملیدر.

صوده بوغولانلره ايلك يارديم

صودن چيقاریلان بوغولمشک الیسه سنی صویوب آغزینی
بروننی تمیزلمی. قوم، کوپوک کبي شیلری چيقارملى، یوتدیغی
صولری چيقارملى. بوغولمشى یوزی قویون، قارنى اوستنه
یاتیرملى وقارننک التنه یاصدیقلق ایدهبيله جک برشی قویملی،
تنفس صناعی یاپملى: قوللر دیرسکلردن یاقالانوب قولاقلرینه

کوتوریلور، صکره کوكسك ياننه کتيروب باصیلير و يادیل بر کرته ده چکیلوب براقیلير .

بتون وجود اوغولور ووجودی ایصتمق ایچون خسته صیجاق صوده ایصلاتیلوب صیقلمش چارشافه صاریلير، وجودك هر طرفدن بزلره صارلمش صیجاق صو شیشه لری ویا صیجاق طوغله دولاشدیریلير، بوغولمش کندی کندینه تنفس آنجهیه قدر بر قاج ساعت یاردیم ایتلی . «یوتدینی صوینی چیقارمق ایچون اصلا باش آشاغی آصاملی ، فضله صارصاملی ، کندینه کله دن هیچ برشی ایچیرمه ملی .»

اون ، اینجه قوم کی بر کومه ایچنه کومیلوب بوغولانلره ایلک یاردیم

آغز، برون، بوغازده کی اون ویا قوملری چیقارملی و صکره صوده بوغولمشلره یاپیلان یاردیملری یاپملی .

آصیلانلره ایلک یاردیم

سیاست میداننده کیلردن ماعدا دیگر اصیلانلرک بوغازنده کی ایپی چیقارملی، الیسه لری کوشتملی، تنفس صنایی یاپملی ، ایپی کسمکده شبهه لی بولنماملی .

نفسی کسینلره ایلک یاردیم

تنفس کسن هر نه ایسه خسته یی اوندن قورتارملی . آچیق

هوايه چيقارملى، وجودى اوغملى، يوزه صو سىرپملى. تنفس
صناعى ياپملى. «خسته يى صيجاق بر ياتاغه قويما ملى؛ قىزغىن
كونشه قارشى طوتماملى و كسكىن بوغولرى تنفس ايتدیرمه ملى.»

صيجاق ويا كونش اورمشلره ايلك يارديم

خسته يى كولكه يه ياتيرملى، اليسه لرني كوشتملى، باشنه
صوئوق صوايصلاتيلمش بزلر قويملى و باشنى يوكسك بولنديرملى
اياق لرني صيجاق صويه دالديرملى، وجودى اوغملى، اشاغيدن
صابونلى ويا طوزلى صوايله تنقيه ياپملى. «بوزلى صو ايچيرملى،
سلوك ياپشديرما ملى. باشنى آلچاق بر اقاملى.»

صوئوقدن طونمده ايلك يارديم

صوئوقدن طونان كيمسه يى بردنبره صيجاق بريره كوتورما ملى.
ايلك او كجه صوئوق بر او طه يه قويملى، البسه لرني كسملى؛
وجودنى قارله ويا بوزلى صويه باتيرلمش بزله اوغملى؛ بويله
طونمش قلانى قيملدا تاممليدر. يواشجه ايصتملى. كندينه كلنجه
بر صيجاق قهوه ايچيرملى طونمشى بردن بره صيجاق او طه يه
ويا آتش قارشوسنه قويما ملى كندينه كلهدن هيچ برشى ايچير-
ما ملى ايچكى هيچ ويرلمه ملى.»

ييلديرم اورمه سنده ايلك يارديم

خسته يى هوالى بريرده آلملى، اليسه لرني كوشتملى، يوزينه

صو سریملی وجودینی اسپرتولی شیلرله اوغملی ، تنفس صنایی یایملی .

صرعه لی یه ایلك یاردیم

خسته یی اوزون یاتیرملی ، الیسه لرینی آچلی ، بریرینی چارپوب یاره لایماسنه باقلی . « کریلن قول و باجاقلرینی بوکمه قالدیشمالی ، کندینه کله دن هیچ برشی ایچیرمه ملی . »

بایلمه — « باشه قان اورمه — دامله ده » ایلك یاردیم خسته یی یاتیرملی و باشنی قالدیرملی هوالی براوطه یه قویملی . باشنه صوئوق صوده ایصلادیلوب صیقلمش بزلر قویملی آیاقلری صیجاق صویه دالدیرملی . . بالدیرلره حردال کاغدی کزدیرملی . یارم تنقیه یاپملی . و بیوک صودلیکی کنارلرینه سلوک یاپشدیرملی . (دامله اینانلره اسپرتولی برشی ایچیرمه ملی . و باشنی آچق بولندیرمه ملی .)

بایلمه « باشند قان چکلمسنده ایلك یاردیم »

خسته یی یاتیرملی . و باشنی قالدیرماملی ، آچاق بریره قویملی وجودینی اسپرتولی شیلرله اوغملی . « باشنی یوکسک طوماملی ، آیاقلرینی صیجاق صویه قویماملی و سلوک یاپشدیروب قان آلامالی . » کندندن کچمش سرخوشه ایلك یاردیم

سرخوشه قی ایتدیرملی . کوچک دیلنی پارمق ویا توبله غیچقلاملی ویا بول ایلیق صو ایچیرملی . براز قی ایتدکدن صکره

بش اون دامله نشادر روخنی برازشکرلی صو ایچنده ایچیرملی.
« سرخوشی پک صیجاق براوطه یه یاتیرماملی . »

قودوز حیوانلرک ایصیرمسنده ایلک یاردیم

ایصیریلان قودوز آشیشی اولان بر مملکتمده ایسه عجله
اورایه کیتملی . اکر بویله بر یردن اوزاق ده ایسه ایصیریلان
یرک اوست طرفنی صیقیلوب باغلاملی، ایصیریق یرینی قاناتوب
صوایله ییقاملی و بردمیر پارچه سنی قیزدیروب یاره یی داغلاملی
« ماشا ، اناختار ، چیوی کبی هر دمیر پارچه سی ایشه یارار .
قرمرزی بیاض اولنجه یه قدر قیزدیرملی . » عجله قودوز آشیشی
یاییلان خسته خانه یه « داء الکلب تداویخانه سنه » کوندرملی .
قودوز کویکک کوزلری فیزلار ، دیلی صارقار .

زهرلی حیوانلرک صوقمسنده ایلک یاردیم

قودوز یاره سنده اولدینی کبی یاره نک اوست طرفندن
باغلا یوب صیقلملی، یاره یی براز قاناتلی بول صو ایله ییقاملی ،
ایصیریلن یرده آری، عقرب دیکنی کبی برشی وارسه جنبیزله
چکوب چیقارملی ، اسپرتولی بر صو ایله ویاخود صولاندیرلمش
نشادر روخی ایله یاره یی اوغملیدر .

قره قبارجقده ایلک یاردیم

بر یرده قره قبارجق حیقنجه عجله داغله ملی وهکیمه
کوسترملی .

قوش پالازنده ايلك يارديم

بوغازده بياض درى پارچه لرى كوزوكنجه عجله هكيمه
كوسترملى . وهكيم كلنجه يه قدر ليون صويي ايله غرغره
ياپديرملى .

قره صيتمه ده ايلك يارديم

سولفاتو ايجيرملى وياتنقيه ياپملى وهان هكيم چاغيرملى .

قوم سانجىلارنده ايلك ياردم

سانجيان يره صيجاق صوده ايصلا تيلوب صيقلشمش بزلر
قويملى . تنقيه ياپملى . عجله هكيم چاغيرملى .

كور باغيرصاق اوجى آتشنمسنده ايلك ياردم

هيچ برشى يه يوب ايجمه ملى . عمل علاجى ايجمه ملى . وتنقيه
ياپماملى . عجله هكيم چاغيرملى .

تعبیرات واصطلاحات قانونیه لغتجه سی

توقیف — محکوم اولمایان بر کیسه ی تحقیقات واستنطاق اناسنده بر مدت آلیقویمق .

موقوف — توقیف اولنان کیسه .

توقیفخانه — موقوفلری آلیقویمق ایچون اولان بنا .

موقت توقیف مذکره سی — بر کیسه نک اوتوز برکون

توقیفی ایچون مستنطق ویردیکی رسمی بر مذکره در .

غیر موقت توقیف مذکره سی — بر کیسه یی بر حکم

چیقنجه یه قدر الیقویمق ایچون مستنطق ویردیکی رسمی بر مذکره در .

مظنون علیه — حقنده ، علیهنده جنایت وجنحه وقباح

جرمی رسماً اسناد وادعا اولنان کیسه .

متهم — هیئت اتهامیه دن جنایتله اتهام اولنان مظنون علیه .

مجرم — جنایت نوعندن بر جرم ایشله دیکنه قرار ویریلن

متهم .

محکوم علیه — علیهنده ، حقنده جنایت وجنحه وقباح

جزالری ویاخود تضمینات وضرر زیان حکم اولنان کیسه .

مسئول بالمال — بشقه سنك ياپديغى برجرمدن طولايى
كنديسك ضرر وزيان اوده مسى لازمكلن كيمسه .

محكمه — برحكم وقرار ويريلن محل .

بدايت محكمه سى — قباحث وجنحه دعوالرينه باقان محكمه .

استيناف محكمه سى — جنحه دعوالرينى تكرار وجنايت

دعوالرينه طوغريدن طوغرى يه باقان محكمه .

تميز محكمه سى — قباحث، جنحه ، وجنايت دعوالرنده

قانونه واصل محكمه يه مخالف برجهت اولوب اولمايغنه باقان

محكمه .

درجه اولى ده حكم، بداية ويريلن حكم، حكم قطعى —

استيناف و تميزى قابل اولان حكم .

درجه ثانيه ده حكم، استينافاً ويريلن حكم، درجه اخيره ده

حكم — يالكز تميز ايدلسى ممكن اولان حكملر .

استيناف دعوى — درجه اولى ده ويريلن بر حكمك

فسخيله يكيدين باقلمسى ايچون دعوى ايتك .

فسخ حكم — بداية ويريلن بر حكمى استيناف محكمه سى

يوزوب يكيدين دعوايه باقق .

نقض — بداية ويا استينافاً ويريلن بر حكمى محكمه تميز

يوزوب يكيدين باقق اوزره حكمى ويرن محكمه يه كوندرمسى .

تميز دعوى — جنايته دائر حكملر ايله درجه ثانيه ده

ويريلن قباحته ، ودرجه اولی ده ويريلوب استينافاً تصديق
اولنان وياستيناف مدتی کچن حکملرک تقضی دعوی ایتک .
هیئت اتهامیه — برکیمسه نک جنایتله مظنون علیه یعنی متهم
اولوب اولمادیغنه قرار ویره ن هیئت .

اتهام مضبطه سی — جنایتله مظنون علیه اولانلرک اتهام
اولندقلرینه دائر هیئت اتهامیه دن ویریلان قراری حاوی
مضبطة .

اتهام نامه — هیئت اتهامیه دن جنایتله اتهام اولنهرق اتهام
مضبطة سی ویریلن شخص حقنده مدعی عمومینک جنایت
محکمه سنه ویردیکی تقریر ، راپور .

مفسوخیت ادعاسی — جنایتله اتهام اولنان کیمسه نک
ویاخود مدعی عمومینک ، اتهام مضبطه سی فسخ ایتدیرمک
ایچون تمیز محکمه سنه ویردکلری استدعا .

جنایت محکمه سی — صرف جنایت دعوالرینه باقان محکمه .
استتطاق نامه — مظنون علیه اولان کیمسه لره مستنطق
طرفدن صوریلان سؤالر و مظنون علیه طرفدن ویریلان
جوابلرک وسائر قرارلرک یازلدیغی اوراق رسمیه .

استجوابنامه — کرک مظنون علیه وکرک شاهد وسائره
مستنطقدن بشقه مأمور سؤال وجوابلری یازدیغی ورقه .

مستنطق — مضمون علیہاری ومدعی وشاهد لری استجواب
واستنطاق ایدن مأمور .

قرار نامہ — مضمون علیہ ویا مسئول بالمالك محاکمہ سنہ
ویا محاکمہ سنہ لزوم اولمادیغہ ویا خود دعوی اولنان فعلک جرم
اولمادیغہ ویا کندی وظیفہ وصلاحیتی خارجندہ بولندیغہ دائر
مستنطق طرفندن استنطاقنامہ نک نہایتنہ یازیلان فذلکہ بیان
اولنان مطالعہ در .

منع محاکمہ قرار ی — استنطاقدن صکرہ مضمون علیہک
جرمی ویامسئول بالمالك مسئولیتی آکلاشلمازسہ محاکمہ لرینہ
لزوم اولمادیغہ دائر ویریلن قرار .

لزوم محاکمہ قرار ی — استنطاقدن صکرہ مضمون علیہک
جرمی و مسئول بالمالك مسئولیتی آکلاشلنجہ محکمہ دہ محاکمہ
اولمہ لرینہ دائر ویریلن قرار .

ادعا نامہ — مضمون علیہ ویامسئول بالمال حقندہ علیہندہ
مدعی عمومینک محکمہ یہ اقامہ دعوی ایچون ویردیک ی تقریر .
طلبنامہ — مضمون علیہ و مسئول بالمال اولانلر حقندہ
مدعی عمومینک مستنطقہ اقامہ دعوی ایدرک تحقیقات اجراسنی
ایستہ دیک ی تقریر .

اعتراضنامہ — مستنطقك قرار لری و حکم غیاب لری

ومظنون علیہک مستنطق طرفندن تخلیه سی ایچون اعتراضی
حاوی تقریر .

دعوتیه — حقوق دعواری ایچون تعیین اولنان کونده
محکمیه کلمک ایچون کوندیریلن ورقه .

جلب مذکره سی — مظنون علیہ ومسئول بالمال ومدعی
ومشتکی وشاهد ومخبرلرک مستنطقه ویا محکمیه کندیلک لرندن
کلمری ایچون کوندیریلان ورقه رسمیه .

احضار مذکره سی — جلب مذکره سیله کلمه ین مظنون
علیه ویا مسئول بالمال ویا خود شاهد ومخبرلرک مستنطقه ویا
محکمیه پولیس وژاندارمه واسطه سیله جبراً کتیرلملری ایچون
ورقه رسمیه .

تحریری امری — دردست ایدیله میان مظنون علیہک
وآرانلسی لازمکلن اشیا والات جرمیه نک آرانیلوب بولنسی
ایچون ویریلان امرنامه رسمی .

اختلاطدن منع — استنطاقده بولنان مظنون علیہک
بشقه لریله کوریشمه سی ومخبره ایده مامسی وحتى اشارت بیه
ایده مامسی ایچون آیری بر محله یولندیرمق .

وظیفه — ذات مصاحبه اولان حق قضا یعنی بر محکم
ومستنطقه نمکبی دعوالرہ باقلمسی قانوناً تعیین ایدلمش وایرلمش
ایسه اود دعوالرہ باقلمسی خصوصنه وظیفه دینور . مثلاً جنجه

دعوالرینه باقمق جزا محکمه لرینک وظیفه سیدر . آله حق دعوا-
لرینه باقمق جزا محکمه لرینک وظیفه سی دکلدر .

حقوق محکمه سنک وظیفه سیدر . شو حالده حقوق دعوا-
لرینه باقمق جزا محکمه لرینک وظیفه سی خارجنده وکذا حقوق
دعوالرینه باقمق حقوق محکمه لرینک وظیفه سی داخلنده در .

صلاحیت — محل مصلحتجه اولان حق قضا یعنی بر
محکمه ومستنطقک قانوناً تعیین اولنان دائره سی داخلنده اولان
دعوالره باقمی خصوصنه صلاحیت دینور مثلاً : اذمیدده
اولان بر جنبه دعواسنه باقمق اذمید جزا محکمه سنک
صلاحیتدر . یوقسه استانبولده وقوعه کلن بر جنبه دعواسنه
اذمید جزا محکمه سنک باقمی صلاحیتی خارجنده در .

قرینه — شهلی اولان بر شیئک حقیقته جزئیجه
یا قلاشمق .

قرینه قاطعه — شهلی اولان بر شیئک حقیقته یا قلاشمق ،
ایر مک .

دلیل — مجهول اولان « بیانمه یین » بر شیئک کشفنه
ومعلوم بولنان « بیلنن » شیئک صحتته واسطه اولان دلالت
ایدن شی .

اماره — نشان و علامت .

شاهد — وقعہ یی کوزلریله کورهن برکیمسه .

برائت — بر جرم ايشله مامش اولق، ونفسنده بر کيمسه نك
حقى بولمه مق. مثلا: فلان ضرب جرمندن برائت ايتمشدر.
دينلور که او کيمسه نك ضرب فعلنى وقوعه کتيرديکى ثابت
اوله مامشدر. ديمکدر.

عدم مسئوليت — قانوناً جزالديرليان فعللر.

کفالت نقديه — مظنون عليهک مدعى عمومى و مدعى
شخصى وشاهد وسائر نك محاکمه مصرفلرى و جزاى نقدى
ايچون عدليه وزنه سنه و يامال صندوقه تسليم ايلديکى آجه.
حکم و جاهى — مظنون عليهک کنديسنه و يا وکیلنه قارشو
تفهيم اولنان حکمدر. مثلا سن شو قدر آى حبس جزاسنه
محکوم اولدک کي.

حکم غيايى — محکمه يه گلامش اولان مظنون عليهک غيابندم
اوله رق و يريلن حکم. مظنون عليه فلان شو قدر آى حبس
جزاسنه محکوم ايدلمشدر کي.

اعاده محاکمه — بدایت واستيناف و تميز محکمه لرندن حکم
ايدلمش اولان بر دعوايى بعض اسباب قانونيه دن طولايى تکرار
رويت ايتمکدر.

تعين مرجع — بر جرمک محاکمه و تحقيقاتى هانکى محکمه
و مستنطقه عائد اولديغنىک محکمه تميزجه تعينى.

نقل دعوی — بعض اسباب قانونیه دن طولای بر دعوایی
عائد اولدینی محکمه دن بشقه بر محکمه یه نقل ایتمکدر.

اخذ و گرفت امری — هیئت اتهامیه بر مظنون علیهاک
جنایتله اتهامه قرار ویردکده اکر او مظنون طوتلامش ایسه
دردست ایدلمسی ایچون ویریلن رسمی ورقه.

اعاده حقوق ممنوعه — حقوق مدنیه دن ساقط اولانلر
جزالری کوردکدن برمدت صکره حقوق مدنیه لرینک اعاده
ایدلمسی استدعا ایدرلر و حقوق مدنیه تکرار ویریلور.

اعاده اعتبار — افلاس ایتش تاجرلرک اعتبار تجاریلریده
قالمیه جغندن قانوناً کندی لری اعتبار سزا اولدقلری اعلان ایدیلور
برمدت صکره بورجلری تسویه ایتدکلری اثبات ایدرلر سه
اعتبار لرینک اعاده ایدلمسه قرار ویریلور بوکا اعاده اعتبار دینور.
تفهیم — برشیء اکلاتق، شفاهاً و رسماً سویله مک دیمکدر.
ایجاب ایدنلر حقنده ویریلان قرارلر اکر او کیمسه لر حاضر
ایسه کندیلرینه سویله نورکه بوکا تفهیم دینلور.

تبلیغ — برشیئی تحریراً و رسماً اکلاتمقده در. ایجاب
ایدنلر حقنده ویریلان قرارلری یازهرق بیلدیر مکدرکه تبلیغ
یدرلر. مثلاً: فلان آدمه جلینامه تبلیغ اولندی کی.

اعاده مجرمین — بر جرم ایشلدکدن صکره ممالک اجنبیه یه
قرار ایتش اولان مجرم لر اعاده سنه یعنی کری کوندلمسه دینور.

بونك ايچون دولتر معاهده عقد ايدر لر هر جرمك فاعلي مجرمي اعاده اولتماز . بعض جرمك فاعلي اعاده اولنور . هله (جرائم سياسييه) مجرملي اعاده اولتماز .

عفو عمومي — بر جرم ايشله مش اولان كي مسه لري ، ويا خود بالجله ارباب جرائم عفو ايتمكدور . مثلاً : اعلان حريتي متعاقب بالجله ارباب جرائمك عفو ايدلديكي كي . عفو عمومي جرمي و جزايي ده ازاله ايدر .

عفو خصوصي — جرم ايشله مش اولان بر كي مسه ويا بر قاج كي مسه يي عفو ايتمكدور . مثلاً : خسته اولان بر آدمك جزاسني عفو ايتمك كي . عفو خصوصي يالكز جزايي ازاله ايدر .

فاعل مستقل — باشلي باشنه جرم ايشله مكه مقتدر اولان شخص . يعني بر جرمك ايقاعنده هر هانكي بر شخصك فعل و معاونتي اولقسزين او جرمك وقوعه كلسي ممكن دكلسه اول كي مسه فاعل مستقندر ويا فاعل اصليدر .

شريك جرم — ير جرمك وقوعه كلسنه يارديم ايدن كي مسه يعني هر كي كه فعل و معاونتي اولقسزين بر جرمك وقوعه كلسي ممكن در . او كي مسه شريك جرمدر .

قوة مسلحه — پوليسه سلاحله معاونت ايدن ژاندارمه و عسكر قوتي .

محاکمه عليه — علناً اجرا اولنان محاکمه لر يعني هر كسك ديكله بيله جي محاکمات .

محاکمه خفيه — خفياً اجرا اولئان محاکمه لر یعنی قانونده تعین اولئان سبیلردن بريله محکمه نك محاکمه یی کیزی اوله رق اجرا ایتسی .

اسباب مشدده — چوق جزا تعین ایتدیره جك سبیلر مثلاً : برکیمسه نك پدیرینی ضرب ایتسی چوق جزا ویرلمکه بر سبیلدر. حاکم لر برهفته دن برسنه یه قدر اولان ضرب جزاسی ایچون استدکلری قدر جزا ویرر لر . بش آی ، طقوز آی کبی فقط قانونك تعین ایتدیکی جزانك نهایتی اولان برسنه یی تجاوز ایده مز لر .

اسباب مخففه — آز جزا تعین ایتدیره جك سبیلر. مثلاً : هیچ قباحتی اولیان برآدمه چاتان بر شخصی اوآدم ضرب ایتسه محکمه برلیرا جزا حکم ایدر. فقط تعین اولئان جزانك اك آشانی درجه سندن آشانی بر جزا ویره مز. چونکه قانون اك آشانی برلیرادن باشلامشدر. محکمه یارم لیرا حکم ایده مز .

مدافعه مشروعه — جانی و عرضی مدافعه ایتمکدر . بناءً علیه جاننه و عرضه قصد و تسلط ایدیلن برکیمسه مدافعه اوکیمسه یی جرح و یا قتل ایتسه مدافعه مشروعه ده بولنمش اولور . صبی — اون اوچ یاشنه قدر اولان چوققلر بونلر برجرم ایشلرسه جزا ویرلمز ولیلرینه تسلیم اولنور .

نابالغ مراهق — بالغ اولیان اون اوچ یاشندن اون آلتی

باشنه قدر اولان چوجققلر بونلر بر جرم ایشلر سه قانونده تعین اولنان آز جزالر ویریلور .

بالغ — حد بلوغه وارن و بالغ اولان کیمسه لر در . اون بش یاشندن یوقاری اولنلر در .

بونلر بر جرم ایشلر سه — قانونده کی تمام جزایی کورور لر . مجنون — دلی اولان کیمسه .

معتوه — بوناق اولان کیمسه .

مکرر — اولجه بر جرم ایشلیوب محکوم اولدقن صکره دیگر بر جرم ایشلیان کیمسه .

استرداد اموال — چالینان و یا خود غضب ایدیلن مالی کری آلمق .

اهل خبره — خبر ویره ن آدم لر یعنی بر صنعته ، بر فنه دائر اوصنعت و یافن اربابی دو قنور ، ایه اجزاجی و سائره کبی .

تخلیه سییل — حبس اولوب مدتی بیتره ن بر محکومی حبس خانه دن چیقار مق .

موقه تخلیه سییل — توقیف مذکره سیله توقیف ایدیلن کیمسه لری موقه توقیف خانه دن چیقار مق .

اشتکا عن الحکام — حاکم لر دن شکایت و دعوی ایتمکدر . قانونده ناصل اوله جنی معیندر .

قانوناً جرم تشکیل و قانون جزاده محرر بولنان جرائمك
بر قطعه مختصر جدولیدر :

سلطنت سنیه دشمناریله برلکده علیه سلاح طومق
(قانون جزا ماده — ۴۸)

دولت علیه علیه دول سائره بی تحریک ایتک (ماده
— ۴۹)

دشمنه تسهیلات و معاونت و عسا کر شاهانه نك صداقتی
اخلال (ماده — ۵۰)

دولته و متفقرینه مضرت ایراث ایده جك نتیجه و بویاده کی
جاسوسلق (ماده — ۵۱)

خفی مکالمه و حرکات عسکریه تنظیمك افشاسی (ماده
— ۵۲)

محافظه اولنان خریطه و رسملرك اعطاسی (ماده — ۵۳)
جاسوس اخفاسی (ماده — ۵۴)

شکل حکومتی تبدیله تشبث ایدنلر و ممالک عثمانیه اهالیسنی
عصیانہ تشویق ایله ینلر و شقاوت اجرا ایدنلر (ماده — ۵۵
الی ۵۸)

خود بخود قوماندانلق ایدنلر ایله امر اوزرینه قوماندان-
لنی ترك ایتیمانلر و طاغلمسی امر اولنان عسکرى بلا سبب
باشنده طوتانلر (ماده — ۵۹)

اخذ نفرات عسکریه علیهنه حرکتی امر و فعلاً ممانعت
ایدنلر (ماده — ۶۰)

ابنیه میریه نك احاق و هدمی (ماده — ۶۱)
دولت و اهالی علیهنه ینما کرلک و غاصبق و بونلر علیهنه
حرکت ایلان عسا کر شاهانه یه مسلحاً قارشو قویماق
(ماده — ۶۲)

قطاع طریق (ماده — ۶۲ الی ۶۵)

تحریکات مضره (ماده — ۶۶)

رشوت آلوب و یرمک و آلوب و یره نه واسطه اولمق (ماده
— ۶۷ الی ۸۱)

سرقت اموال میریه و ارتکابات سائر (ماده — ۸۲ الی ۹۳)
محاکم و مجالسه امر و التماس و رجا و صرف نفوذ و قوه مؤثره
اجراسی (ماده — ۹۴ الی ۹۹)

مأموریندن اهالینک حوایج ضروریه سنجه تجارتیه سلوک
ایدنلر (ماده — ۱۰۰)

هر نوع امر و اراده نك تأخیری و آمرک امرینک عدم
انفاذی (ماده — ۱۰۱ الی ۱۰۲)

اشکنجه (ماده — ۱۰۳)

مجرمینه قانونک تعیینندن زیاده و آغیر حکم و اجرا (ماده
— ۱۰۴)

جبری و خلاف قانون برینک خانه سنه کیرن مأمورین
(ماده — ۱۰۵)

قوة جبريه وضبطيه واحضار مأمورلرينك وظيفه
خارجنده معاملهلری (ماده — ۱۰۶)

جبراً اشترا وضبط اموال (ماده — ۱۰۷)
مقدار معيندن زياده ويركو وسائر اخذ واستحصال
ايدنلر (ماده — ۱۰۸)

جریمه وقبل الحکم غير معين صورته جزای تقدی اخذ
ایتمك (ماده — ۱۰۹)

آنغريه (ماده — ۱۰۷)
جبراً و مجاناً اهايلدن يم ييه جك آلان مأمورين وسائر
(ماده — ۱۱۱)

اجرای وظیفه ایدرکن مأمورینه حقارات واطاله لسان وتشهير
سلاح وضرب وخسته لکه سبييت ويرنلر (ماده — ۱۱۲ الی ۱۱۶)
موقوف ومحبوسينك فرارینه سبييت ويرنلر (ماده —
۱۱۷ الی ۱۲۱)

مهر فکی (ماده — ۱۲۲ الی ۱۲۹)
صلاحيت وماذونیتی اولمقسزین صفت رسمیه ده بولنانلر
(ماده — ۱۳۰ الی ۱۳۱)

امتیازات اجنبیه تعرض (ماده ۱۳۲)
خیرات شریفه وتزینات بلدیهدن اولان ابنیه و آغاچ وسا.
رُمی تخریب وقطع وتلف (ماده — ۱۳۳)

تلغراف مخبراتی اخلال (ماده — ۱۳۴ الی ۱۳۶)

- مطبوعات جرائمی (ماده — ۱۳۷ الی ۱۳۹)
- رخستسز مکتبدر آچق (ماده — ۱۴۰ الی ۱۴۲)
- قلبرنلک (ماده — ۱۴۳ الی ۱۴۷)
- ساخته کارلق (ماده — ۱۴۸ الی ۱۶۲)
- قونداجیللق ایتمک (ماده — ۱۶۳ الی ۱۶۵)
- باروت قاجیرمق (ماده — ۱۶۶ ذیل)
- قتل (ماده — ۱۶۸ الی ۱۷۲ و ۱۷۳)
- جنایت وشقاوت اصحابندن برجنایت عظیمه ایشلمک ایچون
اشکنجه واذیب ایدنلر (ماده — ۱۷۳)
- جرح وضرب ایله عضونک قطع ویاتعطیلی ویاخود ضرب
ایله تلف نفس (ماده — ۱۷۷)
- صورت عادیده ضرب وجرح (ماده — ۱۷۸ الی ۱۷۹)
- اخافه قصدیه تشهیر سلاح (ماده — ۱۷۹ وذیل)
- قتل قصدیه ضرب وجرح وتشهیر سلاح (ماده — ۱۸۰ وذیلی)
- اختلال ونهب وغارت اموال ایله برابر قتل وجرح وضرب
(ماده — ۱۸۱)
- خطاء تلف نفس وجرح وضرب وبغیر قصد یاره بره (ماده
— ۱۸۲ الی ۱۸۳)
- آمر مجبر وغیر مجبر وفاعل (ماده — ۱۸۴ الی ۱۸۵)
- محافظه عرض ومال وسائرہ ضمنتده مدافعده وقوعه کلان
قتل وجرح وضرب (ماده — ۱۸۶ الی ۱۸۷)

بر کیمسه زوجه سی و یا خود محارمندن برینی فعل شنیع اجرا
 سنده ایکن و صور سائر هیه منی مقابله قتل (ماده — ۱۸۸ الی ۱۸۹)
 تخویف و تهدید ایله خلقدن آچه و یا بعضی اشیا و سائر
 طلب ایدنلر (ماده — ۱۹۱)

اسقاط جنین (ماده — ۱۹۲ الی ۱۹۳)
 برینک حسته لکنه و بر مقدار کار و کسبیه مشغول اوله
 مامسنه سببیت ویرنلر (ماده — ۱۹۴)

شهادت نامه سز اجزاجی دکانی کشادی (ماده — ۱۹۵)
 اجزای مضره و قاریشیق مشروبات و کفالتسز سمیات
 فروختی (ماده — ۱۹۶)

هتک عرض (ماده — ۱۹۷ الی ۲۰۲)
 کنج کیمسه لره حرف اندازلق و صارقندیلق ایدنلر و نسا
 قیافتنده مقرنسوان اولان محللره کیدنلر (ماده — ۲۰۲ ذیل)
 خلاف اصول حبس و توقیف اشخاص (ماده — ۲۰۳)
 الی (۲۰۴)

صبی تبدیل و سرقتی و وجودی اولمایان صبییه وجود
 ویرلمسی (ماده — ۲۰۵)

سن بلوغه وار مامش چوجقلرک سرقت و قاچرلمسی و بالغه
 قزلرک کذا (ماده — ۲۰۶ و ذیل)

یلان شهادت (ماده — ۲۰۷ الی ۲۱۱)
 یلان یره یمین (ماده — ۲۱۲)

افترا (ماده — ۲۱۳)

مخل ناموس سوز سويلك وسب وشتم (ماده — ۲۱۴)

افشای سر (ماده — ۲۱۵)

ابنيه دروننده سرقت (ماده — ۲۱۷ الی ۲۱۸)

کيجه بر قاچ کشينك طريق اوزرنده خرسزلق ايتملری
(ماده — ۲۱۹)

خدمتكارك افنديسى ويا مسافر بولندقلرى خانه ده وچراغك
اوسته سنك دكان و خانه سنده سرقت ايتمى (ماده — ۲۲۲)
خانجى ولوقانطه جى و آرابه جى وقايقجى وامثالى اصناف
و كراجى و آدملىرينه وديعه اولنان شيلردن سرقت (ماده —
۲۲۲ و ۲۲۳)

حيوان و محصولات و تميه اولمش ويا غلامش خطب و كراسته
وچفت ادواتى و طاش او جا قىلرنده قىلمش طاش و طاليانلرده
كى بالقار و كوللرده كى سلوكلكرك سرقتى (ماده — ۲۲۴ الی ۲۲۶)
خرسزلق ايتمك ايجون تفريق املاك علامتلىرىنى يرلىرىنى
دكشديرمك (ماده — ۲۲۷)

آناختار تقليدى و كليد آچه حق آلت اعمالى (ماده — ۲۲۸)
جبر و زورله بر كيمسه دن دين تحويلى آلىق (ماده — ۲۲۹)
يانكسجيك (ماده — ۲۳۰)

سرقت تصديده اسباب مانعه حيلولتيله برشى آله ميانلره وسا-
رقلره بيله رك يتاقلق ايدن و ايجلرندن خبر و یرن و سائرلىرىنىك

میدانه چیقملرینی و آلدده ایدملرینی تسهیل ایلیانلر (۲۳۰ ذیل)
مال مسروق بیله رک آالانلر (ماده — ۲۳۰ ذیلک علاوه سی)
افلاس (ماده — ۲۳۱ الی ۲۳۲)
طولاندریحیلق (ماده — ۲۳۳)

صبی میزک الندن سند آلق (ماده ۲۳۴)
امنیت و صور آخرله اله آلتان مهر و یا امضالی بیاض کاغدی
سوء استعمال (ماده — ۲۳۵)

امانت و وکالت و صور آخرله تسلیم اولمش اموال و نقود
و تحویلات سائرہ بی کتم و ضایع ایدنلر (ماده — ۲۳۶)
محکمہ یه تسلیم اولتان اوراق و سائرہ نک استراق و اخفاسی
(ماده — ۲۳۷)

مزایدہ یه فساد قاریشدیر مق (ماده — ۲۳۸)
صحتہ غیر مقرون و افترا یولنده موادک نشری و بیاعک
استدیکی فیأندن زیاده بها عرضی برشیئک بیع و شراسنده
اصنافک غیر مشروع اتفاق و حیل و دسایسله امتعه و اشیا قوائم
و اسهامک تعیین ایدہ جکی بهالرینک تزیدی (ماده — ۲۳۹)
مشری آلداتان و اکسیک وزن و ذراع استعمال ایدن
اصناف (ماده — ۲۴۰)

مؤلفینک امتیازاتی علیهنه کتاب باصان و یا باصدیران
و امتیازلی اولان شیرلی یاپان و یاپدیران (ماده — ۲۴۱)
قومار (ماده — ۲۴۱)

بیانقو (ماده — ۲۴۳)

آلات وادوات زراعیه و حیوانات آغلر و بکچی قولبلری
تخریبی (ماده — ۲۴۴)

حیوانات تلفی (ماده — ۲۴۵)

علامات تحدیدیه اولان خندقلری طولدیرمق و حولیلری
بوزمق (ماده — ۲۴۶)

صو اجراسی و حوض و صنعی کوللرک ویره جکی مضرت
(ماده — ۲۴۷)

حریق ظهورینه سبیت ویرمک (ماده — ۲۴۸)

ابنیه هدمی (ماده — ۲۴۹)

منع انشا آت ابنیه (ماده — ۲۵۰)

اوراق احراقی (ماده — ۲۵۱)

تخریبات ویغما کرلک (ماده — ۲۵۲)

بچلما مش محصولات و آغاج تلفی (ماده — ۲۵۳)

خانجی و لوقظه جی لردن تنبیه عدم رعایت ایدنلر و چقور
ویغیتیلره قنذیل و فنار اصمیانلر و مشرف خراب ابنیه حقنده کی
تنبیه اتی اصغا ایتیمانلر و زقاغه و آدم اوزرینه سو پروندی دوکنلر
و آتانیلر و نشر اولنان نظام و تنبیهاته رعایت ایتیمانلر (ماده — ۲۵۴)
باجه لری تطهیر ایتیمان اصناف و فشنک و طبانجه لر آتانیلر
(ماده — ۲۵۵)

متواردینی دفتره قید ایتیمان و دفترینی وقتیه مأمورینه ابراز

ایتمیان خانجی وسائرہ وآت قوشدیرانلر ودلی ویرتیجی حیوان
صالیورن ودولتک سکه سنی قبول وآت وسائر فناقلرده ممکن
ایکن خدمت ومعاونت ایتمیانلر (ماده — ۲۵۶)

تناولی مضر میوه وسائرہ صاتمق (ماده — ۲۵۷)
طاش واجسام صلبه وپسلک آتان ومروری جائز اولمایان
یرلره کیره و مرور ایدنلر (ماده — ۲۵۸)

دیکرینک اموال منقوله سنه خسار ایراث ایدنلر وحیوان
وقویون سوریلرینک هلاک و مجروحیتنه سبب اولنلر (ماده
— ۲۵۹)

اهالینک راحتتی سلب ایدن ویاپشدرلمش اعلاناتی یرتانلر
(ماده — ۲۶۰)

ایشلنمش و محرز اراضی وسائرہ حیوان صالیورنلر
(ماده — ۲۶۱)

ناقص ونظامک مغایری وزن واوچی قولانانلر (ماده
— ۲۶۲)

نظاماً تعیین اولنان نرخدن زیاده اشیاصاتانلر (ماده — ۲۶۳)
منافع عامه ایچون ترک اولنان محللر ایله یوللردن یرچالان
وبونلری بوزانلر (ماده — ۲۶۴)

نظاماً ممنوع اولان محله میت دفن ایدن ورخصت یرنلر
(ماده — ۲۶۴ ذیل)







